

**КЪЫРЫМТАТАР
ХАЛКЪ АГЪЫЗ
ЯРАТЫДЖЫЛЫГЪЫ**

ХРЕСТОМАТИЯ





КЪЫРЫМТАТАР ХАЛКЪ АГЪЫЗ ЯРАТЫДЖЫЛЫГЪЫ

ХРЕСТОМАТИЯ

Тертип эткен БЕКИРОВ ДЖАФЕР

Экинджи, ишленильген нешир



Къырымдевокъувпеднешир
2008

ББК 82я7
Къ97

Видано за рахунок державних коштів.
Продаж заборонено

Китап Къырым Мухтар Джумхуриети миллетлернинъ мунасебетлери ве сюргюнликке
огърагъан гражданлар ишлери боюнджа джумхуриет комитетининъ малиевий ярдымы
эсасында нешир этильди

Джыйынтыкъ Къырым тасиль ве илим назирлигининъ 2007 сенеси неширге тевсие эткен
планы боюнджа басылды

Къ97 Къырымтатар халкъ агъыз яратыджылыгъы. Хрестоматия
/ Тертип эткен Бекіров Дж. — 2-нџи, ишленильген нешир. —
Симферополь: КъДЖИ «Къырымдевокъувпеднешир» нешириятъы,
2008. — 264 с. — Къырымтатар тилинде.
ISBN 978-966-354-217-1

ББК 82я7

Къ97 Кримськотатарська усна народна творчість. Хрестоматія /
Укладач Бекіров Дж. — 2-е видання, виправлене. — Симферополь:
КРП «Видавництво «Кримнавчпеддержвидав», 2008. — 264 с. —
Кримськотатарською мовою.
ISBN 978-966-354-217-1

ББК 82я7

ISBN 5-645-00722-0
ISBN 978-966-354-217-1

© Бекіров Дж., укладач, 1991
© Бекіров Дж., укладач, 2008, зі змінами
© Видавництво «Уқитувчи», 1991
© КРП «Видавництво «Кримнавчпеддержвидав», 2008

ТЕРТИП ЭТИДЖИДЕН

Кырымтатар халкы агъыз яратыджылыгъынынъ хрестоматиясы кырымтатар тили ве эдебияты болугининъ студентлери ичюн къуланма оларакъ тевсие этиле. Хрестоматияда фольклорнынъ жанрлары боюнда амелий мешгъулиетлер ичюн эсерлер бериле. Эсерлер белли бир тертип эсасында кырымтатар халкы агъыз яратыджылыгъы программасы муджиби такъдим олуна. Эсерлерни сечювде, оларнынъ гъавийлигине ве бедийлигине буюк эмиет берильди.

Хрестоматия кырымтатар дестанларынен баишлана. Кипатта биринджи оларакъ «Эдиге» дестаны бериле. Бу дестан чокъ вакъытлар дерслик ве хрестоматияларгъа кирсетильмеди, такъдим олунгъан такъдирде биле алынны ташилана эди. Албу исе, «Эдиге»нинъ кырымтатар варианты халкы масалыны анъдыра ве онынъ биш къараманы адалет, догърулыкъ ичюн курушкен къарамандыр. Дестаннынъ бу хрестоматиягъа кирсетильген варианты, дженктен эвель «Эдебият ве культура» журналында басылгъан эди.

«Чорабатыр», «Таирнен Зоре» масалджы Бекмамбет Къулмамбеттен, «Къопланды батыр» дестаны — Къызыл Перекоп районы, Байкъазакъ коюнде яшагъан Алим Селимша къарттан, «Къозукъурпеч» дестаны Симферополь районы, Байкъыят коюнде яшагъан чобан Якуб Арсландан язылып алынгъандыр. Бу эсерлернинъ эписи намлы фольклоршынас Керим Джаманаклы тарафындан «Масаллар» китабында дердж этильген эди. «Кёр огълу» дестаны исе, «Эдебият ве культура» журналында басылгъан нухасыдыр. Бу дестанны неширге белли шаир Осман Амити азырлагъан эди.

Хрестоматиягъа кирсетильген дигер жанрлар боюнда берильген эсерлер, Кырымда дженктен эвель нешир этильген чешиит джыйынтыкълардан алынды. Бундан да гъайры, Ташкентте нешир этильген «Манелер ве чынълар», «Къайда бирлик анда тирилик», «Ахмет ахай» киби бир сыра джыйынтыкълардан, «Ленин байрагъы» газетасы ве «Йылдыз» журналында басылгъан материаллардан файдаланылды.



ДЕСТАНЛАР

Эдиге

Эй...й... Азавда олгъан алтмыш хан. Джайыкъта олгъан етмиш, Кыргызда олгъан кыркъ хан. Оларнынъ алайы, бир ерге топланып кенъеш этип, эписине ортаджа кельген бир ерге, Шекерли голь¹ яптырмагъа къарар берелер. Эм ортаджа кельген бир ерге, бу Шекерли гольни яптыралар. Йыл келе. Йыл кельгенде, алай ханлар шу гольге топланып, къуш авлайлар. Токътамыш ханнынъ къушу, къушларнынъ падишасы экен. Онынъ къушу, башкъаларынынъ къушлары киби къуш тутмагъа бармай экен.

О ханларнынъ арасында, Темир хан деген, бир хан бар экен. Темир хан, Такътамыш ханнынъ къушуна кызыл:

— Бизим арамызда ондай эткен къуш, кимседе ёкъ, шу къушнынъ бир йымыртасыны алсам, насыл олур экен, — деп тюшюне.

Ханлар ерли-ерине къайталар. Темир де ерине къайткъан сонъ, Токътамыш хангъа эльчи джиберип:

— Шу къушнынъ бир йымыртасыны мангъа сатса, не истесе, оны берир эдим, — дей.

Токътамыш хан:

¹ Шекерли гольге топлангъан къушларны, ханларнынъ къушлары тутып, озь саиплерине кетире экенлер.



— Мен йымырта сатмагъа кырджыманджы дегилим, — деп эльчини кыйтара. Токътамыш ханнынъ кыушларыны бакъа тургъан Къуртлукъая бей:

— Шу Токътамышкъа береджек парасыны манъа берсе, мен онъа, шу кыушнынъ бир йымыртасыны берир эдим, — деп джибере.

Темир:

— Токътамышкъа береджегим къадар беш берирмен, илле манъа шу кыушнынъ бир йымыртасыны берсин, — дей. Къуртлукъая бей шу кыушнынъ бир йымыртасыны Темир хангъа гизлиден-гизли берип джибере.

Бу кыуш йылда эки йымырта кыозлай экен. Кыуш йымырталарыны аладжакъ вакъытта, шу ханлыкъта не къадар халкъ олса да, алайын тоглап, пельванлар курештиртип, торгъай тобугъындан, бакъа кишенлигинден аш берип, ашап-ичип, ачтан кырылып, шай этип йымырталарны алыр экенлер. Кыуш сельби терекдай бир терекнинъ тѣлесине юва ятып, онда кыозлай экен. Къуртлукъая бей узун аркъандан мердивен ясап, кене де терекнинъ тѣлесине чыккып:

— Хан эфенди, кыуш кыартаядыр да, эр йыл эки йымырта кыозлай тургъан эди, бу йыл бир йымырта кыозлагъан, — дей.

Хан эфенди:

— Олуджыдыр, огълум, — дей. Топлангъан халкълар дагъылып кетелер.

Кель-келелим йыл келе, йыл кельген сонъ, бир даа кыуш авламагъа баралар. Кыушларнынъ падишасы олгъан Токътамыш ханнынъ кыушу, ойнамагъа башлай. Лякин, бу сефер Темир ханнынъ кыушу Токътамыш ханнынъ кыушундан эвель кыуш тутмагъа бара.

— Бу кыушны кыйдан алдынъ? — дей. Темир:

— Озь кыушумнынъ баласы, — дей. Токътамыш:

— Бу йыл меним бир йымыртам гъайып олды, сен онъа бир ярамазлыкъ яптынъ, гъалиба, — дей.

Ерине кыйтып келе. Эр бир ханнынъ бир дане гъайып билиджи — эльчиси ола экен. Билиджиден сорайлар. Билиджи:

— Къуртлукъая бейден башкъа ким этеджек оны, — дей. Хан:

— Къуртлукъая бейге недайын джеза берейим? — дей. Билиджи:

— Сенинъ мууринъ басылгъан ерде, онынъ Къуртлукъая бей ады окъулмасын, Кыара дагъгъа алып кетип ташларсынъ, о анда не ишлеп кечинсе, кечинсин, — дей.

Токътамыш, Къуртлукъаяны Кыара дагъгъа кыува. Къуртлукъая анда чалы-чырпыдан эв ясай ве кыуш авлап кечине. Кунълернинъ биринде о авдан кельгенде, эви сипирильген, ашы пишкен ве эвнинъ

ичинде бир къыз отура, амма бу къыз ай десенъ авызы, кунъ десенъ козю, къаранлыкъ ерге чыракъ оладжакъ, дюльберликте — догъган айнынъ он дёрти. Бир пускюргенде мелевше япрагъы киби майыша экен.

Къуртлукъая онъа:

— Сен меним олурсынъ, — дей.

Къыз:

— Яхшы, олурым, — дей. Къуртлукъая:

— Токътамыш ханнынъ муури басылган ерде, меним Къуртлукъая бей адым окъулмайджакътыр. Озюмиз мында бир никя этейик, — дей.

Къыз:

— Санъа учъ шартнен барарым. Бурнума бакъмазсынъ, къолтугъыма бакъмазсынъ, аякъларыма бакъмазсынъ. Сен кельгенде, мен эр вакъыт эвде тапылтырым, сен къакъырып, тюкюрип келирсинъ. Бизим никямыз шу учъ шарт олсун, — дей.

Шунен, никя этип яшайлар. Шимди куннинъ биринде Къуртлукъая:

— Бу ернинъ ашы битти, манъа ёлгъа аш пишир, мен ёлгъа кетеджекмен, — дей.

Кете, къайтып келе. Апайынынъ бурунына къарай — кенсиреги ёкъ, аягъына къарай — тобугъы ёкъ, къолтугъына къарай — опыкеси ёкъ. Бундан сонъ апайы Къуртлукъаягъа:

— Э...э... энди шартымыз бозулды, алты айлыкъ балам бар, оны ёл янында тапсам, ёлгъа атарым, сув янында тапсам, сувгъа атарым, — деп ёкъ олып кете. Къуртлукъая бей онда олип къала.

Бир Эсевай деген къарт бар экен. Бу къарт эчки къарай турган экен. Кунлерден бир кунъ бу къартнынъ эчкиси савула. Бир кунъ апайы онъа:

— Сен къартлыгъынында алджая башладынъ гъалиба, чёльде балларынынен эчки савып башладынъ, — дей.

Къарт:

— Ёкъ, этмеймен, — десе де, олмай.

Къарт:

— Энди ангълмасам олмаз, — дей.

Ангъыла башлай. Бир кунъ эндектен бир бала сеси чыкъа, сары эчки барып шу баланы эмизе. Эсевай къарт баланы алып эвине келе де:

— Қъары, қъары, мен хырсызны туттым, хырсыз мынавы бала экен, — дей. Оларнынъ озылеринде де, скот эмген бала бар экен. Олар бу эки баланы да бирликте бакъа ве эндектен тапылгъаны ичюн, баланынъ адыны Эдиге къоялар.



Падишанын манеджилеринден¹ 40-джысы, 41-джиси хангъа табирлей:

— Шу айнын ичинде бир Эдиге адлы бала догъгъан, сенинъ башынга шу етеджектир, — дей.

Хан:

— О меним башыма еткенджек, мен онынъ башына етерим. Шу айда догъгъан балаларны кою-коюнен якъынъыз, — дей.

Якъа-якъа кетелер. Эдиге яшагъан койге де келелер. Койде атеш якъалар, фелян-огълу фелян, тюген-огълу тюген, — деп эр кеснинъ баласыны атешке аталар. Эдигенинъ ады олар арасында ёкъ экен. О къала.

Шимди бу бала баягъы осип буюген сонъ, балаларнен ашыкъ ойнап джуре, балалар онынъ ашыгъыны юта, о исе балардан тутып кери ола. Бир киши тура да:

— Бала, сенинъ пельванлыгъынъ олса балаларгъа олмасын, бабаннынъ сучыны алмагъа биль, — дей.

Эдиге:

— Бабамнынъ не сучу бар? — дей.

— Къуртлукъая бей—бабанъ Къара дагъда къуртлап-битлеп къалды, — дей.

Анасы Эдигеге талкъан къавурып, алтын къашыкънен бере.

Эдиге ашамай, кумюш къашыкънен бере, алмай, къолунен бере, къолунен берген вакъытта къапкъач этип, онынъ къолуны тутта да:

— Меним бабам ким? Анам ким? — дей.

— Бильмейим, — дей.

— Ёкъ, догърусыны айтаджакъсынъ, — дей.

— Айса, сени ерден талкъан эдик, — дей.

Эдиге:

— Айса, савлукънен къалынъыз, мен кетем энди, — дей.

Анасы:

— Кетеджек олсанъ, балам, бойле кетме! Санъа ат берейик, къылыч, къама такъайыкъ, шайтип кет, — дей.

Эдиге:

— Ёкъ, керекмей, эгер йигит олсам, оны озюм тапар, йигит олмасам, сизнинъ бергенинъизни де джоярман. Савлукънен къалынъыз, — дей де, анасы ве бабасынен савлукълашып шу ерден чыкып кете. Ёлда кетип бараяткъанда, артындан дёрт атлы етип:

— Селям алейкум, балам, огъурлар олсун, — дейлер. Эдиге:

— Алла разы олсун, сизге де огъурлар олсун, — дей.

Бираз ер кеткен сонъ, акъайларнынъ бириси:

¹ манеджи — тюш табирлеген адам

— Эй, акъайлар, артымыздан копек еткен эди, амма инсан еткен ёкъ эди, бираз чаптырынъыз да, о бала артта къалсын, — дей.

Булар атларыны чаптыралар, лякин олар баргъан ерге Эдиге де бара. Шимди бу дёрт киши атларны сен къара-мен къара, деп бир-бирлеринен сыттавлалар.

Эдиге:

— Эй, акъайлар, къартнынъ яшы олгъанджек, къошнынъ копеги ол, дегенлер. Ичингизде менден яшы ёкъ, шу атларны мен къарайым, — дей.

Олар да:

— Къара, — дейлер.

Эдиге атларны отлатмагъа алып кете. О куннинъ укюминде онгъангъаярыгеджеденурджаваэкен. Бунгъанурджава. Биркъудретли боран пейда ола. Бала джигени, къылычпынен аркъадашларына келе:

— Эй, аркъадашлар, бильген дува-сененгизни этингиз. Яры геджеден танъ аткъандже, дёрт атымыз бешев олды, — дей.

Олар да:

— Бешинджиси сенинъкидир, — дейлер.

Саба тура кетелер. Бу аркъадашларынынъ артындан кете. Еди башлы, бир къуйрукълы йылангъа расткеле.

— Акъайлар, йылан душмандыр, келингиз ольдюрейик, — дей.

Ольдюреджек олалар, йыланнынъ еди башы ювагъа сыгъмай, едиси еди якъкъа даркъай, олар йыланны ольдюрелер. Ондан да бир дагъгъа кетип бараяткъанда, еди къуйрукълы, бир башлы бир йылан даа расткеле. Бала:

— Йылан душмандыр, келингиз ольдюрейик — дей. Ольдюреджек олалар, бир башынынъ артындан еди къуйругъы да къобагъа кирип кете, ольдюрив оламайлар. Эдиге:

— Акъайлар, бундан бир ибрет алдынгызмы? — дей.

— Ёкъ, — дейлер.

— Ана йыланнынъ еди башы, бир къуйругъы бар эди, оны ольдюрдик, мына бирисининъ бир башы, еди къуйругъы бар эди, эписи онынъ артындан кеттилер, ольдюрив оламадыкъ, — дей.

Бу ерде атлылар:

— Арамызда яшымыз да сенсинъ, башымыз да сен ол, — дейлер.

О баш ола.

Токътампыш ханнынъ одасына барып тюшелер. Эдиге баш олып, хангъа теменна эте. Хан:

— Ичингизде балабанынгыз ёкъмы? — деп сорай.

— Бардыр, хан эфенди, — дейлер.



Эдиге ёлдашларына:

— Бар, ханның борасыны ал да келинъиз, — дей. Шу арада кетирип пенджерә огюне токъталалар.

Хан:

— Бу не? — дей.

Эдиге:

— Балабанымыз будыр, хан эфенди, — дей.

Хан:

— Сакъалтынъыз, дейим, — дей.

Эдиге:

— Сакъаллымыз да бардыр, — дей.

Ёлдашларына:

— Бар, ханның эчкисини ал да келинъиз, — дей. Алып келелер ве ханның эвине джиберелер.

Хан:

— Бу да не? — дей.

Эдиге:

— Сакъаллымыз будыр, хан эфенди, — дей.

Хан:

— Сёз анъларынъыз бармы дейим? — дей.

— Сёз анъларымыз да меним, — дей.

Хан:

— Не ишлеп кельдинъиз? — дей.

Эдиге:

— Хан къапысына отъмек ашамагъа кельдик, — дей.

Хан Эдигени янына хызметчи къалдыра. Анавы аркъадашларына да башкъа бирер иш бере.

Ана бундан да, бир къач йыл кечкен сонъ, яш чагъына келер. Бир кунъ ханнен ёлгъа чыкъалар. Денгизнинъ ичинден бир метий келе.

Эдиге:

— Хан эфенди, шу метийнинъ ичинде мал олса, менимки, — дей.

Хан:

— Джан олса, менимки, — дей.

Метий ялыпъа чыкъа, ачып бакъсалар — ичинде бир къыз бар, амма догъгъан айнынъ он дёрти, ай десенъ авызы, кунъ десенъ козю, къарангъы ерге чыракъ оладжакъ, догъгъан айнынъ он дёртине бенъзей. Бир пускюргенде мелевше япрагъыдай майыша.

Хан эфенди къызыны корьгенинен:

— Джан олса менимки деген эдим, къавиль меним, — дей.



Эдиге:

— Къавиль сенинкидир. Лякин, бу сыфатгаки къыскааяктыны метийге салып джибермезлер, бунынъ бир себеби, яхуц да бир эксиклиги бардыр, — дей.

Хан:

— Бу Эдиге, бала экенде дегиль де, ийит чагына кельген сонъ чыкты, — дей.

Оны Эдигеге ляйыкъ корелер ве олға берелер. Бир йыл дегенде бир бала догъа, осе, буюй. Эдигенинъ хызмети, ханға «Саба хайыр», «Акъшам хайыр» айтмакъ экен. Ханнынъ апакъайы оларны денъей. Эдиге къапыдан кирген вакъытта, хан отурган еринден котериле экен.

Ханнынъ апакъайы бир купъ:

— О къадар папалар, байлар келе, сен еринъден котерильмейсинъ, амма бу киргенде котерилесинъ, — дей.

Хан:

Котерильмеймен, — деп къараса да, апакъайы:

— Котерилесинъ, — дей.

Сонъ ханнынъ апакъайы:

— Оны бильмек ичюн сени миндерге тихейик, эгер миндер котерильсе, котериледирсинъ, — дей.

Оны миндерге тикелер. Эдиге киргенде хан котериле, эм миндерни де котерс. Эдиге ханға саба хайыр айта ве айланып чыкъаджакъта хан:

— Токъта! — дей. Эдиге:

— Леги султаным, буюрыгъыз, — дей. Хан:

— Эдиге, бир бардакъ къатыкъ алып кель, къаймагъы устонде олсун, — дей. Эдиге алып келе. Хан къатыкъ устондеки къаймакыны авучлап озю къапа, сонъ Эдигеге:

— Буюрыгъыз, — дей.

Эдиге ханджерини чыкъарып къатыкыны тогъуй да, котерип иче, чыкъа джуре бере. Ханнынъ къарысы:

— Сен не этгинъ, о не этти? — дей.

Хан:

— Мен не вакъытта олса, сенинъ башынтыны бурып алырым дедим, — дей.

Апайы:

— О не этти? — дей.

Хан:

— Онынъ неден хабери бар? — дей.



Апакъайы:

— Я ханджерини чыкъарып къарыштыргъаны не? О не вакъыт да олса, сенигъ къанынъны ичерим дегенидир. Сен кучюгъ барда, эсигъни балшыгъа джый да, оныгъ ким экенини бил! — дей.

Токътамыш хан Джанбайына айта:

— Шу йигитнигъ батырлыгъыны билъ, шу йигит магъа душманлыкъ этеджекми? — дей.

Джанбай:

— Ёкъ, мен билямам, — дей.

Хан:

— Сен озюгъ билип оламасагъ, биледжек кишини билъсеигъ, магъа айт, — дей.

О замаи Джанбай айта;

— Ханларнынъ билиджилерини топлап, сорайыкъ, — дей.

Токътамыш, ханлыкъта не къадар билиджи бар, оларнынъ алайыны тошлай, лякин билиджилер де буны билип оламайлар. Бир Кемалнынъ огълу Кельджанбай бар экен, о:

— Эдиге, къал мында сен, мен сенигъ Эдиге олгъанынъны, сенигъ бабагъны, дедегъни билемен. Меним, яшларны бир ёлгъа салгъан адетим бардыр. Сени де бир ёлгъа саладжакъман, къачкъандайын олсанъ, анавы отуз атлынынъ алайы сени къуваджакълар. Мен оларнынъ минер ян зунгилерини кесип, тасманен илиштирип салдым, миндим дегенде, алайыннынъ сырты устуне йыкъылгъаныны бир сейир эт, сенигъ ким олгъанынъны булар бильмезлер. Мына кельген билиджилерден де бильген сойлары айтмагъа къоркъарлар. Лякин 390 яшына кельген бир софраджорав бардыр, о кельсе, сенигъ Эдиге экенинъни султангъа айтыр. Бильген соигъ «озъ къолунгънен бал ич» деп, сагъа зеэр берирлер. Ичтингъ олерсингъ. Сен иу балны алаяткъанда, мен «бурнугъ янаытыр» дермен, сен балны ханнынъ башына ур да чыкъ. Мен къудрет бердини къапыгъа янапгырып саларым, минер къачар кетерсингъ. Меним де достлыгъым шудыр, менден шундан гъайры достлыкъ истеме, — дей.

Анда джыйылгъан билиджилер софраджоравны косътерселер.

Озю сув боюнда 390 яшагъан.

Тамырлары шувшагъан.

Сакътияннен чаттыргъан,

Азувлары бошагъан,

Чий илекнен сыкътыргъан.

Бизде буюк софраджорав бардыр, — деп софраджоравны косътерселер. О замаи хан Джанбайгъа:



Сен меним Джанбайымсынъ,
Конеген ернинъ атысынъ.
Эр биенинъ сютюсинъ,
Кунешимнинъ саибисинъ,
Сен кетерсинъ Джанбай, — дей.
Джанбай белин тартып бувды, — дей,
Атына Джанбай минди, — дей.
Джеле джорта кетти, — дей,
Онъа барып етти, — дей,
Хан хаберин айтты, — дей.

Лякин софраджорав кельмей:

Учъ юз докъсан яшадым,
Аткъа минер алым ёкъ,
Арабагъа минер амалым ёкъ, — дей.

Сонъ эки девенинъ устюне зембиль салып джиберелер, кене де кельмей. Докъуз торы ат ектирип бир араба джиберелер, кене кельмей, «къартлыгъым бар», дей.

О вакъыгъта арабаджы дей:

Докъуз торы ат ектирдим,
Араба екип кетирдим.
Тенинъе салкъын олсун, — деп.
Аллы гуллер жайдырдым.
Озюнъе йымшакъ олсун, — деп,
Ал чухалар тешеттим.
Энди учъ олды, кучъ олур,
Эгер энди кельмесенъ,
Ханнынъ хатри къалыр, — дей.
Бу сёзлерни эшиткен сонъ,
Джоравджы зорнен турды, — дей.
Арабаджы арабасыны екти, — дей,
Устюне тазе гуллер текти, — дей.
Алты киши котерип джоравны,
Арабагъа салды, — дей,
Алты сувнынъ боюндан,
Он гедже джурип етти, — дей.
Джорав хангъа кельген сонъ,
Токътамыш алдына чыкъты, — дей.
Къолтугъына кирди, — дей.
Ишке баштан ёл берди.
Керегини мал берди,

Онъ аягындан бал берди,
Сол аягындан бал берди,
Джоравджы оны алды, — дей.
Бал аякыны ичти, — дей.
Бал юрекке тюшти, — дей.
Чалынъыз «борлу» деди, — дей,
Токътамыш хан айтты, — дей,
Толгын ол батыр ким,
Джоравджы манъа айтчы, — дей,
Джорав ханъа айтты, — дей.
Беш юз яшагъан хан корьдим,
Беш юз къазан аш корьдим,
Алымы сенден аз эди,
Берими сенден коп эди,
Оны корьген къартынъман,
Сыйласанъ сенинъ мыртынъман,
Эгер мени сайласанъ,
Бир оледжек къартынъман
Бундай эткен хан эвинде,
Батырларынъны сынап,
Душманынъны айтырман.

Хан айтты, — дей, — сен айтчы,
Балабан меджлис этейим.
— Дёртханели оджакъ къаздыр,
Сексен секиз огюз сойдыр
Бинъ бир къандиль якъ, ханым,
Бинъни бинъге къат, ханым,
Бинъ бир чатыр сал, ханым,
Алтындан аякъ кетир, ханым,
Алтындан скемле кетир,
Андан сонъ санъа толгъайым¹, — дей

Токътамышшнен къарт софраджорав отуралар.

Сонъ къарт айта:

— Учъ батыр кельсин, — дей.

Учъ батыргъа хабер берелер. Учъ батыр келе:

Аякънен къарт бал берди,

Учъ батыргъа айтты, — дей,

— Къайсынъыз батыр оласынъыз,

¹ толгъайым — йырлайым



Балны о ичсин, — деди, — дей,
 О заман кучюк батыр ичти, — дей.
 Джорав онъа айтты, — дей:
 — Аферин, батыр экенсинъ,
 Хангъа батырлыкъ этсенъ, насыл этерсинъ?
 О заман йигит айтты, — дей:
 — Къале бузарман, хазине кетирермен.
 — Хангъа эгер дулмаилыкъ этселер,
 Насыл этерсинъ?
 — Авлапып аткъа минермен,
 Кевдесин эки болермен,
 Боллонген къойдай этермен,
 Боркътай кийип кетермен
 Дегенимни этермен.
 Эгер дегеним этмесем
 Атамнынъ арам огълу олурман,
 — Къайгыгъыз энди, — деди джорав
 Учъ йигитке,
 Аргъы огъул да, берги огъул
 Батыр экен кучюк огъул.
 Къоллары узун корюне,
 Мергин экен кучюк огъул.
 Эрини¹ уфакъ корюне,
 Сёзге чебер кучюк огъул,
 Пармагъы джездай майышкъан,
 Чебер экен кучюк огъул,
 Сачы айдай балкъылдай,
 Асыл экен кучюк огъул.
 Бети нурдай токъюлген,
 Тёре олур бу огълу.
 Энсиз къозу, сансыз къой,
 Коп-коп аскер тойсын деп,
 Сойып кеткен кучюк огъул,
 Айланмагъа коп юрткъа,
 Бельги тигер кучюк огъул,
 Аргъыда куннюнъ сонъунда,
 Тёре олур кучюк огъул.
 Энди мен киши танымам,
 Эгер киши танысам,
 Бу Къуртлукъая бейнинъ огълу,
 Эдигедир, бу кучюк огъул.

¹ эрини — дудагъы



Къарт, Къуртлукъая бейнигъ огълу, Эдиге экенини къарарлаштырды ве хангъа айтты:

— Пек чокъ акъча берсенгъ, — дей,
Мен оны зезр берип ольдюримен, — дей.
Хан огъа джеван айтты, — дей.
— Он бигъ кумюш берермен,
Сен оны барып ольдюр, — дей.

Къарт:

— Эдигени чагъыр, — дей.
Ханныгъ батыры сенсингъ, — дей.
Хан озю сангъа бал бере,
Ич, сен, ханнынъ балын, — дей.
Бал деп, джорав зезр берди,
Джанбай бойнуна сокъты, — дей.
Эдигенигъ къолундаки балы тѣкюльди.
«Ана бургулгъ къапады» — дей,
Къачып чыкъты Эдиге,
Джанбай айтты Эдигеге:
Атынъ милип къач, — деди.
Эдиге къачып кетти, — дей.
Джанбайгъа хан айтты, — дей;
— Меним душманым Джанбай,
Согъып¹ къачырдынъ уюмден².
Джанбай джеван айтты, — дей:
— Душманынъ экенигъ биъмедим.
— Айса Джанбай къайтар, — дей.
Эгер Джанбай къайтарсангъ
Сангъа къызымны берермен.
Джанбай артындап кетти, — дей.
Етти Джанбай айтты, — дей:
— Къайтсана, Эдиге, къайтсана,
Къайтып хангъа опыкени
Сѣзлеринъни айтсана.
Аягъы терек, боюны эрек,
Ат берермен, минсене, — дей.
Этегинден енги узун,
Топ берермен, кийсене, — дей.
Алтгъы аякънен бал берермен, — дей.
Оны да, алып ичсене.
Отуз эки хан эди,

¹ согъып — урып

² уюмден — эвиден

Эдильнен джайыкъята.
Токътамыш хандай ёкъ эди,
Зевкъны анда сюрсене.

Эдиге:

— Къайтмам да, Джанбай, къайтмам да,
Къайтып онъа опыкели сёзлеримни айтмам да,
Аягъы терек, боюны эрек,
Ат берсе де минмем де,
Авым къутсыз олгъан сонъ,
Этегинден енъи узун
Тон берсе де киймем де,
Джелькеме тогъайлы муюз биткенджек.
Алтын аякънен
Бал берсе де ичмем де,
Эрним джельке олгъанджек.
Босагъасы алтын олса да,
Эгилип корюш этмем де,
Къайт энди Джанбай, къайт энди,
Хангъа опыке сёзинъ айт энди:
Кемалнынъ огълу Кельджанбай,
Ат джелькели «ит Джанбай»,
Пара бергеннинъ огълусынъ
Мал бергеннинъ къулусынъ,
Тартып тилинъ кесермен,
Тангъалайынъа тель къыздырып басарман.
Къанынъны ятып ичермен,
Мен бу кетишнен кетермен,
Шах Темир хангъа етермен,
Шах Темир хан манъа къол берсе,
Алла манъа ёл берсе,
Мен Токътамыш ханны да,
Аягъыма масхара этермен.
Оны айтып кетти, — дей.

Шимди Джанбай да:

— Ханнынъ да изи къара олсун, Эдигенинъ де, Джанбай адым турар
экеч, бир тилим отъмек къайда барсам, тапарман, — дей де, башкъа
ханлыкъкъа кете.

Эдиге кетип бараяткъанда, бир кишиге расткеле. Бу кишиден:

- Насыл ханлыкътансынъ, — деп сорай.
- Темир ханнынъ халкъынданым.
- Темир хандан не хаберинъ бар?

— Темир ханның алы мушкюль. Бир кябардин онынъ кызыны алып кяачты.

— Онъа кяршы аскер чыкътымы?

— Онъа аскер хайыр этмей.

Онынъ аркъасында йылан кыуббеси бар, онъа кылыгч отъмей.

— Кылыгч отъмесе де, меним кылыгчым отер, оны мен абарым, — дей.

Эдиге шу ерден кете, бир ерде аскер корюне, чёп-чёлен сайыла, аскер сайылмай. Эдиге «олса-олса бу Кябардин аскеридир», деп тюppone. Ана шимди аскерге бара. Кябардин агъагъа ермагъан¹ джибере.

Кябардин:

— Бу кимнинъ мерафети?

— Кырымдан бир йигит кельди, онынъ мерафети, — дейлер.

Кыркъ кязанны кыркъ киши котерип аса тургъан экенлер, Эдиге бир озю котерип аса. Ашчы олсун, о, дейлер. О ашчы олып джуре. Эр вакыт сувнынъ кяатында токътай экенлер. Бу сувны бир саатлик ер кечип токътай, сонъ, аскерлер сёгюнип башлайлар:

— Атны мында отлатаджакъсынъ, сувны кяайда ичеджексинъ, — дейлер.

Кябардин халкълары шикъет этелер:

— Ничюн сувгъа якъын токътатмадынъ? — дейлер.

Эдиге:

— Сув олгъан ерде, от олмай аякылы айванлар ола, алып кетер суварырсынъыз, — дей.

Кябардин:

— Аферин, Эдиге — дей.

Сонъ Кябардин юкъламагъа ята. Онынъ бапшы арабанынъ тёрюнде, аякылары алтмыш чифт огюзнинъ мойсаларындан кечип чыкъа. Аскерлер да алай атларны сувармагъа кетелер. Кябардиннинъ янында ялынъыз Эдигенен кыыз экиси кяалалар:

Кыыз:

— Аман Эдиге акъай, мени кюртараджакъсынъ мындан.

— Меним Эдиге олгъанымны кяайдан билесинъ, — деп сорай Эдиге.

Кыыз:

— Мен бабамдан сорагъан эдим, «бахтынъа Эдиге расткельсе, сени о кюртарыр», деген эди. Мен Эдигени кяайдан билерим дегенде, «Эдиге багъдаш кюрунъш отурыр, отургъанда астына илле бир шей салыр», деген эди. Мен сенинъ кийизинъни хырсыздадым, эр шейинъни

¹ ермагъан — бахшыпп



хырсызладым, сен астыңга ич олмаса джуген салып отурасың, сен Эдигесиң, — дей.

— Айса, кель кьуртарайым, — дей. Тынышлыгъы бармы шу явурнынъ? — дей.

Къыз:

— Кьоллугъынынъ астында, — дей.

Сонъ Эдиге окыны алып тарта, Къабардининиң опкеси, багъыры кокте ойнай, шу ерде джан аляметинен Эдигениң атынынъ кьуйругъындан тута, атынынъ арт аякълары тизине кьацар ерге кире. Эдиге абдырай.

Къыз:

— Кьоллугъдаки кылыч анагъынынъ кьалагъы дегиль де, чал атынынъ кьуйругъын, — дей.

Эдиге ойле япа, кьуртулалар, ордуны айдатып Темир хангъа баралар. Темир хан огъа кызыны береджек ола. Эдиге:

— Мен оны кьардашым этгим, алмам, — дей. Темир:

— Айса тиле тилегини, — дей.

— Мен тилегимни тилесем, эр бир айвадан юзер дане берерсинъ. Атнынъ тосю не дай олса, аскер тосю де ондай оладжакъ, — дей.

Темир разы ола.

Эдиге шу аскерлерни алып, Токътамыш хангъа келе. Онынъ кою алдында балабан оба бар экен, шу обаны сабадан акъшамаджек чал атлы аскер айлана.

Къачып кеткен Кемалнынъ огълу Кельджанбай, хангъа етишкен.

— Эдиге чокътан чокъ аскер алып келе ятыр, сени ольдюреджек, — дей. Бундан къачкъан кьуртулыр, — дей. Токътамыш хан къачын кете. Джанбай аткъа мине де, Эдигениң огълу Нурадин, бабасыны кьаршылап чыкъа. О шимди оськен йигит олган.

Токътамыш ханның Ханикей адлы кызыны тугуп, Нурадинге берелер. Нурадин бабасына: — Энди сен кьартайдыгъ, Токътамышнынъ артыдан мен кьувайым, — дей. Токътамыш ханның артыдан кьувып кете. Нурадин бир голь япындан кетейткъанда, Токътамыш ханның башы устюнде кьыргъый кьушлар бакъырша, о вакъытта Токътамыш хан дей:

— Я агъызыгъ ачма кьыргъый кьуш,
Голь исеси мен эдим,
Сени гольден айыргъан,
Мени коптен айыргъан,
Эдигедир, Эдиге, — дей.

Эдиге ернигъ улы эди,
Эр тагъырнынъ къулу эди,
Анасы джыппынъ кызы эди,
Атасы шейих улы эди,
Эдигенигъ улы Нурадин
Бермесин алла мурадыгъ.

Нурадин токътай бакъа, Тоқтамышнынъ къамыштыкъкъа кирген
ызы бар, чыкъкъан ызы ёкъ, шапша, ель эсе, къамышлар шувулдай,
сызгыршалар. Тоқтамышнынъ сеси келе.

Нурадин:

— Ах, бу ерде экен, — деп къыдырып кете, тапа да онынъ башыны
къакъып ала, ерине хабер эте. Ерине хабер эткен сонъ, бир хаплыкъта
не къадар халкъ бар, алайынъ багына тоглай, бав бастырып, бал
ичирип отуралар.

Кемалынъ огылу Кельджанбай, сарайгъа келе, ичериге кире ве
Ханикейнен Джаникейге:

— Сизнигъ байрамьгъыз бармы, не тедарик къураятырсынъыз? — дей.

Олар:

— Нурадин кележыр, коресинъ, — дейлер. Джанбай:

— Асыл, къыскааякъланынъ сачы узун, акъылы къыска олур, —
дей. — О сизнигъ бабагъызы ольдюрин кележыр да, — дей.

Бу вакъыт Ханикейнинъ ве Джаникейнинъ эвинде булунгъан
апайлар:

— Коресинъ, не бар анда, Тоқтамыш онынъ къарт бабасыны
ольдюрени ичюн, ондан акъкъыны алгъан, — дейлер.

Ханикейнен Джаникей пахыл этип, Эдигенен Нурадиннинъ
арасыны бозмакъ ичюн Нурадиннинъ огъне: «Бабанъ бизни
хорлады», — деп, агълап чыкъмагъа къарар берселер.

Джанбай ёлда, Нурадиннинъ алдына чыкъа:

— Сефер мубарек олсун, душманнынъ башыны алып кележасыгъ
э? — дей. — Эдиге джемаатны багына джыйып отура. Кельдинъ сени
зеэрлеп ольдюреджек, хан озю оладжакъ, — дей.

Сонъ Эдигеге келип:

— Козюнъ айдыгъ, Нурадин душманнынъ башыны алып келе-
жыр, къылычыны къайрап кележыр. Бардым, душманнынъ башыны
алайым, деп кележыр, — дей.

Нурадин келе, эм акыкъат Эдиге джемаатны багына джыйып
отура.

Ханикейнен Джаникей агълап чыкъалар:

— Бабагъ бизни хорлады, — дейлер.



Нурадин бу ерде ачувланып:

— Ма душманның башыны, — деп бабасына котерип ата.

Бабасы:

— Пеземекниң баласы! — дей. — Манға еди султанның башыны кетирдинҗми ёкса, бир султанның башлыгы кетиргенинҗнен бу кьадар киберленесинҗми? — дей.

Сонҗ Джанбай айта:

Аргымакыны аздырма Нурадин,
Атны кьайда минерсинҗ?
Аккьан сувға кьан кьуйма,
Сувны кьайдан ичерсинҗ?..
Кьавданлы ерге от берме,
Отны кьайдан отларсынҗ?
Кьартайгьанда кьарт атанҗны
Кьувалап, кьайда барып онҗарсынҗ?

Нурадин айта:

Кемалнынҗ огьлу, Кельджанбай,
Кери сёзлю, ит Джанбай,
Аргымакыны аздырсам,
Халкымдан сайлап тулпар минермен.
Аккьан сувға кьан кьуйсам,
Шербет сайлап ичермен.
Кьартайгьанда кьарт атамны
Кьувсам, мен кябеге барып
О заман учь кере тевбе, этермен,
Анда барып онҗарман, — дей.

Нурадин бабасына айтты, — дей:

Я бабам ольдюр мени,
Я ольдюрейим мен сени,

О заман бабасы айта:

Бу агьачтан буюгим,
Булуткьа тиймей ич тынмам,
Кульсем эгер бир чувакман,
Гурлесем тань юкьусыны бузарман.
Эдиге огьлуна дуа этти.
Огьлу артына йыккьылды,
Авузы, буруны кьыйшайды.



О заман Джанбай айтты:

О бирден бир балагдыр,
Беддуа этме Эдиге,
Сен дуа эт огьлунга.

Эдиге онга дуа эте. Нурадин бабасынынъ янына келип:

Кесек чыкъкъан булутман
Джавмай турып токътамам.
Анамдан къара тувганман,
Сабуннен джувсанъ агъармам.
Булуттан къыйыш чыкъкъанман,
Алдынга алсанъ тоз олмам,
Атадан бирев огьланман, —

дей де, бабасыны эвден къува.

Эдиге:

Эр Нурадин догъа деп,
Эбанайлар кетирттим.
Санга бешик керек деп,
Алтындан бешик ягтырдым.
Санга тешек керек деп,
Къумач-чугъа джайдырдым.
Къумач къатты олур деп,
Сайлатып джюнлер джайдырдым.
Йигит чагъынга кельгенде
Сайлатып тулпар минсеттим,
Халкъ арасына барганда,
Халкъ севгендай олсун деп,
Санга темиз тонлар кийдирдим,
Йигит адынъ чыкъсын деп,
Артынъдан къыркъ йигитке озгъарттым.
Сёзге чебер олсун деп,
Артынъдан эбет Кемал огьлу
Кельджанбайны джурсеттим.
Худай козюм къызартып,
Сакъальым, сачым агъартып,
Къартлыгымда мен санга
Къувалагъандай не эттим?

Нурадин:

Этмедим дейсинъ, эттинъ сен,
Икърар иман этип, къайттынъ сен, — дей де:
Я мени ольдюр, я мен сени ольдюрермен, — деп

кене Эдигени къува.



Эдиге:

Хатымтайдай джумертсинъ,
Лзмайдай бир пельвансынгъ,
Алиден алий улусынгъ,
Арслан экенсигъ, сен огълум,
Индден, Еменден джыйсам,
Ортагъа агъач тиксем,
Он докъуз корюк бассам,
Дереджеге чексем,
Саф алтын экенсигъ, огълум,
Мен къачайым сен къувала,
Эр бир ерде душманларынгъ
Авлакъ къачсын мырза огълум, — дей.

Эдиге:

— Къара тавда бири-биримизге окъ атышкъанда, корюширмиз,
— деп чыктып кете.

Эдиге деген, Эдиге бир анъ эвельси оладжакъ шейни биле тургъан,
оны шимди, джын кымы олгъан агасы вастасынен биле тургъан экен.
Шимди о тавгъа чыкъа кете.

Нурадин хан олып къала.

Шу койде бир киши оле, онынъ бир эчкиси ве дёрт огълу къала.
Дёртине эчкининъ дёрт аягъы тие. Эгъ кичкенесине тийген аягъы
сыныкъ экен. Бу эчки тегерек башында экенде, куль тепеден туташып
бир ничен тегериги яна, оны да хангъа шикяет этелер.

— Янгъан пичен ерине чёльден пичен алып кельсишлер, — дей.
Агъалары бу яшны зорлап пичен чалмагъа джиберелер. Чёльде пичен
чалаятыр экен, тавдан бир акъ сакъаллы киши чыкъа:

— Вай балам, — дей, — къартпынгъ тилеги къар джавгъанда джилик
къыдырыр деп, кышынгъыз зорладымы не, балам?

Яш:

— Къышымыз зорламады амма, Нурадин «чалып алып кель», деди,
— дей. Меселени анълата.

Къарт:

— Эй балам, соравджыда къусур ёкъ экен, амма айтувда къусур
къалдыргъансынъ, «агъаларымнынъ сав аягъы кетмесе, анда меним,
къырыкъ аягъым насыл бараджакъ», деп айтмадынъмы? — дей.

Пичен чалайткъан яш:

— Ёкъ, акълыма кельмеди, — дей.



Эдиге:

— Айса, бар айт, ким айтканын айтма, — дей.

О киши барын айта. Нурадин бу сөзлер бабасынпг сөзлери экенини билип кыдыра, амма тапалмай.

Бир кул тавда экиси бир-бирине ок атышалар, бабасы:

— Меним окымны алмасагъ, башкы ок тапалмадыңмы? — дей. Сонъ, Нурадин бабасы экенини таний да, купдюз алып кельмей, гедже сенетке салып, аркысына котерип алып келе. Олыгендже де кимсеге косътермей, гизли къарай, олыген сонъ озю джыя.

Токътамыш ханныгъ Къадриберди деген, бир огълу олгъан экен. О да Нурадинден бабасынпг акъкыны алмагъа келе.

Кемалнынъ огълу Кельджанбай онъа барып:

— Хон кельдинъ, Къадриберди султан! — дей.

— Алла разы олсун, — дей, аманлыкъ-эсенилик сорапалар.

— Бизим бабамыздан кълма бир Джанбай бар эди, бильмейсигъми? — дей.

Кемалнынъ огълу Кельджанбай:

— Меним, — дей. Къадриберди:

— Нурадинден бабамнынъ акъкыны аладжакъ олын кельдим, лякин насыл аладжакъымы да бильмейим, яшлыгъым бар, сен яшларны бир ёлгъа сала тургъан адстинъ бардыр, мени де бир ёлгъа сал, — дей.

Джанбай:

— О кьолай. Мен оны алдагъ сенинъ аягъыгъа кетиририм, — дей.

Къадрибердининъ тургъан ерини косътерип:

— Босагъагъдан мында кельгендже мых кыкытыр, онынъ успоне килим тешет, отураджакъ ерине де уджларыны юкъары бакътырып эки пычакъ салсагъ, сапларына саплары. О анда отурыр, онъа сонъ айтаджакъынпг айтыр, этеджегингъи этерсинъ, — дей

Джанбай Нурадинге:

— Голыге чагъала кьонгъан, — деп оны анда алып бара. Барса не корьсин, Къадриберди султанны корит, шаша. Насыл-насыл кьурулгъан тахткы бара, Къадриберди султаннынъ «буйорыгъыз» деген сёзюнен отура, отургъанда, Къадрибердининъ тахткы учъ тебен кьадан салгъан кескин пычакълары эки сапына кире, сапларыны тешип чыкыа. Нурадин:

— Душманныгъ козю семирмеси, — деп эки пычакынынъ уджларыны туга да отура.



Къадриберди:

Докъуз султан бабасы ай, бабасы,
Толакъай юртнынъ саиби,
Токътамыштай ханларны
Оны да къаттинъ, Нурадин?

Нурадин:

Докъуз султан бабасы ай, бабасы,
Толакъай юртнынъ саиби,
Токътамыштай ханларнынъ,
Къарангы тав ичинде,
Башын кесип алгъанман,
Бей бабамнынъ алдына,
Мен кетирип салгъанман.

Къадриберди:

Къындан къыскъа сынайгъан,
Догъру чалсанъ таш кескен,
Къайгырып чалсанъ баш кескен,
Ал джасман арув къылычымны,
Оны да къаттинъ, Нурадин?

Нурадин:

Къындан къыскъа сынайгъан,
Догъру чалсанъ таш кескен,
Къайгырып чалсанъ баш кескен,
Ал джасман арув къылычнен
Токътамыш ханнынъ башыны алгъанман.
Эр къойнума салгъанман,
Эр къойнумда къанар деп,
Къойынчыгъыма салгъанман.

Къадриберди:

Томургъаны-томургъаны джувургъан,
Джувургъанда ер тавурып сувургъан,
Ал тору атын, оны къаттинъ, Нурадинъ?

Нурадин:

Томургъаны-томургъаны джувургъан,
Джувургъанда ер тавурны сувургъан,
Ал тору атны ер къоругъы турада,
Бугъалап салып мингенмен.

Къадриберди:

Ай бузгъара, бузгъара,
Бузгъарада алты арба,



Алтавы да кьазна арба,
Оны да кьаттинъ, Нурадин?

Нурадин:

Ай бузгъара, бузгъара,
Бузгъарада алты арба,
Алтавы да кьазна арба,
Толгъашкъанда мен оны,
Адашкъаным бардыр деп,
Адашкъанда мен оны
Озь кьолумнен садакъя бергенмен.

Къадриберди:

Босагъасы болат эвлерим,
Оларны кьаттинъ, Нурадин?

Нурадин:

Босагъасы болат эвлеринъни,
Долашкъанда оларны,
Адашкъаным бардыр деп,
Адашкъанда мен оны
Оран откъа якъкъанман.

Къадриберди:

Сакъавлап сёйлер сёзю алтын,
Акъ билеги сом алтын,
Ханикейдай арувымны,
Джаникейдай кормелим,
Оны кьаттинъ Нурадин?

Нурадин:

Сакъавлап сёйлер сёзю алтын,
Акъ билеги сом алтын,
Ханикейдай арувнынъ,
Джаникейдай коръмелинъ,
Долашкъанда мен оны
Адашкъаным бардыр деп,
Адашкъанда мен оны
Аркъасындан таптап-таптап севгенмен.

Сонъ ачувланып:

Мен анамдан кесме къара тувгъанман,
Сабунлап джувсанъ агъармам,
Мен джарсам яман кьатты,
Борадан кьатты джарарман.



Джавгъа кельген булутман,
Джавмай турып токътамам! — дей, амма
Къадрибердини сезмей, Къадриберди чадырнынъ четини ача да,
къача.

Къадриберди Нурадинни ольдюралмай. Къадриберди сав киши
олса да къача. Нурадин атына мине, амма орталыкъ къангъа тола,
эвине къайта. Ханикейнен Джаникей оны аттан котерип алалар. Къой
тезегинен атеш якъып, сабаннынъ къытычыны атешине къоялар,
къылыч къып-къызыл олгъан сонъ Нурадиннинъ ярасына басалар. О
зеэрли пычакънынъ ярасыны савута экен.

Кемалнынъ огылу Кельджанбай Къадрибердиге:

— Сенинъ къардашларынъ акъылсызлар, оны савултырлар, — дей.
Мен бир иш даа этермен, энди о олер. Сен акъшамдан сонъ кель де
онынъ атларыны ал да къач.

Къадриберди ойле де яла, Джанбай озю Нурадинге келип:

— Джылкъыларынгъны алып къачаятырлар, — дей.

Нурадин:

— Чападжакъ атымы чыкъарып эгер сал. Эгер-мегер керекмез, тез
олмакъ керек, — дей.

Нурадин аткъа минип джылкъыларыны алып келе. Амма ярасына
минген атынынъ тери къача. Эвине къайтып келе, Ханикейнен
Джаникей къаршылап чыкъып аттан алалар, кене де Нурадинни
савултаджакъ олалар, лякин о:

— Эр оюны — бир олур, ольсем олейим шуны энди, — дей де, эвине
кирип тёрде ята, лякин окъыны къурып кокрегине сала.

Джанбай Къадрибердиге:

— Энди онынъ такъаты къалмады, догъру бар да ольдюр, — дей.

Къадриберди къапыдан киреяткъанда Нурадин:

— Я сангъа не керек? — деп сорай.

Къадриберди «меним артымда ким бар экен», деп артына
къарагъанда, Нурадин яткъан еринден окъын тарта. Къадрибердини
ольдюре. Ондан сонъ, учъ кунъ ятып, озю де оле. Ханикейнен Джаникей
Джанбайгъа къала. Халкъ да Джанбайгъа къала. Ханларны ольдюрп,
тап сонъунда халкъны озюне къалдыра.

ЭДИГЕ БИЙ

(вариант)

Бурунгъы заманда Идильде¹ бир Токътамыш деген хан болгъан. Онынъ да Къутлыкъая бий деген бир къушчысы бар экен. Токътамыш хан авджы къушман ав этмекни пек севе экен. Яз кельсе хан ордусында асыл да отуралмай экен. Къутлыкъая биймен экиси ат минип, къуш алып экевден экев Чегерли гольге чыкъып кетер — бир кетселер эки-учъ кунъ, пек къызышсалар, бир афта эвге къайтмаз экенлер.

Ана шу Къутлукъая бий Токътамышнынъ къушчысы экен. Ханнынъ тогъан, шаин, лачын къушлары чокъ олгъан. Къутлукъая бий о къушларны бакъа, къозлата, йымырта бастырта, явруларын асрап осьтюре, йырты² урмагъа огрете экен. Ханнынъ энг севгени бир анача тогъан экен. Анача тогъан эр йылы эки йымырта къозлар ве ондан чыкъкъан яш тогъанлар йыртыны пек уста урар экенлер.

Ана энди яз кельди. Токътамыш хан бир даа авгъа чыкъты. Кельселер, гольде къаз, орьдек пек чокъ экен. Сонъ къамыш ичинден гъакъылдап, бир багълан³ учып чыкъты. Хан, къолундаки авджы къушны сийтеп учурды. Тогъан бир тегерек айланды да, барып къазны урды. Қаз ерге тюшти, йыртыджы къуш тепеде ойнакълап къалды. Сонъ къамыш артындан даа бирев къуш учурды. О къуш джапалакъланып келип ханнынъ къушы ургъан къазнынъ устуне отурды. Оны корип, ханнынъ тогъаны тепеден ташдай шувулдап тюшти, бир къакъып анавы къушны аттырып йиберди. О къуш чапаланды, чапаланды, сонъ турды. Ханнынъ къушуман урушмагъа къоркъты. Сонъ къамыш артындан о къушны учургъан адам чыкъты, хангъа селям берди. Хан алейк алмады, сонъ о киши хангъа сёз къатты: «Къушынгъыз бек йиги⁴ экен. Сатмазсызмы магъа?» — деди. Токътамыш хан айтты: «Бундайын къуш сатылмай, сатылса да эр кеснинъ арджы тугуль. О тек ханларгъа ляйыкъ къуш», — деди. Анавы киши: «Айса, мен ханман, айткъан фиятынъыздан учъ къат арткъач берирмен», — деди. Токътамыш хан: «Ия-я, сиз бизим падишамыз экенсингизде, биз сизни танымагъанмыз!» — деди. О киши: «Ёкъ, мен бу юртнынъ падишасы тугульмен. Мен сартнынъ падишасы Темирхан боламан!» — деген. Онда Темирхан: «Айса, Токътамышхан, насыл англашыр экенмиз, бу къушнынъ

¹ Идиль — Волга

² йырты — ав

³ багълан — кийик къаз

⁴ йиги — эйи

фияты устюнде?» — деп сорады. Сонъ Токътамыш хан: «Сарт демек, — сатанджы демек боладыр, алыш-беришни танъры олар ичюн чыкъаргъан. Мен сарт тугульмен, алыш-беришмен огърашмайман» — деди. Темирхан бир шей айтмады, лякин Токътамышкъа ачувы чыкъты, амма ачувыны ичинде тюйди. Токътамыш хан да, озъ башына ачувланды.

Темирхан озюнигъ ордукентиге¹ къайтты ве кенъешчилерини тоглап, оларгъа: «Энди биз нишлейик? — деди. — Токътамышнынъ къушуман урушаджакъ къушны, ким тапып бебир бизге?» — деп сорады о. Кенъешчилер: «Ондайын эткен къуш биревде ёкъ, бельки бутюн алемде ёкъ. Шу Токътамышнынъ Къуртлукъая бий деген, бир къушчысы бар, анача тогъанны о беслей, о къозлата, о асрай. Шогъа айтсакъ, бельки бир йымыртасыны хырсызлап, бизге берир?» — дедилер.

Сонъ, Темирханнынъ къушчысы Къуртлукъая бийге кельди: «Къуртлукъая бий! Сен шу, анача тогъаннынъ бир йымыртасыны бизге бермесенъ, болмаз. Бизим ханымыз, Темирхан о къуш ичюн, юкъусыны къачырды. Биз сагъа не истесенъ, оны берирмиз», — деди. Къуртлукъая: «Магъа бир шей керекмей Темирхандан. Мен янъгъыз бир адамман — меним уюм ёкъ, балам ёкъ, къорантам ёкъ. Сен гольге барып, магъа бир быдаякъ байкъуш йымыртасы тапып кетир, мен сагъа тогъаннынъ бир йымыртасыны берирмен. Баргъан сонъ да, менден Темирхангъа селям айт». Шай деп, Къуртлукъая Темирханнынъ къушчысына анача тогъаннынъ бир йымыртасыны берип джиберди.

Ана энди, къантар къышган язгъа авды, джыллы еллер эсип башлады. Сонъ Токътамыш хан сорады: «Насыл, Къуртлукъая бий, анача тогъан бу йылгъы балаларын чыкъардымы?» Къуртлукъая бий: «Хан азретлери! Анача тогъаннынъ асыллыгъы кеткен, о къартайгъан. Бу йылгъы йымырталарынынъ биреви шалкъам чыкъты. Мен оны аттым, ерине бир байкъуш йымыртасы къойдым. Ёкъса, анача тогъан бир йымырта устюнде ятмаз», — деди. Токътамыш хан онъа: «Сен кене де къара, къуш бир кере янъылгъан болса, о асыллыгъыны джойгъан демек, догъру болмаз», — деди.

Энди яз кельди, авалар къызды. Токътамыш хан Къуртлукъая бийни алып авгъа кетти. Ялынъыз чыкъкъан яш тогъанны ве онынънен бир ювада чыкъкъан байкъуш баласыны да алдылар. Сонъ Чегерли гольге кельдилер. Токътамыш: «Башта шу байкъуш баласыны учурайыкъ, къана нишлер?» — деди де, оны учурды. Байкъуш баласы бир шейге къарамадан «пыр-р»этти, учты кетти озъ ёлуна. Сонъ Токътамыш хан яш тогъанны учурды. Тогъан бир тегерек айланды, сонъ юксек

¹ ордукенти — пайтахт

котерилип йырты кыдырды. Шу заман, кымыш артындан даа бирев кыуш учурды. О да бир тегерек айланцы, сонъ юксек котерилип йырты кыдырды. Сонъ эки тогъан да, бир къара акъкыуны корьдилер, экеви де барып оны урдылар. Акъкыу ерге тышти, сонъ эки тогъан бир акъкыу ичюн талаштылар. Кыакышгы, патырдашгы, уруштылар — экеви де ал кыан олдылар. Амма бирев де кыачмады, бирев де устюн кельмеди. Токътамыш хан кыушларнынъ урушкыанына кыарап, ойгъа далды: «Бу бизим тогъанлар насыл кыуш болсын, бир ургъанда, кыачыра тургъан эдилер. Не болды экен бугъа?» Сонъ бир даа кыараса, Темирхан да кыушларнынъ урушкыаныны сейир этип тура. Кыуртлукъая бий барып озылерининъ кыушуны алды, Темирхан да озюнинъ кыушуны алды. Сонъ Темирхан:

Быдаякъ байкыушнынъ баласы

Байкыуштан не асыл аласынгъ?

Байкыуш учургъаннынгъ шижяры (авы)

Сычанман сары йылан баласы, — деди.

Токътамыш хан кыызарды, бозарды, амма бир шей айтмады. Эльдиректен атына кыамчы урды, атны тургъан еринден дёртнал 'чаптырып эвине кыайтты. Кыуртлукъая бийге айланып биле кыарамады, чюнки о бир шейден шекленди. Сарайына пек ачувлы кельди, биревге сёз кыатмады. Сонъ пек чокъ ракыы ичти, башыны байлады, ятгы юкълалды.

Токътамыш хан эртеси куню эрте танъда уянды. Кыуртлукъая бийги юкыусындан уянтп, узурына чагъыртгы. Онынъ козюне тикилип: «Кыуртлукъая бий, догърусыны айт! Сен магъа анача тогъаннынгъ асыллыгы кеттидеп, ялан айткыансынгъ. Сен онынъ бир йымыртасыны менден огъурлап, Темирхангъа берген боласынгъ. Айт догърусыны!» — деди. Кыуртлукъая бий: «Хан азретлери! Кыылыч сизинъ, баш бизим — мен шу акыылсызлыкъны эттим, йымыртаны бердим. Мен буны сизге яманлыкъ этейим де, Темирхангъа ярайым деп, этмедим. Мангъа Темирханнынгъ кыушчысы кельди, бек джалынды (ялварды). Шу ихтияр адамны аджып, бердим. Сонъ Токътамыш хан: «Олай болса, Кыуртлукъая «бий, сен шу йымыртаны береджек болгъанда, бунуиъ сонъу не боладжакъыны да тышонгендирсинъ, чекеджек джезангъа да разы болгъандырсынъ. Шимди сен хиянет эттингъ, меним тузума тыюкюрдинъ, софрамы тептинъ. Мен шимди ойлайман: эгер джеллятны чагъырсам, о да кыылычман сенингъ башынъны кессе, бу сагъа кыолай олюм боладжакъ, чеккен джезанъ эткен гуниягъдан эксик боладжакъ. Бардынъ ки, сен отъмекке-тузгъа козъ юмдынъ, демек, сенингъ козылерингъ сокыур болмакъ керек. Мен сагъа шу шейни

этермен, — деди де, эки кьоруджыман бир джеллятыны чагъырды. Кьоруджылар Кьуртлукъая бийни сюйреклеп алып кеттилер. Сонъ, джеллят онынъ эки козюне темен ине чекти. Сонъ чекишип ольсин деп, тавлыкъ бир ерде чегереликке алып кетип ташладылар.

Шай этип, Кьуртлукъая бий чытырман чегерликте бир кунъ ятты, эки кунъ ятты: «Энди шайтип оледжекмен», — деди ве еринден кыбырдамады. Учюнджи кунъ дегенде, кьушлукъ маали олса керек, чегерликте бир шытырды чыкты. Сонъ къатына эки аякылы, инсан юрюшпимен бирев келип токътады. Сонъ, къарыкъ сесимен сёйледи: «Селям алейкум, Кьуртлукъая бий!» Кьуртлукъая бий сергекленип, даа динълеп турды, сонъ: «Тынмысынъ, джынмысынъ — кимсинъ?» — деп сорады. О сес: «Ишинъ осал, Кьуртлукъая бий! Къара кунъ дегеннинъ энъ къарасы, сенинъ башынъа тошкен. Козьлеринъни ийги этсем, магъа не берирсинъ? Кьуртлукъая бий: «Менде не бар да, сагъа берейим? Менде алтын ёкъ, пара ёкъ, козь ёкъ. Сен мени ярлыгъасанъ¹, сени танъры ярлыкъар», — деди. О сес: «Магъа мал да керекмей, алтын да керекмей, пара да керекмей. Сен акъайсынъ — мен апакъайман. Магъа сенинъ эркеклигинъ керек. Сагъа кьошакъ болмагъа кельдим. Бер кьоолунъны, тут да коръ мени», — деди. Кьуртлукъая бийнинъ кьоолуны алып о, озюни туттурып коръсетти. О керчектен де апакъай экен — балабан кокюслери, тап кьурсагъынадже саркъкъанлар. Кьуртлукъая: «Айса, мен разыман, сагъайт козьлеримни!» — деди.

Энди, о апакъай илядж кыдырып кетти. Барды да, бир теректен эки япракъ узды. Сонъ, таш арасындан чып-чып тамгъан бир чокъракътан сув алды. Келип, Кьуртлукъая бийни чалкъа яткъызды, эки япракъны сувгъа батырып, онынъ эки козюне кьойды. «Сен энди юкъла, мен бир тыныштан келирмен», — деп кетти. Кьуртлукъая бийнинъ козьлерининъ агърысы эксильди, юреги эрювлendi, яш баладайын юкълап къалды. Сонъ, о «Тур энди, Кьуртлукъая бий!» деген сесни эшитип, уянды. Козьлерини ачса, къаршысында — аллыгуллю урба кийген, бир яш кыскааяакълы тура. Кьоолунда да богъчасы бар. Кыскааяакълы: «Ал мынавы богъчаны, Кьуртлукъая бий! Анда аш бар, сув бар. Кьурсагъынъ тойгъан сонъ, бир чалаш кьурарсынъ — экевимиз мында яшармыз», — деди. Кьуртлукъая бий ашады, такъаты кельди. Сонъ чегер юлкып, акъшамгъадже бир чалаш ясады, къавдан² топлап, чалаш тюбюне тёшеди. Сонъ акъшам болды, экиси яттылар — акъай-апакъай олдылар. Саба эрте турдылар, онда Кьуртлукъая бий айтты: «Дызман апакъай экенсинъ! Татлы апакъай экенсинъ!» — деди.

¹ ярлыгъасанъ — аджысанъ

² къавдан — кьуругъан от



Апакъай айтты: «Олай болса, бегене болсанъ, бизге кедер эткен киши ёкъ — мен сенинъки, сен менимки, яшай беремиз. Меним тек бир шартым бар, шоны бозмасанъ болгъан», — деди. Сонъ Къуртлукъая бий сорады: «Насыл шарттыр о?» Апакъай айтты: «Меним шартым шу ки, уйге келе болсанъ, тышарыдан сес берип келирсинъ. Мен уйден чыгып кете болсам, сен артымдан къарамазсынъ, — деди. — Эгер артымдан къарасанъ, я да сес бермей кельсенъ — сен магъа ёкъсынъ, мен сагъа ёкъман. Меним шартым шу». Къуртлукъая бий бу шартны къабул этти, разы болды.

Ана энди Къуртлукъая бий эр кунъ эртен авгъа кете, акъшамгъа бир къуш согъып кетире. О къушны бикеси уюте, темизлей, къызарта — экинджи кунюне акъшам оны ашайлар. Экинджи куню даа бир къуш согъып кетире — оны да юлкыш, тинтип, къызартып иййлер. Шай этип, бир къайгысыз яшайлар.

Сонъ бир кунъ, Къуртлукъая бий яй алып, бир даа чёльге чыкып кете. Апайы уйде янъгъыз къала. Бир даа къараса чегерлик ичинден бир адам чыкып келеята. Адам келип, Къуртлукъая бийнинъ къарысына: «Къарным ачтыр. Бир парча емек булунмазмы?» — деп сорай. Буларда отъмек ёкъ, бир шей ёкъ. Апакъай не береджегини бильмей. Сонъ озъоюне дей: «Санда къызартма къуш бар. Бир джилигин къопарып алып берсем азлыкъ этер, айып болыр. Эписини берийим десем, Къуртлукъая бий ач къалыр деп къоркъаман. Айды, не болса, болыр — берейим!» — деди. Саанны кетирди, тиленджининъ алдына къойды. Тиленджи сааннынъ къапагъыны ачты, къызартмагъы емеге башлады. Бир тамам ашап битирди, сюеклерини саан ичине тизип салды. Сонъ бир шукюр дуасы этти. Къуртлукъаянынъ бикеси сааннынъ къапагъын къапатып бир четке салды. Сонъ тиленджи айтты: «Инсан огълуман яшап, сен де инсанлыкъ ёлуна мингенсинъ — йигитлик этмеге уйренгенсинъ. Айды, айса, алла сизге бир эвлят багъышласын», — деди. Даа бир дуа этти, сонъ чыкып кетти.

Акъшам Къуртлукъая бий авдан кельди, бир къуш согъып алып кельди. Бикеси бет-къолуны ювдырды — алдына аш къоймады. Сёйледди Къуртлукъая бий: «Емек ёкъмы, апакъай? Къарным ачтыр!» — деди. Бикеси сёйледди: «Бир шей ёктыр, Къуртлукъая бий! Бильмеймен нишлемеге. Бир тиленджи кельди бутунъ, ач экен — огъа бердим. Бир тамам ашады. Инанмасанъ къара», — деди. Сааннынъ къапагъыны ачып косътерди — бакъсалар, анда къуш къызартмасы олгъаны киби бутунъ тура. Апакъай, насыл шейдир бу деп, тааджип этти. Сонъ Къуртлукъая бий сёйледди: «Сен апакъай, меннен ойнайсынъ, мени селекеге¹ аладжакъ боласынъ». Апакъай: «Мен ялан айтмадым,

¹ селеке — мыскыл

Къуртлукъая бий! Сёзюм керчектир. Нишлейим сагъа ялан айтгып?» — деди. Онда Къуртлукъая бий: «Олай болса, бу кельген тиленджи зая адам болмаса керек. Онынъ келип кеткени хырлы тугуль», — деди.

Шай этип, олар хайли вакъыт даа авланып-эгленип юрдилер. Сонъ Къуртлукъая бийнинъ къарысы къурсакъ котерди. Апайыннынъ юкло олгъаныны корьген Къуртлукъая бий ойланды да, озю-озюне: «Къа, энди нишлейим экен? Мына келаяткъан къыш. Джавун-сачын башласа, къар да джавса, яш баламан бу чалашта отурылмаз. Магъа энди кишилерге корюнмек, къышлыкъ бир дуракъ тапмакъ керек», — деди.

Къуртлукъая бийнинъ Эсебий адлы бир досту бар эди. О Эсебий Токътамыш ханнынъ аталыгына чобан эди. Барып шу Эсебиймен корюшти, башына келип-кечкен эр шейни айтты: «Шимди апакъайым къурсакъ котерди, магъа къышнынъ къайгысыны чекмек керек». Эсебий онъа бир кийиз чадыр берди, кочъмек ичюн эки ат, савут-саба, даа бир такъым шей берди. Сонъ кенъеш берди: «Сен, Къуртлукъая, улус Токътамыштан кетсенъ, сагъа арув болыр. Токътамыш хан, озюнъ билесинъ, бек тез ачувлангъан адам. Сенинъ сав къалгъанынынъ эшитсе, джынлары башына топланыр, ачувланыр. Сизлерни сав къоймаз», — деди.

Сонъ Къуртлукъая бий ёл бою ойланып кетти: «Айса, мен нишлейим? Темирхангъа барайыммы? Сагъа бир йымырта бергеним ичюн, Токътамыш хан мени къувды. Мен сагъа бир йымырта бердим — энди сен магъа бир тилим отъмек бер, деп айтайыммы? Ёкъ, олай болмаз! Мына — Токътамыш ханнынъ топрагъы. Мына — Темирханнынъ топрагъы. Мен шу сынъырда отурайым, биревге де беринди (подданный) болмайым», — деди. Чадырыны къурды, апакъайыны кетирди — шу сынъырда отурды. Кене авджылыкъман кечиндилер.

Бир кунъ о кене авдан къайтты, амма сес бермей кельди. Унутты. Апакъайы аймангъа¹ сув къойгъан, башпын ювгъан, энди къол котерип, сачыны тарай эди. Къуртлукъая бир къараса апакъайда къолтукъ астында бир тешик бар, о тешиктен опыке бавуры корюне. Сонъ Къуртлукъая бий анълады ки, апакъай албасты² экен. Къуртлукъая сорады: «Апакъай, сенде бу не тедарик я?» Апакъай абдырады, сонъ озюни къолгъа алды да: «Меним синълимнинъ тою бар, мени чагъырдылар. Рухсет бер, кетейим», — деди. Къуртлукъая бий: «Сен насыл кетерсинъ? Мына-мына бала догъаджакъ. Насыл кетерсинъ бу авур аякъман?» — деди. «Эгечи³ болыш да, насыл бармайым синълимнинъ тоюна? Эки кунъден келирмен», — деди къарысы.

¹ айман — тегерек леген

² албасты — обур, джады

³ эгечи — татасы

Къуртлукъая бий рухсет берди: «Бек керек болса кет», — деди. Апакъай кийимлерини кийип, уйден чыкъты. Къуртлукъая бий савлукъман бар айтты, апакъай савлукъман кьал айтты. Сонъ о тюшонди, озю-озюне «Мен уйге сес берип кельмеге унуттым, бунынъ бир шартыны боздым. О магъа бир шей айтмады. Энди бунынъ экинджи шарты: уйден кеткенде артындан къарамайджакъман. Шунунъ артындан да, бир къарайым да!» деди. Арткъа башыны бурып, омуз устюнден къарады. Корьсе — бикесининъ аякълары къуш аягына ошайлар, учъ дане узун пармакълары бар, окчелери ёктыр.

Къуртлукъая бийнинъ бакъкъаныны апайы дуйды, джылп этип артына къарады ве бурулып къайтып кельди. Къуртлукъая бийге: «Энди бизим шартымыз бозулды. Сен сес берип келеджек эдинъ, унуттынъ, мен индемедим. Шимди артымдан къарагъанынъ — бу «биле-биле ядес» демектир. Энди бизим бирлигимиз битти — сен магъа ёкъсынъ, мен сагъа ёкъман. Бала догъса, мен оны джуртлыкъ болгъан бир ерге ташлап, кетермен. Савлукъман кьал!» — деди де, кетти.

Энди десенъ, анавы Эсебий деген къарт, Къуртлукъаянынъ досту, бир кунъ эрте танъда къойларыны къоштан чыкъарып, кой четине, сюрю топланыр ерге айдады. Бир даа къараса, алдда кеткен къойлар урькти, къачтылар. Эсебий: «Бу къойлар неден урьктилер? Барып къарайымчы шоны», — деди. Къойлар урькип къачкъан ерге барып, къарады. Корьсе, янъы тувгъан бир бала, къундагъы ёкъ, къатында анасы ёкъ, бирев ёкъ. Ёлджылар ташлап кеткен бир эдик (этик, йымшакъ сыджма) ичине кирсетильген, ята. Эдик къатында баланынъ шылымы (послед) бувланып ята. Эсебий къарт бир ара абдырап алды, сонъ сюрюге къошмакъчюн къойларыны айдап келеяткъан койдешлерини корип, элесленди. Сонъ баланы эдик такъымынен чекменининъ этегине алды. Адамлардан бириси: «Этегинъде не бар я, къарт?» — деп сорады. «Тезек джыйдым, уйде джагъайт ёкъ экен. Дженъгенъиз бир этек тезек кетир деген эди, шуны тез-тез алып барайым уйге», — деди де, ашыкъып кетти. Эвге келип, баланы апайына корьсетти: «Бу баланы ёл четинде мынав эдик ичинде таптым. Мен беллесем, бу бала, шу Къуртлукъая бийнинъ баласы болса керек, апакъайым авур аякъман чыгып кетти, деп айткъан эди. Сакъын биревге айтма, бала тапкъанымызны», — деп къойларына кетти.

Сонъ акъшам эвине къайтып, апайыман кенъеш къурдылар.

Эсебий: «Мен ярын Къуртлукъая бийге барып айтарман. Сен бареме, кичкенемизнен къошып буны да эмиз — бизим балаларымызман сют къардаш болыр. Къуртлукъая оны къатип, къарайджакъ?» — деди.

Айны шу куню, Токътамыш ханнынъ кишилери онъа хабер



кетирдилер: «Сиз Къуртлукъая бийнинъ козылерине темен ине сокътырдынъыз, чегерликке аттырдынъыз. О анда ольмеген. Бир ырымджы апакъай онынъ козылерини эмлеген (савулткъан), сонъ о, Къуртлукъаяман яшап къалгъан, ондан бала табаджакъ экен. Шимди Къуртлукъая улус топрагъынъызнынъ кунтувуш сынъырында чадыр къурып ерлешкен. Сизге де беринди тугуль, Темирхангъа да беринди тугуль. Озь башына баяр кесильген, отура».

Токътамыш хан нукерлерини чагъырды, эмир этти: «Эртенъги танъман барынъыз, Къуртлукъаянынъ чадырына от салынъыз. Озюни кесинъыз, бикесини кесинъыз, баласы болса — оны да кесинъыз! Танъ чабагъыман, Токътамыш ханнынъ нукерлери Къуртлукъая бийнинъ устуне къычырышып, уджум эттилер. Къуртлукъая бийни скойреп, тышарыгъа чыкъардылар. «Баланъ къайда? Бикенъ къайда?» — деп сорадылар.

«Мен бильмеймен. Бикем синълисининъ тоюна кетти — юртлары къайда болгъаныны бильмеймен. Апакъай кеткенде, бала даа къурсакъта эди», — деди Къуртлукъая. Сонъ, ханнынъ нукерлери Къуртлукъая бийнинъ чадырына от салдылар, озюнинъ де башыны кесип, Токътамыш ханнынъ аягъы астына кетирип аттылар. Шай этип, Къуртлукъая бий ольди.

Бундан сонъ, бир талай вакъыт даа кечкен эди ки, Токътамыш ханнынъ кишилери, онъа бир ягъы хабер даа етиштирдилер: «Къуртлукъаянынъ апайы албасты экен, бир огълан бала догъургъан. О Къуртлукъаядан чыкып кеткен де, догъургъан баласыны бир эдик ичине кирсетип, ёл четине ташлап кеткен. О баланы сизинъ аталыгъынъызнынъ чобаны Эсебий къарт тапкъан, уюне кетирип, адыны Эдиге къойгъан. Шимди апакъайы оны, озъ баласыман къошып эмизе экен. Токътамыш хан: «Ойле болса, чагъырынъыз аталыкъны!» — деди. Аталыкъны чагъырдылар. «Аталыкъ! Мен сизге бир шей айтаджакъ боламан, амма сизни ынджытырман деп, къоркъаман», — деди. Аталыкъ: «Эмир хандан, амель къулларынъдан, буюр, айтыпъыз!» — деди. Хан: «Сизинъ чобанынъыз — Эсебий деген бириси, Къуртлукъаянынъ албасты апакъайы догъургъан эр баласыны тапып алгъан, шимди апакъайы оны, озъ баласыман къошып эмизе экен. О бала буюсе, бельки салтанатымызгъа зарар кетирип деп, къоркъаман. Келеджек белянынъ ёлуны шимдиден кесек яхшы болмазмы?» — деди. Аталыкъ сёйледи: «Баш устуне, хан азретлери! Бизден къаршылыкъ ёкъ!» — деди. Шай деп, ханны тынчландырды.

Аталыкъ ханнынъ узурынъдан чыкты да, атына минип бир кунъ, бир гедже атыны чаптырып, Эсебий къарт яшагъан койге


кельди. Эсебийнинъ отарына барды. «— Эсебий! — деди о. Сен шу Къуртлукъаянынъ баласын тапкъан экенсинъ, оны хангъа келип айттылар. Шимди хандан адамлар келеджек, баланы сенден алып бараджакъ, кеседжектер. Кель, шу баланы хангъа бермейик, Къуртлукъаянынъ несли дюньядан джойылмасын. Къуртлукъаянынъ эджатлары, озюнь билесинъ, бизим аймакънынъ (къабиленинъ) етекчилери эдилер. Аймакъ төрелеримиз битсе, ёкъ болса, бизге яхшы болмаз. Апакъайынъны къандыр, шу бешитке яткъан озъ балангъызны берингиз хангъа», — деди. «Арув, айса шай этейик», — деди Эсебий къарт. Аталыкъ гедже къаранлыгъыман ордукентке къайтты. Эсебий къарт да уюне кельди. Келип апакъайына аталыкъ айткъан сёзлернинъ эписини айтып, оны къандырды. Сонъ, къарт отаргъа къайтып кетти. Апайы исе, озюнинъ баласыны къундакълады, бешикке яткъызды. Къуртлукъая бийнинъ баласын къойнуна алып ятты.

Ана, шимди танъ атайым дегенде, ханнынъ къоруджылары ат чаптырып, Эсебий къартнынъ уюне кельдилер. Уйге кирип, къартнынъ апайындан сорадылар: «Сиздеки эки баланынъ бириси, Къуртлукъаянынъ баласы экен. Къана, къайсы бириси обала?» Къадын: «Эсебий бир бала тапып кетирди, бильмеймиз кимнинъ баласы болгъаныны. Ана, бешикте ята», — деди. Къоруджылар баланынъ бетини ачып къарадылар: «Къуртлукъаянынъ баласы эсмери болмакъ керек, бу бала сарышын келе. Сиз янъылмадынгъызмы?» — дедилер. «Озъ баласын танымагъан апакъай болырмы? Я да озъ баласын бешикке салып, биревнинъ баласын къойнуна алып яткъан ана болырмы?» — деди. Шай этип, къоруджылар баланы бешиги такъымынен хангъа кетирдилер. Хан, Эсебийнинъ баласыны бешиги такъымынен ортадан кестирди. Шай этип, Эсебийнинъ баласы кетти, эдик ичинден тапылгъаны ичюн, ады Эдиге деп къоюлгъан Къуртлукъая бийнинъ баласы сав къалды:

Эдиге бийнинъ улы эди,
Бий де танърынынъ къулы эди.
Анасы джыннынъ къызы эди,
Дедеси туюлю-сачлы азиз эди.

Бу вакъиалардан сонъ кунълер-айлар кечти, йыллар кечти. Эдиге эмчектен кесильди, къундакътан чыкъты, тал турды, татий юрди, тили чыкъты. Бир яшъны толдурды, эки яшкъа кирди, сонъ беш яшъна кельди. Бир кунъ шойле бир ал болды.

Бир топ бала кой ичинде курешип ойнаша эдилер. Бир даа къарасалар, озюнинъ къыркъ къоруджысыман Токътамыш хан келеят. Ханны корип, бутюн кой халкъы тышкъа чыкъты, къолларыны



кѣурсакъ устю кѣавушгырып, турдылар. Хан балаларнынъ янынъдан кечейткѣанда Эдиге балаларгѣа айтты: «Кѣулакъ асманъыз, балалар! Ойнай беринъиз!» — деди. Хан кечип, балалар оюнларыны быракъмадылар. Буны корип, Токѣтамыш хан бир кѣоруджысыны йиберди: «Бар, битип кельчи, бу балалар ничюн селям турмадылар?» — деди. Кѣоруджы келип балалардан: «Улуснынъ ханы кечип кеткенде, ничюн селям турмадынъыз?» — деп сорады. Алдгѣа Эдиге чыкѣты да айтты: «Киши озюнден буюк адамгѣа селям берир. Биз балалар не кѣадар коп болсакъ болайыкъ, бизни бир адам кѣадар кормейлер. Амма бизим яшымызны кѣошсакъ, юз яштан буюк болармыз. Хан болса-болса, даа элти яшындадыр. Бизге о селям бермек керек», — деди. Кѣоруджы Эдигени ханнынъ кѣаршысына кетирди: «— Мынав бала шай деп айта», — деди. Хан айтты: «Ярамаз бала экен бир якѣтан. Экинджи якѣтан улуста бундайын акѣыллы кескин балалар осип етишсе, улус бундан кяр этер. Бар, ойна, бала!» — деди.

Шундан сонъ, арадан бир йыл даа кечти. Эдиге бабасы Эсебий кѣартман чѣльде кѣой бакъып юре эди. Сонъ кѣарт бир ишмен уйге кетти. Эдиге кѣой башында кѣалды. Бир даа коръсе, онъ-солуна бакъынып, бир киши келе-келе, чалылар арасында юкѣлап яткѣан бир кѣоянны эследи. Сонъ Эдигенинъ кѣатына кельди: «Мен авджыман, амма тюфегимни уйде кѣалдырдым. Анав чалылар ичинде бир кѣоян юкѣлап ята — сен оны урькютме», — деди де, ашыгып кетти. Шай дегендже, чалы артындан атлы-итли бир авджы даа чыкѣты. Кѣоян юкѣусы белли шей — о атнынъ дюбюрдисинден уянып, туруп кѣачты. Ит онънъ артындан кѣувып тутты. Шу арада тюфегини алып анавы авджы да етип кельди. Биринджи авджы: «Бу кѣоян менимки. Оны башта мен коръдим, мына бу бала шаатыр!» — деди. Экинджи авджы: «Чѣльде юкѣлап яткѣан кѣоян биревнинъки сайылмай. Ким тутса, кѣоян онынъки. Шай тугульми, бала?» — деди. Эдиге: «Мергин авджы ким болса, кѣоян онынъки. Мен ерге чалкѣа джатып, мына бу алманы кѣурсагым устуне салайым, сиз нишангѣа алып атынъыз. Кѣайсынъыз алманы урсанъыз, мергин авджы одыр. Кѣайсынъыз да алманы уралмай мени ольдюрсенъиз, кѣан кѣарышкѣымны (одегини) бабама тѣлерсиз», — деди. Сонъ ерге ятты, кѣурсагы устуне бир алма кѣойды. Авджынынъ биринджиси атты, алманы экиге больди. Авджынынъ о бириси тюфекни кѣолуна алгѣан сонъ кѣоркѣу тюшти экиленди. Сонъ: «Ёкъ, мен атмам. Эки арада баланы ольдюрип, кѣан кѣарышкѣысын тѣлемеге меджбур болырман», — деди. Онда Эдиге: «Айса, сизге кѣоян тиймей. Авны бир аткѣанда ургѣан киши мергин авджы сайыла. Йырты артындан ит салып, я да бизим улус ханымыз

Токътамышдай кѳуш салып, ав эткен киши авджы сайылмай. Кѳуш йыртысы кѳушнынъ, ит йыртысы итнинъ», — деди. Сонъ, бу сѳзлер Токътамыш ханнынъ кѳулагъына барып етти. Токътамыш хан: «Ким экен о шай тѳре кескен бала?» — деп сорады. «О бала, сизге селям бермеген анавы бала, Эсебий кѳартнынъ кендже улы Эдигедир». «Ярамаз бала экен, — деди хан. Бир даа ондайын сѳз эшитсем, тилини кестирирмен!».

Ханнынъ бу хышымлы сѳзлери койге де етип кельди. Онда Эсебийнинъ бикеси байынайтты: «Эсебий! Бу бала бизим башымызгъа бир иш чыкъараджакъка ошай. Оксюз кѳозу беслесенъ, авузынъ-бурнынъ май болыр, оксюз бала беслесенъ, авузынъ-бурнынъ къан болыр, деп нечиле айтылмагъан. Сен бунынъ сонъуны бир тюшюнип корь!» — деди. Бундан сонъ, Эсебий бир баш аталыкъкъа барып, апакай шай-шай деп айта, деди. Аталыкъ айтты: «Арув айса! Кетир баланы магъа. Ондан сонъ койге къайт да, чѳльде кѳой кѳарагъан кенджемни Темирханнынъ айгъавул джетеси эсир алып кеткен деп, джылав кочюр», — деди. Сонъ Эсебий Эдигени кетирип аталыкъкъа бере. Койге къайткъан сонъ да, аталыкъ огреткен сѳзлерни айтып, бакъырыкълап джылав кочюрелер.

Аталыкънынъ беш улу бар эди. Эдигени оларгъа кѳошты. Ана-бабадан оксюз къалгъаны, еринден-сувундан кѳопкъаны ичюн, адыны Кѳобукъ ул кѳойдылар.

Кель заман-кет заман, аталыкънынъ уллары джигит болдылар, бирер-бирер Токътамыш ханнынъ къапысына кѳоруджы олып бардылар. Арадан беш-он йыл кечти, Эдиге де он алты яшына кельди. Сонъ, о да Токътамыш ханнынъ къапысына кѳоруджы болып барды, хан хызметинде булунды.

Къыркъ кѳоруджы эр кунъ Токътамыш хангъа саба хайыргъа баралар. Отуз докъуз кѳоруджы бирер-бирер кирип чыкъалар — хан къыбырмай отура. Энъ сонъунда кѳоруджыларнынъ энъ яш сойы, Кѳобукъ ул кире — Токътамыш хан атылып, бель устю тура.

Ана шимди бикеси Токътамыш хангъа айта: «Отуз докъуз кѳоруджы кирип, сагъа селям айта, сен къыбыр этмийсинъ. Энъ яш кѳоруджы киргенде бель устю турасынъ. Ничюн шай этесинъ?» — дей. Токътамыш хан: «Ёкъ, хайыр, мен ич еримден турмайман!» — дей. Бикеси онгъа: «Мен айса сагъа сенинъ бель устуне тура экенчинъни исбат этермен», — деди.

Сонъ, бир кунъ хан озюнинъ корюниш одасында кѳоруджыларны къабул эткенде, бикеси хангъа дуйдырмай онынъ халатынынъ этегини тюревичинен миндерге тюреп салды. Бирер-бирер кѳоруджылар кирип, саба хайыр айттылар хангъа. Хан къыбыр этмедди. Энъ сонъунда

Къобукъ ул кирди. Хан учып тура кельди. Артындан астындаки миндер де котерильди. Сонъ хан къаний болды ки, Къобукъ ул киргенде о еринден тура экен. Къобукъ ул чыкъып кеткен сонъ, хан бикесинден: «Сенинъ айткъанынъ чын экен, мен еримден тура экенмен. Бунынъ себебини бильмейсинъми?» — деп сорады. Бикеси: «Мен беллесем, сагъа бу Къобул улдан бир яманлыкъ келеджек, сен де оны ичинъ билен дуясынъ», — деди. Токътамыш хан сёйледи: «Бизден аталыкъкъа бир яманлыкъ эрмеди ки, ничюн онынъ несилинден бизге яманлыкъ келеджек?» — деди. «Мен бильмеймен, амма сенинъ еринъден учып тура кельгенинъ — бу зая шей тугуль. Мында бир сыр бар», деди бикеси. Хан да онъа: «Айса, буны аталыкъкъа дуйдырмай тындырсакъ болмазмы?» — деди. Бикеси: «Апшкъма. Сен даа ачыкъ-айдын бильмийсинъ ки, о сагъа явмы, эльми (достмы). Бельки сагъа эльдир, достунъа къаршы тураджакътыр. Башта мен онынъ биз явмы, достмы экенин аныкълап алайым», — деп джевап берди.

Сонъ ханнынъ бикеси бир бардакъ къатыкъ уюттырды, кетирип хангъа берди. «Ярын эртен шу бир бардакъ къатыкъ янынъда турсын. Сен Къобукъ ул кирип кельгенде бардакънынъ устюнден къаймагъын пармакъ билен бурып алып къап да, бардакъны Къобукъ улгъа бер. О, къатыкъны къарыштырмай ичип болмаз, ничюн десенъ къатыкъ бавурдайын тыгъыз уюгъан. Бакъайыкъ, о къатыкъны насыл этип къарыштырыр экен?» — деди.

Ана сонъ эртеси куню отуз докъуз къоруджыдан сонъ саба хайыргъа Къобукъ ул кирди. Хан къатында тургъан бардакъны алды да, устюндеки къаймагъыны пармагъынен бурып алып къапты. Сонъ бардакъны Къобукъ улгъа узатты: «Ич къатыкъны, Къобукъ ул!» — деди. Къобукъ ул бардакъны алды, янындан къамасыны чыкъарды, къаманынъ темиринен къатыкъны къарыштырды, бардакъны котерип ичти. Къобукъ ул кеткен сонъ, бикеси хангъа: «Сенинъ къатыкъ устюндеки къаймакъны пармакъ билен бурып алып, къапкъанынъ: — Мен сенинъ башынъны мына булай этип, бурып алырман — дегенинъ эди. Къобукъ ул, бунынъ манасыны аңлады. Сагъа дост болса, о къатыкъны къамасынынъ сапы билен къатыкъны темири билен къарыштырып: — Сен меним башымны бурып алгъандже, мен сенинъ ичеклеринъни къанджал билен, мына бундай этип, къараштырырман! — деген болды. О сагъа эль тугуль экен, о сагъа яв экен, душман экен», — деди.

Токътамыш ханнынъ эр вакъыт янынъда юрген бир джандашы бар экен. О киши Кенегес урувындан эди. Ханнынъ эпси авалесини о япа, эр вакъыт ханнынъ янынъда булунгъаны ичюн, онъа Джанбай дей эдилер. Шимди хан Джанбайны къатына чагъырды, сёйледи:

«Сен магъа бир киши тап. О, сыр бильген, чынълап толгъамагъа¹ бильген джырав² бир киши болсын. Шекленген бир адамым бар», — деди. «Айса, мен сизге Шулубайнынъ къызы, Томалай Арувны алып келейим. Дюньяда не къадар толгъавджы кишилер бар — оларны пу къыз биле», — деди Джанбай. Сонъ, о барып, Томалай Арувны ханнынъ сарайына алып кельди. Томалай Арув айтты: «Хан азретлери! Сизинъ керегинъизге ярайджакъ, гизли шейни ачыкъ этип бере биледжек, чынъларыман сыр ачып, сизге душманынъызны тутып бере биледжек киши бар». Хан сорады: «Кимдир о киши?» Томалай Арув: «О киши сартгыр, Хыва Бухара еринде яшайдыр,» — деди.

О заман хан Джанбайгъа айтты:

Юз докъсанны япагъан,
Дзувлары бошагъан.
Иегине инджи салып
Чий джибекмен къуршагъан
Кумюштен къапакъ яптыргъан
Арышкъа мончакъ такътыргъан,
Самурдан тон джабынгъан,

Тюм-тюз джолда абынгъан.
Отуз ханны оздыргъан
Учъ юз кольмек тоздыргъан,
Аткъа минер алы ёкъ
Араба минер элеми ёкъ.
Сачлары ап-акъ къыравдыр,
Ады Сабра джыравдыр, — деди.

Сен меним Джанбайымсынъ,
Къаранлыкъ гедже Айымсынъ.
Кенегес эльнинъ отюсинъ
Кёр биенинъ сютюсинъ.
Арабагъа джегип эки тай
Бар кетир, оны, Джанбай! — деди.

Ана плимди Токътамыш хан Сабра джыравны кетирмеге эки ат еккен къошар араба йиберди. Джанбай белини тартып бууды, къошаргъа тешек-ястыкъ алды, сал къайыкъман Идилъни кечти, къамчы

¹ толгъамакъ — сыр ачмакъ

² джырав — чынъджы, кедай



саллаштырып Хыва Бухара юртуна ёнелиш алды. Бу арада, Сабра чынъджы ремиль тѣкип¹ отура эди. О, ремильге бакъып къарысына айтты:

Улус Джучы ханындан
Хазарнынъ сырт ягъындан
Сыптай сѳйрю борк кийип
Ат къуйругъын шарт тююп
Эки боз ат джектирген,
Арабагъа гуллер тѣктирген,
Арышкъа демир къакътыргъан
Къолдыкъкъа дуа такътыргъан
Атлары къамчы зорындан
Энтигип джорта, еледир
Сабра деген джыравгъа
Бир имансыз келедир.

Шай дегендже Джанбай келип чыкъты, Токътамыш ханнынъ селямынен риджасыны Сабраджыравгъа еткизди. Токътамыш ханнынъ адыны эшиткен сонъ, Сабра джырав еринден учып тураджакъдай болды, туралмады. Джанбай онъа къол берди, турсатты, къолтугъына кирип, алып барып къошаргъа отуртты. Атларны айдаштырып, Идиль бетке ёл алдылар. Идильни кечкен сонъ, Токътамыш хан оларны къаршылап чыкъты, ордукентке алып кельди. Хан чынъджынынъ:

Къолтугъына кирди, дей
Тѳрден орун берди, дей
Къонакъ ашы бермеге
Къона-мезе къурды, дей
Хан джыравгъа къол берди
Бал савутын бол берди
Эмен саплы къадемен
Учь-дѳрт кере бал (буза) берди.

Онъ якътан берди бир къаде
Сол якътан берди бир къаде
Къарт къадени алды, дей
Бошатып алдына салды, дей
Балдан башы айланып
Чала саргъуш болды, дей
Бал бѳйрекке тюшти, дей
Бѳйреги балгъа пишти, дей.

¹ ремиль тѣкип — фал бакъып

Сабра чынъджы сайдан, сайгыъдан, балдан, сѣзден башы айланды, эсирди. Онда Токътамыш хан Джанбайгъа буюрды: «Айт огъа, чынъласын!» — деди. Сабра джырав чынълады:

Байрачлы узун айдар Косе бай
«Мен де джыравман», — дей экен,
Болса — болгъай.
Акъсыргъанда къобуз телин къопарыр
Джюткюргенде май чыракъны авдадыр
Май чыракъны джагъайым дегечи
Джыйында бала-чагъа юкълап къалыр.
Къабузгъа тель тартайым дегечи
Акъай апайын сюйрер де, таркъалыр.

Токътамыш хан Джанбайгъа: «Айт, огъа, бизге керек шейни айтсын», — деди. Сабра джырав толгъады (чынъ айтып сыр ачты):

Идилъде болды секиз хан
Джайыкъта болды докъуз хан
Босагъасы сом алтын
Уйкени эди Чынгъыз хан
Уфакъ ханнынъ ириси
Ири ханнынъ уфагъы
Къартбабанъ да хан эди
Беримге саран эди
Альмы къатты болса да
Берими сендай тугуль эди.

Токътамыш хан Джанбайгъа сѣйледі: «Къарт, я айнеджилик эте, я да анълагъан шейи ёкъ. Ёкъсам, ичкени бек аз болды, я бек коп болды. Онъа балабан бойнузны толдурып, бир баллы боза даа бер. Эгер, шимдигеджек ичкени аз болса, къарарына келир, коп болгъан болса, эсирип олер», — деди. Онда сабра джырав хангъа къаршы турды да, чынъ айтты:

Эй, падишам, эй, ханым!
Къыйнавгъа салдынъ къарт джаным
Хывадан кельген сартынъман
Бир оледжек къартынъман
Иче, иче тоймайман
Яш джаныны къыймайман
«Толгъа!» — дейсинъ, тоймайсынъ
«Айт!» дейсинъ де, къоймайсынъ.
Айтмагъа тилим бармайдыр
Айтмасам да болмайдыр
Буюк болсын сый, ханым



Джигитлерни джый, ханым
Чагыр, кетир, корейим
Аслын айтып берийим.

Онда Токътамыш хан Джанбайга айтты: «Айса, сен бар, айт, даа мал сойсынлар, даа къазан ассынлар. Сен озюнъ бар да, Аргъын мырза, Барын мырза, бир де Къобукъ улны мында алып кель!» — деди. Сонъ, эписи шей хан айткъандай олды, дернек (къонушув) пек балабан болды, пек чокъ йигитлер топлады. Джанбай барды, Къобукъ улны тапты: «Сен билесинъми, бу халкъ не ичюн джыйыла?» — деди. Къобукъ ул айтты: «Бильмиймен», — деди. «Айса, сен буны биль! Сен Эдигесинъ, Къутлукъаянынъ улысынъ, ханнынъ душманысынъ. Бу Сабра джырав сени толгъап-толгъап ханга бильдиреджек. Олар сага агъувлы бал берип, сени ольдюреджеклер. Сен бал толу савутны алганда оны аселеттен бурнунъа ур. Сонъ «Бурнум къанады!» деп савутны биревге бер де, озюнъ чыгып къач. Шимди барып кирип отураджакъсынъ», — деди Джанбай.

Ана энди Аргъын мырза, Барын мырза, бир де Къобукъ ул Сабра джыравнынъ къаршысына отуртылдылар. Сонъ Сабра чынъджы джигитлернинъ бирине сёз къатты: «Хан сага батырлыгъынъ корьсет десе, батырлыкъны къалай этерсинъ?» — деп сорады. Джигит айтты:

Язда ирккен сув болып
Къалага (шеэрге) ташып кирермен
Къавданны алган ат болып
Койлерге от берирмен
Сарттан эскен борадай
Аскерин къувар, сюрермен
Малын-баркъын басар да
Кетирип ханга берирмен
Дал къылычым котерип
Арслан болып отермен.

Онда Сабра чынъджы, савутка бал толдурып узатты: «Аферин, Аргъын мырза, дызман джигит экенсинъ! Котер балны!» — деди. Аргъын мырза савутны алып, балны котерип ичти.

Энди Сабра къарт джигитлернинъ экинджисине сёз къатты: «Бирев ханынъа душман болса, сен огъа нетерсинъ?» — деди. Барын мырза айтты:

Ханга душман фитнеджи
Эльге, юртка джав болып
Фитне дуйса джурегим
Лав этер де, къав болып

Алгъакъ-булгъакъ бойнуна
Серт чылбырым бав болыр
Башын кесип кетирсем
Хан джуреги дав (кучъло) болыр
Хан джуреги дав болса
Элим-кунюм (халкъым) сав болыр
Элим-кунюм сав болса
Джигит адым чав (намлы) болыр.

Сабра чынджы экинджи савутны толдурып бу джигитке берди:
«Аферин, Барын мырза! Садыкъ джигит экенсинъ! Котер савутны!»
— деди. Барын мырза балны алып, симирип ичти.

Энди исе, Сабра къарт Къобукъ улгъа къарады: «Бирев сагъа душман
болса, сен огъа не этерсинъ?» — деди. Къобукъ ул айтты:

Арсайып аткъа минермен
Кедегисинъ болермен
Озь къанына тойдырып
Къазанчыны тёлермен
Мангърагъан къойдай этермен
Боркдай кийип кетермен
Къыргый болып учарман
Чагъаракътан къачарман
Бир кунъ бола келир де
Бабам очюн алырман
Эгер дегеним этмесем
Атамнынъ арам улы болырман.

Онда Сабра джырав толгъады:

Аргъын ул да, Барын ул
Батыр экен Къобукъ ул.
Къоллары узун корюне
Мергин экен Къобукъ ул
Эрини (дудагъы) юфкъа корюне
Сёзге уста Къобукъ ул
Пармагъы джездай майышкъан
Чебер экен Къобукъ ул
Сачы Айдай балкъыгъан
Асыл экен Къобукъ ул
Бети нурдай тегюльген
Тёре экен Къобукъ ул
Энсиз-сансыз ат салып
Сюре келир Къобукъ ул



Къутлукъая къаныны
Сорай келир Къобукъ ул
Айланмагъан кенъ юрткъа
Бельги тикер Къобукъ ул
Бириктирген топрагъынъ
Йыртып сёкер Къобукъ ул
Къашыкълап джыйгъан малынъны
Чёмючлеп сачар Къобукъ ул
Къапыда турар болсангъыз
Пенджеренден къачар ол
Эгер мен киши танысам —
Къутлукъаянынъ улы
Эдигедир шу Къобукъ ул! —

деди де, Сабра чыпъджи учюнджи савутны толдурып Эдигеге берди: «Котер савутны, Эдиге!» — деди. Эдиге савутны алды, абдырап ичеджек дайын болып оны бурнуна урды: «Джанбай, тут савутны! Бурнум къанады!» — деди де, савутны Джанбайгъа туттырып, явлугъыны бурнуна басып, тышаргъа атылып чыкъты. Токътамыш хан окюрди: «Тутынгъыз Эдигени!» — деди. Дув-в этип, джигитлер эписи къапы-пенджеренден тышаргъа атылып, атларына чаптылар. Эдиге энди атына минген, тоз къопарып къача эди. Джигитлер атларына ыргып минеджек болып, бир-бирининъ артындан ерге йыкъылдылар, эписининъ эгерлери авуп тюшти. О десенъ, эписининъ айылы (эгер къайышлары) кесилген экен. Токътамыш хан да тышаргъа чыкъты, амма батырларынынъ бу алыны корип, чырайы къап-къара кесильди. Сонъ, Джанбайгъа айланып: «Джанбай! Ничон къачырдынъ Эдигени?» — деп къыгчырды. «Оны мен къачырмадым!» — деди Джанбай. Токътамыш хан хышымланды: «Эдигени сен къачырдынъ! Атларнынъ айылларын сен кестинъ! Магъа душманлыкъны сен эттинъ! Эдигени бугунъ тапып кетир! Кетирмесенъ озюнъ, бала-чагъанъ, къары-къурткъанъ — эписине къылыч! Сёз битти!» — деди.

Джанбай джылай-джылай атына минди, эки де улыны къатына аякъдаш алды да, Эдигенинъ пепинден къувып кетти. Эдигенинъ изинден кетип, Идиль къыйырына кельдилер. Корьселер — Эдиге энди сувнынъ оте ягъына кечкен эди. Озеннинъ бу къыйырындан туруп Джанбай айтты:

Къайтсана, Эдиге, къайтсана,
Хангъа савлукъман къал айтсана.
Кенары юфкъа сары къадемен
Бал бередир, ичсене!

Озеннинъ оте ягъындан турып Эдиге айтты:

Къайтмам да Джанбай, къайтмам да!
Хангъа савлукъман къал айтмам да!
Кенары юфкъа сары савутман
Бал берсе де, ичмем де —
Эриним яра болгъандыр.

Джанбай айтты:

Къайтсана, Эдиге, къайтсана!
Хангъа опыкенъни айтсана!
Салары онынъ сандалдай,
Саврусы улькен тебедай,
Аягъы терек, бойну эрек
Ат бередир, минсене!

Эдиге айтты:

Къайтмам да, Джанбай, къайтмам да!
Хангъа опыкемни айтмам да!
Салары анынъ сандалдай,
Саврусы улькен тебедай,
Аягъы терек, бойну эрек
Ат берсе де минмем де —
Путыма чыбан чыкъкъандыр.

Джанбай айтты:

Къайтсана, Эдиге, къайтсана!
Хангъа хайырлы сѣз айтсана!
Хан сагъа тюймеси сом алтын,
Бир коръмеси бинъ алтын,
Этегинден енъи узун
Тон бередир кийсене!

Эдиге айтты:

Къайтмам да, Джанбай, къайтмам да!
Хангъа хайырлы сѣз айтмам да!
Хан магъа тюймеси сом алтын,
Бир коръмеси бинъ алтын,
Этегинден енъи узун
Тон берсе де киймем де —
Бойнума яра чыкъкъандыр.

Джанбай айтты:

Къайтсана, Эдиге, къайтсана!
Хангъа: — Багъышла! — деп айтсана!
Хан сагъа сары сансардан



Борк бередир, кийсене!
Коксюнде зырх, ат минип,
Урушларгъа атланып,
Хандан алтын мааш алып,
Дюнъя сефасын сюрсене!

Эдиге айтты:

«Къайтмам да, Джанбай, къайтмам да!
Хангъа: — Багъышла! — деп айтмам да!
Хан магъа сары сансардан
Борк берсе де киймем де —
Башыма муюз чыкъкъандыр!
Коксюмде зырх, ат минип
Урушларгъа атланып
Хандан алтын мааш алып
Дюнъя сефасын сюрмем де:
Кенъ дюньядан не файда,
Тар этик аягъым сыкъкъан сонъ?

Джанбай Эдигенинъ къайтмайджагъыны анълагъан сонъ, окюрип агълады: «Сен къайтмасанъ, хан меним озюмни, бу улларымны, къары-къурткъа, сой-сопымны — эписини къылычман чаладжакъ. Айса, сен озюньмен мынав эки улымны да алакет — бареме булар сав къалсыплар», — деди. Джанбайнынъ уллары урбаларыны башлары устуне байладылар, атларыны джугенинден джетип сувгъа топштилер, ялдап озеннинъ оте ягъына кечтилер. Сонъ атларына минип, къылычларыны чыкъарып, Эдигеге уджом эттилер. Эдиге къачты, биревини окънен урды, экинджиси къоркъып, токътады. Эдиге онынъ устуне ат чаптырып келип, къылычнен башыны къакъып алды. Джанбай Идиляннинъ бу джагъасында турып, улларынынъ аджыныкълы олжомини корип, окюр-окюр агълады.

Эдиге айтты:

Кемал улу кок Джанбай!
Кери сёзти ит Джанбай!
Сен къаранынъ улысынъ
Пул бергеннинъ къулысынъ
Къайт энди, Джанбай; къайт энди
Ханынъа бу сёзюм айт энди:
Шу кетиште кетермен
Темирхан магъа къол берсе,
Худайым магъа ёл берсе,



Шу Токътамыш ханынғы

Аякъ асты хор этермен! —

деди де, атына къамчы урып кетти. Джанбай сув кечип, эки улынынъ олюсини алды, джылай-джылай хангъа кельди. Сонъ Токътамыш хан инанды, Эдигени Джанбай къачырмады деп.

Сонъ Токътамыш хан аталыкны чагъыртты. «Аталыкъ! Мен сизни сую эдим. Озюмден юксек сая эдим. Мен сизни аталыкъ туттым, тонгъучым Джелалны сизге адакъ эттим. Сиз исе, магъа хиянет эттинъиз: Къуртлукъаянынъ йылан баласыны меним уюме джибердинъиз. Мен энди бильмеймен кимге ишанмагъа, кимге аркъа таямагъа. Сиз энди кетинъиз!» — деди.

Аталыкъ чыкты кетти. Сонъ онынъ уллары, олар беш джигит эдилер, бабаларына айттылар: «Энди боладжакъ шей болды. Хан бизни де душман тутты, энди бизге де бу юртта яппайыш болмаз. Айса биз де кетейик Эдигенинъ артындан: я девлет башымызгъа, я къузгъун лешимизге», — дедилер. Кеттилер. Идильни кечип чельде Эдигени таптылар. Сонъ алты къардаш бир урув болып, чадыр къурып, от якъып, авджылыкъ этип, аш пиширип эглендилер.

Бир кунъ олар аш пиширип отура эдилер, бир даа къарасалар — бир атлы, бир кийикни къувып келеята. Эдиге аман атына минди, кийикнинъ ёлуны кестирип чыкты. Кийик бир тыныш туракъсады, шай дегендже, атлы етип кельди, окъ мезгилгине (месафесине). Эдиге де етип кельди, окъ мезгилгине. Экеви де нишангъа алып аттылар — Эдиге кийикни алдындан урды, о киши артындан урды. Эки окънынъ демир уджлары бир-бирине келип тиркельдилер. О киши аттан тюшти, чекти кийикни озюне. О адам деди ки: «Бу меним авым, мен оны бермем сагъа!» Эдиге деди ки: «Ёкъ, бу меним авымдыр! Мен де бермем сагъа!» Шай деп, чеккелешип тура эдилер, сонъ Эдигенинъ агъалары етип кельдилер. О адам коръди ки, булар чокълар: «Айды, болсын кийик сизге!» — деди. Эдиге айтты: «Ёкъ, оны мен де урдым, сен де урдынъ. Ортадан болейик», — деди. Ортадан больдилер кийикни: арттан ургъаны ичюн, о адам артыны алды, алдан ургъаны ичюн Эдиге алдыны алды. Сонъ Эдиге сорады: «Сен кимсинъ? Кимлерден боласынъ?» О киши айтты: «Мен Кабертиннинъ аскеринден боламан», — деди. «Я о Кабертин ким?» — деп сорады Эдиге. Аскер айтты: «Кабертин черкезлернинъ бир батырыдыр. О Темирханнынъ къызыны хырсызлап, алып къачты. Шимди Темирхангъа озюни туттырмай, чельде-тавда къачып юре», — деди. Шай деп, къалмыкъ атына минди де, озюнкилерине кетти.

Сонъ Эдиге агъаларына айтты: «Биз сыгъынакъ истеп, Темирхангъа



бараджакъ бола эдик, амма озюмизни насыл танытаджагъымызны бильмеймиз. Мына Кабертин, Темирханнынъ кызын алып къачкъан. Эгер Кабертиннинъ артындан кетип, Темирханнынъ кызыны къуртарсакъ, бизге Темирхангъа бармакъ къолай боладжакъ», — деди. Шу анъ атланып, олар къалмыкъ аскерининъ артындан кеттилер.

Кетип бараятыр эдилер — алдларына бир йылан чыкъты. Къувдылар йыланни, корьдилер, алты башы бар, бир къуйрыгъы бар. Йылан къачты, барып бош ювагъа сокъулды. Бир башы кирди, беш башы тышарыда къалды. Йыланни ольдюрдилер. Кене кете эдилер — бир йылан даа расткельди. Къувдылар йыланни, корьдилер: алты къуйрыгъы бар, бир башы бар. Йылан къачты, барып бир ювагъа сокъулды. Башы кирди, артындан алты къуйругъы да кирди. О йыланни ольдюралмадылар. Бираз даа юрдилер, сонъ Эдиге токъталды, айланып агъаларына сёйледі: «Бу йыланлардан бир дере алдынъызмы?» — деди. Агъалары: «Ёкъ, бир шей анъламадыкъ», — деди. Эдиге сёйледі: «Биринджи йыланннъ алты башы, бир къуйругъы бар эди. Бир башы кирди ювагъа, беш башы кирмеди — биз йыланни ольдюрдик. Экинджи йыланннъ бир башы, алты къуйругъы бар эди. Башы ювагъа кирди, алты къуйругъы да онынъ артындан кирди, биз оны ольдюралмадыкъ. Бундан, шуны анъламакъ керек ки, биз алтгъымыз да баш олсакъ, бир иш битиралмамыз. Биримиз баш олайыкъ да, къалгъанымыз къуйрукъ болайыкъ», — деди. Агъалары: «Арув айттынъ! Сенден артыгъымыз ёкътыр — сен баш бол!» — деди. Шай этип, Эдиге оларгъа баш олды.

Ана шай этип, олар къалмыкънынъ изинден кетип, Кабертиннинъ аскерини корьдилер. Эдиге агъаларына: «Сиз бу ерде къалтынъыз, мен барып Кабертиннинъ аскерине къошулайым. Аскерден бир къона артта юрюнъиз — олар бугунъ геджелеген ерде сиз экинджи геджеси къонынъыз. Мен онда ашчы, къазанджы болмагъа тырышырман. Қазанджы болсам, сизге оджакъта емек къалдырырман », — деди. Шайтип, агъалары къалдылар, Эдиге исе, гедже барып Кабертиннинъ аскерине къошулды.

Шимди Темирханнынъ кызы Бердибикеге аскерининъ бириси гизли мектуп кетирди. Бабасы Темирхан кызына: «Кызым! Мен Кабертин устуне къылыч салып, сени къуртарайым дегендже, о сени ольдюрим. Шимди сени Кабертинден къуртарса, Эдиге къуртараджакъ. Эдиге Токътамыш хандан къачкъан, бизге келе экен. Шимди Кабертин аскерине къошулгъан. Эдигени таныджакъ олсанъ: о бинъ кишимен къошулып отурса да, энъ юксек ерде отурыр. Эм асла такъыр ерде отурмаз — илле астына я чекмен, я боркюни салыр, я да къавдан

(къуругъан от) юлкъып салыр — ич такъыр ерде отурмаз. Эдигени бундан танырсынъ», — деп язгъан.

Бердибике мектюпни окъугъан сонъ, чадырдан чыкъып аскерлер арасында козь кездирип, Эдигени къыдырды, айырды эталмады. Сонъ акъшам болды, аскерлер эписи ятты. Кабертин де юкъламагъа ятты. Бердибике чадырдан чыкъты, корьди ки: алчаракъ бойлу, къара сынлы, чымры тенли, кескин бакъышлы бир аскер къавдан юлкъып тюбюне салгъан, отура буларнынъ чадыры янынъда. Бердибике онынъ къатына барды, онъа сёз къатты: «Сен кимсинъ? Ничюн чадырдан козь узьмей отурасынъ?» — деди. Аскер айтты: «Мени сизинъ чадыргъа къаравул салдылар», — деди. Бердибике: «Ялан айтасынъ. Кабертин чадыргъа къаравул салмай, ничюн десенъ, о биревден къоркъмай. Сен Эдигесинъ, мен билемен», — деди. «Эбет, мен Эдигемен», — деди о. Бердибике ялварды: «Эдиге! Мени къуртар Кабертинден!» — деди. «Сен айт, о мени къазанджы этип алсын, о ягъыны мен озюм къарарман», — дей Эдиге.

Экинджи куню Бердибике сёйледиди Кабертинге: «Сенинъ къазанджыларынъ шорбаны датсыз пиширелер. Мен бездим оларнынъ ашларындан», — деди, Кабертин: «Айса, озюнге ярагъан адамны къазанджы сал», — деди. Сонъ Бердибике: «Айса, мына бу татар пиширсин шорбаны», — деп Эдигени корьсетти. Шай этип, Эдиге къазанджы, яни ашчы олды.

Энди эр акъшам, Эдиге оджакъ тюбюнде тюрлю-тюрлю ашлар коме агъалары оны чыкъарып ашайлар: «Ана энди ашымыз бар, ишими. де болыр», — деп къуваналар. Олар Кабертиннинъ аскери артындан иерип, келе берелер.

Сонъ бир кунъ, Эдиге Бердибикеге сёйледиди: «Айт Кабертинге, атлары отны ятып отласын, сувны юрип ичсинлер», — деди. Бердибике Кабертинге: «Сенинъ атларынъ отны юрип отлай, ашагъаны аягъына кете, тавланъп болмайлар. Келир бабам, басар сени — сенинъ атларынъ урушкъа ярамаз. Айт аскеринге — атлар отны ятып отласынлар, сувны барып озенден ичсинлер», — деди. Кабертин аскерлерине буюрды: «Атларгъа от чалып берингиз, олар ятып ашасынлар. Куньде эки кере Идильге сувлаккъа алып барырсынъыз», — деди.

Аскерлер Кабертин буюргъаны киби эттилер, от чалып атларгъа бердилер. Сонъ атлар сувсадылар. Шимди аскерлер эписи атларыны сувармагъа Идильге кеттилер, дуракъта бирев къалмады. Кабертин де чадыргъа кирди, ятты юкълады.

Эдигенинъ метий арабагъа екип шорбалыкъ сув тышыгъан бир бакъыравукъ боз аты бар эди, башкъа ат къалмагъан эди. Минди

бакъыравукъ бозгъа, алды окъ-яйыны, кельди чадыр янына. Юкълап яткъан Кабертинни костерип, Бердибикеден: «Бунынъ бутюн тени темир зырх ичиндедир, окъ кирер ери бармы экен?» — деп сорады. «Окъ кирер ерини корьмедим. Тек эки къолтугъынынъ тьбюнде тешиклери бардыр», — деди Бердибике. «Айса, котер къолуны юкъарыгъа мен атайым!» — деди Эдиге. Бердибике Кабертиннинъ къолуны котерди, Эдиге окъны тешикке атты, окъ барып Кабертиннинъ юрегине кирди. Сонъ экиси бакъыравукъ боз аткъа миндилер — къачаджакълар. Кабертин джан талашып, чадырны йыкъты, къолуны узатып, бакъыравукъ атнынъ къуйругъындан тутты да, оны озюне чекмеге башлады.

Бакъыравукъ боз, аякъ тиреп бакъырмагъа башлады. Эдиге нишлейджегини бильмеди. Бердибике къычырып: «Белиндеки къаманы ал да, кес атнынъ къыл къуйругъын!» — деди. Эдигенинъ эси башына кельди, белиндеки къаманы алды, бакъыравукъ бознынъ къыл къуйругъын кести. Ат бир абынды, йыкъылды. Булар тура кельгенче, Кабертиннинъ де джаны чыкъты. Сонъ Эдиге: «Сен мында тур, мен барып аскернинъ ишини битирейим», — деди.

Барды, аскернинъ янына, корьди: аскерде бир къавгъа бар! «Не ичюн къавгъа этесинъиз?» — деп сорады. Аскерлер: «Къавгъа сенинъ устюнде. Бир талайымыз айтамыз: Бар болсын Эдиге, юрсин! — деймиз. Бир талайымыз: ёкъ олсын Эдиге, кетсин! — дедилер. Эдиге: «Бир киши ичюн бир алай (полк) аскер къавгъа этип отураджакъмы? Бар болсын Эдиге! дегенлер, бир якъ болсын, ёкъ болсын Эдиге! дегенлер, бир якъ болсын. Эки якъ да озъ ёлуна кетер, vessелям!» — деди. Аскерлер айырылыштылар. Сонъ Эдиге озъ ягъыны туткъан аскерлерге къошулды да, озюне къаршы кеткенлерге бас этти. Оларны санчты, кестилер! Сонъ Бердибикени янларына алдылар, барып аталыкънынъ улларыны да таптылар. Эдигемен Бердибике тюштилер аскер алдына, ёлландылар Темирханнынъ юртына.


Шимди булар Темирханнынъ ордукентине якъын кельдилер, сонъ мудждеджилер чаптырып, Темирхангъа кеттилер. Сарайгъа келип: «Козюнъиз айдын! Эдиге Кабертинни ольдюрди, къызынъызны къутарды!» — деп хабер бердилер. Темирхан Эдигемен къызыны къаршылап, ёлгъа чыкъты: «— Къызым Эдигенинъкидир!» — деп илян этти. Хан балабан той япты, Бердибикени Эдигеге берди. Сонъ киевине елемлик багъча ичинде къурулгъан бир сарайыны берди. Эдигемен Бердибике анда яшадылар. Севишип, ойнашып бир йыл къадар юрдилер, сонъ бир огъулары болды. Адыны Нураддин къойдылар.

Шай дегендже, арадан он дёрт йыл кечти, Нураддин джигит яшына

кельди. О, бир озю болып, эрке осьти, ондан отьрю ашыкъ ойнавны даа ташламай эди. Шимди о эки мырза баласыман ашыкъ ойнакта эди. Бир даа араларында къавгъа чыкъты. Нураддин о огъланларнынъ бирисини урып джылатты. Сонъ о огъланнынъ бабасы кельди, улындан сорады: «Ничюн уруштынъыз сиз?» — деди. О огълан айтты: «Биз ашыкъ ойнаймыз, о тызым эте. Бир онъбай ашыгъы бар — татарлардай этип, онынъ ортасыны тешкен, ичине къуршун иритип къуйгъан. Шимди о ашыкъ чик, пик, алчы, ялчы — недай истесе, ондай тура. Мен: бизде ашыкъ ичине къуршун къуймайлар, — дедим, о бизни урды», — деди. Мырза Нураддинге ачувланды да: «Эй сен, оръ корьмеген бадракъ (батрак), татарнынъ баласы! Сен бек батыр болсанъ, барып озъ юртынъда джигитлик эт! Юртунъ, малынъ къайтарып ал!» — деди. Нураддин урды ашыкъларны ерге, кельди бабасына. Келип корьсе, бабасы Эдиге терек тюбюнде янгъыыз, мугъайып отура эди. Нураддин кельди бабасынынъ янына, сорады: «Бабам, ничюн шай тюшкюн отурасынъ?» Бабасы Эдиге: «Ничюн тюшкюн болмайым! Меним де юртум бар эди, бабам бар эди, халкъым бар эди. Токътамыш хан бабамны ольдюрди, мени къувгъун этти. Мен мында яшайышкъа алдандым, эр шейни унуттым. Шимди яшлыгъым кечип кетти — юртумны барып коралмадым, бабамнынъ очюни алалмадым. Мен мугъаймай, ким мугъайсын!» — деди.

Нураддин айланды да, къартбабасы Темирхангъа кетти. Барып къапысына джылады. Темирхан чыкъты: «Не джылап отурасынъ, яврум? Не керек сагъа — алтынмы, къуралмы, къошунмы, эгленджеми?» — деди. Нураддин сөйледі: «Мен бабам ичюн джылайман. Меним бабам Эдигени Токътамыш хан къувалагъан, къартбабам Къуртлукъая бийни ольдирген. Оларнынъ очюни алмагъан эвлят насыл болыр? Магъа къол тутынъыз — барып бабамнынъ очюни алайым», — деди. Онда Темирхан айтты: «Аферим, улым, бек арув этерсинъ! Бар бабанъа айт — къурал-ярагъ, тутъ-байракъ, не керек эр шейни текмиллеп берсин сагъа. Изинни мен бердим. Ал очюнъни!» — деди.

Нураддин бабасына къайтты, къартбабасы деген эр шейни, онъа сөйледі. Эдиге сорады: «Къач тюмен (10 бинъ аскер) керек сагъа?» Нураддин айтты: «Магъа тюмен аскер керекмей. Мен Токътамышны ёкъ этермен. Эгер ишим онъ кельсе, Токътамышнынъ сонъ окюнчи зияде болыр. Эгер ишим онъ кельмесе, меним окюнчим аз болыр. Сиз магъа дёрт уюръ джылкъы беринъиз: бир топ къара джылкъы, бир топ ала джылкъы, бир топ чал джылкъы болсын, оларны да сюрюп кетмеге къыркъ джигит болсын», — деди. Эдиге огълу истеген эр бир шейни текмилъ этти, берди.



Ана шимди Нураддин кыркъ джигитмен дёрт уюръ джылкынынъ артына тыштилер, дакур салып, тоз кьопарып Токътамыш ханнынъ юртуны козылеп, кеттилер. Джайыкъ сувуны кунъдюз кеттилер, Идиль сувуны гедже кьаранлыгында кеттилер. Эртен, танъ аткъанда Токътамыш ханнынъ ордукентини дёрт якътан сарып алдылар, огъ уруш хаберини бильдирмеге эльчи салдылар: «Эдигенинъ улы Нураддин, бабасыман кьартбабасынынъ очюни алмагъа кельди. Урушмагъа алы болса, Токътамыш хан чыкъсын уруш аланына (мейданына). Ёкъса тахты башатсын» — деп бильдирюв йибердилер.

Шимди Токътамыш ханнынъ аскери аз эди. Аскер: «Биз азмъз!» — деп кьоркьып кьачты. Аскер кьачкъан сонъ халкъы да кьачты, акышамгъа ханнынъ огълу ордукентинде бирев кьалмады. Сонъ Токътамыш хан да тахтыны ташлап чыкьып кьачты. Шай болгъан сонъ, Нураддин ордукентке кирди, Токътамышнынъ кьачкъан аскерлерини тутып озюне аскер этти. Оларнынъ устюне озъ джигитлерини онбашы, юзбашы этип салды. Сонъ тахткъа минди, ондан сонъ да, бабасы Эдигеге: «Токътамыш хан кьачты, бейлик бизингъи, бабам кельсин!» — деп хабер йиберди.

Ана энди бабасы Эдиге озъ аскерлерини алып кельди. Нураддин онгъа: «Бабам! Энди бейлик бизингъи, ханлыкъ укюмини биз сюреджекмиз!» — деди. Эдиге сорады: «Огътум, Токътамыш хан кьайда кьачты, билесингъми? Нураддин: «Бильмеймен мында шимди тек яш бикеси эм де Ханике, Джанике кызлары кьалды. Токътамышнынъ озю кьачты», — деди. Онда Эдиге сёйледи: «Огътум! Сен балгъа кызыштынъ да, чибинини унуттынъ. Девлет балы ондай татлы балдыр ки, онынъ башындан чибин эксик болмай. О балны ашайджакъ болсанъ, башта чибинлерини ольдирмек керексинъ. Ёкъсам чибинлер топланыр, зувудашып башынъа келир. Башта Токътамышны абра!» — деди. Шай деп, Нураддинге озъ аскерини де берди. Янына Джанбайны да кьошты. Ёл косътермеге бир джаврунджы да (фалджы) кьошты. Шай этип, Нураддин Токътамыш ханны излемеге кетти.

Токътамыш кьача, амма онынъ кьатында да джаврунджысы бар. Джаврунджы: «Эдигенинъ улы Нураддин бизни кьувып келеятыр», — деди. Сонъ Токътамыш кьачып Кенегесте кьонды Нураддин исе Акъташта токъталды. Сонъ Токътамышнынъ джаврунджысы джаврун суегине кьарады ве: «Нураддин бир кьона (геджелев) артымызда — эпкин келеятыр», — деди. Нураддининъ де джаврунджысы джаврун кьарап: «Токътамыш бир кьона алдымызда», — деди. Нураддин айтты: «Бир кьона алдымызда экен, айса бу гедже кьонмайып, геджелейин барып басайыкъ», — деди. Олар геджелейин юрьдилер. Токътамышнынъ фалджысы айтты: «Олар бу гедже кьонмадылар, айдаштырып келеятырлар», — деди.

Сонъ олар да къонмады, къачтылар. Нураддин ич къувып еталмай.

Шимди Нураддиннинъ фалджысы айтты: «Токътамышнынъ къатында фалджысы бар — о бизни корип тура. Оны янълышлатмасакъ болмаз. Сиз буйрукъ беринъиз эписи аскерлер атларыны арткъа бурып арт-арткъа кетсинлер». Нураддин буйрукъ берди — аскерлер эписи атларыны арткъа бурып аркъагъа иерледилер. Сонъ Токътамышнынъ фалджысы джаврунъа бакъып: «Нураддиннинъ аскери айланып арткъа къайтты, энди раат бол!» — деди. Токътамыш шимди Чегерли гольде эди. О, учъ гедже юкъламагъан, чырайы топракъдай болгъан. О чадырыны къурыш ятты да, къатты юкъугъа далды.

Токътамыш хан бир ара юкъуда булунды, сонъ недендир къоркъып уяңды. Башынъы котерип къараса, танъ атаятыр экен. Сонъ ат туякъларынынъ сесини ве къыгъкырувларны эшитип, еринден атылып турды. Коръсе ки, фалджысы ёкъ, бирев ёкъ — бир уйрю аскер тоз къопарыш айт-уйт этип келеятыр. Аскер алдында да чал ат минген — Нураддин келе. Токътамыш чапты, урды озюни къамышшыкъ ичине. Къамыш аралап къачты. Къамыш ичинде яткъан къушлар къоркъып пыр-р, пыр-р учты, чивильдешип Токътамышнынъ башы устюнде айландылар. Токътамыш бир алантыкъкъа барып токътады, башы тѣпесинде уюрьильген къушларгъа къарап оларны къаргъады:

Аккъу къушлар, къаз къушлар,
Сизни сунгъур, боз къушлар
Къанатынъыз тоздырып
Башынъызны къайырсын!

Эдигенинъ улы Нураддин —
Алла бермесин мурадын
Мени юрттан айыргъач
Сизни де гольден айырсын!

Худайдан тилеймен эндиги —
Шайтандан тувгъан Эдиге
Ниет эткен ишлерин
Танърысы талкъ этсин!

Сызагъы (мешребе) бельден тюшмесин
Башы ястыкъ корьмесин.
Къартайгъанда янъгъыз къалып
Башын алып чыгып кетсин, —

шай деп тургъанда, ат кокрегинен къамышшы эки ярып, давур-салып, къолунда дал къылыгъ — Нураддин келип чыкъты. Нураддин айтты:



Ай, бийим, огърунъ Токътамыш!
Джесетинъ сараджакъ саз къамыш.
Къысмет бу экеч мен сагъа
Алладан ярдым кондермем.

Эдигенинъ улы Нураддин —
Акъ таала берди мурадын
Джан береджек сен болсанъ,
Джан аладжакъ мендирмен.

Къартбабамны кескенде,
Бабама экип куськенде
Алла адыны анъмадынъ
Бийсинмединъ кишини.

Мен бабамдан бар болдым,
Джигит, атчапар болдым.
Ана шимди дув-в кельди
Кесип алмагъа башынъны.

Онда Токътамыш айтты:

Къартбабанъ къулым эди
Ондан Эдиге тѣреди
Ондан тѣреген сен болсанъ —
Сен де меним къулумсынъ.

Сен меним къулым исенъ
Мен сизге алла исем
Очюкип эм ачувман
Ничюн устюме келесинъ?

Шимди мында янгъгызман
Кене мен хангызман.
Бу юрт дедем Чынгъзынынъ
Бугунъде мен Чынгызман!

Сонъ Нураддин:

Идилъде кулюк суваргъан
«Тунагъа етип туваргъан.
Бату: — «Чынгызман!» — дер эди
О да Чынгыз тугуль эди!

Алтын Сарайны къурдургъан
Алтын босагъа къойдыргъан.



Хушенк де: «Чынгъызман! дер эди
О да Чынгъыз тугуль эди!

Къуран, китап окъуткъан
Дин ислямны таркъаткъан.
Ментю: «Чынгъызман!» — дер эди
О да Чынгъыз тугуль эди!

Таркъакъ эльни топлагъан
Топлакъ джавны таркъаткъан.
Озьбек хан да хан болды
Ана о Чынгъыз эди!

Сен манъа къулум демечи
Мени алчалгъып кульмечи.
Мен сагъа сой къувайым
Сен оны бир динълечи;
Сачлы-тюклю Къоджамет
Ондан тувгъан Эрамет

Ондан тувгъан Кёрамет
Ондан тувгъан Къутлукъая
Ондан тувгъан Эдиге
Эдигеден тувгъан Нураддин
Сыра огъа кельгенде
Бакъ — алла берген Мурадын! —

деди де, сол къолуман Токътамышнынъ сакъальндан туггы, Токътамыш къоркъудан къатып къалды, мучелери киртлешкендай болды. Сонъ къаба сесмен бек къатты кыгчырды. Шай дегечи, Нураддин кыылыч билен онынъ башыны чалып алды. Сонъ Токътамышнынъ башыны торбасына салды, кетирип бабасынынъ алдына ташлады.

Шундан сонъ, Нураддин Токътамышнынъ тахтына отурды, хан болды. Шу вакыт бабасы Эдиге айтты: «Тёрели (къануний) хан болмакъ ичюн сагъа Токътамышнынъ кызыларына уйленмек, огъа киев болмакъ керек. Сен девлет ишлеримен огъраш, юртны бир долаш. Ханикемен Джаникени мен мында сагъа азырларман», — деди. Бабасы шай деген сонъ, Нураддин чыккып кетти, девлет ишлеринен мешгуль болып юрт айланды.

Шимди хан сарайында Токътамышнынъ кызылары Ханике, Джанике, бир де онынъ яш бикеси къалгъан эди. Бикенинъ къарнынъда баласы бар эди. О Токътамышнынъ кызыларына акъыл огретти: «Нураддин сизинъ бабангъызны ольдирди, Ясаны, къанунны бозып



Чынгъызнынъ тахтына отурды. Шимди сизге уйленсе, Чынгъыз союна киев боладжакъ, тѣрели хан боладжакъ. Сиз кѣурсагъынъызгъа ястыкъ байланъыз да, кѣурсакъ котерген болынъыз. Нураддин сораса, бу шейни бизге бабанъ Эдиге этти, деп айтынъыз», — деди.

Ана энди Нураддин юрт ишлерини битирип кѣайтып кельди. Ханикенен Джаникени корейим деп, о аремге кирди. Коръсе — Ханике де кѣурсакъ котерген, Джанике де кѣурсакъ котерген юрелер. Нураддин сорады: «Бу сизлерге не мараз болды?» — деди. Къызлар уганды, къызарды, къачтылар. Токътамышнынъ яш бикеси: «Буны бабанъ Эдигеден сора!» — деди. Нураддиннинъ сачлары тик-тиктурды: «Мен ондан сорарман. Шимди сен айт!» — деди. Токътамышнынъ яш бикеси айтты: «Бу хорлукъны къызларгъа бабанъ Эдиге этти:

Арзудан козылери къызарып
Бир ёл Ханикени джылатты
Бир ёл Джаникени джылатты
Акъ сакъалын титретип
Бабанъ къызларгъа саташты.
Сасыкъ якъасын къонълатты
Силекейин акъызып,
Ахыр дегенин болдырды
Джебр билен яткъызып,
Ичлерин-бавурын толдурды,
Шимди бир шей ёкъдайын
Ёлунгъа козь тикти, отурды, — деди.

Нураддин чапып чыкъты арем ичинден, козюне бир шей корюнмеди. Сонъ кѣаршысына бабасы Эдиге расткельди. Нураддин нефеси тутулып, тишлерини сыкъып айтты: «Сен магъа — Токътамышны ольдир, къызлары сагъа, яш бикеси магъа дединъ. Сонъ, бар девлет ишлерин эт дединъ. Озюнь яман ниетмен уйде кѣалдынъ. Уйде кѣалып, къызларгъа зорбалыкъ эттинъ, огълунгъа иман кѣырдынъ. Кѣырылгъан иман кѣайтмаз, оны кѣан джувар. Сен магъа бабасынъ — мен сени ольдиралмайман. Я сен мени ольдир, я мындан башынъ алып чыгып кет!» — деди. Онда Джанбай Нураддинге айтты:

Аргъамакъны аздырма, Нураддин —
Атны кѣайдан минерсинъ?
Акъкъан сувгъа кѣан кѣуйма —
Сувны кѣайдан ичерсинъ?
Кѣавданлы ерге от салма —
Отны кѣайдан отларсынъ?



Къарт бабанъны къувласанъ,
Къайда барып онъарсынъ?

Сонъ Нураддин айтты:

Кемал улы Кок Джанбай!
Кери сёзли ит Джанбай!
Къара мадай улысынъ,
Аш бергеннинъ къулусынъ,
Сен къоянъга «Къач!» дерсинъ,
Сен тазыгъа «Къув!» дерсинъ.
Сенден акъыл арамам,
Кенъеш сенден сорамам!
Аргъамакъны аздырсам —
Сайлап тулпар минермен.
Акъар сувгъа къан къуйсам —
Сайлап шербет ичермен.
Къарт папазны къувласам —
Йылындан Кябе кетермен,
Кябени учъ долашып,
Учъ кере тевбе этермен.

Онда Эдиге айтты:

Эр Нураддин догъа деп,
Эбанайлар кетирттим.
Сагъа бешик керек деп,
Алып чугъа джайдырдым.
Чугъа къатты болыр деп,
Сайлап сунгяр джайдырдым.
Джигит чагъынъ кельгенде,
Сайлап тулпар миндирдим.
Темирхан бек скойсин деп,
Темирден зырх кийдирдим.
Джигит адынъ чыкъсын деп,
Къыркъ джигитни ерттирдим.
Сёзге уста болсын деп,
Кок Джанбайны эш эттим.
Акъкъудай козюм къызартып,
Ундай сачым агъартып,
Къартайгъанда мен сагъа
Къувлаткъандай не эттим?



Сонъ Нураддин айтты:

Этмедим деме, эттинъ сен,
Имангъа терс кеттинъ сен.
Чанагъыма чибин атып,
Мени къысметсиз эттинъ сен!
Къарарып чыкъкъан булутман —
Джавмай — сачмам таркъамай!
Гонълюм авлап сѣз къатма —
Сабунман джувсанъ агъармам!
Озюнь чыгъып кет мындан
Я ольдирип ташларман!

Онда Эдиге айтты:

Боз агъачтай тырманып,
Булуткъа етмей ич тынмам!
Къанлы эт ашар шункъарман —
Олюмтикке ич къонмам!
Къара булут мандирмен —
Джавун-бурчакъ созарман.
Эсип кельген джелъ болып,
Танъ юкъунъны бозарман!

Андан сонъ нефес толдурып, Нураддинге уфюрди. Нураддин артына йыкъылды, авузы — бурну къыйшайды.

Онда Джанбай айтты Эдигеге:

Бир дане янгъызы баланъдыр
Терс дуа этме, Эдиге!
Этнени алла суймейдир
Огъа терс кетме, Эдиге!

Сонъ Эдиге онъа дуа этти. Огълу Нураддин ерден турды, авузы-бурну тюз болды.

Сонъ Эдиге айтты:

Индден, Йеменден от алып,
Оджакъкъа от къаладым.
Ол оджакъкъа комюр салып,
Докъуз корюкмен тавладам.
Алтыным иритип денъедим:
Ичинде бакъыр ёкъ экен.
Джайлай оськен ашлыгъым
Сом бурьтюкли, токъ экен
Душманьнгъны эр заман



Мени къувгъандай къув, улым!
Авджы къушдай йыртыджы
Арсландай адув, алып улым!
Ачудан корьмез козюнъни
Алла ачсын, мырза улым!
Къувгъан душманынъ эр заман
Мендай къачсын, мырза улым!

Шай деди де, Эдиге чыкъып кетти. Бабасы чыкъып кеткен сонъ, Нураддин янгъыз къалды, ханлыкъ укюмин юрсетти. Арадан йыл кечти, Токътамышнынъ къызлары бала кетирмедилер. Сонъ о къызларнынъ хызметчисини чагырды, ондан сорады: «Бу сенинъ бикечлеринъ ич ташлады ёкъса?» — деди. Хызметчи айтты: «Оларда къурсакъ ёкъ эди. Олар къафтан пюбуне ястыкъ тыкъкъан эдилер», — деди. О вакъыт Нураддин эсини джыйып, озъ-озюне: «Мен нишледим?! Бабамны ничюн ывджыгътым, уйден къувдым? Ёкъ, булай болмаз! Бабамны тапайым да, ондан афу сорайым». Сонъ о бабасыны араштырды-сораштырды — тапмады.

Нураддин эм ханлыкъ укюмини сюре, эм шериаткъа риает этип халкънынъ арзу-алыны динълей эди. Бир кунъ онъа баш урып, бир фукъаре кельди. О озюнинъ истегини бильдирип шай деди: «Биз бабадан беш къардаш къалдыкъ, бизге мирас деп, тек бир ыргъачы улакъ къалды. Биз анълаштыкъ — улакъ осип эчки болса, эр йыл кетирген улакъларын невбетмен атырмыз, ондан эпимиз малты болырмыз. Эгер барып да, улакъ яшлай олъсе, оны соярмыз — дёртимизге дёрт аягъы, биримизге де башы болыр деп анълаштыкъ. Шимди бу улакънынъ магъа тиеджек аягъы сынды. Сонъ мен онъа чул байладым. О улакъ баргъан культёбеге, анда о чул янгъан. Сонъ улакъ къоркъып къачкъан, къомшунунъ кебен пиченини якъкъан. Шимди къомшу зор эте: «Магъа яз кечмей тура, пичен чалып берингиз!» — дей. Агъамлар да магъа зор этип: «Пиченни сагъа деген аякъ якъты, пиченни сен чалыш бер! — дедилер. Мен о къадар пиченни насыл чалайым, ярдым этингиз, дедим. Къайыл болмайлар, мени котеклейджек болалар. Ана шонынъ ичюн сизден акъыл сорап кельдим», — деди. Нураддин тюшонди-ташынды — акъыл берип оламады. Сонъ фукареге: «Мен сагъа догъру кенгеш бералмайман. Токътамышнынъ кенгеш бере бильген бир къадысы бар эди, къаяты. Йигиси, мен сизинъ эр бирингизге бирер эчки берейим. Пичен чалув меселесин озюнгиз чезингиз», — деди.

Бир къач кунъден сонъ, Нураддин о фукъарени ёлда коръди — фукъаре къуванчлы, шенъ эди. Нураддин ондан: «Сонъ насылсынъыз?



Агъаларынгъман анылаштыпгъыз аллем?» — деп сорады Фукъаре: «Бир киши бизге бек догъру кенъеш берди. Шимди; пиченни агъамлар чалалар, мен чалмайман», — деди. Нураддин хан шу кишинен меракъланып: «О акъыллы киши сизге насыл кенъеш берди?» — деп сорады. О киши деди ки: «Сенде суч ёкъ, ничюн десенъ, улакънынъ санъа деп адалгъан аягъы сыныкъ, озю юралмай. Улакъны культёбеден пиченге анавы учъ сагълам аякъ алып баргъан, о ёлгъа да улакъны баш догърулткъан. Онынъ ичюн, пиченни агъанълар чалсынлар. Сонъ, мен бу кесильген тёренни (чыкъарылгъан къарарны) агъамларгъа айттым — олар бу адалетли къарар деп, разы болдылар», — деди фукъаре. Бу сёзлерни дикъкъатнен дингълеп тургъан Нураддин хан озь-озюне: «Дюнъяда бундай догъру къарар чыкъара биледжек адам олса, о да меним бабамдыр. Айса, бабам эрек кетмеген экен, бу орталыкъларда юре экен», — деди. Сонъ, о фукъареден: «Сен о кишини къайда корьдинъ?» — деп сорады. «Мен чалмагъа от къыдырып кеткенде, оны бир чокъракъ башынъда корьдим», — деди фукъаре. Нураддин фукъаренинъ айткъан ерине атлылар йиберди, амма олар онынъ бабасыны тапалмадылар.

Нураддин тюшпонип-ташынгъан сонъ, шу фукъаре яшагъан ерден оз кишини тутып кетирсинлер деп, буйрукъ берди. Нукерлер андан оз кишини тутып кетирдилер. Хан оларгъа айтты:

Он беш — огълан,
Йигирми беш — дживан,
Отуз — арслан,
Къыркъ — къаплан,
Эли — тильки,
Алтмыш — кулъкю,
Етмиш — тыршав,
Сексен — бея,
Докъсан — буламыкъ,
Юз — джылавукъ.

Сиз магъа бир ай ичинде шу шейни тапып кетирингиз. Тапып кетирмесенгиз — башынгыз джеллят! — деди.

Шимди бу фукъаре урувынынъ бири шу чокъракъ янынъдан кече эди, коръсе — акъсакъл бир адам сувгъа тикилип далгъын тура. О, шу адамгъа селям берди. Къарт селямны алды, сонъ: «Сен кимсинъ?» — деп сорады. Бу киши: «Мен Нураддин ханнынъ халкъынъдан боламан», — деди. Къарт: «Сонъ, Нураддин ханынгъыз яхшымы, насыл? — деп сорады. О киши: «Алланынъ хышымына огърасын! О бизге дюнъяда ёкъ бир шейни тапып кетирингиз, деп, бир ай муддет берди. Биз,



бир кой халкъ о шейнигъ не экенини тапыштыралмаймыз. Шимди йигирми кунъ кечти, он кунъ къалды. Он кунъден сонъ, башымыз джеллят!» — деди. «Даа насыл шей экен о?» — деп сорады ихтияр. Койлю:

Он беш — огълан,
Йигирми беш — дживан,
Отуз — арслан,
Къыркъ — къаплан,
Элли — тильки,
Алтмыш — кулькю,
Етмиш — тыршав,
Сексен — бея,
Докъсан — буламыкъ,
Юз — джылавукъ.

Нураддин султан бизге мына шу шейни тапып кетиринъиз, деп буюрды, — деди. Онда акъсакъл айтты: «Нураддин султанныгъ сизге айткъаны шей тугульдир. О бир сёздир, тапмаджадыр. О сизден тапмаджаныгъ табыны истей. Мына сен арув динъле:

Он яшына толгъанда —
Адам «огълан» чагърылыр.
Йигирми бешке еткенде —
Адам «дживан» чагърылыр.
Отуз яшкъа толгъанда —
Джигит арслан къуветте.
Къыркъ яшына киргенде —
Эркек къаплан къуветте.
Элли яшлы къырджыман —
Уста бир тильки болыр.
Алтмышта «мен акъай!» деп
Джумлеге кулькю болыр.
Етмиш яшкъа кельгенде,
Аякълар тыршавланыр.
Сексен яшкъа еткенде,
Халкъкъа бея, юк болыр.
Ашы болыр буламыкъ,
Докъсан яшкъа кельгенде,
Юз яшына кельгенде —
Киши болыр джылавукъ.

Бу шейлернигъ джумлеси бир кишиге бола. Буны бар да, ханынъызгъа айт. Эм ханынъызгъа куфюр этменъиз, оны

къаргъамангыз!» — деди. «Айса, къуртулдыкъ оломден!» — деп къуванды фукъаре. Сонъ кельди, тапмаджанынъ табыны Нураддин хангъа айтты. Нураддин атылып еринден турды да: «Буны санъа ким уйретти?» — деди. О, койлю къартны корьген ерини айтты. Нураддин тез атлы йиберди — о кишини тапып кетирдилер.

Ана энди Нураддин къапы артындан къарай-къарай о кишиге: бабасымы, бабасы тугульми — ич танымай. Къартнынъ сачлары орус папазынынъ сачларыдайын оськен, сакъал кийизлешкен, устюнде кийими урьян-пурьян. Сонъ озь-озюне деди: «Буны башта ашатайым. Насыл ашай экен, шугъа къарап танырман бабамы. Болмаса, тойгъан сонъ лаф эттирип танырман», деди. Ашчыларгъа эмир этти: «Бир токълу сойып, бутюнлей къазангъа салынсын, сорпасы-эти — эписи къонакънынъ алдына къойылсын». Ашчылар шай да эттилер — бутюнлей къайнап пишкен къойны сорпасыман къонакънынъ алдына къойып, озьлери аяткъа чыкътылар. Къарт къона башына къурулды — этнинъ эписини ашады, кемиклерини тер-темиз кемирди, сорпасыны да котерип эписини ичти.

Ханнынъ аякъчылары софраны джыйыштырмагъа кирдилер, корьселер — оларгъа бир кесечик биле эт къалмагъан, бир къашыкъ шорба къалмагъан. Аяткъа чыкъкъан сонъ: «Яндыгъымы папазы! Бир кесек эт биле къалдырмагъан!» Къарт оларнынъ сёгюнгенини эшитти, сомурданып сейленди:

Тавда джурген борю эдим,
Талчыгъыма тайлы бие ер эдим.
Ойгъа тюштим, къой болдым,

Къонкъулдашкъан коп ямангъа хор болдым, — деди. Сонъ Нураддин ялакъчыларыны чагъырып сорады: «Ашадымы къарт?» Ялакъчылар: «Ашады. Бир къойны бир шей демей, ашады!» — дедилер. Нураддин сонъ анълады ки, бу онынъ бабасы экен. Одагъа кирди, бабасынынъ къолун-аягъын опти, афу сорады. Баба огълунынъ сучуны кечирди, афу этти. Шай этип, Нураддин хан бабасы Эдигени озь янына алды, раат этти.

Токътамышнынъ бикеси бир заманлар юкю къалгъан эди. Шимди о бир эр бала тапты, адыны Къадырберди султан къойдылар. Заман кечти, Къадырберди султан он секиз яшына кельди. Сонъ, башкъа ханлар онъа ярдым этти, аскер бердилер. Сонъ, баба улусындан адам топлады. Шай этип, аскери чокъ олды. Сонъ, баба тахтыны къыдырып, Чегерли гольге келип токътады.

Шу куньлерде, Нураддин Джанбайгъа эмир этти: «Бар, Чегерли гольги къара — къуш бар экенми?» — деди. Джанбай атына минди кетти. Кельди Чегерли гольге, чыкты секенинъ тёлесине, къарады.




Корьди ки, Чегерли гольде чадырлар бар, чокъ аскер тура. Секеден ашагъы тюшеджекте аскерлер Джанбайны тутты, Къадырберди султангъа кетирдилер. Къадырберди султан сорады: «Къана меним юртум? Къайда меним алтыным, малым? Къана меним Ханике, Джанике татайларым?» Джаны къыл успонде олгъан Джанбай не айтсын: «Юрт деген шей, гъайып болмай — бигъ йыл кечсе де тургъан еринде тура. Кобиси юртнынъ даваджысы гъайып олып кете. Айса, сен баба юртунъны дава этип кельдинъ — яхшы этгинъ. Мен сагъа Нураддинни алып келейим — малынъ, алтынынъ ондан сора. Чегерли гольде къуш коп десем, Нураддин келир. Сиз азыр турынгъыз, хан азретлери!» — деди.

Сонъ Джанбай кельди Нураддинге: «Хан азретлери! Бир къуш бар! Бир къуш кельген Чегерли гольге — корьсенъиз акъылынгъыз учар! Саны бар — сонъу ёкъ!» — деди. «Айса, атлан, кетейик! Бир лячин учурайыкъ!» — деп къуванды Нураддин. Сонъ, Нураддин яхшы бир джюйрек сайлап минди. Джанбай да чарпыкъ ат минди. Атмаджа (авджы) къушларны алып, Чегерли гольге кельдилер. Джанбай Нураддинге: «Султаным! Сагъа бу къушны ат чаптырып насыл учурылгъаныны корьсетир эдим, амма, атым мартавал. Сенинъ атынъа минейим де, къушны бир учурайым — сен онынъ учушыны сейир эт!» — деди. Нураддин разы олды. Сонъ Джанбай Нураддиннинъ джуйрюгине, Нураддин де Джанбайнынъ чарпыкъ атына миндилер. Джанбай аткъа мингенинен атмаджа къушны алды, синъди кетти секе артында. Нураддин не олгъаныны анъламады: «Бу бадракъкъа (батрак) не мараз олды? Чыкъайым секенинъ тёпесине, къарайым», — деди озю-озюне. Чыкъты секенинъ тёпесине — корьди ки, секенинъ о тарафы аскер толук. Шай дегендже, оны эки якътан аскерлер къамачавгъа алды. Нураддиннинъ джарты аты чапып олмады. Оны аттан тюшюрип, эки къолундан эки аскер тутып Къадырберди султаннынъ чадырына алып кельдилер. Къадырберди султан Нураддинге ер косътерди, «отур» деп ишмар этти. Къызыл къадифе тёшельген бир шиндикни (кресло) корьсетти. Нураддин отурды.

Амма шимди астындан къадифе тюбюне эки зезрли пычакъ тиклетип салынгъан экен. Нураддин отургъанда эки пычакъ эки тизини тешип уджлары тёпеге чыкъты. Нураддин эки къолуман эки пычакънынъ уджларыны къапатып отурды.

Къадырберди султан сорады:

Аргъавулдан кочькен алты арбам
Алтавы да къазна арбам
Тугъра-тамгъалы асыл арбам —
Оны къаттинъ, Нураддин?



Нураддин айтты:

Аргъавулдан кочькен алты арбанъ
Алтавы да къазна арбанъ —
Танъры магъа болсын деп бергенде,
Мен оны бутюнлей сайгъанман.
Улуснынъ къувети алтын! деп,
Акъ Субан батырны къазнаджы къойгъанман.

Къадырберди султан сорады:

Босагъасы юксек боз уюм,
Алтмыш алты козь уюм
Къышлав уюм, яз уюм —
Оны къаттинъ, Нураддин?

Нураддин айтты:

Босагъасы юксек боз уюнъ
Алтмыш алты козь уюнъ —
Мен оны ёкъ корьгенмен:
Эриккеним кетсин деп.
Мугъайгъаным къалсын деп,
Орьтмен откъа бергенмен.

Къадырберди султан сорады:

Секиз ерден чегели
Токъуз ерден тогъалы
Юзю къызыл чугъалы
Тонимны къаттинъ, Нураддин?

Нураддин айтты:

Секиз ерден чегели
Токъуз ерден тогъалы
Тонинъ магъа къалгъанда —
Мен оны авур тапкъанман:
— Бу къызыл тон сагъа! — деп
Бабамнынъ сыртына арткъанман.

Къадырберди султан сорады:

Толгъамалы меним ай балтам
Кумюш саплы сай балтам¹
Ханике, Джанике джан тотам —
Оларны къаттинъ, Нураддин?

¹ сай балтам — сайланып алынган, сойдан къалгъан

Нураддин айтты:

Толгъамалы сенинъ ай балтанъ
Чынгъыздан къалгъан сай балтанъ
Айланышкъан урушта,
Толгъанышкъан токъушта
Онъ къолума алгъанман.
Ханикедай ёсманы
Джаникедай сылувны
Тангъры озю манъа бергенде —
Бедава мал къылгъанман.

Къадырберди султан сорады:

Аягъы терек, мойны эрек
Атымны къаттинъ, Нураддин?
Юртнынъ ханы, бабасы —
Атамны къаттинъ, Нураддин?

Нураддин айтты:

Аягъы терек, мойны эрек
Атыгъны тутып мингенмен,
Бизни юрттан къувгъанчюн
Атанъа терс дёнгенмен.
Татар къыгъыры Тунада
Токътамышдай атангъны
Сакъальпдан туткъанман.
Боз бугъадай окюртип
Еди тавны янгъгыртып —
Башыны кесип алгъанман.
Къара мешинге саргъанман.
Эр башы къокъланыр деп —
Чильтер дорбагъа къойгъанман.
Чильтер дорбаны кетирип —
Бабамнынъ алдына салгъанман.
Очъ-ачувын къандырып —
Бабамнынъ алгъышын алгъанман!

Онда Джанбай тильге кельди: «Къадырберди султан! Изин этингиз — меним де булардан сораиджакъ эсабым бар», — деди. Къадырберди разы олып баш саллады, сонъ Джанбай Нураддинге сёз къатты:

Беш-беш оба, беш оба
Бельги тиктинъ, Нураддин.
Салыкъ салып коп халкъны



Урып сѣктинъ, Нураддин.
Беш биеден бир кѣулун
Сен тилединъ, Нураддин.
Чынгъыз тахтынъ огъурлап
Къа, нейлединъ, Нураддин!
Тюштинъ къара тулпардан
Малиймен насыл кетерсинъ?
Шимди эсап сораилар —
Эсапны насыл этерсинъ?

Онда Нураддин айтты:

Беш-беш оба, беш оба
Бельги тиксем — юрт ичюн.
Юрт сынъырын атлагъан
Къыбла билен сырт ичюн.
Беш биеден бир кѣулун
Мен истесем — сют ичюн.
Къалан, салыкъ кестирсем —
Сендай арсыз бет ичюн!

Кемал улы кок Джанбай,
Кери сѣзлю ит Джанбай.
Озь эткенинъ ойлачы,
Тилинъни тыйып сѣйлечи!
Тилинъни пыгчакъ сырты билен кесермен

Танълайынъа нал къыздырып басарман!
Эки джагъынъ эки якъкъа айырып
Шорбалыгъынъ (агъзынъ) джыртарман!

Сонъ Къадырберди султан еринден турды да, сѣйледи: «Джигит экенсинъ, Нураддин султан, аферим сагъа! Мен бабамны бешбаш эткенинъе бек окуне эдим. Шимди корьдим ки, оны джигит киши енъген экен. Айса, окюнчим кетти, сагъа да биз языкъ эттик. Сенмен менде суч ёкъ — сучман къавгъа бабаларымыз арасында. Берингъиз Нураддин султаннынъ тулпарыны — кетеджек ёлуна джигитчесине ат минип кетсин!» — деди. Сонъ, нукерлер Нураддинге онынъ къара тулпарыны кетирдилер, атланмагъа ярдым эттилер. Нураддин атланды кетти. Бир даа корьсе — бабасы Эдиге бир ат минген, къолунда дал къылыч — келеятыр, Эдиге корьди — огълу Нураддин ат устюнде саллана, эки тизинден къан акъа келеятыр. Онда Эдиге айтты: «Вай, улым! Шу къадарлыкъ эдими алынъ?» — деди. Сонъ, о ат салып барды,



түшпү Къадырберди султаннынъ аскери арасына — онъуна-солуна кылыч саллады. Бир къач аскерни кести, яралады. Сонъ такъаты битти къарт кишининъ — айландырды атыны, къачты. Къадырберди султан артындан къувды. Эдиге бир койге далды, эвлер арасына синъди. Сонъ түшпү аттан, кирди бир эвге. Къадырберди султан да къолда кылыч — далды шу эвге онынъ» артындан: «Папазнынъ башыны озъ къолумман кесейим!» — деди. Эдиге исе, къамасыны алып, къапы артында беклеп турды. Къадырберди кирип, оны корьгендже, Эдиге бас этти къаманы онынъ къурсагына — ичеклерини эшти. Къадырберди йыкълды. Эдиге атылды тышары, минди атына — къачты.

Энди Токътамышнынъ, Къадырберди султаннынъ айтувлы мырзалары етишип кельдилер — корьдилер ки, Къадырберди султан олеята. Къадырберди оларгъа яткъан еринде сёйледі: «Магъа ким Эдигенинъ башыны алып кельсе, къан къарышкъысы онынъкидир!» — деди. Мырзалар ат салып, Эдигени къувып кеттилер. Кете-кете корьдилер: Эдигенинъ атынынъ излери Чегерли гольде къамыш ичинде биткен. Къамышкъа кирген ат излери ёкъ, амма, чыкъкъан ат излери бар. Мырзалар: «Бу насыл бола?» — деп къарап къалдылар. Сонъ Джанбай: «Бу Эдиге бек тильки адамдыр — бу да онынъ мерафетлеринден биридир. Мен беллесем, о атыны къамыш ичине арт-арткъа берип кирсеткендир. Сиз Барын мырза, Шырын мырза, азыр турынъыз! Мен Эдигени бир толгъайым (чынъман сырын ачайым). Эгер Эдиге къамыш ичинде болса, о мытлакъ сесленир», — деди. Джанбай толгъады:

Озюньден артыкъ джав корьсенъ:

— Тур, атайым, — дер эдинъ.

Озюньден эксик джав корьсенъ:

— Ат, турайым! — дер эдинъ.

Эр Эдиге даа савмы?

Бар болсанъ чыкъ, къарайым!

— Ат! — десенъ мен атайым.

— Тур! — десенъ мен турайым.

Онда къамыш ичинден Эдиге сесленди:

Токътамышны ольдирдим,

Огълунынъ чырагъын сёндирдим.

Очюм, ачувым къандырдым —

Энди къалгъанындан ким къоркъа!

Шай деп, ат чаптырып, кылыч ойнатып къамышлыкъ ичинден чыкъты, мырзалар онъа уджюм эттилер. Барын мырза Эдигенинъ башыны кылычнен кести. Башы тыгъырып түшпү ерге, къаталап кетти.



Амма Эдигенинъ башы:

Барың, сагъа мен неттим?
Сизчюн девлет, юрт куттюм.
Биринъ эки болмасын!
Юртыңъ, къаранъ къалмасын!
Ханлар ханы мен йыкътым,
Хан болып сен де къалмазсыңъ!
Сют ерине къан тѣктинъ,
Къанымны тѣгип не эттинъ!
Къазан, Кърым, Аждархан (Астрахань)
Союмны сорап къалгъанда,
Не болгъанын анда корерсинъ! — деп къаргъады.

Барың мырза алды Эдигенинъ башыны — Къадырберди султандан онынъ къан къарышкъысыны аладжакъ. Шырын мырза юнга: «Бер, Эдигенинъ башын мен тутайым, сен устюньни къандан арындыр!» — деди. Барың мырза берди Эдигенинъ башын Шырын мырзага. Шырын мырза Эдигенинъ башын къолуна алгъанынен тутты къачты. Кетирип Эдигенинъ башыны Къадырберди султаннынъ алдына салды. Къан къарышкъысы Шырынга болды. Шырын мырза укомдар болды. Барың мырза эди — мырза олып да къалды. Тап сонъу, Барың мырза айтты:

Ольди, битти Эдиге —
Мерафети битмеди.
Къарышкъысы Шырыннынъ —
Барыңга къысмет этмеди.

Идилъ юрты деврильди,
Яв устюне яв кельди.
Эдиге айткъан кунъ кельди,
Чынгъызнынъ къойгъан хан дагъы
Хан дагъына айланды.
Алтын Орду таркъады,
Хан сарайы къалмады.
Кърым, Къазан, Аждархан
Айры-айры иль болды.



АЙРЫ СЁЗЛЕРГЕ АНЪЛАТУВ

адув — душман

аймакъ — къабиле

аталыкъ — хан оғылунынъ тербиеджиси: ханнынъ ярдымджысы, кенъешчиси

бал, балбоза — балдан япылганъ эсирткили ичимлик

беринди — бир де-бир укюмдаргъа бойсунганъ киши (подданный)

бешбаш — аз къувет иле япылганъ чапул, чапкъынлыкъ

быдаякъ — байкъуш союздан бир къуш

Джанбай — Токътамыш ханнынъ везири

зырых — кольчуга, латы, панцирь

кер бие — ачыкъ къаверенки тюсте байтал

къазакъ — озъ эркине чёльде яшаганъ адам

къанджугъа — эгер артына бир шей багъламакъ ичюн махсус пекитильген
сыджымлар

Къутлукъая — Токътамыш ханнынъ къушчысы, мангъыт урувындан олганъ

мадай — авам халкътан олганъ киши

нукер — ханны къоруджы аскерлер

савру — атнынъ арт аякъларынынъ тёпеси

салар — атнынъ аркъасында алд аякъларынынъ тёпеси, курегининъ устю

самур — соболь

сулув — гузель, дюльбер

тёре — чыкъарылганъ къарар, къанун; ханлар яки юкъары табакъаларгъа
менсюп

Токътамыш — 1380-нджи йылдан башлап акимлик эткен Алтын Орду ханы,
Джучы хан несилнинъ девамджысы

Чынгъыз — Чынгъызхан (1155—1227). О 1206-нджи йылдан Монгъол
империясынынъ ханы олганъ. Асиягъа, Шаркъий Авропагъа арбий
сеферлер япкъан, чокъ ерлерни залт эткен.

шункъар — чокъусы «сунгъур» деп адланганъ къуш



ЧОРАБАТЫР

Сиз айт дейсиз бизлерге,
Биз айтайык сизлерге,
Не берерсиз бизлерге?
Екмеге берсенъ, деве бер,
Савмагъа берсенъ, бие бер,
Салкъын тышмей сувалмаз.

Чоранынъ бабасы Нарик, Нарикнинъ агъасы Арик, фукъарелерден оларар. — Айды, джалчы¹ кетейик, — дейлер. Кетелер де, бир ханлыкъкъа баралар. Арик онъа джалчы джуре. Нарик де башкъа бир хангъа кете. Нарик хангъа джалчы джуреджекте, хан эфенди:

— Санъа бир кыймет кесейик, эр йыл шу кыйметнен джурерсинъ, — дей.

Нарик:

— Манъа кыймет кесюв керекмез, ханым. 25 яшыма кельгендже джурерим, лякин 25 яшыма кельген сонъ, джылкъынъ ичинден сайлап бир ат алырым. Онъа да кумюшлеп алет кесерсинъ. Деген еримден де бир кыз алып берерсинъ, — дей.

Нарик 25 яшына кельгенджек джуре.

Хан эфенди:

— Ана, Нарик, энди 25 яшынъа кельгенджек джурдинъ, энди шу оладжагынъны ал, — дей.

Ханнынъ джылкъысыны айдап кетирелер ве авлагъа къапайлар. Нарик билегини тиреп, джылкъынъны ичине тыше, бирининъ къуйругынъдан тутып котерип ата, экинджисини де котерип ата. Атларны шай этип бакъа. Булардан бириси аякъ устуне тышмей. Бир чонтукъ тай аякъ устуне тыше.

— Ана бу, ат оладжакъ, — деп Нарик тайгъа япыша. — Ана мал оладжакъ будыр, — дей. Тай ат чагъына кельген сонъ, хан Нарикнинъ устуне бир къат-урба кестире.

— Бар да энди, паша кызы деме, хан кызы деме, бегенген кызынъны сайла ал, — дей.

Нарик атланып кете. Кой четине чыкъкъанда, акъкозь ат минген бир акъ сакъаллы кишиге расткеле. Селям бере. Акъ сакъаллы киши селям ала, Нарик де онынъ къолуны ала.

Къарт:

— Чорам, къайда барасынъ? — дей.

¹ джалчы — ыргъат

Нарик:

— Озюме аркъадаш (апакъай) къыщырып кетем, — дей.

Къарт:

— Сенинъ аркъадашынъ мына мында, туварчынынъ къызы Менъли Сулу. Узакъкъа кетме, санъа башкъасы ярашмаз, — деп койни косътере.
— Къайтаткъанда, коръ де кет, — дей.

Нарик туварчынынъ къызыны барып коре, къызынынъ дюльберликте дюньяда акъраны ёкъ. Нарик шимди эвине келе, атыны багълай. Азбар ичинде о якъ-бу якъ джуре.

Хан эфенди:

— Къана не кетмединъ, — дей.

Нарик:

— Мен барып кельдим, — дей.

Хан:

— Кимни таптынъ? — деп сорай.

Нарик:

— Хан эфенди, туварчынынъ къызыны, — дей.

Хан:

— Алла-алла чорам, таптынъ-таптынъ да, туварчынынъ къызыны таптынъмы, гузель бир къыз ёкъмы эди? — дей.

Нарик:

— Хан эфенди, гузель, гузель дегильдир, джан севген гузельдир, — дей.

Хан:

— Айса, озю йыкъылган агъламаз, эвленингъиз, — дей.

Хан той этип туварчынынъ къызыны Нарикке алып бере. Нарик шимди эвли-баркълы киши ола.

Ана энди Нарик агъасына кетеджек ола. Атка минип кете. Агъасына кетип бараяткъанда, ёлда бир къой къошу коре. Бир къозу да бу къойларны эмип, бир башындан бир башына чыкъа, кене де манърай экен. Ондан да кететкъанда, ёл янында бир къанджыкъ копек ята, бу къанджыкъ индемей, лякин ичинде балалары уре экен. Ондан да кететкъанда, учъ къазан асувлы тура: экисинде эт къайнай, ортадаки къазанда сув, о бир бетте къазандаки эт ортадаки къазанны атлап, о бир четтеки къазангъа тюше экен.

Ана, Нарик шимди агъасына келе, бу шейлерни айта.

Агъасы:

— О сенинъ корьген къойларынъ бизден сонъ халкълар арасындаки зентинлердир, олар алай халкъны ашайджакълар да кене тоймаджакълар, бу шунунъ мисалидир, — дей. — О сенинъ корьген къанджыгъынъ,

бизден сонъ оладжакъ халкыларнынъ бабасындан эвель балалары сёйленеджектир, ана о къанджыкъ шунунъ мисалидир, — дей. — О сенинъ корьген къазанларындан эки зенгиндир, эки зенгин бири-бирини сыйлар, фукъаре халкълар арада ач къалыр демектир, — дей. — Ана о къуру сув къайнайткъаны да, шунунъ мисалидир, — дей.

Бир акъшам ханнынъ одасына яшлар джыгылгъанлар, ханнынъ огълу Нарикнинъ апайыны макътай. Онынъ янында отургъан яшлар:

— О Нарикке ляйыкъмы эди, о сиздай бир хан огълуна ляйыкъ эди, — дейлер.

Сонъ ханнынъ огълу Нарикни насыл джойсам да, шу кыс-къааякълыны алсам, — дей. Сонъ яшлар:

— Эгер шундай гонгъюнъ олса, о къолай да, — дейлер. — Эки тулуп алтын алып барарсынъ, бирини Нарикнинъ озюне берерсинъ, бирини де: «Мынавы тулуп алтынны Кефеге алып кет де анда бир кишиде бир айгъыр бар, шуны алып кель», — деп джиберирсинъ, — дейлер.

Бундан сонъ, ханнынъ огълу Нарикке: — Мен санъа бир исим берейим, мына сен бу эки тулуп алтыннынъ бирисини озюне, бирисини де Кефеге алып кет де, анда бир кишиде бир айгъыр бардыр, шуны ал да кель, — дей.

Сонъ Нарик де:

— Алып келейим даа, — дей.

Ханнынъ огълу Нарикке эки тулуп алтынны бере, бир де кягъыт язып бере.

— Мынавы кягъытны косътерсенъ, санъа о айгъырны берерлер, — дей.

Нарикнинъ къарысы:

— Къана, берчи шу кягъытны окъуп бакъайым, — дей, окъуп бакъа.

— Ханнынъ огълу сени ольдюрмеге азырланып ятыр да, — дей. Сен шумди кет де, джылгъанынъ ичинде бир ерге сакълан, акъшам къайт да кель, — дей.

Нарик акъшамдан сонъ къайтып келе, амамнынъ ичине сакъланып тура. Шимди пенджерере драм-драм къакъыла. Нарикнинъ апайы: «Агъанъ эвде ёкъ, сен мында не ишлейджексинъ?» — дей.

Ханнынъ огълу:

— Ёкъ олса олсун, сен ач къапунынъ, — дей.

Нарикнинъ апакайы къапуны ача, ханнынъ огълу янындаки сакълавларгъа:

— Сиз энди къайтынъыз, мен мында къаладжагъым, — дей. Сакълавлар къайталар. Ханнынъ огълу ичери кире, отуралар.

Нарикнинъ апайы:

— Эфендим, мен сизге бир масал айтайым, — дей. «Бир заманда

сиздай эткен бир хан олгъан, джылкысы пек чокъ олгъан. Онынъ сюрюсинден кунъде бир ат джоюла экен. Джоюлгъан атларнынъ сайысы бир юз данеге бара. Хан эфенди джылкыджыларына ачувланып:

— Не ичюн джоябересингиз? — дей. Озю де джылкыджыларнен берабер джоюлгъан атларны кыдырып кете. Бир юксек кырыннынъ тѣпесине чыкълар. Анавы джоюлгъан атларнынъ лешлерини анда корелер. Шу ерде бир арслан да ята экен. Хан арслангъа:

— Сен айванларнынъ, мен инсанларнынъ падишасыман, сангъа хырсызлыкъ эт ашамакъ ляйыкмы? — дей. — Сангъа кунъде бир дане бие берейим, тек хырсызлыкъ этме! — дей. Арслан къаилъ ола. Олар къайталар. Бир кунъ семиз бир бие джибере. Арслан алмай. Не ичюн деп сорагъанда:

— Тай экенде, онынъ аягъындан джанавар тшплеген, мангъа джанавардан кългъан шей керекмей, — дей». Айван олса да, джанаварнынъ агъызындан кългъан биени истемей. Сен бир ханнынъ огълу олып да, сангъа халкътан кългъан бир самтыкъ керекми? — дей.

Ханнынъ огълу кене Нарикнинъ апайына уджюм эте. Нарик шу арада амамдан чыкъл, ханнынъ огълунунъ башыны баттанен кесе. Онынъ башыны тандыргъа коме, кевдесини бир терен къуюгъа ата.

Арадан бир кунъ, эки кунъ кече, амма ханнынъ огълу ёкъ: аслы ханнынъ огълунунъ къайда экенини эшиткен биле ёкъ. Ханнынъ янынъда булунгъанлар:

— Бу иш Нариктен кельди, — дейлер. Хан:

— Нарик ойле шей этмез, — дей.

— Этмез эди амма, хан эфендим, сизнинъ огълунуыз онынъ намусына токъунды. Этсе, шу себептен эткендир, — дейлер.

Хан:

— Нарик эрдир, эткен олса, о айтыр. Чагъырынъыз оны мында, — дей.

Нарикни чагъыралар. Хан:

— Сен бизим огъланны не яптынъ — дей.

Нарик:

— Башыны кестим де, тандыргъа комдим, — дей.

Хан:

— Сенинъ меним бир йымыртама биле зарарынъ тиймей эди, насыл олды да, меним огълума токъундынъ? — дей.

Нарик:

— Ырызма, намусыма токъунды да, сабырым кълмады, — дей.



Хан:

— Айса сен мындан кет, энди бизим арамьзда достлукъ олмаз, — дей.

Нарикнинъ бир асрав къазакъ чорасы бар экен. Бир атлы арабасы бар экен. Нарик Чорагъа арабаны ектире, алайыны отурта, арабаны Чорагъа айдата, бирден-бир сыгырыны да, артына тиркей. Озю де атына минип огте кете.

Ёлдан кетип бараяткъанда, апакъайы толгъата, локъса ола. Баласы догъгъан вакъытта, бала атеш олып догъа. Сонъ аягъы тийген ерден сув чыкып, сувнен атешни сёндюре. Ана Чоранынъ эджели сувдан олгъаны шунунъ ичюн экен. Нарикнинъ къазакъ Чорасы онынъ артындан Кокушли Тамагъа келип, Нариктен мужде истей. Нарик Чорасына:

— Азат ол, — дей. Шимди Нарик къазакъ Чорасыны азат эте де, бу чорадай джаны пак олсун деп, огълунунъ адыны Чора къоя.

Сонъ Чораны окъумагъа берелер. Чоранынъ Къылынчакъ деген, бир къомшусы бар экен. Онынънен берабер достлашып оселер. Оджада берабер окъуп джурелер. Оджа окъувы биткен сонъ, алай балалар бузав бакъмагъа кетелер. Кунълерден бир кунъ бир атлы келе амма, къолунда бир атеш бар, дюньяны якъаджакъ. Балалар къоркъуп къачалар, ялынъыз Чоранен Къылынчакъ къалалар.

Анавы киши:

— Селям алейкум, — деп келе.

Чора:

— Алейкум селям, хош кельдинъ, къартбабай, — дей. Оны котерип ала, чадыргъа кетирип отурта. (Олар обанынъ тёлесине чадыр къургъан эдилер). Атыны да джувшангъа тартып байлайлар.

Мусафир Чорагъа:

— Чора, ач къойнунъны, — дей.

Онынъ анавы къолунда атеш олып корюнген шей аждера экен. Оны Чоранынъ къойнуна джибере. Къойнундан бир йылан даа чыкъарып Къылынчакъ батырнынъ къойнуна джибере, сонъ къарт:

— Чора, санъа бир тай алып кельдим, онъа нишанынъ сал, — дей. Чора бу ерде аягъындаки коселе къайыштан бир тасма тилип ала да: — Бунунъ ады «Тасмалы кер» олсун, — деп тайнынъ бойнуна багълай.

Шимди балалар да келелер, къартнынъ къолуны опелер. Сонъ Чора:

— Ана, балалар, бизге бутунъ мусафир кельди, бир бузав соймакъ керек, — дей. Балаларнынъ биреви «анам дарытыр», биреви «бабам дарытыр», — дейлер. Озъ бузавларыны соймагъа къоркъалар.

Чора:

— Тутып меним бузавымны союнъыз, — дей. Чоранынъ бузавыны



тутып соялар. Чора балаларнынъ биревине «къазан кетир», биревине «тезек кетир», биревине де «сув кетир», дей.

Эр шей азыр ола. Бузав этини пиширмеге башлайлар. Еткени къадар ашайлар. Анда бир бузав дегиль, он бузав олса биле етмейджек экен.

Ана, къарт турып о ерден, ёлуны девам эте. Чорагъа:

— Сен ийгит чагъына кельген сонъ, фелян денъиз кенарына кельсенъ, бу тайны санъа берирлер, — деп, тайны да алып кете.

Беш-он йыл кечкен сонъ, Чора деген бир пельваннынъ намы чыкъа, «онъа бирев акъран кельмей», дейлер.

«Къара» деген бир ерде бир Къара хан олгъан. О Чораны чагъырта, Чора кете, анда бара. Анда отура, мусафир ола. Аш-сув ашала, ондан сонъ Къара хан:

— Чорам, къач кишиге олурсынъ, — деп сорай.

Чора:

— Озюмдай бир кишиге олурман, — дей.

Къара хан:

— Айса, Чора дегиль, бир шей де дегиль экенсинъ, — дей. — Сенинъ адынъны мот эттилер, — дей. — Меним юз кишиге «къаршы тургъан пельваным бар», — дей.

Чоранынъ айткъанына ханнынъ къафасы етмей. Чора:

— Озюмдай бир кишиге олурман, — дей. Амма ойле киши бутюн Кърымда бармы? — дей.

Сонъ булар ятып юкълай ве саба туралар. Хан Чорагъа бир торба алтын бере:

— Шимди Чорам, къайт, — дей.

Озю исе, артындан пельванларыны джибере.

— Барынъыз, — дей. — Чорагъа бир торба алтын берип джибердим. Ёлда оны тепеле де, алтынларны ал да келинъиз, — дей.

Ана, пельванлар баралар. Чорагъа къыркъ къамчы уралар. Чора аттан секирип тюше, оларны тутып атларынынъ къуйругъына багълай. Эписини хангъа айдап келе.

Ханнынъ Али бей деген бир пельваны даа бар экен, о мыйыгъыны джелъкесине багълай тургъан экен. Эгер анавы къыркъ пельван Чоранен тутушмагъа ярагъан олса, ода бараджакъ экен, амма анавылар чул тутгырып олмагъан сонъ, о еринден къыбырдамай.

Чора:

— Хан эфендим, сен чагъырдынъ, мен кельдим, ашынъ-сувунъ ашадым, берекет берсин, я бу копеклерингъе талаттырманънынъ себеби не, я? — деп сорай.

Хан:

— Я сен бир кишиге олурман деген эдинъ де, — дей.



Чора:

— Алла-алла, хан эфендим, мен «озюмдай бир кипите олурман» деген эдим де, — дей. Сонъ шу ерде тургъан Али бейни косътерип:

— Мен бундай эткен бинъ данесине олурман, — дей.

О ерден къайта, коюне бара, нишанлана, тою ола, эвлене. Кокушли Тамада Али бейнинъ бир досту бар экен. Али бей онъа бир кунъ:

— Чора бир ерге кеткенде, манъа хабер эт, мен анда барып, онънъ бабасындан лаф аладжакъман ве къорантасына бираз аскъы этеджекмен, — дей.

Досту:

— Чора фелян куню киев чагъырылып кетеджек, ана шу куню етиш.

Али бей шу куню къыркъ сакълавджыны алып, анда бара. Сейир эте, бал ясата.

Ашарына дёнен къойлар сойдура,
Сувсусына ракъы баллар сюздюре,
Нарик къартны башкъа-козьге тарта,
Меньли Сулу анасына яман сёзлер айта,
Ханикей къардашына къаде сюздюре.

Ана, о кете. Нарик де бир ат минип огълуна чапа:

Меним Чорам къайда экен,
Ракъы билен балда экен,
Бал басылгъан тойда экен,
Къызлар тургъан эвде экен, — дей.

Сонъ Чораны коре:

Акътачылы Али бей,
Джав ичинде дели бей,
Авансырай берип кельди, — дей.
Тёгерекке джав салды,
Къунан-дёнен къойларымны сойдырды,
Сувсусына бал бузалар сюздюрди,
Алтмыш яшар бабанънынъ,
Баш-козюне тартты, — дей.
Къарындан къапташ къардашынъа,
Шериаттан тыш сёз айтты, — дей.
Къой айдарны бердим алмады,
Джылкъы айдарны бердим алмады,
Дев айдарны бердим алмады,
Къуш етмезни бердим алмады,
Сарымсакъдай азувлы,
Сакътияндан къулакълы,
Тостыкъандай туякълы,



Ойнай турган сийракълы,
Джалъны, къуйругъы къайтандай,
Джувургъаны шайтандай,
Савурысы къара тёпедай,
Онъгети къара копчекдай,
Азавгъа башын къараткъан,
Бейге башын тараткъан,
Тасмалы керни минип кетти, — дей.
Чора эшитти бу сёзни,
Усанды да бусанды,
Буздай темир къушанды,
Чаларына къылыч алып,
Сансарына сюнгю алып,
Къуш етмезни минди, — дей.
Али бейнинъ артындан
Авлай берип кетти, — дей.
Али бей артына къарады,
Кесек-кесек булут чыкъты,
Булут дер экеч, тоз чыкъты,
Тоз дер экеч, бей чыкъты.
Азраильдай аре бетли,
Кок джюббели джан чыкъты.

Али бей айланып артына, янындаки сакълавджыларындан:

— Артынъызгъа бакъынъыз, киши келеми? — деп сорай.

— Бир атлы келе амма, ташны бурчакъдай ягъдырып келе, — дей.

Экинджиси бакъа:

— Бир атлы келе амма, тобугъына тоз къондурмай келеятыр, — дей.

Учюнджиси бакъа:

— Чора келе, — дей.

О, «Чора келе» дегенинен, Али бей:

— Танърынънъ талавы келе де, — дей. — Къайт, — деп ялвармасанъ олмаз, — дей.

Чора якъынлашып кельгенде, Али бей:

Къайтсана, Чорам, къайтсана,
Атынънынъ башыны тартсана,
Атынъа джанынъ агъырса,
Атынъны алып къайтсана.

Чора:

Къайтмам да, Али бей, къайтмам да,
Атымнынъ башыны тартмам да,



Атыма джаным агъыргъанчюн,
Атымны алып къайтмам да.

Али бей:

Къайтсана, Чорам, къайтсана,
Атыпгънынъ башыны тартсана,
Атынъны миндим, одейим,
Къоюнъны сойдым, телейим.

Чора:

Къайтмам да, Али бей, къайтмам да,
Атымнынъ башыны тартмам да,
Атымны миндинъ одерсинъ,
Къоюмны сойдыпгъ тёлерсинъ.
Алтмыш япар атамны
Башкъа-козъге тарткъансынъ,
Къарындан къапташ къардашыма
Бал бузалар сюздюрп,
Шериаттан тыш сёз айткъансынъ,
Оны насыл одерсинъ?

Али бей:

Къайтсана, Чорам, къайтсана,
Атынънынъ башыны тартсана,
Атынга джанынъ агъырса,
Атынъны алып къайтсана,
Атынъны миндим, одейим,
Къоюнъны сойдым, телейим.

Чора:

Къайтмам да, бейим, къайтмам да,
Атымнынъ башыны тартмам да,
Экимизнинъ арамызда къан салмай,
Атымны алып къайтмам да.

Али бей:

Къайтсана, Чорам, къайтсана,
Атынънынъ башыны тартсана,
Ат иеси сен олсанъ,
Атынъны алып къайтсана.
Къоюнъны сойдым, телейим,
Атынъны миндим, одейим,
Озюнъни де сары алтыннен
Акъ кумюшке комейим.
Ат иеси сен олсанъ,
Атынъны алып къайтсана.

Чора:

Атымны миндинъ, одерсинъ,
Къоюмны сойдынъ, тѣлерсинъ,
Озюмни де сары алтыннен
Акъ кумюшке комерсинъ,
Алтмыш яшар атамны
Башкъа-козьге тарткъансынъ,
Меньли Сулу анама
Яман сѣзлер айткъансынъ.
Ханикей къардашыма
Бал бузалар сюздюрп,
Къапу артына кыыстырып,
Шериаттан тыш сѣз айткъансынъ.
Къарындан къаггаш къардашым
Анда агълай тургъан, — дей.
Оны насыл одерсинъ?

Бундан сонъ Али бей:

— Айса, Чора, сен ат, — дей.

Чора Али бейге:

— Башга мен атсам, санъа атмакъ сыра тюшмез, башга сен ат, — дей. Бу ерде:

Акътачылы Али бей,
Джав ичинде дели бей,
Джаврында менъли бей,
Онъ янына къарады,
Эки тюрлю окъ алды,
Сол янына къарады,
Эки сырлы окъ алды,
Джая берип тутты, — дей.
Тарта берип атты, — дей.
Ель етмезнинъ сарсывындан,
Къуш етмезнинъ астындан,
Оте берип кетти, — дей.

Шимди невбет Чорагъа:

Чора онъуна къарады,
Эки тюрлю окъ алды.
Чора солуна къарады,
Эки сырлы окъ алды.
Джая берип тутты, — дей.
Тарта берип атты, — дей.
Эгерининъ къашындан,
Юрегининъ башындан,



Али бейге сокъты, дей.
Али бей атындан тюшти, — дей.
Къамчысына таянып,
Къан тюкюре къалды, — дей.
Янындаки кыркъ черкесни
Борю чапкъан къойдайын,
Большюч, джаргъыч этти, — дей.
Азавгъа башыны къараткъан,
Къуйругъын джалынынъ тараткъан,
Тасмалы кёрны алып къайтты, — дей.
Кокушли Тамагъа кельди, — дей.
Бабасына сонъ сёзини айтты, — дей.
Ал энди, бабам, ал энди,
Савгыкъман биле къал энди.
Акътачылы Али бейни ольдюрдим,
Али бейнинъ башына
Кельмез хорлукъ кельтирдим.
Къара ольдюрген туралмаз,
Йигит мында къалалмаз.
Еди ханлы Къазангъа,
Къазакъ чыкып кетемен.

Нарик къарт айтты, дей:

Кет сен, огълум, кет, огълум,
Кеткен ёлунъ урь олсун.

Шу ерде Менъли Сулу анасы эвден чыкып кельди, — дей.

Чора анасына айтты, дей:

— Ал энди, анам, ал энди,
Сагълыкъмен биле къал энди!
Али бейни ольдюрдим,
Али бейнинъ башына
Кельмез хорлукъ кеттирдим.
Нарикнинъ огълу мен олсам,
Мен Къазангъа кетем, — дей.

Анасы Чорагъа айтты дей:

Къайтсана, балам, къайтсана,
Атынънынъ башыны тартсана,
Сенинъ бабанъ Нарик къарт,
Докъуз султан ольдюрди,
Кърымдан чыкып кетмеди.
Сенъ бир бейни ольдюрдинъ,
Кърымдан чыкып кетесинъ, — дей.

Чора бир даа:

Ал энди, анам, ал энди,
Сагълыкъмен биле къал энди?
Он ай мени котердинъ,
Он ай мени эмиздинъ.
Алкъалы бешик яптырдынъ,
Танъ юкъусын дёрт больдинъ,
Тартып эмчек эмгенде,
Бавырынъа, ай анам, синъгенмен.
Бундан бир кунъ корьгенде
Эмген сютюм элял эт!
Нарикнинъ огълу мен олсам,
Мен Къазангъа кетем, — дей.

Бу вакъыт анасы айтты, дей:

Аякъ, аякъ аш бердим,
Элял олсун балайым!
Айры эмчектен сют бердим,
Элял олсун балайым!
Ала кет, балам, ала кет,
Ат яньна сала кет,
Майгъа увулгъан къурмачны,
Джеплеринъе сала кет.
Ёлда отурып ашарсынъ,
Буны берген анайым,
Артымдан агълай къалды деп,
Мени де бир анъарсынъ, — дей.
Сен Къазангъа киргенде,
Тар сокъакъта джургенде,
Аягъынъны увалап,
Бек сынап бас, эй, Чорам.

Ханикей арув къардашы,
Ал явлукъны япынып,
Джувурып эвден чыкъты, — дей.
Агъасынынъ бойнуна сарылып,
Шу сёзлерни айтты, — дей:
— Кер тор аткъа мингенсинъ,
Къуйругъыны, джалыныны,
Ипек билен тюйгенсинъ,
Агъам, къайда кетесинъ?
Окъунъ, джайынъ такъкъансынъ,



Окъ батмагъан къуббенъни
Онъ янынъа такъкъансынъ,
Агъам, къайда кетесинъ?
Болат¹ къылыч байланып,
Къара баш сюнгю котерип,
Агъам къайда кетесинъ?
Чора къардашына айтты, дей:
— Кер тор аткъа мингенмен,
Къуйругъынъ, джалынынъ,
Ипек билен тюйгенмен.
Чонкъаймасын, деп эткенмен,
От батмагъан къуббемни
Терс буклеп онъ яныма
Пеките берип салгъанман.
Душманлар корип къачсын, — деп,
Болат къылыч багъланып,
Къара баш сюнгю котерип,
Окъалы чекмен кийинип,
Онъ къолума къуш алып,
Мен Къазангъа кетем, — дей.

Джевапны алгъан сонъ, Ханикей Чорагъа айтты:
Кетмесе, агъам, кетмесе,
Бизни оксюз этмесе.
Агъам, сен Къазангъа кетесинъ,
Бабамнен анамны,
Кимге эманет этесинъ?

Чора джевап берди, дей:
Агълама, къардаш, агълама,
Сен агъласанъ, Ханикей,
Джолума насыл кетермен?
Мен анамны бабамнен,
Аллагъа эманет этермен.

Бундан сонъ Чора апайынен сагълыкълаша:
Ал энди, арув, ал энди,
Сагълыкълнен биле къал энди!
Али бейни ольдюрдим,
Али бейнинъ башына
Кельмез хорлукъ кетирдим,
Еди ханлы джат ерге,
Къазакъ чыжып кетемем.

¹ Болат — челик



Бу вакъыт Чоранынъ апайы дей:

Ала кет, мени, ала кет,
Атынънынъ артына сала кет,
Атынъа агъырлыкъ этсем,
Азизлер, беклер ёлуна,
Мени къурбан сала кет.

Бу вакъыт Чора дей:

Аламам да, арув, аламам да,
Ат артына саламам да,
Мен Къазанъга кеткенчюн,
Хан олмагъа кетмеймен,
Бай олмагъа кетмеймен,
Хан этселер, ич олмам,
Бей этселер, ич турмам.
Алмам да, арув, алмам да,
Ат артына салмам да,
Ерли джаным сагъ олса,
Мен джат ерде къалалмам да.

Шундан сонъ Къылынчакъ батырнен экиси кетелер. Баарълик экен. Булар бир койнинъ ичинден кечип бара ятыр экенлер. Бакъсалар, къартлар когетнинъ устюнде ятыр экенлер. Къартлардан бириси:

— Мынавы келе яткъанлар кимлер экен? — дей. Шу арада шу ерде булунгъан Таз огълан:

— Шеэрге баргъанда, аягъыма бир къызыл чызма алып кельмеге сёз берсенъиз, мен онынъ кимлигини билип келирмен, — дей. Къартлар разы олалар. Таз огълан батырларнынъ алдына чыкъа:

— Кер торы ат минип,
Къыл-къуйругъын шарт тюйип,
Окъалы чекмен онъ кийип,
Онъ къолунъа окъ алып,
Сол къолунъа къуш алып,
Тёрем къайда кетесинъ?

Чора джевап бере:

Тёре дегиль, къараманман,
Коюмнинъ адыны сорасанъ,
Кокушли кок Тамалыман,
Атамнынъ адыны сорасанъ,
Нарик огълу Чораман.
Кер торы атымны минип,
Къыл-къуйругъын шарт тюйип,
Окъалы чекмен онъ кийип,

Онъ кьолума кьуш алып,
Сол кьолума окъ алын,
Мен джат ерге кетемен, — дей.

Чора Къылынчакъ батырнен бу ерден де кете.

Ёлда бир ханда кьонакъ олалар. Хан буларнынъ пельван олгъанларыны анылап:

— Эй улу пельванлар, меним пельванларымнен бир окъ атыпсаныыз, насыл олур эди? — дей.

Чора:

— Алла-алла, хан эфенди, пельванларнынъ окъу къайда бараджакъ? Мен окъ атсам, окъум тап Къазан кьалесининъ мермер ташына барып кьадалыр, — дей.

Хан:

— Къайда барып кьадалса-кьадалсын, сен ат, — дей.

Чора:

— Мен окъ атсам, тап эв тѣпесинде кираметлер кьуюлыр, ичли биелер ич ташларлар, агъыраякълы кьадынлар да баларыны тюшюрирлер, — дей. — Айса, хан эфенди, сен меним окъ аткъанымны корьмек истесенъ, чѣльге чыкъайыкъ, анда атарман. Лякин сен менден беш чакъырым иракъ турарсынъ, ондан башкъа отюнъ патлап олерсинъ, — дей.

Ана чѣльге чыкълалар. Чора бир окъ ата амма, хан эфендининъ башындан тап акъылы кете.

Чоранен Къылынчакъ бу ерден догъру кетелер. Булар Къазан ханынынъ эвини сорап баралар.

— Селям алейкум, эвинге яхшылыкъ! — дейлер. Хан эфенди:

— Алейкум селям! Хош кельдинъиз, джюрюнъиз эвге, — дей. Атларны байлап, ашханеге кирелер. Аш-сув ашагъан сонъ, эвге кирип яталар. Хан эфенди: «Ярын окъ тартарсынъыз», деп акъшамдан пельванларына бал ялкъан. Пельванлар саба турып баралар. Чора да бара, Къылынчакъ да бара. Къазаннынъ халкъы да джыйылып кельгенлер. Къаленинъ къалавына бир окъ келип кьадалгъан, пельванлар шуны тартаджакъ экенлер. Пельванлар окъны тартып башлайлар. Бириси тартып чыкъларып оламай, окъ мермер ташкъа кьадалгъан. Къара батыр да тарта, о да аламай (Къара батыр юз кишиге кършы тура экен), кърккы да тарталар, кене аламайлар. Чорабатыр окъны тартып ала, белине кыстыра. Хан къарап тура ве оньнъ Чора экенини анылай.

Хан Чорагъа:

— Сен Чорасынъ, — дей. Чора:

— Догъру, мен Чораман, — дей.

Хан:

— Пельванлар, дагъылманъыз! Бутюн Къазангъа душман уджюм этеджек, шунгъа къаршы чыкъаджакъсынъыз, — дей.

Ханнынъ Сарыханымадынъда бир кызы бар экен. Сарыханым талдай майышып, къонъравлы алтын табалдырыкънен кырк мердивден топпи келе. Пельванларнынъ алайына кылыч улештире. Чорагъа кийиз къалта бере. Къылынчакъкъа бир шей бермей. Чора бу якъта озъ башына бир одагъа чыкъа: «Озъ батырларындан кимине ат, кимине кийим, кимине кылыч багъышлады, мангъа исе, бир кийиз тийдими?» — деп окуне ве къалтаны ат пышкысы ичерсине быракъа.

— Тез чыкъынъыз, Къазанны душман алаятыр! — деп пельванларгъа хабер этелер.

Пельванлар кетелер, еди кунъ, еди гедже къавгъа-дэгюш япалар. Ич бир чаре тапып, душманны къайтаралмайлар. Сары ханым дюрбюннен бакъа да:

— Бабай, буларнынъ арасында Чора ёкъ да, — дей. Бабасы:

— Бир шейге джаны агъыргъандыр, — дей. Сары ханым келип:

— Чора акъам, Къазанны душман алаятыр, сенинъ джанынъ ёкъмы, не ичюн чыкъмайсынъ? — деп сорай.

Чора:

— Къылыч-къама берген пельванларынынъ кеттилер де, — дей.

Сары ханым:

— Оларгъа бердим де, сангъа бермедимми ёкъса? Сангъа берген кылычымны махсус сенинъ ичюн ялтырдым, кырк аршын ерден чала, о, къалта къайда? — деп сорай.

Чора:

— Мен оны ат пышкысына быракътым, — дей.

Сары ханым эмир эте. Кырк кыз ат пышкысы ичинден къалтаны кыдырып тапалар. Сары ханымгъа берелер. О Чорабатырнынъ огюне келип, къалтанынъ агъызыны ача, онынъ ичинден секиз къат букленген бир кылыч чыкъа. Чорабатыр кылычны кюлуна ала, пек къувана.

Чора атына минип кете. Пельванлар къачып келеятыр экенлер. Чора оларны токътатып, оларгъа бир сёз айта:

— Терекнинъ тепренмеси ельдендир.

Кийикнинъ джурген ери мейдандыр.

Ашагъаны къавдандыр.

Тёпеси алтын борк кийген төрелернинъ кечинмеси халкътандыр.

Ай ийгитлер, алла билир эджелинъиз недендир.

Лякин кене чапайкъ биз душмангъа! — дей.



Чора шу ерде бир атешке чевирилип, яна. Душман аскерининъ эсабы ёкъ, еди кунъ, еди гедже дженк этелер. Ат кишеннигинден къан акъа.

Къан сели инсан кевдесини алып кете.

Чора:

— Къылынчакъ батыр, даа бармы? — деп сорай.

Къылынчакъ:

— Бир дане къалды, амма зевал сою къалды, — дей.

Къалгъан пельваннынъ ады Золпын экен. Чора огъа уджюм эте ве оны да енгъе.

Золпын пельван айта:

— Сен Чора дегиль, ким олсанъ ол, мен сенинъ богъазынъдан тутар, богъазынъны къопарыр алып эдим, — дей. — Сенден бир аллы-ешилли атеш чыкъты да, шу яман якъты козюмни, — дей.

Чора:

— Къылынчакъ батыр, Золпын атешни коръгенде, отю патлагъаны ёкъ. Бунынъ юреги чаталдыр. Оны бир бой, бир де конделен кес де, юрегини бутюн кетир, — дей.

Чора окънен ура, Къылынчакъ батыр да Золпын пельванны, Чоранынъ айткъанындай этип чала, юрегини алып келе. Чора:

— Юреги чатал экен, эгер чагъына еткен олса, бизни де енгъеджек экен, — дей.

Золпын пельван аягъына кийип джурген ташны уюрильдирип-уюрильдирип джибере де, къаршысындаки кишининъ башына кийсетип къоя экен. Къарувынъ етсе ташны урып къайтарасынъ, етмесе, ташны бойнуна кийсете, сычанны баскъандай баса къоя экен. Ерге чеке къала экенсинъ.

Батырлар Къазан ханынынъ сарайына къайталар.

Сары ханым Чорабатырнынъ алдына чыкъып:

Къайтарып джаныны, къайтарып,

Къара ерге саплангъан

Къазан деген шеэрде

Чорабатыр къан джалгъан.

— Къара батыр пельван дегиль экен, сен экенсинъ пельван. Къара батыргъа бараджакъ эдим, о батыр дегиль экен, батыр Чора экен, — дей де Чорагъа эрге чыкъа. Чора Сары ханымны ала. Сонъ айыршалар. Сары ханым душманлар тарафына кече. Арадан он беш-йигирми йыл кечкен сонъ, душманлар арасында намлы бир батыр етишкени эшитиле. Бир кунъ ола Чорабатыр бу батырнен расткелише ве эки батыр къаршылашалар. Ич бири енгъалмай. О вакъыт Чорабатыр:



Алай да достлар, алай да,
Алданганман малайга.
Къатип отсин къылычым,
Озюмден тувган балайга.
Энди бизге ал кайда
Къазан деген шеэр кайда?
Шу Къазаннын алтында
Бойлакъ, бойлакъ сув кайда? — дей.

Шу ерде эки батыр бири-биринен къавгъалаша-къавгъалаша, озьлерини бир джардан сувга аталар. Чорабатыр сувга баткъан сонъ, Къазанны рус чары ала.

КЪОПЛАНДЫ БАТЫР

Эвель заманда Къопланды деген бир батыр олган. Бу Къопланды батыр да Мамай ханнын батыры экен. Мамай ханнын апайы Заде. Къопланды батырга ашыкъ ола. Кунълерден бир кун хан бир ерге кеткенде къадыны озь севгилисине тошюнджесини анълатмакъ ёлуны таппагъан сонъ:

— Мен сени севем, сен де мени сев! — дей.

Къопланды батыр бу ишке шашып къала. Не айтмагъа бильмей:

— Мен сизни севмейим ве севип оламам. Догърусы — туз-отмек ашагъан еримде хиянетлик этмем, — дей.

Хан бир ерге даа кете. Бу вакъыт пек буюк къар ягъган экен. Ханнын къадыны аягына буюк бир этик кие де, озю яткъан эвнин алдында уч кере айлана, шай этип, къапы огюнде аякъларынынъ излерини къалдыра.

Хан эвине къайтып кельгенинен къадыны:

— Мына бакъ, сенинъ Къопланды батырынъ манга мына не эти, нелер этмек истей, — дей. Этик излерини косьтере:

— Эвнинъ этрафыны уч кере айланган сонъ, эвден чыккып къачмагъа меджбур олдым, пек къоркътым, — дей.

Хан бу ишке пек ачувлана. Къопланды батыр акъкъында бир къыгъыт яза. Бу къыгъытны Къопланды батырнынъ озюне бере де, онга:

— Бар, бу къыгъытны Москва падишасына алып кет де бер, — дей.

Къопланды батыр къыгъытка не язылганыны бильмей. Моск-

ва падишасына алып кете де бере. Падиша шу ерде Къопланды батырнынъ аягына, къолуна бугъав урдур, оны зинданга аталар. Къопланды батыр уч-беш йыл зинданда ята, пек зайыфлаша. Къарысы да ханнынъ бузавларыны бакъып, ачлы-токълу кечине.

Мамай ханнынъ ханлыгында Къопланды батырнынъ яхшы досту олгъан Кязим деген бир пельван бар экен.

О, тавдан келеяткъанда, Къопланды батырнынъ эвине кире де, онынъ къарысындан ал-эвал сорай. Къопланды батырнынъ къарысы онга олып кечкен ишни олгъаны киби айта. Къадын бу пельванга Къопланды батырнынъ балтасыны бере де:

— Балтадан манга бир эгев ясатып кельсе, — дей. Пельван бу ишни япа. Сонъ, къадын арпа унундан бир къалакъай азырлай. Эгевни о къалакъайнынъ ичине къойып пишире ве ханнынъ бузавларыны бакъмагъа кеткенде, къалакъайны да янына ала, улу ёл янына келип беклеп отура. О вакъыт, бу ёлдан бир керваннынъ кечкенини коре. О керваннынъ къайда кеткенини сорай. Керваннынъ Москвага ёл туткъанын айталар. Къадын:

— Айса, сиз Москвага кете олсангыз, меним хан тарафындан зинданга къапатылгъан акъайым, Къопланды батыр да анда, мынавы къалакъайны онга берсенгиз, — деп риджа эте.

Керван башы къадыннынъ эманетини алып кете. Москвага келе. Озь малыны саткъан сонъ, къалакъайны алып, зинданга бара.

— Бойле бир уфакъ ишни япкъанда, не оладжакъ я, — деп къалакъайны ерине теслим эте. Къалакъайны чыкып алгъан Къопланды батыр, зинданга кире де, ах чекил: «Меним къадыным манга къурып къалгъан къалакъай джибергендже, бир эгев джиберген олса, даа яхшы олур эди», дей. Къалакъайны ортадан боле. Бир даа бакъса, не корсюн: къалакъайнынъ ортасындан яп-янгы бир эгев чыкъа.

Къопланды батыр шу ерден:

— Аферин, къадыным, керчектен дост экенсинъ, — деп севине.

Къопланды батыр эгевини ала да, аягындаки бугъавларыны кесе. Тышкъа чыкъа, къаравулны ольдюре. Зиндандан къуртылып къача, догъру эвине къайта.

Бир кунъ апансыздан ёл янында бузав бакъып отургъан къадыныннынъ янына сюре де келе. Бу ерде эки асрет бири-бирлерине къавушалар. Къопланды батыр, къадынына:

— Сен меним кельгенимни бильдирме, сен онынъ буюргъан хызметини де ялма, — дей.

Бир кунъ хан кене де маджарга деве ектире де, Къопланды

батырнынъ къадыгына деве башыны ектирип, чѣльге чыкъа. Къопланды батыр да буны коре. Атка атылып, онынъ артындан бара. Джелъдире берип, ханнынъ янына келе. Ханнынъ башыны маджар тегерчигининъ кегейлери арасына тыкъа да, эки аягынен эки элини тартып багълай. Маджарны артына айландырып, ханны эзиетлеп ольдоре. Къопланды батыр ханны ольдюрген согъ, къадынынен берабер шу ерден къачалар.

КЁР ОГЪЛУ

Шойле айталар ки, даа пек эрте заманларда мемлекетни ханлар идаре эткенлер. Олар есир туткъан, озылерине таби олгъанларны савып сувургъанлар, алай байлыкъларыны джыйгъан, ярашкъы сарайларда яшагъанлар. Олар байлыкъ эльде этмек ичюн, бири-бирлеринен талашкъан, кимер вакъытларда исе, зевкъ байрамлары тизерек, озь аралары ат къошусы япкъан, абаданлыкъ къазангъанлар.

Мына, Болы орталарында шунынъ киби бир хан олгъан. Бу хан ат къошусында нам къазанмакъ макъсадынен озюнинъ къарт ве теджрибелли атчысыны ат сайламагъа джибере. Факъыр атчы шу къадар джылкъы ичинден сайлай-сайлай бир къотур тайны тапа, хангъа кетире ве:

— Иште, ханым, сизнинъ абаданлыгъынгъызны котереджек бу тайдыр, — дей.

Къотур тайнынъ арыкълыгъыны ве къурчангъылыгъыны корьген хан ачувлана ве джекире:

— Шу къадар джылкъынныгъ ичинден шу къотур тайны тапып кетирдинъми? — дей.

Залым хан озюне садыкъ олгъан хызметчилерини чагъыра, оларгъа: — Атчынынъ козьлерини чыкъарыгъыз! — деп эмир эте. Хызметчилер келе, ханнынъ дегени киби, атчынынъ козьлерине миль джиберсе, козь бебеклерини чыкъара, оны шу сайлап кельген къотур тайнынъ устуне минсете, сарай азбарындан къувып джиберелер. Шеър сокъакъларында атчы къартнынъ бу агъыр алыны корьген танышлары оны озь мемлекетине кетирелер.

Атчы къарт къанлы козь яшларыны акъызып, озюнинъ эвине кельгени киби, огълуны чагъыра ве онъа:

— Шу къотур тайны ахыргъа ал. Оны бесле. Ахырнынъ эр

тарафыны ойле кѣпат ки, ель киреджекдай ич бир тюрлю сызат кѣлмасын, — дей.

Кѣарт ат бакъыджынынъ огълу кѣотур тайны бабасы огреткени киби бакъа. Арыкъ кѣотур тай куньлер кечкен сайын семире ве тавлана башлай. Кель заман, кет заман, арадан бир йыл кече, о акъикъатен яхшы бир ат ола.

Куньлерден бир кунь кѣарт озюнинъ теджрибели кѣолунен атны сыйпай, онынъ кѣолу атнынъ савырысы устюнден тайып кете. Аман огълуны чагъырада, онъа авлагъа сув акъызып, атны онынъ чамырында сынап бакъмасыны айта. Огълу бабасы дегени киби япа. Авлагъа сув акъыза; атны онынъ чамырында чаптыра. Кѣарт ат бакъыджы атнынъ туякъларыны тутып кѣарай ве онынъ туякъларында слакълыкъ сезе ве огълуна:

— Атны бир йыл даа беслемек керек, — дей.

Огълу атны ахыргъа кирсете, кене де бакъмагъа башлай. Озю де етишкен йигит ола. Арадан бир йыл даа кече. Кѣарт ат бакъыджы огълуны чагъыра да, онъа авлагъа сув акъызып, атны бир даа онынъ чамурында сынап бакъмасыны айта. Огълу бабасынынъ дегени киби япа — авлагъа сув акъыза. Авла чамурдан юрюльмез алгъа келе ве аты кѣою чамур ичинде чапа. Кѣарт ат бакъыджы атнынъ туякъларыны бир даа тутып кѣарай, онынъ туякъларыны кѣуп-кѣуры дуя. О вакъыт о кѣуванаракъ:

— Айды огълум, бу атны минер экеч, сен эр ерден сав кѣайтарсынъ. Бу аткъа мин, хандан меним акъкъымны ал! — дей.

Кѣарт ат бакъыджынынъ огълу кѣалчаныны кие, кѣылычыны такъа, окъуны ала, тамам бир батыр киби кѣушанып аткъа мине ве хандан бабасынынъ акъкъыны алмагъа кете. Кѣр огълу акъикъатен йигит киби бельсене, бабасынынъ акъкъыны алмакъ ичюн, Болы орталыгъына чыкъа ве сазыны элине аларакъ бейитлер айта:

Мен атымны байладым минек ташына
Сычрадым миндим, аман, йигер кѣашына.
Мурат этсем, етерим ханнынъ башына.
О да манъа бир иш дегиль, меним Кѣр огълу.

Кѣр огълудыр, акъызыр душман кѣаныны,
Сав кѣалдырмаз ич бейлернинъ джаныны.
Кѣыар везирлерини, тутар ханыны,
О да манъа бир иш дегиль, меним Кѣр огълу.

Мен бир Кѣр огълуйым, дагъда кезерим,
Эскен рузгярлардан иле сезерим.

Демир чокъмар иле ханны эзерим,
О да манъа бир иш дегиль, меним Кёр огълу.

О, атыны ель киби учурып, ханнынъ шеэри къаршысында Чамлы бель денильген ерге келе. Бу ернинъ гузель дагъларыны, хош авасыны бегене. Анда чадыр къурып ерлеше. Бабасынынъ козылерини чыкъаргъан залым хангъа олгъан ачувынен Чамлы бель ётундан кечкен бейлернинъ, базиргянларнынъ акъкъындан келе. Алтын ве малларыны ала башлай. Бейлер, базиргянлар ондан зар чекелер. Онынъ ель киби учкъан аты ич бир душманны эльден къачырмай, артындан етише, я да Кёр огълуны энъ сыкълет котеклерден къуртара.

Болы орталыгъыны ве Чамлы бель этрафыны яхшы этип огрентген сонъ, Кёр огълу дагъ-ташларны джыйыштырып, дёрт одадан ибарет къыркъ аршин юксекликте бир къале къура. Диварлары учъ аршин къалынлыгъында олгъан бу къаленинъ тёпе къатына пенджеречиклер ача, бу пенджеречиклерден эр тарафны бакъып, козь эте. Бир кунъ, Кёр огълу бу пенджерелернинъ биринден бакъкъан вакъытта, къаршыда Болы ханнынъ яйлясында къурулгъан чадырны ве о чадыргъа насылдыр бир къызнынъ кирип чыкъкъаныны коре. Шу арада озюнинъ янгъызылыгъыны хатырлай, эляллыкънен оны бабасындан истемеге къарар бере. Чадыргъа бара. Чадырны, аваланмагъа чыкъкъан Болы бейлеринден бириси къургъан экен. Кёр огълу эляллыкънен къызны истей. Лякин бей Кёр огълундан сакъына ве къызыны онъа бермеге ниет этмей. Кёр огълуны баштан савдырмакъ макъсадынен:

— Огълум! Сен долашкъан адамсынъ. Къадынынъты янгъыз быракъып кеталмазсынъ. Аякъташ олгъандай бир йигит олсайды, — дей.

Кёр огълу ондан:

— Аякъташ олгъандай йигитни къайдан тапа билирим? — деп сорай. Бей онъа къайдадыр бир къасап башынынъ огълу, йигит Айвазны айта, даа чокъ яш олса да, онынъ къараманлыгъыны макътай. Кёр огълу ойлана ве:

— Я о, Айваз дедигингиз йигитни насыл расткетирмек мумкюн? — деп сорай.

Бей онъа аман уйдургъан айнеджилигини айта: Иште, санъа бир сюрю кёой, бир де дёрт бойнузлы бир къочкъар беририм. Айдап шу ернинъ чайырына барырсынъ. Кёойларны чайырда къалдырып, къасап башына кирер, кёой кетиргенини айтарсынъ, огълу Айвазнынъ къулагъына да онъа дёрт бойнузлы къочкъар кетиргенинъни аңлатырсынъ. Айваз къочкъаргъа авесленир. Чайыргъа кельгенде,



оны атыңға алып кѳачарсынъ, — дей. Кѳр огълу тышкы бейнинъ огреткени киби, кѳойларны ве дѳрт бойнузлы кѳочкѳарны алып чайырға келе. Кѳойларны чайырда кѳалдыра, кѳасап башына барып, кѳой кетиргенини айта, огълу Айвазнынъ кѳулагына да онъа дѳрт бойнузлы кѳочкѳар кетиргенини аңлата.

Кѳойларны алмакъ ичюн, чайырға келеджекте, Айваз озюнинъ кѳочкѳарыны корьмеге олгъан авеслигини бильдире. Лякин кѳасап башы Айвазны алмагъа истемей. О вакъыт Кѳр огълу:

— Зарары ёкъ. Оны мен озь атыма алырым, — дей. Кѳр огълу Айвазны озь атына ала.

Тамам чайырға келип кѳойларны бакъкъан вакъытта, Кѳр огълу Айвазнен берабер козьден гъайып олып кете. Кѳасап башы онынъ Кѳр огълу олгъаныны аңлай ве аман артындан кѳува. Лякин етишальмай.

Ель киби учып, Болы ханнынъ пезирине келелер. Болы ханнынъ огълу буны коре ве бабасына айта. Кѳр огълу кене де сазыны элине аларакъ, чалып бейитлер айта:

Чамлы бельден кечкенимни корьдилер,
Хангъа хастлыкъ эткенимни бильдилер,
Кѳр огълу Айвазны алды, дедилер,
О да манъа бир иш дегиль, меним Кѳр огълу.

Болы ханнынъ огълу чифте, чифте
Шимди олдыкъ биз де чифте.
Мен булурым сизни кырда чифте,
О да манъа иш дегиль, меним Кѳр огълу.

Шу арада Чамлы бельге етишелер.

Кѳр огълу атыны ерине багълай ве Айвазны кѳалесине кирсете. Юкѳары пенджелерден бакъаракъ, оны этрафнен таныш эте:

Чамлы бельден окъ учурдым,
Еди бинъ тельден кечирдим.
Кѳаршы яйлягъа тюшюрдим,
Иште, Айваз, дагълардыр бу.

Чамдан чамгъа сув акъыздым,
Джумлесине сув ичирдим.
Душманларны ваз кечирдим,
Иште, Айваз, дагълардыр бу.

Ат кишнемесинден дагълар чыгълады,
Кѳылыч сесинден ерлер инъледи.
Меним озюмни душман динъледи,
Иште, Айваз, дагълар бу.

Олар энди эки адам олалар. Айваз мында чалыша, осе, дюльбер бир деликьянлы ийгит ола. О Кёр огьлунунг эгъгъ якъын ярдымджысы ола, онынг артындан къалышмай, ёлгъа чыкъа, эр котеклепшовде Кёр огьлуна ярдымда булуна.

Бир кунъ джан сыкъысындан Кёр огьлу къаленинг дамына чыкъаракъ, сазыны чалмагъа отура. Буттон эфкъярыны ачып, сазыны чалгъанда, не ичюнudir, сазынынг богъазы кырыла. Мына, кырыкъ сазыны япгырмакъ ичюн атына мине. Авлакъ бир шеэрге кете. Саз тюкянына бара. Лякин саз япувнен мешгуль олгъан уста, Кёр огьлуна къулакъ асмай. О вакъыт Кёр огьлу:

Ат чаптырып Чамлы бельден кельгеним,
Арай, арай тюкянынгъны булгъаным.
Саз чалмасам мен озюм не олгъаным?
Уста Къурбан, къайыр меним сазымны, — дей.

Саз устасы кене де къулакъ асмай, озюнинг ишини девам эте. Бу арада Кёр огьлу кыза ве:

Чадыр къурдым Чамлы бельнинг дизиге,
Сырма садеф тешетирим сазыма.
Тюкюририм шимди къара юзюнгъе,
Уста Къурбан, къайыр меним сазымны, — деп текрарлай.

Саз устасы башыны биле котерип къарамай.

Кёр огьлу:

Дагълардан кельдим, кетмесин бу ичке
Татлы сёзлегеним кельмесин кучьке.
Шимди эль этерим къайкъы кылычкъа,
Уста Къурбан, къайыр меним сазымны, — деп ташлай.

Саз устасы кене де джевап бермей.

Кёр огьлу ачувланып:

Мен Кёр огьлум, дагъда кезерим,
Эскен рузгярлардан иле сезерим.
Демир чокъмар иле башынгы эзерим,
Уста Къурбан, къайыр меним сазымны, — бейитини айта.

Кёр огьлунунг адышы эшиткен саз устасы аман айына, буттон ишини быракъаракъ, Кёр огьлуны буюк бир сайгъынен айбетлеп, онгъа садефнен сырмалангъан янгъы бир саз багъышлай.

— Иште, янгъы бир саз. Буны махсус сиз ичюн япкъан эдим. Бейтлерингизден сизнинг ким олгъанлыгъызны бираз ангъадым исем де, озюни билдирсин деп, индемедим.

Кёр огьлу озюнинг сазыны устагъа къалдырып, уста берген садефли сазны аларакъ, савлукълаша ве сокъакъкъа чыкъа. Атына

миниң, чешме башына кельгенде, сув алаяткъан дюльбер бир кызыны коре. Оны бегене ве озюни корьмек истей. Кёр огьлунынъ мерамыны дуйгъан кызы фырлантысынен юзюни орте. Бу вакъыт Кёр огьлу сазыны элине аларакъ:

Теналарда герданынъны ачасыпъ,
Акъыз, шимди не ичюн шай къачасыпъ?
Не ичюн акъ юзюнъ менден ортесинъ?
Аман, дюльбер, инсаф иле кель манъа.
Кёр огьлудыр бу ерлернинъ арсланы,
Акъыз, сени шекер иле беслерим.
Сенден бир батыр огьлан истерим,
Аман, дюльбер, инсаф иле кель манъа, —

бейитлерини саз чалып йырлай. Кызынынъ артындан къалмай, оларнынъ эвлерине кете. Озюнинъ мерамыны кызынынъ бабасына анълата. Бабасы онъа:

— Э, не ягмалы? Бегенгенинъни алырсынъ, — дей.

Кёр огьлу учъ кунъ, учъ гедже той эте, кызыны ала ве озюнинъ аят аркъадашы иле баягъы омюр эте.

Лякин Кёр огьлунынъ хангъа олгъан ачувы кене де ятышмай. Чамлы ельге кетмеге азырлана. Савлукълашкъан вакъытта, къадынына ир билезликти тобултгъы къалдыра ве къадынынынъ козьлеринден оперек: — Сакъла. Меним огьлума берирсинъ. Биенъизден меним атымдан олма бир тай тувар. О тай да, ат олур. Меним огьлум о аткъа атланып, мени талар, — дей.

Атына мине, толу чапувнен ель киби учып, Чамлы бельге келе. Айваз оны къуванчнен къаршылап ала.

Кёр огьлу озюнинъ батырлыгъы ве атынынъ джойрюклигинен алай ортагъа нам бере. Гъарез Болу ханы да онынъ атыны эльге кечирмеге истей. Бу ишке озюнинъ садыкъ хызметчилерини къоя. Хызметчилер атны алып къачмакъ ичюн, эр ерде ве эр вакъыт насылдыр бир аман-аралыкъ къадыралар.

Кунылерден бир кунъ Кёр огьлу дегирменге бара. Атыны азбарда къалдырып, озю дегирменге киргенде, ханнынъ хызметчилери атны чалып хангъа кетирелер. Ахыргъа байлайлар. Ат о къадар тавлана ки, кимсени озюне якъын ёратмай. Хан бу атны баш этемегенинден, оны пекитеджек адамларны араштыра. Мында эр якътан чокътан-чокъ ат бакъыджылар джыйылалар, амма атны пекитип оламайлар. Устюне гъурбет урбалары киерек, Кёр огьлунынъ озю де келе ве топлангъан адамлардан:

— Бу насыл джыйын? Бу халкъ нени сейир эте? — деп сорай.

— Бизим ханымыз Кёр огьлунынъ атыны эльге кечирген, амма баш этамай, — деп джевап бере адамлар арасында бириси.

— Мен баш этерим, — дей Кёр огълу, атына олгъан яныгъыны гизлеерек.

Сейир этмекте олгъан адамларнынъ арасындан кечип, хангъа теменна этерек:

— Буюрынъыз ханым, атынгъызны мен баш этерим, — дей.

Хан:

— Айды бакъайым, — деп, кулюмсирей.

Кёр огълу атынынъ янына бара. Акъикъатен де, ат оны таный ве кишней. Шу куньден сонъ, Кёр огълу ханнынъ ахырында озюнинъ атыны бакъмагъа башлай. Атыны алып къачмакъ ичюн аман-азырлыкъ кыдыра.

Бир кунъ хангъа:

— Атны чокъ байлы тутмакъ олмаз, чапгырмакъ керек, — дей.

Хан ондан:

— Алып къачмазсынъмы? — деп, сорай. Кёр огълу:

— Алла этмее, ханым! Мен ойле осаллыкъ япарыммы? — дей.

Хан разы ола. Лякин алып къачар хавфынен, этрафы юксек исарнен сарылгъан къале авласы ичинде чаптырта. Кёр огълу атынынъ джалынларыны сыйпап, перчемини тартаракъ, устуне мине ве:

Дегирмен алдында алдырдым Кёр атны,
Устуне мингенлер булдылар муратны.
Эгиль, атчыгъым, козылеринъден опейим,
Пертавлатып чыкъкъанынъны бакъайым.

Пек эвельден билемен алынъны,
Эшрефиден кестиририм налынъны.
Гузеллерге яптырырым халынъы,
Пертавлатып чыкъкъанынъны бакъайым.

Меним атым исарлардан атылыр,
Атылдыкъча, къулакълары чатылыр.
Уджузлыкъта юз бинъ алтынгъа сатылыр,
Пертавлатып чыкъкъанынъны бакъайым.

Сени минген къалырма ич саарге,
Узенгиси пек яраша йигерге.
Болы ханы салды мени къаарге,
Пертавлатып чыкъкъанынъны корейим, —

бейитлерини айтып, аякъларыпен атыны сыкъа. Ат сейирге кельгенлерини билерек, авла исарыны атлай, козден гъайып олып кете.

О джум козюнъни, ач козюнъни Чамлы бельге келе. Атыны ахыргъа



багылай ве озюнинг аркъадашы Айвазнен берабер къаленинг тёпесине чыкъаракъ, Чамлы бель этрафыны козете баш-лайлар. Шу арада олар силянен къушангъан бир атлыны ве онынъ артындан керван кельгенини корелер. Айвазны къаледе къалдырып, озю ёлга тюше. Атлы якъынлай, керван девелерининг боюндарында чынъгыравукъ сеслери эшитиле башлай.

Иште, бу вакъыт Кёр огълу керван къаршысына озь адамларындан бирисини ёллай ве адети узьре базиргян башындан ёл кирасыны истей. Сарап базиргян башы алдына чыкъкъаннынг сёзюне къулакъ асмай, къаршылап, озь ёлуны девам эте.

Кёр огълу бунга кызаракъ:

Шу къаршыдан кельди улу базиргян,
Къыр устонде къалып къонды базиргян.
Яхшылыкъ иле ёл кирасыны коньдер,
Манъа кулип, ойле кечме базиргян, — дей.

Базиргян кене де къулакъ асмаяракъ, Кёр огълунынъ адамына: — Бар агъанга сёйле, бизде ёл кирасы береджек адам ёктыр, — деп джевап бере.

Кёр огълу къайтарып:

Эй базиргян башы, бу сёзюнгъ ичке!
Яхшы сёйлешейик кетмесин кучьке.
Шимди эль этерим къайкъы кылычкъа,
Манъа кулип ойле кечме, базиргян.

Керван сакъчылары джыйлыша, мушавере япаракъ, базиргян башына: — Аман, эфендим, къавгъагъа киришсек енгилирмиз. Энъ яхшысы бираз алтын берип баштан савмалысынъ, — дейлер.

Базиргян башы керван сакъчыларынынъ дегенине разы ола ве Кёр огълуна беш бинъ алтын ёллай. Бунга азсынган Кёр огълу:

Токъат керванындан алдым бакъырны,
Ынджытмангъыз фукъарени, факъырны.
Кира бермей терк этме бу кырны,
Сайчы беш бинъ алтын даа, базиргян.

Бинъ алтын коньдерсе, бабама мал олмаз,
Бинъ даа коньдерсе, атыма нал олмаз.
Бинъдеп манъа ич етишкен кяр олмаз,
Сайчы беш бинъ алтын даа, базиргян.

Йигит алыны бильсе, олурмы начар,
Эйиликтен коклерде шаинлер учар.

Къоркъулы къавгъаны корерсе, къачар,
Сайчы беш бинъ алтын даа, базиргян, — дей.

Базиргян кене де къаршыламакъ макъсадыннен:

Белиме байладым алтын къушакъны,
Мен енъерим сенинъ киби ушакъны,
Чокъ ерлерде коръдим эшекни,
Токъунма кервангъа, чекиль, Кёр огълу, — дей.

Кёр огълу къайтарып:

Еди йылдыр Чамлы бельде тургъаным,
Достлар арап душманларны къыргъаным.
Еди къабат налны бирден бургъаным,
Бер бу ёлнынъ кирасыны кеч кет, базиргян, — дей.

Базиргян:

Он секизде яштыр, йигит дурулмаз,
Дурулса да, сия мыйыкъ бурулмаз.
Кёр огълунынъ аслы гонглю къырылмаз,
Кене эваллам ёкътыр санъа, Кёр огълу, — деп джевап бере.

Кёр огълу:

Мен бир Кёр огълуйым, дженкке турарым,
Башынъа къайкъы, къылыч урарым.
Алай керван сакъчысыны къырарым,
Бер бу ёлнынъ кирасыны, кеч кет, базиргян.
Сен билирсинъ, Кёр огълунынъ хуюны,
Турар шимди этер сизге оюнны.
Бир саатте кесер юз бинъ боюнны,
Бер бу ёлнынъ кирасыны, кеч кет, базиргян, — дей.

Шу ерде атына мине, базиргян башы ве керван сакъчыларынен
къавгъагъа тутуша. Керван сакъчыларынынъ чокъусыны къыра.
Амма сонъки такъатыны джыйыштырып, орталыкъкъа чыкъкъанда,
башынынъ зоргъа къалтгъаныны дуяракъ, аркъадашы Айвазны
чагъыра:

Етиш, Айваз, етиш,
Кетти намымыз.
Чамлы бельнинъ чёллеринде,
Чыкъар джанымыз, —

бейитини айта. Айваз къаледен тюшерек, къавгъа мейданына етише,
ве онгълу-соллу къылычыны сийтештире. Къаршылагъанларнынъ
алайыны къырып, керваннынъ малына саип олалар. Кёр огълу
къуванчынъдан, Айвазны къучакълап, онынъ козылеринден опе ве
сазыны элине аларакъ:

Айваз кельди, онъа иш энди,
Базиргян кесильди, ерге тешелип,
Белине кылыгч, элине чокъмар кыушанды,
Аферин, Айвазгъа, козюмден яш кельди.
Дёгюше, дёгюше, аман, тюштим энишке,
Чокъмарымны батырдым алтын-кумюшке.

Менден чокъ селям олсун кучюк Мемишке¹,

Сиясыны такъсын, чыкъсын дёгюшке, —

бейитини сазыны чалып йырлай. Олар атларыны ахыргъа байлаяракъ,
къалеге чыкълар. Геджени чокъ раат юкьунен кечирелер. Куньлер ве
айлар кече.

Бир тынч куню Кёр огьлу юмшакъ миндер устюнде багдаш
кыурунып отура. Башыны тёбен аларакъ, озюнинъ мемлекетини,
коюни, анасыны, бабасыны хатырлай. Юректен терен окюнереке,
сазыны элине алып гъамлы бир макъамнен:

Анам сагъ олсайды, корьсейди алымны:

Берердим мен онъа таптыгъым малымны.

Нейлейим, анам корьмеди юзюмни.

Эвимизни къалдырып, чыкътым дагъларгъа,

Чокъ тереклер отурттым багъчаларгъа, багъларгъа.

Бельки, огълум олды, кимге сёйлейим,

Анам ёкъ, гьурбетим, бунъа нейлейим.

Бабамнынъ козьлери кёр олмагъайды,

Гьарез Болу ханлары козюни алдылар,

Амма атымны корил пешман олдылар, —

бейитлерини сазыны чалып йырлай. Олар Айвазнен узундан-узакъ сёз
ачып, лафкъа тутуналар.

* * *

Кель заман-кет заман, Кёр огьлунынъ къадыны бир огьлан догъура.
Онынъ адыны Асан адайлар. Асан осе, буюй, деликъанлы бир йигит
ола. Кёр огьлунынъ атындан тёреген джойрюкнинъ бирисини минип
чапа ве эглене. Онынъ ат устюнде отурышына сукълангъан адамлар:

— Эшкъ олсун огьлангъа! Акъикъатен, бу да бабасы киби йигит
оладжакъ, — дейлер.

Асан адамларнынъ бу лафыны эшите. Эвге келерек, анасындан

¹ «Кёр огьлу»нынъ агъыздан айтылгъан ич бир вариантнда кучюк Мемишнинъ
ким олгъаны айтылмай. Кыяснен, о къарт ат бакъыджынынъ козюни чыкъларгъан хан
огьлу, я да Кёр огьлуны авлап юргенлерден бириси олмакъ керек. Биринджиси даа
къавий фикирдир.

бабасыны сорай. О вакъыт анасы онъа билезликти тобулгъыны чыкъарып бере ве къучакълаяракъ:

— Ма, ал огълум! Буны санъа бабанъ быракъып кеткен эди. Сенинъ бабанъа Кёр огълу дерлер. О Чамлы бель денильген ерде яшай. Шимди аткъа минип, бабанъа кетеджексинъ, — дей.

Асан буны аңлагъаны киби, сияларыны къушана, элине билезликти тобулгъыны ала, кер джойрюгине мине, анасынен савлукъалашып ёлгъа чыкъа.

О уджсуз-буджакъсыз дагълар ве кыырларны кечерек, таныш олмадыгъы Чамлы бель денильген ерге егише. Бутюн ёл бою Асан бараджагъыны, бабасыны кореджегини тюшюне. Къале къаршына кельгенде, оны Айваз коре ве Кёр огълуна:

— Къаршыдан бир ийгит келе, ат тыпкъы сизнинъ атынъызгъа бенъзей, — дей.

Кёр огълу онъа:

— Атыны исте, — деп джевап бере.

Айваз аман къаледен ашагъы тюше ве Асаннынъ къаршына чыкъып:

Бала, бу ерге кельгенсинъ,
Тюшюнджеге далгъансынъ,
Не олгъанын бильмегенсинъ,
Конъдер кер атынъны, — дей.

Асан атынынъ тизгинини чекерек:

Мен бу ерге кельгеним,
Тюшюнджеге далгъаным,
Не олгъанын бильмегеним,
Бермем кер атымны, — деп джевап бере.

Айваз динълеерек текрар:

Бала, сёзюмни динъле,
Санъа дейджегим бойле:
Ёл кирасы истерим,
Конъдер кер атынъны — бейитини айта.

Асан къайтарып:

Огърады башым бу якъкъа,
Ашкъ иле дёндим о якъкъа.
Дюгюшир чыкъарым акъкъа,
Бермем кер атымны, — дей.

О озюни сыкъмай атынынъ тизгинини бош джибере, ёлуна кете башлай. О вакъыт Айваз зоруны девам этерек:

Бала, кель инат этме,
Мени динъле, зоргъа етме,

Озь джанынъны кыйып кетме,
Коньдер кер атынъны.
Лякин Асан ич бир торлю кьоркю бильмеерек:
Динъле мени, эй, адам!
Чекиль ёлдан, кет бурадан.
Ат меним джаным эр дем,
Бермем кер атымны, — кьаршылай.

Къале тёпесинде Асаннен Айвазнынъ бу сёзлерини динълеп тургъан Кёр огълу, Асан киби яп-яш бир баланынъ, бу къадар тик кьаршылагъанына даянып оламай. Мердивенден ашагъы тюше, ёлнынъ кенарына келеерек:

Бала, бизлер чокъ киши,
Сен ялынъыз бир киши.
Не ятгын сен бу иши,
Коньдер кер атынъны, — дей.

Асан:

Сиз олунъыз кыркъ дане,
Мен олайым бир дане,
Йигитсинъ, чыкъ мейдане,
Бермем кер атымны, — деп джевап бере.

Кёр огълу кыза ве энъкъастан, кьоркьутмакъ ичюн:

Кёр огълуйым, кесерим,
Бала, къанынъ эмерим.
Ольдюририм, комерим,
Коньдер кер атынъны — дей.

Асан бу ернинъ, Чамлы белъ денъильген ер олгъаныны ве онъа кьаршы чыкъкъаннынъ, бабасы олгъаныны анълай ве:

Арслан огълуна арслан дерлер,
Къаглан огълуна къаглан дерлер.
Санъа Кёр огълу дерлерсе,
Манъа да Асан дерлер, — деп айта.

Кёр огълу кювана, дикъкъатнен бакъа, даа чокъ йыллар эвельси догъаджакъ огълу ичюн, къадынына быракъкъан билезликли тобулгъысыны таный, чапып бара, Асаннынъ бойнуна сарыла. Огълу ве бабасы биринджи кере бири-бирини корелер... Кёр огълу Асандан аманлыкъ сорай. Асан онъа факъыр кой адамларынынъ, фукъаре шеэр халкъынынъ сыкълетлигини, анасынынъ савлугъыны ве насыл этип, ёлгъа чыкъкъаныны тарифлей. Олар артыкъ учъ дане йигит олып, Кёр огълунынъ къалесинде омпор этелер.

КЪОЗУКЮРПЕЧ

Эвель, эвель экенде,
Эвель заман экенде,
Девелер деллял экенде,
Сен бешикте экенде,
Мен эшикте экенде,
Къазлар торгъай экенде,
Кокюмиз бакъыр экенде,
Еримиз такъыр экенде,
Сувсыгъыр амамджы экенде,
Къаглы-къуплу бакъалар,
Къанатланды учмагъа,
Дерьдаки балыкълар,
Кира тутты кочмеге...
Къайнана бекмез къайната,
Къызы къашыны ойната,
Ойнатма къыз къашынъны,
Кесер бабанъ башынъны.
Сенигъ бабанъ тав башы,
Сув башынъныгъ атлары
Арпа ашап кишнешир,
Курпе ашап тишлешир.
Энгъиш кельсе: «тыр» демез,
Къыр кельсе де «джурь!» демез.
Алтмыш бакъла¹ арпанъны,
Едим демез шу атлар.
Учъ къуюнынъ сувуны,
Ичтим демез шу атлар...
Пердакъай-пердакъай экенде,
Пердакъай кельди джувурьш,
Чалгъы сабыны; сувурьш,
Штанына бакъса, авы ёкъ,
Къавташында къавы ёкъ,
Мына сизге бир такъмакъ,
Масалымны динълеп бакъ:

Заман, заман экенде, узакъ бир мемлекетте, Эдилъ байнен бир
де Джайыкъ бай олгъан. Кунълерден бир кунъ, Эдилъ бай къунлу

¹ бакъла — эвель заманда аштыкъны чувал эсабынен эсаплагъанлар, эки чувал — бир бакъла эсап олунгъан



биесини, Джайыкъ бай исе, ботасыны джоялар. Сонъ, бу байларнынъ экиси де джоякъларыны къыдырмагъа кетелер. Кете-кете, олар экиси бир оба устюнде, бири-бирлеринен расткелишелер ве бир меракълы меселе акъкъында сёз ачалар. Меракъ этип ачкъан меселелери де — къадынларнынъ агъыр аякълы олувлары акъкъында экен. Бу байлар озъ къадынларынынъ бу алларыны бири-бирилерине бильдирелер.

Джайыкъ бай:

— Худжур шей, экимизнинъ джоягъымыз да бир геджеде олды, меним ботам джоялды, сенинъ биенъ, — дей.

Бу байларнынъ экиси де, бу ерде этек йыртышалар. Бирисининъ къызы, бирисининъ огълу олса, къыз алып, къыз беришеджек олалар. Байлар бу лафны битиргендже, оларнынъ янына джельдай джельдирип бир атлы келе де:

— Эдиль байнынъ апайы къыз тапты, — дей.

Чокъкъа бармай бир атлы даа джельдирип келе де, оларгъа:

— Джайыкъ байнынъ апайы огълан тапты, — дей.

Байлар меджлис япмакъ фикиринен, эвлерине къайталар. Огъланнынъ адыны Къозукюрпеч, къызнынъ адыны да Баянслув адалар.

Балалар айбет-къыбет бакъылып оселер; шай этип бир чокъ йыллар кече. Балалар оськен, етишкен сонъ, оларны мектепке окъумагъа берелер. Яваш-яваш балаларнынъ къалтыплеринде бири-бирлерине муаббетлик теренлеше. Куньлерден бир кунъ Джайыкъ бай оле. Эдиль бай да: «Мен оксюзге къызымны бермем», деп, сёзюнден къайта. Балаларнынъ бири-бирлерине олгъан севгиси теренлеше экен. Эдиль бай буны дуя. Не япаджагъыны бильмей. Тюшпоне-тюшпоне, тап сонъунда чаре тапмагъан сонъ, яшагъан еринден бапкъа бир якъкъа кочип кете. Къозукюрпечлернинъ къорантасы озъ ерлеринде отурып къала. Къозукюрпеч бир юкъласа, еди кунъ, еди гедже юкълай экен.

Къозукюрпеч куньлерден бир кунъ, шойле бир юкъудан тюш корип тура, асретимни корейим деп, ёлгъа чыкъа. Кете-кете бир ерге барып ете. Бу ер, Эдиль байнынъ ери экен. Бакъса не корьсин: бу ерде не Эдиль бай, не де онынъ къызы — ич бириси къалмагъан. Къозукюрпеч бир даа артына къайтып, Эдиль байнынъ къайда экенини анасындан сорай. Анасы да буны онъа айталмай.

Къозукюрпеч озъ-озюне:

— Бу иш бойле олмаз, — дей де, анасына комеч пиширтип, джыллы джымшакъ комечни къойнуна алып текрар ёлгъа чыкъа.

Анасы:

— Эй, балам, сен бу тасавурынъдан вазгеч, олар ким биле, насыл мемлекеткекеткендирлер. Джаным балам, букъадар малынъ-мулькюнъ бар, буларны терк этме, — деп ялвара. Анасынынъ бу ялварувы, ич

бир файда бермей. Бундан сонъ, анасы баласыны къандырмакъ ичюн, бельки бейит тесир этер деп, шу бейитлерни айта:

Бир бойнузы кок йыртар, балам,
Бир бойнузы ер йыртар, балам,
Ашадан келир бир сюрю тувар,
Темир кокнен ала да чубар —
Буларны кимге ташлайсынъ, балам?

Огълу анасынынъ бу бейитлерине:

— Арамгъа кетсин! — деп, джевап бере. Анасы: «Бельки джылкъысыны айтсам, къайтар», деп тюшпоне ве:

Чѣльге чыкъса, кишнешир, балам,
Къыргъа чыкъса, тишлешир, балам.
Ашадан келир бир сюрю джылкъы,
Джылкъыларнынъ ямандыр къылыпгы.
Оларны кимге ташлайсынъ, балам, — дей.

Къозукюрпеч бунъа да эмиет бермей. Анасы: «Бельки къойларыны айтсам, къалыр», деп тюшпоне ве:

Туякълары шалтырашып, балам,
Къозлу къойдай манърашып, балам,
Ашадан келир бир сюрю къоюнъ,
Чыкъып да кетсенъ, о болур оюнъ,
Буны да кимге айтайым, балам, — дей.

Огълан кене де: «Арамгъа кетсин!», деп, джевап бере. Анасы ойлана, ойлана: «Бельки девесини айтсам, къалыр», деп:

Туякълары джалпылдашып, балам,
Орькечлери салпылдашып, балам,
Саркъувдан келир, бир сюрю деве,
Оларны ташлап, кетмесе тѣре, — ялвара.

Огълу бу кересинде де: «Арамгъа кетсин!» деп, джевал бере. Анасы чокъ тюшпонтен сонъ: «Бельки эмген сюткони айтсам, кетмез», умютнен:

Онъ эмчегим ийдирдим, балам,
Ал-ешпиль кольмек кийдирдим, балам.
Къайт дегенде, къайтсана, балам,
Хайырлы бир сѣз айтсана, балам, — дей де,
козьяшларыны тѣкип агълай.

Огълу бунъа шойле бир йырнен:

Онъ эмчегинъ ийдирдинъ, анай,
Ал-ешпиль кольмек кийдирдинъ, анай.



Уле танынъ ур ташкъа, анай,
Таш къайтса да мен къайтмам, анай, —

джевап къайтара, да ёлгъа чыкъа. Къозукюрпеч кете, кете, ёлда кеткен маджарнынъ артындан ете. Маджар саиби артындан адам еткенини дуймай. Маджар къайда кетсе, Къозукюрпеч де анда кете. Ёлда оларгъа бир чобан расткеле. Къозукюрпеч чобаннынъ янына тюшип къала. Маджар озъ ёлунен кетмекни девам эте. Къозукюрпеч чобангъа бара да: — Сен мангъа бир къой сой, — дей.

Чобан къоюны аджымай, соя. Къозукюрпеч озюнинъ яхшы урбаларыны ташлай да, чобаннынъ урбаларыны алып, устуне кие. Къойнынъ этини къарынгъа толдура, терисинден озюне къалпакъ тикип кие. Шу ерде бир таз огъланнен достлашып, ёлгъа чыкъалар.

Къозукюрпечнинъ мангъалайында айнен йылдыз алямети бар экен. Бапъна къой терисинден тикильген къалпагыны басып-кийген сонъ мангъалайындаки алямет корюнмей. Афта кете, ай кете, Къозукюрпеч Эдиль байны къыдырып тапа. Онынъ босагъасы тюбуне бара да, багдаш къурунып отура. Бир вакъыттан сонъ, Эдиль бай озъ эвинден чыкъа. Босагъада отургъан адамнынъ, Къозукюрпеч олгъаныны танымай. Эдиль бай:

— Хош кельдинъ, балам, бу ерлерде не ишлеп джуресинъ? — деп сорай.

Къозукюрпеч:

— Мен, сизге къозулы къой бакъмагъа адам керек деп эшиттим, онынъ ичюн де кельдим, — деп джевап бере.

Эдиль бай, Къозукюрпечни къозулы къой бакътырмакъ ичюн озюне чобан этип тута. Къозукюрпечнинъ макъсады исе, къой бакъмакъ дегиль де, Баянслувны корьмек эди. Къозукюрпеч алты ай къозулы къой бакъа, амма Баянслувны коралмай. Къозылы къой бакъып коралмагъан сонъ, джылкъыджылыккъа авуша, джылкъы бакъа.

Къозукюрпеч джылкъы бакъкъанда, куньлерден бир кунъ чёльде озъ башына тилекке отура ве:

Джайыкъ баштан джеллер де эссе,

Эвлер, койлер чёльде де кезсе,

Баянслув сейрангъа чыкып юзюни ачса,

Къотур тай да койге къачса, — деп тилек тилей де,
озъ тилегини кесе.

Куньлерден бир кунъ ойле бир ель эсе, тереклер тюбю-тамырындан савурыла, тоз-думан ола, козь ачтырмай. Баянслув бу вакъыт багъчагъа сейирге чыкъа, шу арада Къозукюрпечнинъ къотур тайы да къачып багъчагъа келе. Къозукюрпеч, тайнынъ артындан чапа-чапа келе де, багъчагъа кире. Баянслувнынъ янына кельгенде:

Алты ай бакътым къоюнъны, бикеч,
Ич корьмедим боюнъны, бикеч.
Алты ай, он кунь дегенде, бикеч,
Корьдим, тайым кельгенде, бикеч, — дей.

Бундан сонъ, Баянслув Къозукюрпечтен:

— Сиз кимсинъиз я? — деп сорай.

Къозукюрпеч куломсирей де:

— Сорап турмагъа аджет ёкъ, — деп, джевап бере.

Шу ерде къалшагъыны чыкъарып, Баянслувгъа манълайындаки айнен йылдызны косътере. Шай этип, эки асрет бири-биринен тапшалар.

Къыз Къозукюрпечнен сёзлеше ве онъа:

— Меним анамнен бабам бир айлыкъ мусафирликке кетеджеклер, о вакъыт мен санъа хабер этермен, сенъ келирсинъ, — дей.

Къозукюрпеч къотур тайыны алып, джылкъысына къайта. Куньлерден бир кунь Эдиль бай мусафирликке кете. Къозукюрпеч Эдиль байнынъ кеткен хаберини алгъанынен, Баянслувгъа келе. Асрет асретине къавушалар. Къозукюрпечнен Баянслув, Эдиль бай кельгенге къадар бир ерде отуралар.

Къыз Къозукюрпечке:

— Сен бабамнынъ келеджек ётуна чыкъарсынъ, сакъын бир якъкъа бакъма пек, сезгек олып тур, олар сени танырлар, — дей.

Къозукюрпеч джылкъысыны алып, чёльге чыкъа. Къызнынъ бабасы келеджек ёлгъа козь ташлай. Таягъына таянып, Эдиль байнынъ къайтувына азырлана. Эдиль бай келеяткъанда, дар-къашмасынлар деп, дагъылгъан джылкъыларыны къайтарып, бир ерге джыя. Бу вакъытта Эдиль байнен апайы шу ерден кечип кетелер.

Эдиль байнынъ апайы Къозукюрпечке пек дикъкъатнен бакъа, онынъ ким экенини манълайындаки айнен йылдыздан таний.

Эдиль байнынъ апайы койге кельгенде:

— Сен джылкъыджынънынъ ким экенини тандынъмы? — деп акъайындан сорай.

Эдиль бай:

— Танымадым, — деп, джевап къайтара.

Апайы:

— Танымагъанынъ не, джылкъыджынъ, Къозукюрпеч де, — дей.

Шу арада койден бир атлыны ёллап, Къозукюрпечни алдыралар. Бай онынъ янындан кечкенде, онъа эль къавушгырып турмагъаны ичюн, Къозукюрпечни джезаламакъ, ольдюртеджек ола.

Баянслувнынъ пек дюльбер бир дюльдюли бар экен. Аслында бу дюльдюль башкъа адамларгъа чиркин бир къотур тай олып корюне

экен. Аван ель эскенде, чёльден къачып кельген къотур тай да бу дюльдюль экен. Къыз озюни Къозукюрпечни танымагъан, бильмеген бир киши киби косътере. Бабасына келе де:

— Биз оны ольдюрген сонъ, чекиштирип ольдюрейик, — дей.

Бабасы:

— Яхшы, къызым, оны насып этип чекиштирейик, я? — дей.

Къыз:

— Оны энъ азаплы чекиштирюв — ат чаптырып, дженк яптырып бакъува олур, биз бутюн ерлерден ат чапкъан яшларны джыяйыкъ, — дей.

Бай, Къозукюрпечке ат чаптырып бакъмакъ ичюн, бутюн ерлерден ногъай яшларыны чагъырта. Яшлар аткъа атланып келелер. Бай оларгъа аш-сув сала. Джылкъыджы яшнынъ акъи-къатен, Къозукюрпеч олгъанына-олмагъанына сонъуна къадар къаний олмакъ ичюн, кельген яшларны йырлатып бакъайым, ким де Баянслувнынъ адыны йыргъа къошып йырласа, о Къозукюрпечтир, дей. Яшларгъа йырламакъларынны теклиф эте. Эр кес йырлай, лякин ич бирев ийрына Баянслувнынъ адыны къопмай.

Къошугъа кетеджек атларнынъ эписи, яшлар джыгъылгъан эвнинъ алдында багъты тура экенлер. Баянслув келе де, кескин пекисинен атларнынъ эгерлериндеки тапкъырларынны бирер-бирер кесип чыкъа.

Йырламакъ сырасы джылкъыджы яшкъа — Къозукюрпечке келе. О йырлагъанынен, озъ ийрына Баянслувнынъ адыны къоша. Бай буны эшиткенинен:

— Токъта, йырлама, — дей. Яш йырлай.

Бай ачувланып:

— Тут да атынъыз, башыны джеллят этинъыз, — дей. Яш чапып чыкъа да, къотур тайгъа мине. Кельген яшлар, Къозукюрпечнинъ артындан къувмакъ истейлер, амма атларына миналмайлар. Бай дженкке азырлангъан аскерлерине эмир этип:

— Тез джылкъыджы яшны тутынъыз, — дей. Бу аскерлернинъ, атлары устюндеки эгерлерининъ де тапкъырлары кесилип къоюлгъан экен.

Буны да, Баянслув япкъан. Аскерлер де, ногъай яшлары киби йыкылып, йыкылып къалгъанлар.

Шай этип, Къозукюрпеч олардан къачып къуртула, лякин Къозукюрпеч Баянслувнен ичте хаберлешип оламай. Оларнынъ арасында сёз къатнаткъан бир торгъай ола. Бу торгъай эки арада сёз къатнатып джуре.

Кунылерден бир кунъ бу торгъай ягъмургъа тутула, къанатларыны сувландыра. Эдилъ байнынъ янында бир хынзырнынъ бириси шу гъарип торгъайны тутта да, торгъайдан:

— Сенде бир иш бар, сен мында не ишлеп джуресинъ? — деп сорай.

Торгъай озъ сырыны онъа айтмай. Бу хынзыр, торгъайнынъ къанатларыны юлкъа. Торгъай озъ сырыны кене де айтмай. Сонъ, хынзыр озъ ишини токътатмай, онъа демир маша къыздырып баса.

Бундан сонъ торгъай чаре тапалмай. Къозукюрпечнинъ къайда олгъаныны айта. Хынзыр да буны Эдиль байгъа барып айта. Къозукюрпечнинъ къайда экенини эшиткен Эдиль бай, аскерлерине:

— Ким де Къозукюрпечнинъ башыны кесип алып кельсе, онъа къызымны берерим, — дей.

Эдиль байнынъ бу хаберини эшиткен аскер башы мейдангъа чыкъа да:

— Къозукюрпечнинъ башыны мен алып келирим, — дей. О, торгъайны озъ янына алып кете. Торгъай онъа:

— Мына о ерде, мына бу ерде, — деп оны алдатып алып тура.

Торгъайнынъ башы айлана, чаре тапалмай, аскер башына Къозукюрпечнинъ дурагъыны косътере. Къозукюрпеч де единджи кунюни юкълап яткъанда, аскер онынъ башыны кесип ала да, Эдиль байнынъ янына къайтып келе. Къозукюрпечнинъ башы бабасына кетирилгенини корьген Баянслув шаша-шашмалай, не яладжагъыны бильмей. Бабасына бара да:

— Бабам, Къозукюрпечни биз ольдюрдик, дженазесини де биз джыймакъ керекмиз, — дей.

Бабасы бунгъа разы ола.

Къозукюрпечни джыймагъа кетелер. Кеткенде, Баянслув ве арабджыдан гъайры, янларына аскер башыны да алалар. Ёлда къуюнынъ янына баргъанда, къыз:

— Мен сувсадым, — дей. Аскер башы:

— Сувсасанъ, сувсагъандырсынъ, лякин бизде не къопкъа, не де сыджым бар, сув ичменьнинъ чареси ёкъ, — дей.

Къыз онъа:

— Сен меним эрим олмакъ истесенъ, къуюгъа тюш де, мангъа къалпагъынънен сув алып бер, мен къалпагъынъны тельбевнен чекип алырман, — дей.

Аскер башы бунгъа разы олып, къуюгъа тюше. Къыз сувны чекип чыкъара, тельбевни къайтарып къуюгъа ташлай да, озъ ёлуна кете. Аскер башы къуюда къала. Къыскъасы, къыз Къозукюрпечнинъ ольген ерине бара, шу ерде арабджысына эки янаша къабир къаздыра, озюнинъ эки тилти пекисини чыкъара да, кескин бир тилини озюнинъ кокюсине къадай ве оле. Арабджы, къабирлернинъ устюни ортил, артына айланып къайта. Шай этип, эки асрет янаша къабирде ятып къалалар.

Кунълерден бир кунъ, Эдиль байнынъ чобаны къойларыны чёльдеки къуюдан сувармакъ ичюн, къую башына келе. Къуюгъа къопкъасыны

узата. Бу арада, кую тюбюнде, насылдыр бир инсан даушы эшитиле. Кюпкяны чеке, кюпкянен бирге кую тюбюнден Кюзукюрпечни ольдюрген, аскер башы чыкя. Чобан буны таный. Шу ерде:

— Кюзукюрпечнен Баянслувынъ башына джеттинъ де, озюнъ, даа ольмей джуресинъми? — дей де, онынъ башына бир ыргакъ яндыра. Аскер башынынъ мийи сачрап кете де, Кюзукюрпечнен Баянслувынъ къабирлери арасына барып тюше. Азмы, чокъмы вакъыт кече, къабирлернинъ устюнден гуль тереклер осип чыкя. Аскер башынынъ мийи тюшкен ерден, бир итбурун осип чыкя. Гуль тереклер гуль ачалар. Олар даима бири-бирлерине къавушмакъ истейлер. Итбурун исе, оларны бири-бирлерине къавуштырмай.

Гуль тереклер аля бугунъ осип, гуллер ачып тура экенлер. Бу къабирлернинъ янындан отъкен-кечкенлер итбурунны даима кесип, гуллерни де кюкъләп кете экенлер.

ТАИРНЕН ЗОРЕ

Бир заманда бар экен, бир заманда ёкъ экен, бир падиша бар экен. Онынъ да ич де баласы олмай экен.

Кунълерден бир кунъ падишанынъ къапусына бир саиль¹ келе, падиша онъа акъча бере де, озю бир «ах» чеке.

Саиль:

— Эй падишам, не ичюн «ах» чекесиз, апамагъа, ичмеге тапмайсынъызмы я? — деп сорай.

Падиша:

— Эр шейим бар, амма не файда, мен бир кунъ келип оле кюйсам, ерime кюймагъа бир балам биле ёкъ. Везирлерим де шай, баласызлар, — дей.

Саиль:

— Айса, мен сизге эки алма берейим, бирисини ортадан болер де ярысыны озюнъ ашарсынъ, ярысыны да къадынынъ ашар, — дей. — Мынавы бирини де везиринъе бер, ярысыны озю ашасын, ярысыны къадыны, сонъ сизлернинъ баланъыз олур, — дей.

Саильнинъ айткяны киби, падишаман везир алмаларны алып ашайлар.

Арадан чокъ кечмей дженк илян этиле, падишанен везир дженкке кетелер. Дженк майданында бираз вакъыт кечкен сонъ, падиша:

— Меним апайым агъыр аякълы эди, не олды бильмем, — дей.

¹ саиль — тиленджи

Везир:

— Менимки де агтыр аякты эди, не олды бильмем, — дей.

Сонъ, оларгъа бир атлы келе де:

— Падишам, ханым кызы тапты, — дей. Падиша онъа мужде бере.

Сонъ, везирнинъ атлысы да келтип:

— Ханым огълан тапты, — дей. О да, хабер кетирген атлыгъа муждесини бере. Падишанен везир шу ерде сёзлешелер: «Биз балаларымыз оськен сонъ, оларны бири-бирине берермиз», дейлер. Оларнынъ адыны Таир ве Зоре адландыралар. Падишанен везирнинъ балалары осе, буюй, оларны окъутмагъа берелер. Таирнен Зоре бир мектепке къатнайлар.

Куньлерден бир кунь олар мектептен къайта экенлер, Таир алтын алмасынен ойнагъанда, къурткъанынъ сув ташыгъан бардагъын кыра.

Къурткъа падишагъа бара да:

— Падишам, сиз Таирнен Зорени окъумагъа джибересиз, амма олар гульбагъчада бири-биринен ойнашалар, — дей.

Падиша:

— Ойнашсынлар, биз везирнен экимиз бири-биримизге оларны къавуштырмагъа сёз бердик, — деп джевап бере падиша.

Къурткъа:

— Сиз кызынъызны эвлендирмек ичюн везир огълундан гъайры, башкъа падиша баласы тапмадынъызмы? Таирге къой бакътырысынъыз, онъа ляйыгъы будыр, — дей.

Падиша къурткъанынъ айткъанына къана. Таирге къой бакътыра. Бир кунь Таир къой бакъып къайта экен, Зоре де чешмеге бара, алтын билезлигини чешме ташыннъ устюне къоя да кери къайта. Билезликнинъ устюне де «Таирнен Зоре» сёзлери язылы экен. Таир келе, билезликини ала, джебине къоя, озь эвлерине къайта.

Бир къач вакъыттан сонъ, олар бири-бирлеринен расткелишелер.

Зоре:

Мешребемни далдырдым,
Далдырдым да толдурдым.
Къубе ташнынъ устюнде
Билезлигим къалдырдым, — дей.

Таир:

Мен чешмеге бармадым,
Элим, юзюм джувмадым,
Къубе ташнынъ устюнден
Билезлигинъ булмадым, — дей.



Къойлар къара къозылыдыр,
Гъарип ады назлыдыр.
Билезлигинъ устюнде
Насыл язы язылыдыр? — дей.

Зоре:

Къойлар къара къозулыдыр,
Гъарип ады назлыдыр.
Билезлигим устюнде
«Таирнен Зоре» язылыдыр, — дей.

Таир:

Сувлар акъар улукъ-улукъ,
Улукълары долукъ-долукъ.

Билезликни булгъангъа,
Не берирсинъ мужделик? — дей.

Зоре:

Сувлар акъар улукъ-улукъ,
Улукълары долукъ-долукъ.
Билезлигим булгъангъа,
Иште озюм мужделик, — дей.

Къурткъа оларнынъ йырларыны дингълеп тура, падишагъа бара да:
— Падишам, Таирнен Зоре бири-бирине тюркю айтып башладылар,
— дей. Падиша индемей.

Къурткъа:

— Мен оларгъа Зоренинъ ана сютни савып, бир мияне къавурып
ашатайым, сонъ олар къардаш олурлар, — дей.

Къурткъа Зореге анасынынъ сютюнден къатылгъан бир мияне
къавурта, Таирни де ашамагъа чагъырта.

Таир келе. Зореге:

Къашынъ, козюнъ чаткъансынъ,
Къайгъыларгъа баткъансынъ,
Огюмдеки миянеге
Агъув зезр къаткъансынъ, — дей.

Зоре:

Къайгъыларгъа баткъанман,
Къашым, козюм чаткъанман.
Огюмдеки миянеге
Анемнинъ сютюни къаткъанман, — дей.

Таир:

Алмысынъ, алдашмысынъ,
Сырмысынъ, сырдашмысынъ.



Ана сютю кьатеджек,
Кель ашайыкъ, кьардашсынъ, — дей.

Зоре:

Алмы олур, алдашмы олур,
Сырмы олур, сырдашмы олур,
Сен везирнинъ огьлусынъ,
Къызмы, кьардашмы, олур! — дей.

Къурткъа оларнынъ янына келе:

— Не ичюн ашамайсынъыз? — дей.

Зоре шу ерде мияне савутыны ала да, къурткъаньнгъ башьна авдара.
Буны эшитип, падиша келе, къурткъагъа:

— Сен не ичюн оларнен огърашасынъ я? — дей.

Къурткъа падишагъа:

— Таир Зорени бегенмей, онъа яман сёзлер айта, ондан къуртулмакъ керек. Биз Таирни Мердим шеэрини джиберейик, о шеэр пек узакъ, о анда барып кельгендже, биз Зорени эвлендирирмиз, — дей. Падиша онынъ бу сёзлерине разы ола. Таирге кетмесини тектиф этелер. Таир шу ерден кетмеге азырлана.

Куньлерден бир кунь ёлгъа чыкъа. Зоре де Таирнинъ кеткек ёлуна чыкъып, онъа:

Бирини минип, бирини джетип,
Бильмем къайда кетесинъ.
Ачылмагъан гьондженъни
Кимге сымарыш этесинъ? — дей.

Таир:


Бирини минип, бирини джетип,
Бильмем къайда кетемен.
Ачылмагъан гьонджемни
Мевляма сымарыш этемен, — дей.

Зоре:

Гидер исенъ, огърунъ олсунъ,
Мердим шеэр ёлунъ олсунъ.
Менден гъайры яр севсенъ,
Джеллятлар бойнунъ урсунъ, — дей.

Сонъ кене Зоре:

Ай арагъай-арагъай,
Айдарынъ кимлер, тарагъай.
Беш кунь арув, бир кунь сав,
Хатырынъ кимлер сорагъай? — дей.



Таир:

Ай арагъай, арагъай,
Айдарым кимлер тарагъай.
Беш кунь арув, бир кунь сав,
Хатрымны мевлям сорагъай, — дей.

Шу ерден бу дюльберлер савлыкълашып, бири-биринден айырылышалар. Агълашалар, сызлашалар. Таир кете.

Зоре:

Гидер исенъ, огърунъ олсун,
Дерья-денъиз ёлунъ олсун,
Менден де гъайры яр севсенъ,
Эки де козюкъ кёр олсун, — дей.

Таир:

Гидер исем, огърум олсун,
Дерья-денъиз ёлум олсун.
Сенден гъайры яр севсем,
Эки де козюм кёр олсун, — деп джевап бере.

Ай кете, йыл кете, Мердим шеэрини барып ете. Анда баргъан сонъ, бир багъчанынъ ичинде, бир къурткъа отура экен, Таир онъа жъын келе де:

— Селям, аналакъ, — дей. — Огъулсызгъа огъулман, къызсызгъа къызман, — дей.

Къурткъа:

— Огълум ол, — дей.

Таир о къурткъанынъ огълу ола. Бу къурткъа, эр кунъ бир ерге аш алып кете экен.

Бир кунъ Таир:

— Аналыкъ, сен бу ашны къайда алып кетесинъ? — деп сорай.

— Бабагъ бойле-бойле бир ерде багъчеванлыкъ эте, шунда алып кетемен, — дей.

Таир:

— Айса, сиз манъа онынъ не ерде олгъаныны косътеринъиз, мен озюм алып кетейим, аналыкъ, — дей.

Къурткъа аш алып кеткен ерини косътере, ашны плу куньден Таир алып кете башлай. Таир косътерильген ерге келе де:

— Бабалыкъ, сен къайт энди, мен мында турайым, — дей. Бабасы:

— Сен мында турмагъа билирсинъми? — дей. Огълан:

— Мен билирмен, — дей. Бабасы кете. Таир мында багъчеванджы олып джуре. Бу багъчада ханнынъ къызлары аремнинъ чешмесинде джувунгъанда, дюрбиннен оны узакътан бакъып корелер, бегенелер. Къызлар яш багъчевангъа яхшы ашлар джибере башлайлар. О да, оларгъа гуль джибере.



Бир кунь кызынынъ бириси:

— Шу гульни, огъланнынъ озю кетирсин, — дей.

Огълан гульни озю алып келе, бир къапудан кире, экинджи къапуда бир кыскааякъланы коре, гульни онъа туттура да къайта.

Къыз экинджи куню:

— Мытлакъа, озюме кетирсин, — дей. Эртеси куню Таир кене де гуль къопарып кетире. О кельгени киби, бири де «мени ал», дей, о бири де «мени ал», дей. Сонъ, кызлар бабасыны чагъырталар:

— Бу бизни алмай, — деп, огъланны бабаларына чакъалар.

Падиша:

— Сен не ичюн меним кызларымны алмайсынъ? — дей.

Таир:

— Мен алыр эдим, амма меним бир шейим ёкъ, бир кунь олур, манъа: «Сен мында бир таягъынъман, эки аягъынъманъ кельдинъ», дерлер. Онынъ ичюн, илькиде мен бир шей къазанайым да, сонъ бир де бирини алырман, — дей.

Падиша бундан сонъ, Таирге бир къаве тюкяны яптыра. Таир анда барып, алыш-вериш япа.

Бу бойле къалсын, биз Зореге кечейик. Бир улу ёлдан керван кете экен. Зоре де бу керванны корип, оларны токътата, шу бейитлерни айта:

Кочъмисинъ, керванмысынъ,

Дердима дерманмысынъ?

Таирге мектюп ёлласам,

Сен оны алырмысынъ?

Керваннынъ башы бу кызгъа агъызыны ача да къала. Бир Таз огълан керваннынъ башына чыкъа да:

— Сен онынъ айткъаныны анъладынъмы? — дей.

Керван башы:

— Ёкъ, — деп джевап бере. Сонъ Таз огъландан:

— Я сен анъладынъмы? — деп сорай.

Таз огълан кызгъа:

Кочъкен де биз, керван да биз,

Дертлиге дерман да биз.

Бир мектюпчик ёллар исенъ,

Таиринъе берирмиз биз, — дей.

Керваннен кеткен кызлар бар экен. Шу арада дёрт кыз келе. Бу кызлар Зореге бир яхшы къалпакъ ве саат берелер. Зорени котерип ала, Таз огъланнынъ янына, деве устуне къоялар.



Таз огълан кызыларгъа:

— Зоренинъ кърны ачтыр, аш кетиринъиз, — дей. Аш кетире де ашаталар. Сонъ Зоре Таз огъландан:

— Сен Таирни насыл тападжакъсынъ? — дей.

Таз огълан:

— Сиз манъа бир алтын окъ, бир де алтын табакъ берирсинъиз. Окъны атармыз, эгер бизим аткъан тарафымызда Таир олса, окъ догъру алтын табакъкъа тюшер. Табакъ аман айланып турар, амма Таир олмаса, окъ табакънынъ бир ягъындан кирер, экинджи ягъындан чыкъар кетер, — дей.

Зоре Таз огъланнынъ истеген шейлерини бере. Олар бир вакъытта Мердим шеэрини келелер.

Таз огълан айткъаны киби япа, Таирни тапып, къаве тюкянына бара. Таз огълан оларгъа бир къач тюркю айта. Таир бунынъ тюркюсини бегене:

— Сенде яр къокъусы бар, — деп оны эвине алып келе. Ёл бою Таз огълан Таир адлы бир яшны къыдырып чыкъкъанларыны айта.

Таир да онъа:

— Мен Таирмен, — дей. Таз огълан денгемек истеп:

— Таир олсанъ, оладырсынъ, лякин мен инанмайман, мына бу алтын окъны ат, бу табакънынъ устуне келип, айланып турса, сен Таирдирсинъ, эгер Таир олмасанъ, табакънынъ бир ягъындан кирер, экинджи ягъындан чыкъар да кетер, — дей.

Таир окъны ата, окъ догъру табакъкъа келип тюше.

Бундан сонъ Таз огълан:

— Мен сизинъ мемлекетке бардым, сенинъ севген кызынъ мени кийиндирип мында джиберди, — дей. Кызынынъ язгъан кягытыны да Таирге бере.

Таир:

— Меним Таир олгъанымны сен халкъкъа айтма, — дей. Мен бу гедже къачарман, сен меним ериме Таир ол да, мында къал, — дей. Еди йыл мында турсанъ, санъа падишанынъ кызыны берерлер, — дей.

Таир гедже тура, атына мине, орталыкътан ёкъ олып кете. О кеткенде, йырлай-йырлай кете. Онынъ кечкен ёлу пек къоркъунчлы экен, бу ёлдан айдутлар бир кимсени джибермей экенлер. Бунинъ йыргагъаныны эшиткен айдутлар бу адам я дели, я да ашыкътыр, — дейлер.

Таир айдутларнынъ кършысына келе, айдутлар Таирге:

— Токъта, — дейлер. — Гедженинъ бир маалинде, къоркъмай, къайда кетесинъ? — деп сораилар. Таир элине сазыны ала да:

Мердим ёлу тюм-тюздир,
Геджелер манъа куньдюздир.
Ёл беринъиз, къыркъ айдут,
Зорем эвде янгъыздыр, — дей.

Араларындан айдутларнынъ бириси чыкъа да:

— Коресинъизми, бу ашыкътыр, дедим де тийменъиз шунъа кетсин, — дей. Таир кете. Бек султан, деген бир ханлыкъкъа барып ете ве ханъа кельген сонъ:

Мезелерге селям олмаз,
Ашыкъларгъа токътав олмаз.
Зоре досттан айырылдым,
Бир риджам бар, султанымыз, — дей.

Бек султан:

— Сен меним озюмни кьошып, аскеримни кьошып бир тюркю айт, санъа бир кюл аскер берирмен, барыр да Зоренъни алырсынъ, — дей.

Таир:

Озюнъ гульсинъ, аскеринъ гуль,
Везиринъ сендай дегиль;
Зоре досттан айырылдым,
Бир риджам бар, бек Султан, — дей.

Бундан сонъ, Султан Таирге бир кюл аскер бере:

— Бар да, Зоренъни ал, — дей.

Таир кете, озю догъгъан шеэринге етеяткъанда, кюрткъа Таирни тюшюнде коре.

Кюрткъа падишагъа:

— Таир келеятыр, Зорени аладжакъ, онъа Султан бир кюл аскер берген, — дей.

Бундан сонъ Кюрткъа Таирнинъ келеджек ёлуна чыкъа да, янгы бир мезар къаздыра. Озю де, мезарнынъ башында агълап отура. Бир вакъыт Таир аскерлеринен мезарнынъ янына келип ете. Кюрткъа янына джан ашны да пиширип алып чыкъкъан экен. О аскерлерге:

— Токътанъыз, падишанынъ кызы Зоре ольди, мына бу джан ашны ал да онынъ джаны ичюн ашанъыз, — дей.

Таирнинъ чырайы тюрлене. Ашны о ашамай, аскерлер ашайлар. Таир шу ерде токъталып къала. Аскерлерине «къайтынъыз, иш анълашылды», дей. Аскерлер озь султанына къайталар. Кюрткъа да кете. Таир бир озю ятып къала. Бир вакъытта Таир уянып тура. Амма, бакъса не корьсин къабирнинъ янында башкъа кимсе ёкъ, бир озю къалгъан. Шу ерден догъру бир къартанайнынъ эвине бара. Къартанайгъа:



— Меним кърным ач, манъа аш берсенъиз, — дей.

Къртанай:

— Вай, балам, падиша кызынынъ тою олаята, бар анда той ашы ашаса, — дей.

Таир:

— Бу насыл той я, къртым? — деп сорай.

Къртанай:

— Ана, Таирни ёкъ этип джибердилер, балам. Зоренинъ тою олаятыр, оны башкъасына берелер, — дей.

Таир:

— Аналыкъ, сен Таирни корьсенъ, танырсынъмы? — дей.

Къртанай:

— О мындан кеткенде даа бала эди, насыл таныгъым я, балам? — дей.

Таир шу ерде:

— Мына, мен Таирмен, — дей. Таир къртанайгъа:

— Тойгъа бар да, мына бу юзюкни Зореге бер, — дей. Къртанай юзюкни алып, Зореге бара:

— Мендай кърт бол, ханийим, — деп, алып кельген кынасыны Зоренинъ башына джагъа. — Мына бу юзюк де Таирнинъ юзюги, санъа селям джиберди, — дей де, оны да Зореге бере.

Къртанай:

— Той кеткенде, атнынъ башыны манъа джеттирсинлер, — дей.

Зоре хызметкярларына:

— Бир сандыкъ аш ве алтын кетиринъиз де бу къртанайгъа беринъиз, — дей.

Зоре къртанайдан Таирге джавлыкъ джибере. Къртанай звине къайткъан сонъ, Таирни тойгъа алып келе. Келин де кетмек ичюн аткъа минген экен. Эр кес атнынъ башыны тута. Зоре кимсени кябул этмей. Сонъ:

— Ким кълды, ким кълды, къртанайнынъ огълу кълды, — дейлер. Халкъ Таирни, къртанайнынъ огълу, деп билелер. Таирни алып келелер. Зоре атнынъ башыны онъа туттура. Шеэрнинъ четине чыкъалар.

Таир:

Ал кийип гонълонъ осьтюрге,
Муабетинъ менден кестирме.
Атынънынъ башыны чеке тут,
Окчечигим эздирме, — дей.

Зоре:

Ал кийинип гонълком осьтюремем,
Муабетим сенден кестирмем,



Эки козюм кёр олса,
Окчечигинъ эздирмем, — дей.

Зоренен берабер оны озгъарып, Зоренинъ дженгелери де кетелер.
Бираз кеткен сонъ, Таирге де бир ат берелер. Таир де ат минип кете, эм
бу дженгелерге де тюркю айта:

Ай дженгелер, дженгелер,
Саруш олгъан, дженгелер.
Зоремнинъ аягъыны
Пек сыкъмангъыз, дженгелер.

Ай дженгелер, дженгелер,
Саруш олгъан дженгелер,
Сизге файдасыз аякъны
Къырмасын да зюнгилер.

Еллер эсер, савурылыр,
Дюньялар баптан верилир.
Разы ол сен, Зорем,
Ёлумыз мында айырылыр, — дей.

Зоре айырыла да кете. Таирнигъ эси джоюла, аттан йыкъыла ве шу
йыкъылгъан еринде къала. Зорени келин этип алып кетелер.

Бараджакъ ерлерине баралар.

Зоре:

— Мангъа киев кельмесин, меним ёлда агъам олип къалды. Мен
Къыркъ кунъ яс тутаджам, — дей. Сонъ къыркъ кунъ яс тута. Къыркъ
кунъден сонъ, — мангъа къыркъ къыз беринъиз, мен гуль багъчагъа
чыкъаджам. — дей.

Гуль багъчагъа кетелер. Зоре бир пычакъ ала. Гуль багъчагъа
баргъан сонъ, къызларгъа:

— Бар кетинъиз, — дей де, озю агълай-агълай сув кенарына кете.
Сувнынъ о бир янында Таирни коре. О Зорени яхшы эслеп оламай.

Таир:

Аведен учкъан къазмысынъ,
Ерден кечкен назмысынъ.
Сорамакъ айып олмасын,
Келинмисинъ, къызмысынгъ? — дей.

Зоре:

Аведен учкъан къазман мен,
Ерден юрген назман мен.
Къыркъ кунъ муллет алгъанман,
Анадан догъгъан къызман, мен, — дей.



Шу ерден Зоре Таирни сувнынъ бу ягына чыкъмасыны истей. Таир пек талып чыкъа. Зоре Таирнинъ бетине дюльбентини япаджакъ ола, бу вакъыт Таир:

Дюльбентинъ ямпа юзюме,

Козюм тойсынъ юзюнъе, — дей

ве джаныны теслим эте. Зоре де шу ерде пычакънен озюни урып ольдюре. Къурткъа да бу ерге келип, бир чобангъа:

— Мени де бу ерде ольдурсе, — деп, онъа алтын бере. Чобан ачувланып:

— Сен оларны дюньяда бир ерге къошмадынъ, ахретте де къошмайджакъсынъмы? — дейде, онынъ башына бир ыргакъ ура. Ода оле. Къурткъанынъ мийи сачрап, Таирнен Зоренинъ къабирлерининъ арасына тюше.

Бу мий, обур бир тегенек олып, ерден осип чыкъа. Таирнен Зоренинъ къабирлеринде исе, гуллер осип чыкъа. Бу гуллер экиси бир ерге къавушаджакъта, обур тегенек оларны къавуштырмай. Бу обур тегенек ачкъан гульнинъ япракъларына къадалып тура.

НАР КЪАМЫШ

Бир заманда бар экен, бир заманда ёкъ экен, фукъаре бир акъайнынъ бир де апакайы бар экен. Олар, инсан бармагъан бир адада яшай экенлер. Оларнынъ бир кызы ве эки де огъланлары бар экен, амма дюньяда оларнынъ кызы киби дюльбер кыз ёкъ экен.

Кунълерден бир кунъ, озьлерининъ кызларынынъ къартайыш къалмамасы ичюн, озь аралары сёйлешип, кызны буюк огъуларына бермек къарарына келелер. Бу къарарны кызнынъ кучюк къардашы эшитип, агтесине баргъан да:

— Аптем, анамнен бабам сени буюк агъама къоджагъа бермек истейлер, — деген.

Кыз неге огърагъаныны билъмеген, озь-озюнден утангъан. Бу кыз шу ерден, элине сув ташыгъан савутларындан бирини алтып, чешмеге кете.

Чешменинъ башында буюк бир голь бар экен, гольнинъ ичерисинде де къамышлыкъ осе экен. Кыз бу къамышлыкънынъ янына агълай-агълай барып:

— Джаным къамыш, ярыл къамыш, артыкъ мен бу дюньянынъ юзюни коръмек истемейим, — деп ялвара.



Къамыш ярыла. Къыз къамышнынъ ичерисине кире де:

— Орьтоль къамыш! — дей. Къамыш орьтоле.

Къызнынъ агъасы беклей-беклей, къардашы кельмей. Оны араштырып чыкъа, лякин тапып оламагъанындан, гъайыптан хабер бериджиджадыгъабара. Джадыонгъа къардашынынъ чешмебашындаки гольде оськен нар къамышлардан бирининъ ичинде экенини айта. Огълан шу ерден чыкъып, догъру бу нар къамышларнынъ янына келе ве шу сёзлерни айтып йырлай:

Нар, нар къамыш, нар къамыш,
Ярылса да шу къамыш.
Шу къамышнынъ ичинде
Меним ярем бар эмиш.

Камыш ичинден къыз онъа:

Нар, нар къамыш, нар къамыш,
Ярылмасын шу къамыш.
Къардашына яр деген,
Бу дюньяда бар эмиш, —

деп джевап къайтара. Агъасы козьлерининъ яшыны сюртип, эвге келе, ишни олып кечкени киби анасына бильдире. Анасы да къамышнынъ янына келип, ялвармагъа башлай:

Нар, нар къамыш, нар къамыш,
Ярылса да шу къамыш.
Шу къамышнынъ ичинде
Менин келиним бар эмиш, — дей.

Къыз къаршылык оларакъ:

Нар, нар къамыш, нар къамыш,
Ярылмасын шу къамыш.
Баласына келин деген
Бу дюньяда бар эмиш, — дей.

Анасы да агълай-агълай эвине къайта. Бираздан козьлерининъ яшыны чыбыртып, уфакъ къардашчыгъы келе ве къамышкъа ялвармагъа башлай:

Нар, нар къамыш, нар къамыш,
Ярылса да шу къамыш.
Шу къамышнынъ ичинде
Меним аптем бар эмиш, — дей.

Къамыш ярыла. Къыз къамыш ичерисинден чыкъа, къардашынынъ коълундан тутып, экиси де койден чыкъып кетелер. Кете, кете бир сувгъа расткелелер. Къардашы:

— Аптем, шу сувдан бир ютум сув ичейимми? — деп сорай.

Аптеси:

Эгер, бундан сув ичсень,
Тору аткѣа дѣнерсинъ.
Инсан олып осьмез де,
Бир айвангѣа конерсинъ, — деп джевап бере.

Бала аптесининъ сѣзюнден чыкъмай ве ёлларыны девам этелер. Бир чокъ вакъыт кечкен сонъ, бир сувгѣа даа расткелелер. Бала пек сувсай, аптесининъ сув ичмеге изин бермесини истей.

Аптеси:

Эгер бундан сув ичсень,
Ала къашкъыр олурсынъ.
Авджыларнынъ къолундан
Сопа ашап олерсинъ, — дей.

Бала буны да динълей ве сув ичмеге кѣрар бере. Бираз вакъыт кеткен сонъ, бир темиз сувлу озенчикке даа расткелелер. Кѣардашы сув ичмек ичюн, аптесинден текрар разылыкъ истей.

Аптеси:

Эгер мындан сув ичсень,
Акъ къозугѣа дѣнерсинъ.
Инсан олып джурмезсинъ,
Пычакъ ашап олерсинъ, — дей.

Бала буны да динълейджек ола, лякин о къадар сув ичеджеги келе, артыкъ даянып оламай. Аптеси артына бакъмай, тюшонджели бир алда кеткенде, озенден бир къач ютум сув иче...

Шу арада бир къозугѣа дѣне ве аптесининъ артындан къозу киби багъырмагѣа башлай. Аптеси артына айланып бакъа, кѣардашынынъ къозугѣа дѣнгенини корип, яна ве мугъайсырай.

Не япсын, артыкъ ич бир тюрлю чаре къалмай. Къозуны артына такъып, озъ ёлуны девам эте. Багъ ичинде буюк бир терек коре. Терекнинъ тюбюнде де падишанынъ сув чокърагъы бар экен. Къыз къозучыкъны терек тюбюне отлатмагѣа джибере, озю исе, терек тѣлесине чыкып отура. Бираз вакъыттан сонъ, падишанынъ къулларындан бири къолуна эки буюк бардакъ алып, сувгѣа келе. Бир даа чокъракъ ичерсинде бир кольге коре ве о якъкъа-бу якъкъа бакъа, кимсени кормей.

Бу къул, бу ашына кельгенге къадар, даа озюни кузъгюде коръмеген экен. О озюни, сувда корюнген къызнынъ кольгеси киби дюльбер санып:

— Мен бу къадар дюльбер олгъан сонъ, мангѣа падишагѣа къул олып, сув тышымагѣа неден керек экен? — деп тюшюне ве алып



кельген бардакъларыны ерге урып парлай да, чыккып кете. Падиша беклей-беклей, амма күүл кельмей. Экинджи күүлны джибере, о да биринджиси киби бардакъларны парлап, падишанын сарайындан чыккып кете. Падиша учонджи күүлуну джибере, о да дигерлери киби бардакъларны парлай ве чыккып кете. Падиша беклей-беклей, күүлларындан ич бириси сувдан кяйтмай. Сонъ күүлларына не олгъаныны бильмек ичюн, чешмеге озю бармаккыны къарарлаштырып, ёлгъа чыккы. Падиша чокъраккынынъ янына яккынлашккында, парлангъан бардакъ парчаларыны корип, терен тюшонджеге дала. Бираз тюшонген сонъ, падиша голь янына келип баккы, баккы не коркын: сув ичинде дюльберден-дюльбер, узун сачлы бир ккызынынъ кольгесини коре. Юреги урмагкы башлай. Башыны котерип, юккыарыгкы баккы, терекнинъ юккыары пытаккылары арасында айнынъ он дертю киби дюльбер бир ккызынынъ олгъаныны эслей. Не япаджагкыны бильмей. Бираз тюшонген сонъ, ккызыгкы шу сёлерни айтып, ялварып йырламагкы башлай:

Тюш, гузелим, сен мында,
Сени ккырым япарым.
Гуль багкычанынъ ичинде
Бульбуль киби баккыарым, — дей.

Ккызы онкы:

Ёккы, падишам, тюшалмам,
Эмрингкызни япалмам.
Гуль багкычанынъ ичинде
Гузель бульбуль оламам, — деп джевап бере.

Падишанынъ козюнден яшлар аккып башлай. О козы яшларыны сюртип:


Тюш, гузелим, сен мында,
Сени келин япарым.
Алтын ккыафес ичинде
Лячин киби баккыарым, — дей.

Ккызы бункы да ккыайль олмай:

Ёккы, падишам, тюшалмам,
Эмрингкызни япалмам.
Алтын ккыафес ичинде
Лячин ккыушу оламам, — деп джевап бере.

Падиша:

Тюш, гузелим, сен мында,
Сени ккызым япарым.
Юксек сарай ичинде
Лячин киби баккыарым, — деп ялвара.



Къыз падишанынъ бу сонъки сѣзюне разы ола ве теректен тюше. Падиша къызнынъ тюшкенине сонъ дередже къувана. Къыз онъа озюнинъ башына кельгенлерини анълата ве янынъдаки къозучыкъны косътерип:

— Падишам, бу къозучыкъ меним дюнья ве ахрет къардашымдыр. Ёлда бир озенден сув ичип, къозугъа чевирилъди, — дей,

Падиша къозучыкъны да къуванчнен къабул эте. Сарайгъа келелер, падиша къыркъ кунъ, къыркъ гедже той этип, къызны зар-зорнен кене де озюне къадынъ этип ала. Падишанен бу къыз сарайда яшап башлайлар. Сарай халкъы оларнынъ бахтыны пек кунълей.

Бир кунъ падиша къызгъа келип:

— Мен авджылыкъны пек севгенимден, бугунъ авгъа кетеджегим. Мен кеткен сонъ, бир де бир кимсенинъ сѣзюне къанып, тышкъа чыкъма, — дей.

Къыз разылыкъ бере. Бу падишанынъ бир де таз давкеси бар экен. Бу таз давке падиша кеткен сонъ, сарай халкъларынен топланып, къызнынъ янына келелер. Олар:

— Айды, аптечигим, денъиз ялысына чыкъып, бираз эгленейик, — дейлер. Къыз разы олмайджакъ ола, амма чаре тапалмай. Къызлар зар-зорнен оны ялыгъа алып келелер ве союнып, джувунмагъа башлайлар. Падишанынъ къарысына да: «Джувун», — деп ялваралар. О къызларнынъ ялваргъанларыны ред этмек истемей. Аягъынъдаки папучларыны чыкъарып, бир аягъынъ джува, экинъджисини джувмагъа азырлангъанда, таз давке оны денъизге йыкъа. Къыз батар-батмаз, оны бир арам балыкъ юта. Къызлар сарайгъа къайтып келелер. Бу таз давке де бу къызнынъ урбаларыны кийип, сарайгъа келе. Озюне согъан къабугъындан бир тѣшек тиктирип, тѣшекке кирип ята.

Бу таз давкенинъ козьлери кок, сачлары къыска, бети чубар бир къыз экен. Падиша сарайгъа кельгени киби, къадынынынъ яткъан одасына кире, бакъса не коръсин: тѣшекте чубар, чиркин бир къызнынъ яткъаныны корип шаша.

— Вай, санъа не олды? — дегенде, таз давке сесини чыкъармай. Озюни пек хаста косътерип, бир тарафындан дигер тарафына айлана. Таз давке тѣшек ичерисинде айлангъанда, согъан къабугъынен ятылгъан тѣшек чыгъырдамагъа башлай. Падиша бу вакъыт тѣшекте яткъан таз давкеге:

— Айтса, санъа не олды? О шыгъырдагъан не? — дей. Таз давке зар-зорнен:

Кемиклерим шыгъырдай, падишам. Пек ярамайым. Мен сизинъ кельменъизни къарай-къарай, козьлерим когерди, алача къаргъалар сачларымны юлкып битирди. Чубар къаргъалар да бетимни чокъып,

чубар эттилер, — дей. Падиша не демене бильмей.

— Не япсам яхшы олурсың? — деп сорай.

Бу вакыт таз давке падишага:

— Ана шу кюзучыкны сойып, оның этини ашасам, яхшы олурман, — дей.

Падиша:

— Я сен бу кюзучык меним дюнья ве ахрет кярдашым деген эдинъ де? — дегенде, таз давке:

— Мен оны кый беллеп, соймасынлар деп, сизге ялан айттым, — дей.

Бу вакыт падиша везирлеринден бирини чагырып:

— Чагырыңыз кьасапчы Болатны, — дей.

Везир кьасапчы Болатны чагырмаларыны эмир эте. Кюзучыкны тутып, аякларыны байлаятканда, кюзучык:

Джибер мени, Болат акъам,

Ялы бетке кетейим.

Омюрюминъ сонъунда

Бир дувачыкъ этейим, — деп ялвара.

Болат кюзучыкның аякларыны чезип джибере. Кюзучык ялыга келип, агълай-агълай, аптесине:

Болат пычакъ кыйрай,

Богъазыма таяй.

Таз давке айтты: «Сой!» деди.

Падиша айтты: «Кый!», деди, — дей.

Аптеси кярдашының сесини эшитип:

Арам балыкъ ичиндем,

Сия сачым тышында.

Онъ янымда султаным,

Кыйтип чыкыйым, тувганым, —

деп джевап бере.

Кюзучык агълай-агълай кене де Болатка келе. Болат оның аякларыны багълай, кюлуна пычакны алганда, кюзучык:

Джибер мени, Болат акъам,

Ялы бою чапайым.

Сонъгулыккъа шу дюньяны

Тоя-тоя бакыйым, — деп ялвара.

Болат кюзучыкның ялварганыны ред этип оламай, аякларыны чезип джибере. Кюзучык чапа-чапа ялыга келип, аптесине ялвармага башлай:

Болат пычакъ кыйрай,

Богъазыма таяй.



Таз давке айтты: «Сой!» деди.

Падиша айтты: «Къой» деди, — дей.

Къыз шу сёзлерни эшитип, кене де къардашына:

Арам балыкъ ичиндем,

Сия сачым тышында.

Онъ тизимде султаным,

Къатип чыкъайым, тувгъаным, —

деп джевап бере.

Къозучыкъ бир даа агълай-агълай Болаткъа келе. Болат онынъ аякъларыны багълай, башыны тутуп, богъазына пычакъны якъынлаткъанда, къозучыкъ:

Джибер мени, Болат акъам,

Ялы бою кезейим.

Шу багъчанынъ ичерсинден

Мен бир гульчик узейим, — деп текрар ялвара.

Болат къозучыкъны аджып, бир даа джибере. Къозучыкъ къалыдан чыкъып кете. Падиша барып: «Бакъайымчы, шу айван къайда кете экен?» — деп, къозучыкънынъ артындан кете. Къозучыкънынъ догъру ялыгъа кеткенини коре. Онынъ артындан яваш-яваш кетип динълей. Падиша къозучыкънынъ агълай-агълай аптесине:

Болат пычакъ къайрай,

Богъазыма таяй.

Таз давке айтты: «Сой!» деди.

Падиша айтты: «Къой» деди, — дегенини эшите.

Сонъ денгизден къызнынъ да:

Арам балыкъ ичиндем,


Сия сачым тышында.

Онъ тизимде султаным,

Къатип чыкъайым, тувгъаным, — дегени онынъ

къулагъына чалына.

Падиша бу сёзлерни эшиткени киби, барып къозучыкъны къучакълап ала ве бир даа йырламасыны истей. Къозучыкъ бир даа йырлай, падиша къызнынъ сесини динълей ве аман эвге къайтып, озъ мемлекетинде олгъан далыджыларына эмир эте. Далыджылар денгизге дала, арам балыкъны тапып чыкъаралар. Балыкъны ортадан яралар да, онынъ ичинден къызны сагъ-селямет чыкъаралар. Падиша сарайгъа келе ве къозучыкъны сойдырмакъ истеген чубар таз давкени, озюнинъ яланджы къадынларыны атларнынъ къуйрукъларына багълата да, сюйретип ольдюрте.



АШЫКЪ ГЪАРИП

Бир заманда бир йигит олгъан. О йигитнинъ де бир анасынен бир де къыз кърдашы бар экен.

Куньлерден бир кунъ йигит, анасына;

— Анам, сен манъа падишанынъ кызыны айттырса, — дей.

Анасы:

— Алла-алла, балам, неге сандыракълайсынъ я? Падиша санъа кызыны берип, сен ким олгъансынъ?! — деп огулунынъ тюшпюнджесине тааджигленип куле.

Огълу, анасынынъ бу лафларына къулакъ бермей.

— Бар, берсе берир, бермесе бермез, кейф падишанынъ, — дей.

Анасы чаре тапалмай, падишанынъ эвине къудалыкъкъа кете. Падишанынъ сарайында къудалар ичюн айры бир курсю бар экен, йигитнинъ анасына да бу курсюге келип:

— Не истегинъ ве не талабынъ бар? — деп сорай.

Къадын:

— Къылыч сизинъ, баш бизим, кельмеге къркъкъаным киби, айтмагъа да къркъкъаман, — деп, бир чокъ вакъыт макъсадыны айталмай отура. Бир талай вакъыт кечкен сонъ, огулунынъ падиша кызына къуда этип ёллагъаныны айта. Падиша бу лафны эшиткенинен чырайы бозула, ап-акъ кесиле.

Падиша шу ерден озюнинъ анасына бара да:

— Анам, бу фукъаре къарт озъ огулуна меним кызымны айттыра кельген, сен бу ишке насыл бакъасынъ, бу къадыннынъ башыны джеллят этейимми? — деп сорай.

Анасы:

— Ёкъ, балам, ойле иш ялма. «Къызы ким айттырмаз, кымызны да ким ичмез» дегенлер, — деп падишаны тынчландыра.

Падиша бир даа озъ анасындан:

— Джеллят этгирмесем, бу къадынгъа не деп джевап берейим? — дей.

Анасы:

— О пек фукъаре олса, сен онъа «Еди тулуп алтын берсенъ, кызымны беририм, — де, — еди йыл да муллетъ», — деп ёлла, балам, — дей. Падишанынъ кызы Шахсанем де бу лафларны динълеп тура да, эписини эшите.

Шахсанем:

«Бу ишнинъ астындан насыл чыкъмалы да, Ашыкъ Гъарипке бармалы? — деп ойгъа дала. Сонъ, арт къапыдан чыкъа да, Ашыкъ Гъарипнинъ анасына еди тулуп алтын бере, эки тулуп алтынны да: «Озюнге харджлыкъ», — деп кьолуна туттыра. Шай этип, къартанайны



ёлуна оздура. Падишанынъ бундан хабери олмай. Къадын, алтынларны алып, эвине къайта. Ёлда кеткенде, гедженинъ бир маалинде бир эвге расткеле. Эвден ярыкъ чыкъа. Къартанай: «Бу эв кимнинъ эви экен?» — деп меракълана, эвининъ пенджересинден бакъа. Бакъса, не бакъсын, кок козлю бир къадын озь акъайынен къавгъалашып отура экен.

Къоджасы:

— Мына, кетиргенинъ бир ёргъаннен бир тёшек дегильми, алда кет, — деп къадынны эвден къува. Буны корьген къадын:

— Вай, меним балам да эвленсе, бойле оладжакътыр, — деп къоркъа да, алтынларны алып кетип, падишанынъ къызына Шахсанемге, къайтарып бере. Шахсанем бунынъ себебини сорай. Къадын айтмай.

— Мен озюм чалышыр да тоглап беририм, — дей. Озь эвине кетмек ичюн аякъ устюне тура.

Падишанынъ къызы, Ашыкъ Гъарипнинъ анасына:

— Ал, сен, ал, бу алтынларны къайдан къазанаджакъсынъ, — деп ялвармагъа башлай.

Къадын сёзюнден къайтмай:

— Мен бу къадар алтынны озюм де тапарым, — деп эвине къайта. Шу арада, Ашыкъ Гъарипнинъ озю де келип етише. Шахсанем бу вакъыт Апыкъ Гъарипке шу бейитни айта:

Гъарип сенинъ сёзюнъ акъкъа ярамаз,

Озь сёзюнде турмагъан, йигит олмаз.

Ашыкъ Гъарип, Шахсанемнинъ бойнуна сарылып, агъламагъа башлай. Бу ерде бири-бирлеринден айырылышып кетелер.

Эвлерине баргъан сонъ, Ашыкъ Гъарип озь анасына шойле яныкълы ашыкъ бейитлери айта:

Джаным, анам, кольмегимнинъ кирини сильсе,

Ювып да ювып, кольмегимни гуль далына ильсе.

Эр вакъыт гъурбет ильде бир олюм бар десе,

Кетейим, анам, ич эгленмей кетейим, — дей.

Анасы:

Кетме де, балам, кетме де сен, агълатма мени,

Эгер кетсенъ, къара юзлю, арам эвлят этерим сени.

Кетме, гъарип, кетме сен, ёллар чамур,

Сенинъ багърынъ неге къатты, санки демир, — дей.

Ашыкъ Гъарип, анасына ич де разы олмай, озь ёлуна кетмек ичюн азырлана. О вакъыт анасы:

— Кет, гъарибим, сагълыкъ илен къайтарсынъ, — деп йырлай, эм агълай.

Ашыкъ Гъарип шу ерден анасыннен сагълыкълашып, Альп шеэринне кете. Альп шеэриндеки бир къарт къаведжининъ къавесине барып токътай.



— Бабалыкъ, сизде къаве тюкянлары пек уфакъ экен, лякин кене де мен бу къаведен ятып турар эдим, — дей.

Къарт бунъа разылыкъ бермей:

— Меним оладжагъы беш дане муштерим бар, сен мында ятсанъ, сонъ олар да кельмей башларлар, — деп джевап бере.

Ашыкъ Гъарип бу къарткъа:

— Къарт, сен муштери акъкъында ич де хавф этме, мен санъа бингълернен муштери тапарым, — дей. Сазыны элине алып, йырламагъа башлай. Ашыкъ Гъарипнинъ сесини эшиткен бутюн пашалар, везирлер къавеге толалар. Отурмагъа ер олмагъан сонъ, къаве алдында да ине ташламагъа ер къалмай. Шай этип, Ашыкъ Гъарип бир къач кунълер ичинде чокътан-чокъ пара къазана. Бутюн падишалыкъкъа онынъ намы кете. Ашыкъ Гъарип бу шеэрде пек буюк къаве ача, ятакъханелер яптыра.

Ашыкъ Гъарипнинъ анда экенини, падишанынъ къызы Шахсанем де эшите, озкуне нишан бермек пешинден юрген бир оджа вастасынен, Ашыкъ Гъарипни озъ янына алмакъ истей.

Кунълерден бир кунъ оджа, Шахсанемге теклиф эте, лякин Шахсанем:

— Меним озъ нишанлым бар, сен оны манъа къуртарып бермелисинъ, — дей. Оджа, Шахсанемнинъ нишанлысыннен меракъланып башлай. Шахсанемден онынъ адыны сорай, Шахсанем буны айтмай.

Шай деп йырлай:

Еди йылдыр, меним ярем гъайыптыр,

Яремнинъ адыны айтсам, санъа айыптыр, —

лякин кене де озъ-озюни туталмай:

— Меним яремнинъ ады Ашыкъ Гъариптир, — дей.

Шу ерден оджа, Альп шеэрини кете. Анда энъ буюк бир къавеге бара да:

— Мында Ашыкъ Гъарип деген киши бармы? — деп сорай.

О арада Ашыкъ Гъарипнинъ озю чыкъа да:

— Мен Ашыкъ Гъарипмен, — дей.

Бу оджа Ашыкъ Гъарипке:

— Мен сенинъ ананъны, къардашынынъ ве нишанлынынъ да корьдим, — олар санъа селям сёйледилер, — дей.

Шу арада Ашыкъ Гъарип сазыны элине ала да:

Авадан учкъан турнамыдыр, къазмыдыр?

Сен кельгенде, бизим иллер язмыдыр?

Джаным, оджа, насыл корьдинъ сен оны? — деп йырлай.



Оджа:

Авадан учкъан турна дегиль, къаз эди,

Мен кельгенде, сизинъ ишлер яз эди.

Назлы синълинь келин дегиль, къыз эди,

Агълар, сызлар коръдим гъарип яреньни, — деп йырлай.

Оджа шимди Ашыкъ Гъарипни бираз абдырата: — Сенинь нишанлынгъны башкъасына нишанлагъанлар, сен мындан тез къайт, — дей.

Ашыкъ Гъарип:

— Мен къайтар эдим, амма мында да шойле бир иш олды, — деп, озъ башына кельген бир алны оджагъа айта. — Ал шундан ибарет эди: куньлерден бир кунъ падишанынь, бири, манъа озъ къызыны теклиф этти, мен оны истемедим. «Айса, меним къолумны опы», деп теклиф этти, мен оны янълышыкънен опип алдым, шимди бу оладжакъ ишни анълаштырып кетмесек, меним виджданым бу ишни къабул этмез, — дей.

Оджа:

— Ойле олса, айды, падишагъа барып, ишни анълатайыкъ, — дей, Ашыкъ Гъарипни падишанынь эвине алып кете. Падишагъа меселени айтып анълаталар. Падиша бу ишке пек яман ачувланып, Ашыкъ Гъарипни къапата. Оджа бу ишке тѣзип туралмай, башкъа падишаларнынъ аскерлерини джыйып кетире де Ашыкъ Гъарипни андан къуртарып алып къайта. Падишалар Ашыкъ Гъарипке:

— Сен кетмезден эвель, бизге бир тюркю йырласа, — деп ялваралар.

Ашыкъ Гъарип бунъа разы ола:

Йигит олгъан, озъ сырыны гизлесин,

Джигерини кебап этип тузласын.

Дели гонъюль сиясыны излесин,

Кельсин о деп сымарламаз яр мени,

Алып шеэринден, джаным оджа, ал мени, —

деп йырлай. О ерде Ашыкъ Гъарипке энъ дюльбер джуйрюклерден олгъан бир чалджуйрюкни берелер. Ашыкъ Гъарип бу чалджуйрюкни мине, Шахсанемге кийимликнинъ игисинден-игисини бахшыш сатып ала.

Къайнана сына, къайнатасына да бир такъым бахшышлар ала. Алгъан шейлери де дюньяда энъ эйи шейлер экен.

Ашыкъ Гъарип озюнен берабер эки торба алтын да ала. Бундан башкъа еди тулуп алтын да Алып шеэринде киртли къала. Бу алтынлар аля бугунъ даа сакълы тура, дейлер.

Ашыкъ Гъарип еди йыл бу шеэрде омюр эткен, Альп шеэрини йырлар айткъан, халкъларынен сагълыкълашкъан, халкълар да оны пек севгенлер. О, Альп шеэри акъкъында шойле йырлай:

Санъа дерлер Арабистан,
Чевре чети багъ ве бостан,
Кельди манъа яр хабери,
Кетем энди, Альп шеэри,
Мен ашадым отъмегинъни,
Узакълардан эшиттим хаберинъни.

Атына минип, къулан кийик олып, чаптырып кете. Кете-кете бир вакъыт ёлда аты сувсызлыкътан янып оле. Ашыкъ Гъарип къалгъан ёлуны эсап этип бакъса, тамам бир йыллыкъ джурюледжек ёл къалгъан. Ашыкъ Гъарипнинъ алы пек мушкюллеше. Тамам къыркъ кунъден сонъ да севгилисининъ тою оладжакъ экен. Не япмасыны бильмей. «Ольсем, бундан хайырлы», — дей. Ёлда буюк бир акъар сувгъа расткеле. Бир къаянынъ устуне чыкъа да, ондан озюни сувгъа атаджакъ ола, амма бу арада бир темир кок атлы адам кечип бараятыр экен: «Бу адам кечсин де, озюмни сонъ атарым», деп токътала. Бу атлы да догъру онъа келе. Селям берип, онынъ янында токътай. О, Ашыкъ Гъариптен:

— Къайда кетесинъ? — деп сорай. Ашыкъ Гъарип энъкъастан къайда кеткенини айтмай.

Атлы:

— Айды, мин атыма, кетейик, — деп Ашыкъ Гъарипни озъ атына отуртып, алып кете. Ач козюнъни, юм козюнъни, олар келеджек ерине келелер. О киши Ашыкъ Гъарипни ерге тюшюрип, ташлай да, сонъ:

— Къайда бараджакъсынъ? — деп сорай.

Ашыкъ Гъарип къайда бараджагъыны гизлей. Атлы, Хыдырнеби экен, ондан себеп, Ашыкъ Гъарипнинъ къайда бараджагъыны биле.

— Сен ялан айтма, — дей. — Агълай, агълай сенинъ анангнынъ козылери кёрлангъан, онынъ ичюн меним атымнынъ арт аягъындан балчыкъ ал да онынъ козюне якъ, шай этип арув олып кетер, — дей.

О ерден Хыдырнеби атына минип кете. Бираз кеткен сонъ, Ашыкъ Гъарипнинъ эви янындаки чешмеден сув ичмек ичюн токътай. Шу арада Ашыкъ Гъарипнинъ къыз къардашы чыкъа да, Хыдырнебиге сув бермейджек ола.

Хыдырнеби:

— Къызым, сен бу ишни манъа япма, мен сенинъ Ашыкъ Гъарип агангны корьдим, тезден келеджек, — дей.

Къыз шаша, шашмалай, севинмеге башлай.

— Сиз меним агъамны къайдан билесингиз, сиз оны къайда корьдингиз? — деп сорай.



Хыдырнеби ишни олгъаны киби ангълата. Къыз буюк бир урьметнен Хыдырнебиге сув берип, эвлерине къайта да, анасына бу хаберни айта. Анасы дёрт козьнен, огълу Ашыкъ Гъарипни беклей.

Бир вакъыттан сонъ, Ашыкъ Гъарип келе, лякин ич бир кимсе оны танымай. Озю де Ашыкъ Гъарип олгъаныны айтмай. Еди йылдан берли о, бус-бутюн тюрленген. Ашыкъ Гъарип, звинтъ бир кошесине явап-яваш озъ тоюнынъ пердесини къурмагъа башлай. Ашыкъ Гъарипнинъ анасы пердени тутып бакъа да:

— Вай, балам, бу сенинъ перденъ, меним огълумнынъ пердесине не къадап ошай я? — деп сорай.

Ашыкъ Гъарип:

— Къартанай, мен еди йыл бир ерде Ашыкъ Гъарипнен бирге турдым, онынъ ичюн пердесининъ не киби экенини билем, — деп джевал бере.

Ашыкъ Гъарип анасына бу йырларны йырламагъа башлай:

Саба намазыны Алып шеэринде къылдым,
Уйле намазыны Акъчокъракъта къылдым,
Экинди намазыны Сокъур чешмеде къылдым,
Акышам да намазыны озъ ханемде къылдым,
Хыдырнеби атына минип де кельдим,
Мен Гъарипмен, мен ашыкъман, эй, анам, — дей.

Анасы бу йырны дингълеген сонъ:

— Вай, балам, — деп огълунынъ бойнуна сарыла. Ашыкъ Гъарип къолундаки бир авуч балчыкъны анасыннъ козюне якъа. Анасыннъ козьлери ачылып кете, эвелькиси киби козьлери коре. Кийине-къушана да, тойгъа кетелер.

Падиша къызынынъ тою девам эте. Ашыкъ Гъарип пек яхшы урбалар кийип, той сарайына бара. Урбаларыннъ яхшылыгына бакъып, оны киббарлар янына кирсетеджек олалар.

Ашыкъ Гъарип:

— Ёкъ, мен мында киббарлар арасына кирмек истемейим, сиз мени чыплакъ баджакълар янына кирсетингиз, — дей.

Бундан сонъ, Ашыкъ Гъарипни чыплакъ баджакъларнынъ янына алып кетелер. Онда Ашыкъ Гъарипни Дели Меметтен башкъа ич бир кимсе танымай экен. Ашыкъ Гъарип, Дели Меметнен бирге агълашып, сызлашып корюпте, аманлыкъ, эсенлик сорашалар. Бираз отургъандан сонъ, Дели Мемет: «Эй, мусафир, бизге бир саз чалса», — деп саз кетире. Халкъ оларгъа къулакъ бермей» озъ башларына лакъырды этип туралар.

Ашыкъ Гъарип:

— Ёкъ, мен бу дакъкъада ич бир шей чаламам, юрегим пек яныкълы, мен шимди саз чалсам, — дагълар, ташлар агълар, — дей.

Дели Мемет не яла-япа, Ашыкъ Гъарипке сазны чалдырта. Олар къонакъ одасындан чыкъып, падишанынъ сарайына кетелер. Къыркъ къат перде къурулгъан, Шахсанем онынъ артында отура экен. Ашыкъ Гъарип, сазыны чала башлагъанынъ, Шахсанем къыркъ пердени йыртып чыкъа да, дингълеп тура. Ашыкъ Гъарип бу вакъыт шойле деп йырлай:

Ашыкъ Гъарип алды сазын элине,
Дюзем берди пердесининъ телине,
Кене еттим мен дюльбернинъ дююнине,
Ал дувакъ астындан гизли де бакъасынъ.
«Гъарибим ольди», — деп, дюгюн япасынъ,
Ольмеди, кельди кене Гъарибинъ.

Бу дакъкъада, Шахсанем келе де, Ашыкъ Гъарипни къучакълай. Эки ашыкъ бири-бирине агълашыш, сарылшалар.

Бу арада Ашыкъ Гъарип:

Саба намазыны, Алып шеэринде къылдым,
Уйле намазыны Акъчокъракъта къылдым,
Экинди намазыны Сокъур чешмеде къылдым,
Акъшам намазыны, озъ ханемде къылдым, —

деп йырлай.

Бу вакъыт Шахсанемнинъ нишанлысы да пенджерен бакъып, ишнинъ астыны агълай да Ашыкъ Гъарипнинъ янына келе.

— Я сен кимсинъ — дей. Бу арада Дели Мемет: — Киев олмакъ пешинден юре, — деп, япкъа бир шамар ура. Киевнинъ башы-козю айланып, ерге йыкъыла. Шу арада, Ашыкъ Гъарипни падишанынъ къызына киев кирсетелер. Ашыкъ Гъарипнинъ къыз къардашыны да, Дели Меметке берелер.

Ашыкъ Гъарип, Шахсанемге кетирген кийимлерини бере. Оны тамам еди кунъ кийиндире. Асрет-асретине къавуша. Масалджы да шу йырны айта:

Дингъленгъиз, агъалар, тариф этейим,
Ашыкънынъ йырыны мен йырлап кетейим.
Баарье ачылыр Тифлисте гуллер,
Дюгюнде, байрамда атлас киерлер,
Ашыкъ Гъарипни бильсенгъиз, Кавказда дерлер.





ХАЛКЪ ЙЫРЛАРЫ

АГЪЛАМА, КЕЛИН

Келин кынасы эзилди,
Яш енгелер тизилди.
Даманъ менден узюлди,
Агълама, джаным, агълама,
Башынъа чембер багълама.

Келинге бакъ, келинге,
Ал кына якъты этине,
Языкъ индже белине,
Агълама, джаным, агълама,
Башынъа чембер багълама.

Келин кетер наз иле,
Аягъында тоз иле,
Бир йигитнинъ сёзюле,
Агълама, джаным, агълама,
Башынъа чембер багълама.

Келин кетер багъчагъа,
Куркини кюяр богъчагъа,
Озюни сатып акъчагъа,



Агълама, джаным, агълама,
Башынъа чембер багълама.

Келиннинъ кийгени алдыр,
Ал янакътан акъкъан балдыр.
Ай эфендим, бу не алдыр.
Агълама, джаным, агълама,
Башынъа чембер багълама.

Дам артында даяма,
(Даяндынъмы ай, баба)
Бир тилимчик отъмегинъни
Аядынъмы ай, баба.
Агълама, джаным, агълама,
Башынъа чембер багълама.

Къудаларгъа аш ёкътыр,
Тепелемеге таш ёкътыр,
Киевде де баш ёкътыр.
Агълама, джаным, агълама,
Башынъа чембер багълама.

Къара сыгъыр бойнызын,
Къайырмангъыз, енгелер,
(Келинимизни анасындан)
Айырмангъыз, енгелер.
Агълама, джаным, агълама,
Башынъа чембер багълама.

ГУЛЬСЮМ КЪЫЗ

Гульсюм кетер къарт эрге агълай, агълай, ах,
Бабасы зорнен бере экен, къызындан сорамай, ах.

Вай, бахытсыз Гульсюмчик, кетеджексинъ, ах,
Озюнъни къарткъа эманет этеджексинъ, ах.

Вай, бахытсыз Гульсюмчик, кетеджексинъ, ах,
Къыз къадрини бильмединъ сен де халкъ киби, ах.



Шай деменъиз, достларым, кетеджекмен, ах,
Озюмни къарткъа эманет этеджекмен, ах.
Не япсам да япарым къуртулырым, ах,
Я озюмни, я оны ольдюрим, ах.

Огъурлар олсун, Гульсюмчик, шай сёйлеме, ах,
Озь озюнъни олюмге сюреклеме, ах.

ДЕГИРМЕНДЖИ

Яш къадын:

Аман, дегирменджи,
Джаным-козюм, дегирменджи,
Сырма да сачлар сенинъ де олсун,
Ал чек богъдайны!

Дегирменджи:

Олмаз, джаным, олмаз,
Улукълар суя толмаз,
Невбетчилер разы олмаз,
Ал къайт богъдайынъ.

Яш къадын:

Аман, дегирменджи,
Джаным-козюм, дегирменджи,
Ал янакълар сенинъ де олсун,
Ал чек богъдайны!

Дегирменджи:

Олмаз, джаным, олмаз,
Улукълар суя толмаз,
Невбетчилер разы да олмаз,
Ал къайт богъдайынъ.

Яш къадын:

Аман, дегирменджи,
Джаным-козюм, дегирменджи,



Къара козылер сенинъ олсун,
Ал чек богъдайны!

Дегирменджи:

Олмаз, джаным, олмаз,
Улукълар суя толмаз,
Невбетчилер разы да олмаз,
Ал къайт богъдайынъ.

Яш къадын:

Аман, дегирменджи,
Джаным-козиом дегирменджи,
Къалем къашлар сенинъ олсун
Ал чек богъдайны!

Дегирменджи:

Олмаз, джаным, олмаз,
Улукълар суя толмаз,
Невбетчилер разы да олмаз,
Ал къайт богъдайынъ.

Яш къадын:

Аман, дегирменджи,
Джаным-козиом, дегирменджи,
Индже беллер сенинъ олсун,
Ал чек богъдайны!

Дегирменджи:

Олур, джаным, олур,
Улукълар суя толур,
Невбетчилер разы да олур,
Ал кель богъдайны.

Берабер:

Невбетчилер разы да олды,
Богъдай ун олды.

(1919 сенеси А. Тайганскаядан
язылып алынды)



БААРЬ

Аваланып япракълар,
Ешергейди, яр, яр.
Чувулдашып къушчыкълар,
Шенъленгейди яр, яр.

Шенъ кунешнинъ нурлары
Сачылгъайды яр, яр,
Баарь ели юреклерни
Охшаткъайды, яр, яр.

Багъчаларда къушчыкълар
Къувалашалар, яр, яр.
Бир-бирлернинъ артындан
Акышалар, яр, яр.

(1936 сенеси Э. Топчиден
язылып алынды)

ГИДИНЪ, БУЛУТЛАР

Гидинъ, булутлар, гидинъ,
Яреме селям идинъ.
Ярем татлы да юкъуда исе,
Ой, ой, аман, аманым, аман,
Юкъусын сейран идинъ.

Денъиздеки балыкъмыдыр,
Бу бизге ляйыкъмыдыр?
Ярем эллер къучагъында,
Ой, ой, аман, аманым, аман,
Агъласам айыпмыдыр.

Денъизде къум къалмады,
Балыкъта пул къалмады.
Ярем эллер къучагъында,
Ой, ой, аман, аманым, аман,
Юректе сабыр къалмады.



Дерьдаки къайыкълар,
Ян гиделер балыкълар.
Эджель кельсе де, джан гидер,
Ах, севдигим, аманым, аман,
Эким кельсе кярмы эйлер?

(1939 сенеси А. Саидовадан
язылып алынды)

ЯР-ЯР

Бурма киби ёллардан,
Бурылып кельдик, яр-яр.
Сырма мыйыкъ бабайдан
Къуда кельдик яр-яр.

Къапу огюнде джувурса,
Джувурып кечти бир тавшан.
Агъам санъа береджек
Йигирми беш алтын, бир нишан.

Йигирми беш алтын, бир нишан,
Ёлда къалсын, эй гузель.
Кельсин, бакъсынъ, агъанъыз,
Бегенсе алсын, эй гузель.

Кокте учан сыгъырчыкъ,
Къуйручыгъы тыгъырчыкъ.
Агъам санъа береджек
Ешилъ пулту бурумчыкъ.

Келин-киев бу тойгъа
Ярашады, яр-яр.
Авес этип достлары,
Къарашады, яр-яр.

(1956 сенеси С. Зейтулаевадан
язылып алынды)



КЪАРШЫЛАВ ЙЫРЫ

Отурынъыз, отурынъыз, къудалар,
Аякъларынъыз талмасын,
Бизнинъ хатиримиз къалса-къалсын,
Сизнинъ хатиринъыз къалмасын.

Хош кельдинъыз, хош кельдинъыз, къудалар,
Сайгъылы мусафирлер,
Буюрынъыз, буюрынъыз, сиз тёрге,
Джан къурбанмыз биз сизге.

Сиз кельген сонъ эвимиз,
Ярыкълансын, нурлансын,
Сизнинъ омрюнъиз узакъ олсын,
Берекетли, бол олсын.


*(1927 сенеси Коки устадан
язылып алынды)*

НАВРЕЗ

Кельди баарь нур сачып,
Наврез къокъый мор ачып.
Ешерди чёллер, дагълар,
Азан наврезим мубарек.

Наврез кельди, корюнъиз,
Наврез акъкъын беринъиз.
Дженнет олсун еринъиз,
Азан наврезим мубарек.

Кельди баарь, турынъыз,
Бу наврезге бакъынъыз.
Котерильсин башынъыз,
Азан наврезим, мубарек.



Уйнинъ арты багъча,
Акътар-токътар бокъча.
Балаларгъа беш (йымарта) акъча,
Азан наврезим мубарек.

Чыкъты чѣльге батыр Али,
Зильфи къара дульдюли.
Ол танърынынъ арсланы,
Азан наврезим мубарек.

(1929 сенеси С. Шемшединовдан
язылып алынды)

ЕШИЛЬ ЯПРАКЪ АРАСЫНДА

Ешилъ япракъ арасында къырмызы гуль гонджеси,
Къайда кетти, кельмез олды, гонълпомнинъ эглеңджеси.

Бардым ярем багъчасына, гуль далында гуль битер,
Эр кеснинъ учъ-беш яresi олса, манъа бир дане етер.

Бардым ярем багъчасына, гуллери мерджан киби,
Акъ герданда бенълери бар, эр бири бир фильджан киби.

Бардым ярем багъчасына, гуллерини къокъламагъа,
Бакътым ярем инджи тизер, акъ гердангъа такъмагъа.

Бардым ярем багъчасына, бир нар кестим емеге,
Ах, дюльберим, бир сѣзюм бар, утанырым демеге.

Бардым ярем багъчасына, бульбуль сандым сесини
Назлы ярем-къушчыгъым, эгри къоймыш фесини.



АТАДАН ОКСЮЗ КЪАЛДЫМ

Атадан оксюз къалгъанман,
Джангъан откъа далгъанман.

Сен арувгъа, мен байгъуш,
Къайдан севда болгъанман.

Ай, орайман, орайман,
Джолгъа биткен къорайман.
Кельген кеткен джолчыдан,
Мен яремни сорайман.

Ай къара къыз, къара къыз,
Башынъ, сачынъ тара къыз.
Менден сагъа файда ёкъ,
Бар кысметинъ ара къыз.

Джеделек откъа джанармы,
Дженгесин алгъан онгъармы.
Дженгесин ташлап къыз алса,
Танъ аткъанын дуярмы.

БЕГИМ КЪАРТ

(йыр-оюн)

Ай, балам, балам, балам, балам, одаманым балам,
Орда чобан сен де олдынъ, балам.
Къырда чобан сен де олдынъ, балам,
Ата сёзюн сен тутмадынъ, балам,
Ата сёзюн сен тутмадынъ, балам, балам, балам, эй.

Къайтармасы:

Чыкътым оба башына, кельди къоюм къаршыма,
Мен къойымны корген сонъ, аманым-аман,
акъылым кельди бапъма.
Эгиз обада къышларым, тонума чекмен тышладым,



Халкъ сачымгъа баргъанда, аманым-аман,
къайтмагъа башпадым.
Къарабаш къозы туз истей, гъарип джаным къыз истей,
Къарабаш къойгъа туз да ёкъ, аманым-аман,
мен гъарипке къыз ёкътыр.

* * *

Диредиль-диредиль къавалым,
Фетта меним чобаным.
Фетта къойгъа не бармай
Чарыкъ бавыны топлай.

ЧОБАН ВЕ КЪЫЗ

Чобан:

Мына селям алейкум,
Къыз, келинчик, асабам.
Джыйынынъыз гурь олсун, аманым-аман,
Ляле, чечек, асабам.

Хор:

Джыйынынъыз гурь олсун, аманым, аман,
Ляле чечек, асабам.

Къыз:


Чобан деген хыянетинъ,
Джюзданы тынч, асабам,
Ишлемеси иш дегиль, аманым, аман,
Къуртылмакъ кучь, асабам.

Хор:

Ишлемеси иш дегиль, аманым, аман,
Къуртылмакъ кучь, асабам.

Чобан:

Чобан деген йигитлер,
Эрлик сатар, асабам,



Асыл сениң башыңға, аманым, аман,
Биздайлар етер, асабам.

Хор:

Асыл сениң башыңға, аманым, аман,
Биздайлар етер, асабам.

Къыз:

Аягыңда чарыгың,
Аркъаңда тоның, асабам,
Чың сырада шашырырым, аманым, аман,
Секизин, онун, асабам.

Хор:

Чың сырада шашырырым, аманым, аман,
Секизин, онун, асабам.

Чобан:

Тоным къысқа олса да,
Джыллы тутар, асабам.
Секиз дегиль бир менден, аманым, аман,
Озюңни къуртар, асабам.

Хор:

Секизни дегиль бир менден, аманым, аман,
Озюңни къуртар, асабам.

МЕНИМ УЛУМ БАТЫР

Меним улум батыр
Чавып келеятыр!
Алты къоян беш чавке,
Алып келеятыр.
Меним балам озектен,
Къуванаман юректен.
Юкъла, балам, юкъла!
Ару тюшмен юкъла.

*(1927 сенеси, Арифовадан
язылып алынды)*



«АЙЯ» ДЕСЕМ ЯРАШЫР

Айя десем ярашыр, айненни,
Гуль багъчалар долашыр, айненни.
Гуль багъчалынь ичинде, айненни,
Алтын бешик ярашыр, айненни.

Къазан къайнар къашыкъ ёкъ,
Бала агълар, бешик ёкъ, айненни.

*(1938 сенеси К. Умеровадан
язылып алынды)*

ЧУБУКЪЧЫ

Ай анайлар, анайлар,
Акъ сакъаллы бабайлар.
«Огълум солдат кетти», — деп,
Ой, ой, ой,
Эв айланып агълайлар.

Эки юзьло балтам бар,
Урдым ташкъа кесмеди.
Чубукъчынынь беш огълундан,
Ой, ой, ой,
Бири солдат кетмеди.

Къазармалар йыкъылсын,
Чубукъчынынь бели букюльсин.
Багъчасарайлы Аджи Ибраим,
Ой, ой, ой, мезарында окюрсин.

СЫРА, СЫРА КЪАЗАНЛАР

Сыра-сыра къазанлар,
Къара язы язгъанлар.
Онъмасын да битмесин,
Ой, ой, ой,
Бизни солдат джыйгъаңлар.
Узун сельби япрагъы,



Тёкюльмеге башлады.
Чубукъчынынъ сарайлары,
Ой, ой, ой,
Сёкюльмеге башлады.

ШУ КЪАРШЫДА АКЪ БАЙЫРДА

Шу къаршыда, акъ байырда богъдаймы битер,
Аман, падиша, санъа аскерми етер.
Эр кеснинъ эвлядын алмакъ олюмден бетер,
Не яман агълашыр, дживан йигитлер,
Къой киби мағрашыр гъарип анелер.
Чайыр, чименлер бульбульсиз къалды,
Гъарип аналар эвлятсыз къалды,
Сойымыз-сопымыз мағрашып къалды.
Не яман агълашыр дживан йигитлер,
Къой киби мағрашыр гъарип анелер.
Ал чуха къалпакъ кийдирди бизге,
Мырзалар зулумларын бильдирди бизге,
Къылыглар къушатып, талимге бизге,
Не яман агълашыр дживан йигитлер,
Къой киби мағрашыр гъарип анелер.
Белимде чанта, ичинде патрон,
Устюмизге кийдирди сыкъма панталон,
Шимди бизге дерлер. «Кърым эскадрон»¹.
Не яман агълашыр дживан йигитлер,
Къой киби мағрашыр гъарип анелер.
Чыкъты бизни топлады голова депутат,
Шимди кимден, истермиз бизлер имдат.
Салы куню алдылар бизлерни солдат.
Не яман агълашыр дживан йигитлер,
Къой киби мағрашыр гъарип анелер.

¹ Къырымтатарларындан эскадрон 1874 сенеси мейдангъа хелип, айны шу сенеси «Къырымтатар дивизионы» адыны алгъандыр.



ПОРТ-АРТУР

Кечти бааръ, кельди кузь, агъламакътан шишги козь,
Порт-Артургъа кетемиз, сиз савлыкънен къалынгыз.

Агълама, анам, агълама, бабам,
Бельки чаре булуныр.

Стакан толу сувмыдыр, япон ёту бумыдыр,
Эй, алланынъ залымы, этеджегинъ бумыдыр.

Агълама, анам, агълама, бабам,
Бельки чаре булуныр.

Порт-Артурнынъ малеси, не буюктир къалеси,
Джыйды, алды эвлятларны, агълап къалды анеси.

Агълама, анам, агълама, бабам,
Бельки чаре булуныр.

Машиналар ягъланды, бир-бирине багъланды,
Порт-Артургъа баргъан сонъ, кылыч-пычакъ къайралды.

Агълама, анам, агълама, бабам,
Бельки чаре булуныр.

Сельби киби боюмыз, агълап къалды союмыз,
Порт-Артурдан къайткъан сонъ, бельки олур тоюмыз.

Агълама, анам, агълама, бабам,
Бельки чаре булуныр.

Гизли газет бастылар, Порт-Артургъа астылар,
Буны окъугъан запаслар, отступление яптылар.

Агълама, анам, агълама, бабам,
Бельки чаре булуныр.



Куропаткин¹ башымыз, ат этидир ашымыз,
Порт-Артурнынъ ичинде къалыр бизим башымыз.

Агълама, анам, агълама, бабам,
Бельки чаре булуныр.

ШОМПОЛ

Акъ бандитлер кельдилер,
Хансарайда турдылар.
Бутюн халкъны яш-къарт демей,
Шомполнен урдылар.

Сагъ яныма, сол яныма,
Айланалмадым.
Аман да, достлар, шомпол ярасына
Даяналмадым.

Хансарайнынъ азбарында,
Меджлис де къурулды.
Юз элли шомпол, ах анечигим,
Манъа да урулды.

Сагъ яныма, сол яныма
Айланалмадым.
Аман да, достлар, шомпол ярасына
Даяналмадым.

Къара къалпакъ башымда,
Полковниклер къаршымда,
Ах, нелер кельди, вах нелер кельди,
Бу яшлыкъта башыма.

Сагъ яныма, сол яныма
Айланалмадым.
Аман да, достлар, шомпол ярасына,
Даяналмадым.


¹ Куропаткин — 1893 сенелерине къадар арбий министр эди.

ТАРАКЪТАШЛЫ СЕЙДАМЕТНИНЪ ЙЫРЫ

Меним адым Сейт огълу Сейдамет,
Койге барсанъ, аман, эшке-досткъа селям эт.
Ешилленди дар агъачнынъ диреги,
Чаталланды, аман, Сейдаметнинъ юреги.
Таракъташнынъ ёлларындан юрмедим,
Тевбелер олсун, аман, шу папазны корьмедим.
Джума куню дженаземни къылдылар,
Дарагъачтан, аман, къара къаным сильдилер.
Эшим-достым, агъа-къардаш, эял эт,
Дарагъачта, аман, олком корьди Сейдамет.

ЙЫР I

Джума куню, джума акъшамы эттилер джыйын,
Нокъталы бапкъа бир олюм, анама къыйын.
Чагъаракънынъ тюбюнде моллакъбай яткъан,
«Сокъмадым» (урмадым), деп Зуфер бай ялан айткъан.
Он секизде мучели, къайнар да къаным,
Йигирми бирде шу байлар алдылар джаным.
Дёрт диварнынъ ичинде олюмиз ятыр,
Ботен ерге джан алыджы Зуфер де къафир.
Чагъаракънынъ тюбюнде эфенди яткъан.
Ахретини дюньясыны откъа якъкъан.
Геджелейин эфенди чагъырды оны,
Сабасына къасыргъа сарылды тени.
Ботен ерге агъамны ольдюрдилер,
Дюнья устюне хаберни бильдирдилер.



ЙЫР II

Шу отузнынъ яшлары, токъмакъчыдыр аллары,
Самосудны чыкъаргъан имансыз байлары.
Ай аналар, аналар, турмайып агълайлар,
Джаным да джаным беш йигитни къаядай парлайлар.
Биз азбардан чыкъкъанда джыйындай, тойдай,
Къора артына чыкъарып, сойдылар къойдай.
Аблямит деген балтаджы, токъмакъджы Аджы Асан,
Мезарына баргъан сонъ, насыл этип ятарсынъ.
Шу отузнынъ Аджы акъайы самосуд этти,
Йигирми беш дукъат, эки къой Кезлевге кетти.
Алдандылар байына койнинъ, алдылар джаным,
Джаным козюм, Ильяс акъам, талап эт акъкъымны.

ЗАМПАРА МАЗИН

Мазин:

Аллау экбер, алла...
Мен санъа папуч джибердим, алдынъмы?
Аллау экбер, алла...

Къадын:

Алдым да нени, кийдим де нени,
Аягъыма тар кельди, ай нени...

Мазин:

Аллау экбер, алла...
Мен санъа къафтан джибердим, алдынъмы?
Аллау экбер, алла...

Къадын:

Алдым да нени, кийдим де нени,
Къапагъы йипек дегиль, ай нени...

Мазин:

Аллау экбер, алла...
Мен санъа алтынлы фес джибердим, алдынъмы?
Аллау экбер, алла...



Къадын:

Алдым да нени, кийдим де нени,
Алтын аз эди, ай нени...

Мазин:

Аллау экбер, алла...
Мен санъа бир топ инджи джибердим, алдыңмы?
Аллау экбер, алла...

Къадын:

Алдым да нени, такътым да нени,
Инджиси уфакъ эди, ай нени...

Мазин:

Аллау экбер, алла...
Къайсы къапыдан барайым?
Аллау экбер, алла...

Къадын:

Айлан да кель, долан да кель,
Айлан да кель, долан да кель,
Арт къапыдан кель де кир, ай нени...

УМЕР ОДЖА

Меним адым Умер оджа,
Къабрим бар, удждан-уджа
(уджъа).
Не имам керек, не бир оджа,
Дженаземни къылсын къызлар.
Азмакъ иле тозмакъ иле,
Яр булунмаз кезмек иле.
Алкъан дирем, къазма иле,
Мезарымны къазсын къызлар.
Узундыр сельбининъ далы,
Етишмез къызларнынъ эли.
Бизим багъчанынъ гуллери,
Вакъыгъ олды деринъ къызлар,
Сув келир, сувсыз дереден,
Мевлям айырмасын ярдан,
Алты дюльбер бир сарайдан,
Топ-топ олып келир къызлар.



Эски куляим сатайым
Шекерден эльва япайым,
Етмесе де да а къатайым,
Джаным ичюн есин кызылар.

САБА ОЛСА

Саба олса, турсам кетсем ишиме, яр, ишиме,
Севда олып тюшме, йигит, пешиме, яр пешиме,
Шаин киби панджа урма лепшиме, яр, лепшиме.

Уян, азиз, уянса,
Уянмаз, яр, уянмаз.
Уянса да, бунъа да джанлар
Даянмаз, яр, даянмаз.

Элимдеки сары кягъыг учты кетти еллере,
Мен сагъ олсам сени де бермем эллерге, яр, эллерге.
Уян да, сёзге де кьойма мени, тиллерге, яр, тиллерге.

Уян, азиз, уянса
Уянмаз, яр, уянмаз.
Уянса да, бунъа да джанлар
Даяналмаз, яр, даяналмаз.





ХАЛКЪ МАСАЛЛАРЫ

ЗАМПАРА КЪАДЫ

Менгли-Герай хан заманында Багъчасарайда бир къады эфенди бар экен. Къады эфендининъ озю бурюшкен, аягъы титревик олса да, шеэрнинъ яш дюльбер къадылларына ёл бермей экен. Онынъ къомшусынынъ пек яш дюльбер бир къадыны бар экен. Къады эфенди бу къадынчыкънынъ гузеллигине силекийлерини чыбыртып, эр кунъ джамиден къайткъанда, Эминеге лаф атмай кечмей экен, Эминенинъ янындан кечкен сайын:

— Ах, джанчыгъым,— дегенде дудакъларындан акъкъан силекийлерини тоглап оламай экен. — Сенинъ козьчиклеринъ йылдызчыкъларкиби парылдай, татлы бакъышчыгъынъ меним теними атеш киби якъа. Джанчыгъым, не олур, къоджанъ эвде олмагъанда мени бир геджечик къонмагъа чагъырсанъ? Джанчыгъым, санъа ойле къокъулы рахат локъумчыкълар кетирейим, ойле эльвачыкълар ашатайым, султанларнынъ софрасында биле тапалмазсынъ. Санъа ойле бир шамаладжа антер кийдирейим, ойле антерни ханнынъ къадыллары биле киймедилер, — дей экен.

Къадынынъ бу татлы алдавлары намусты Эминенинъ къулагъына биле кирмей, эм Зампара къадыгъа айланып да бакъмай экен.

Кунълерден бир кунъ къадынынъ бу сой баш кутювинден безип, меселени Эмине къоджасына анылаткъан. Шериат башы олгъан къадыдан, оны къуртармасыны риджа эткен. Бу вакъыткъа къадар сабыр этип тургъан Эминенинъ акъайы, къады эфендининъ ишни къарардан зияде япкъаныны анылагъан. Эминенинъ акъайы молладан



къртулмакның чарелерини тюшюнген. Къадынына:

— Бакъ, апай, бу керата бир даа санъа токъунаджакъ олса, сен оның теклифини ред этме. Кулерюзнен оны къаршыла, онъа умют бер. Мен онъа эшиттирип, санъа бир якъкъа кетеджегимни айтарым, о буны эшитип, санъа такъылыр. Сен оны эвге чагъырырсынъ, о сенинънен шакъалапмакъ истегенде, сен онъа къаршы бираз джилъвеленъ. Иш ятакъкъа бараджакъ маальде, мен къапыны къакъарым. Сен исе, меним аджеле къайткъанымдан къоркъкъан киби, мусафирингъи сандыкъкъа сакъларсынъ, сонъ къапыны ачып, мени ичери алырсынъ, берабер отурып шу эдепсизни насыл масхара этеджегимизни тюшюнирмиз, — деген.

Эртеси куню, къады эфенди гузель Эминенинъ эви янындан кечкенде эр вакъыттаки киби «севгилисининъ» дюльберлигини макътамагъа башлай. Къады эфенди, бу кере Эминенинъ ачувланмакъ дегиль, пек назнен кулип къаршылагъаныны коръгенде, къуванчыннан юреги чатлайджакъ дереджеге кельген. Бу арада азбар ичинде, оларнынъ лафларыны динълеген къоджасы, багъыра-багъыра:

— Эмине, мен бутунъ чельге кетеджегим. Беш-он кунъ къадар эгленирим, сен сакъын къапыдан башынъны узатма! Эшиттинъми? — деп, тембилеген.

Эмине къоджасына:

— Яхшы, — деп джевап бере.

Юреги умютнен толгъан къады эфендиге айланып, гизлиден:

— Бу акъшам бизге буюрынъыз! — деп, къоджасына азырлыкъ коръмеге ашыкъкъан адам киби аджеле азбаргъа кирген.

Бу лафларны эпиткен къады озъ къулагъына биле инанаджагъы кельмеген. Акъшамнынъ тез кельмесини сабырсызлыкънен беклей экен. Къады акъшам намазыны абул-къубул къылгъан сонъ, козь къаранлыкъы тюшкени киби догъру къомпшучыгъына кеткен.

Азбар къапуда беклеген Эмине, къадыны кулер юзьнен къаршылап ала, эвине кетире. Эв къапусыннан кирер-кирмез, сабыры тюкенген Зампара къады, къадыннынъ устюне атылып, белинден сарып къучакълагъан. Айнеджи Эмине, къадыннынъ бу уджюмини джилъвеликнен къаршылагъан. Эфенди акъам юзь булгъан сонъ даа зияде къызыпкъан, къадынгъа даа зияде сарылгъан. Къадынны къучагъына алып, миндерге яткъызатургъан дакъкъада, бирден къапу кескин къакъылгъан. Буны эшитип, экиси де буз-бузлап къалгъанлар. Къапы экинджи кере даа да къуветли къакъылгъан. Эмине башыны эллери арасына алып, къапкъангъа тюшкен сычан киби, ода ичинде чапкъаламагъа башлагъан:

— Ах, яраббим! Масхара олдыкъ! Резиль олдыкъ! Къапы къакъкъан

мутлакъа къоджамдыр! Онынъ даушына ошай! Шимди кирип мени эркекнен коръсе, вай меним альма! Вай кеттик те! Экимизни де ольдюрис! Тёв, төв, ярабим! — деп оданынъ бир башындан, бир башына чапкъалай экен.

Къады эфенди сувдан чыкъкъан тавукъ киби урыккени аз олгъан, къадыннынъ вайваламасындан отю патламагъа аз къалгъан. Дир-дир, титреген къады энди ятакъны унуткъан. Шеветатеши ичинде туташып янгъан къадыннынъ эр ери буз кесильген, дамарларында къаны биле сувугъан. Къапы бир даа къуветли урулгъанда, къады озюне келип, дёрт доланып, Эминенинъ пешинден чапа экен. Эмине сачларыны юлкып чапа, онынъ артындан да сакъалыны тиклеп, къады чапа экен. Эминеге эллерини узатып, къалтыравукъ сеснен озюни бир ерчикке гизленмесини айта. Къадын «севгилисини» белядан къуртармагъа даврашып, оданынъ бир кошесинде азырлангъан балабан сандыкънынъ къапагыны ача ве копек киби къалтырагъан къады эфендини анда ерлештире. Сандыкънынъ къапагыны килитлеп, анахтарыны алгъан сонъ къапыны ачып, къоджасыны ичери алгъан. Эмине элинен сандыкъны косътерген сонъ, экиси де дудакъ астындан къыскъылдап кульгенлер.

Зампара къадыннынъ къапкъангъа тюшкенине къувангъан къары-къоджа тойгъандже кульген сонъ, сандыкънынъ устюне тёшеклерини къойып аткъанлар. Къады эфендининъ пайына, тюптен тёшекте олып кечкен аларны динълемек тюшкен. Заваллы эфенди янғы меяны ичинде учъ кунъ, учъ гедже ашсыз-сувсыз бутюн сасыгынен ятмагъа меджбур олгъан. Къады, эв саибининъ бир шейден хабери ёкътыр беллеген. Чюнки севимли Эминечиги ичюн эр тюрю джезагъа, джефагъа къатланмагъа азыр экен.

Учюнджи куню сандыкънынъ тюбюнде бир сылакълыкъ корюнген, эв саиби бир шейден хабери олмагъан адам киби къадынындан;

— Къадынчыгъым, я бу сандычыкънынъ ичинде не бар экен? Тюбю сылакъ, дымлы? — деп сорагъан.

Эмине, къады эшитеджек къадар къыгчырып;

— Эй, меним севгили къоджам, сандычыкънынъ тюбюни сычанлар булаштырсалар керек. Эвимизнинъ ичинде о къадар чокъ сычан пейда олгъан, атта не япаджагъымны бильмейим. Эвде бир эркек мышыкъ олса, яхшы олур эди, — деген.

Буларнынъ лакъырдыларыны динълеген къады эфенди, Эминенинъ бу сёзлеринден бираз юреги тынчлангъан. Ферасетли «севгилисининъ» акъыллы тедбирлерини бегенип, аллагъа дувалар эткен.

Эв саиби бираз тюпюнген сонъ:

— Билесинъми, Эмине! Бу хынзыр сычанлар бизим бирден-бир



сандыгъымызны чайнар, делик-тешик этерлер деп, къоркъам. Мен оны базаргъа алып кетейим де, уджуз-паалы сатайым. Сен не дейсинъ? — деген.

Къадынынъ даа янъы тынчлангъан юреги, бу лафларны эшиткенде, къоркъудан парчаланаджакъ дереджеге кельген ве тюбюни сылатып джиберген.

Эмине бунъа къаршы кеткен киби, сандыкъны сатмайкъ деп, къоджасына ялваргъан. Эминенинъ назлы ялварувларыны эшиткен сонъ, къадынынъ юреги текрар умютлернен толгъан.

Энъ сонъ, эв саиби сандыкъны сатмагъа къатты къарар берген. Буны эшиткен къады эфенди, текмиль масхара оладжагъым, деп сабагъа къадар козь юммагъан. Базы вакъытлар завалы озъ башына абдырап-абдырап кете экен. Санки иблис, онынъ балабан къурсагъына зеэрли тырнакъларыны батыра да, чеке, батыра да чеке, джынлар да оны эриштирип табанларыны, юреги байылгъанына къадар къытыкълагъан киби келе экен.

Эртеси куню, Эминенинъ ялвармасына бакъмай, къоджасы сандыкъны аркъасына юклеп, базарда сатмакъ ичюн деллялгъа теслим эткен. О куню де пахыл киби, къурбан байрамынынъ арфеси олгъанындан, бутюн Багъчасарай базарда экен. Къадынынъ да учъ огълу, учъ кунъден берли гъайып олгъан бабасыны къыдырып, базаргъа тюшкенлер. Сандыкъ янына топлангъан халкъны корип, анда баргъанлар. Сонъ деллялдан:

— Къара огълан, насыл мал сатасынъ? — деп сорагъанлар.

— Буюрынгъыз, алынгъыз, акъайлар! Уджуз берем. Турушы учъ бинъ алтын. Къыйметлиси сандыкънынъ озю дегиль, сандыкънынъ ичиндеки! Буны алгъан омюрлик сытма маразындан, титревиктен, ич кетмесинден къуртулыр. Не къадар джилъвели олса-олсун гузель къадындарнынъ козь назарындан селямет къалыр. Акъайлар! Кельди тапты къарарыны! Деллял бильмез зарарыны!

Бу инсан къалабалыгъы ичинде, деллялнынъ сесини, огъланларнынъ базарлыгъыны эшиткен эфенди акъай, астыны булаштыра экен.

Акъыллы огъланлар, шу саат деллялнынъ истеген фиатыны берип, «тылсымлы» сандыкъны алгъанлар. Буюк бир сайгъынен сандыкъкъа якъын келип, оны ачмагъа азырлангъанда, бутюн базар халкъы тылсымны корьмек ичюн, сандыкънынъ башына топланып кельгенлер. Эмине де сандыкъкъа якъын кельген. Сандыкънынъ килитине анаhtar къойып ачкъанларынен, ичинден ойле бир къоркъунчлы айкъырма, артындан да ойле бир сасыкъ чыкъкъан, бутюн халкъ сандыкъта

джынлар бар деп, тутуштырып къачкъанлар. Къады эфендининъ «джесюр» балалары исе, эр кесни озип кечкенлер.

Сандыкънынъ ичинде аякълары, къоллары уюшып къалгъан къады эфенди, огъланларынынъ пешинден шайтан киби кескин сеснен къычырып:

— Эй, меним сеvimли огъланларым, къачмангъыз! Къачмангъыз! Сандыкънынъ тылсымы бабангъызнынъ къолундадыр, — деген.

Огъланлар бабасынынъ сесини эшитип, токътагъанлар. Сонъ, къоркъа-къоркъа сандыкъкъа якъып кельгенлер. Оларнынъ пешинден базар халкъы да топлангъан. Къадынынъ балалары бу манзараны озь козълеринен корип, шашып къалгъанлар.

Тар сандыкъ ичинде учъ къат букленген, къурсагъы бурюшкен, устю дымлы, сасыкъ бир алда яткъан къады эфенди, янына топлангъан халкъкъа кийик-кийик бакъа экен. Къадынынъ балалары утангъанларындан къаршысында икона киби къатып къалгъанлар. Къадынынъ бу перишан алыны корьген сейирджилернинъ кулъкъюси бутюн Багъчасарайны янгъгыратып, боран киби гурылеп кеткен.

Эр кезден зияде Эмине кульген.

АЖДЕРХА ЙЫЛАН

Бир заманда бар экен, бир заманда ёкъ экен, бир фукъаре акъайнен бир апакъай бар экен. Оларнынъ ич де балалары олмай экен, амма озълери бала олмасыны пек истей экенлер. Олар бала севгенлеринден, эль балаларыны алып бакъа, лякин о балалар да оларнынъ элинде чокъ яшамай экенлер.

Кунылерден бир кунъ оларнынъ эвине бир дервиш келе ве оларгъа:

— Сизнинъ балангъыз олмай экен деп эпитгим, мына мен сизге бир алма кетирдим. Сиз оны пай этип ашангъыз да, сонъ балангъыз олур, — дей.

Апайнен акъай къуванып, бу алманы пай этип ашайлар.

Бир чокъ вакъытлардан сонъ апакъайнынъ баласы оладжакъ вакъытта акъайы чалышмагъа кете. Чалышмадан къайткъанда, бир аждерха йылан онынъ алдына чыкъа:

— Сенинъ эвинде янгъы бир шейинъ олды, айтсам, мангъа бахшыш не берирсинъ? — деп сорай.

Акъай:

— Я не олгъаныны бильмейим де, — деп джевап бере.



Аждерха:

— Ненъ олгъан олса, шуны берирсингъми? — деп, сорай.

Акъай:

— Яхшы, менде не олгъан олса, шуны беририм, — дей. Акъай, эвине келе. Бакъса, не корьсин, апакайынынъ бир кереден эки баласы олгъан, бириси — кыыз, бириси — огълан экен.

Акъайы къуванчынъдан шаша, ёлда олгъа кечкен ишни апакайына айтмагъа да къоркъа. Шимди не япсыгъ, аждерха йылан келип, балаларны мытлакъа алып, деп тюшпоне.

Кунълерден бир кунъ аждерха йылан балаларны алмагъа келе. Шапыргъан акъай онъа не айтаджагъыны биле бильмей. Аждерха йылан огъуне чыкып онъа яландан:

— Сен, аждерха йылан, шимди кельме, меним балаларым беш яшыны толдурсынлар да, санъа адалгъан бу балаларны о вакъыт келип алырсынъ, — дей.

Аждерха йылан бунъа разы ола, кери къайтып кете. Акъай меселени апакайына да анълата. Балалар беш яшына келелер. Шимди не ятмалы? Эгер балаларны аждерха йылангъа бермеселер, аждерха йылан эм оларны, эм де балаларыны ашайджакъ.

Бу вакъытта акъайы:

— Терен бир певренк къаздырайыкъ. Балаларнынъ бутюн ашайджакъ, ичеджеклерини анда къояйыкъ, озюмиз исе, бу эвде чыкып кетейик, — дей.

Шай да этелер. Терен бир певренк къазалар, ичине балаларынынъ бутюн ашайджакъ, ичеджек шейлерини къойып, балаларны анда тюшпоре, устюне топракъ орте, озылери исе, чыкып кетелер.

Беш йыл кечсе де, аждерха йылан хаста олгъанындан, келип оламай, лякин о бир къач йылдан сонъ, кене келе. Келип бакъса, не корьсин, эвнинъ ичинде бир шей ёкъ. Чыкъа да кете. Экинджи йылы кене келе. Кене эвде биревни тапалмай. «Булар кезмеге кеткендирлер», дей де, кене кери къайтып кете. Бир йылдан сонъ аждерха йылан бир даа келе. Бакъса, эвде кене бир кимсе ёкъ. Энди меселени анълай.

Булар менден къоркъып, балаларны алып къачтылар, гъалиба, — деп тюшпоне. Бу ишни кимден сорайджагъыны бильмей. Тюшпоне-ташына, сонъ эв ичиндеки шейлерден сорамагъа къарар бере. Башта сипиркиден сорай:

— Шорбаджыларынъ къайда кетти? — дей.

Сипирки онъа:

— Бильмейим, меним козюм ёкътыр, — деп джевап бере. Сонъ кьопкъадан:

— Шорбаджыларынъ къайда кеттилер? — деп сорай.



Къопкъа:

— Бильмейим, олар кеткенде мен агъзымны ачтым да къалдым,
— деп джевап бере.

Балтадан сорай, балта кестирип:

— Бильмейим, — деп джевап къайтара.

Аждерха йылан оларнынъ бильмегенлерине ачувлана, энъ сонъу кезевден:

— Шорбаджыларынъ къайда кеттилер, корьмединъми? — деп сорай.

Кезев:

— Ал мени козлеп ат, мен къайда тюшсем, онынъ балалары о ердедир, — дей. Аждерха йылан кезевнинъ бу айткъанларына къувана. Аман кезевни ала, козьлеп ата, кезев, балалар олгъан ерге барып тюше. Аждерха йылан лескер алып, шу ерни къазмагъа башлай. Балалар энди озьлерининъ оледжеклерини дуялар. Бири-бирлеринен савлыкълашалар. Аждерха йылан оларны певренктен бирер-бирер къазып чыкъара: — А... а... сиз мында экенсинъиз де, — дей. Балалар къоркъушалар. Башта, аждерха йылан оларны ашамакъ къарарына келе, амма бакъа коре, балаларнынъ экиси де айнынъ он дёртю киби дюльбер экенлер. О оларны бойле дюльбер олгъанлары ичюн ашамай, догъру озь эвине алып келе. Эвине кеткенде, ёлда бир ерде токътайлар.

Аждерха йылан къызгъа:

— Сен отур да, меним башымны бакъ, — дей.

Къыз ерге отура ве онынъ башыны бакъа. Бу арада аждерха йылан юкылап къала. Олар шу ерден кечейткъан бир атчыкъны корип, онгъа:

— Атчыкъ, бизни аркъангъа ал да, шу аждерха йыланнынъ элинден къуртар, — дейлер.

Атчыкъ оларгъа:

— Кель мининъиз аркъама, кетейик, — дей. Огъланчыкънен къызчыкъ аждерха йыландан гизли оларакъ атчыкънынъ аркъасына барып мине, чаптыра берип кетелер.

Атчыкъ балаларгъа:

— Мен сизни тап эвинъизге алып кетерим, — дей. Шай дер экеч аждерха йылан тоз-думан къопарып балаларнынъ артындан ете де:

— Мен сизни бунынъ ичюн алып кельдимми? — дей. Сонъ аткъа айланып:

— Я, айван, сен де оларны неге алып къачтынъ? — деп багъыра ве атнынъ богъазына япышып, атны тирилей ашамагъа башлай.

Балалар кьоркьалар. Аждерха йылан атны ашап битирген сонъ:

— Джурингыз, эгер бир даа кьачсангыз, сизни де бойле ашарым, — дей.

Балалар кьоркькъанларындан:

— Ёкъ, бизлер артыкъ ич де кьачмамыз, — дейлер. Аждерха йылан балаларны алып, кене де озъ кьобасы олгъан тарафкъа кете. Бир талай вакъыттан сонъ балаларгъа:

— Биз бу ерде токътайыкъ, азачыкъ джал этейик, — дей.

Къызгъа:

— Сен кызым, меним башымны бакъ, — дей.

Къыз онынъ башыны бакъа. Аждерха йылан къызнынъ къаныны эме-эме юкълап къала.

Балалар кене кьачмакъны тюшюнелер. Шу ерден бир къатыр кечип кете экен. Огъланчыкъ онынъ огюне чыкъып:

— Къатырчыгъым, бизни аркъангъа ал да, аждерха йыландан кьуртар, — дей.

Къатыр буюк бир сайгъынен:

— Кель минингыз, аркъама! — дей.

Балалар кьоркъа-кьоркъа къатырнынъ аркъасына минелер. Аждерха йылан юкъудан уяна. Бакъса, не коръсин: балалар кене де кьачкъанлар. Кене де оларнынъ пешинден чапа. Чокъ кечмеден, оларнынъ артындан еткени киби огълангъа атыла да:

— Къачмакъ меселесини сен чыкъаргъандырсынъ, мен башта къатырны, сонъ сени ашайджагъым, — дей. Къатыргъа айланып:

— Сен оларны кьачыраджакъ олдынъмы? Яхшы, кысметим бир эди, эки олды, — дей де, шу ерде тирилей къатырны ашай.

Балачыкълар бу сефер даа пек кьоркъушалар. Не айтаджакъларыны бильмейлер. Аждерха йылан:

— Мен сизлерни бу сефер къалдырмаз эдим, амма токъум, айды тюшпюнгиз огюме, — дей. Балалар кене де эсир тюшелер ве не япаджакъларыны бильмейлер. Бир чокъ вакъыт ёл джурген сонъ, аждерха йылан кене де токъталып къызгъа:

— Отур ерге де, меним башымны бакъ, — дей.

Къызчыкъ кьоркъа-кьоркъа ерге отура, аждерха йыланнынъ башыны бакъмагъа башлай. Аждерха йылан кене де къызчыкънынъ къаныны сукура-сукура юкълап къала.

Балачыкълар бир даа къачаджакъ олалар, амма кьоркъалар. Шай этип, агълашып тургъанда, узакътан бир бугъанынъ келеят-къаныны корелер. Оны къуванчнен кьаршылайлар. Бугъа аждерханы корьгенинен:

— А... а... меним еди йылдан берли кыдыргъан душманым мында

экен де, — деп шу ерде токътай. Балалар бугъанынъ шай дегенине шашалар. Бугъа сёзюни девам этип:

— Эм озю де юкълый, барем мен онынъ ишини битире къояйым, — дей.

Балалар онъа ялварып:

— Ёкъ, бугъа агъам, сиз оны шимди тийменъиз, бизни алып къачынъыз, сонъ онынънен тена-тена куреширсинъиз. Ондан гъайры, о шимди уяныр эм сизни, эм де бизни ашар, — дейлер.

Бугъа:

— Сиз ондан къоркъманъыз, о бир шей япалмаз, — деп джевап бере.

Балалар кене де бугъагъа ялварып:

— Екъ, бугъа агъам, бизим янымызда онъа тийменъиз, сиз тек ондан бизни къуртарынъыз, — дейлер.

Бугъа:

— Яхшы, мен сизинъ дегенинъизнен разы олам, лякин онынъ эджели меним къолумда, — дей.

Балалар къуванлар. Огъланчыкъ:

— О бизни кене келип тутар, биз эки дане айваннен къачаджакъ олдыкъ. О бизни тутгы, айванларны ашады. Шимди де тутса, не япармыз? — дей.

Бугъа онъа:

— Огълум, сен меним сагъ къулагъымдан кир, сол къулагъымдан чыкъ. Анда бир таракъ оладжакъ, оны ал да, кереккенде ерге ташларсынъ, чыкъылмаз бир тав олур. Аждерха йылан онынъ ичинден къолай-къолай чыктып оламаз. Къызым, сен исе, сол къулагъымдан кир, сагъ къулагъымдан чыкъ, анда бир кузгю оладжакъ. Сен о кузгюни ал, кереккенде ерге ташласанъ, денъиз олур. Аждерха йылан денъизнинъ ичинден ич де чыктып оламаз. Биз о вакъыткъа къадар эвге барып чыкъармыз, — дей. Балалар бунъа къуваналар.

Огъланчыкъ онынъ сагъ къулагъындан кире де, сол къулагъындан бир таракъ алып чыкъа. Къызчыкъ исе, сол къулагъындан кирип кузгюни ала ве сагъ къулагъындан чыкъа.

Аждерха йылан бир талай вакъыт юкълагъан сонъ, юкъудан уяна. Бакъса, не коръсин: балалар кене де джюлгъанлар. О:

— Бу сефер мен оларны ашарым, — дей де кельген ёлундан арткъа къайта. Кете, кете, ич де бир шей коралмай. Бираз вакъыт кечкен сонъ, балаларны коре, балалар да оны корелер. Огъланчыкъ оны коръгени киби, таракъны ташлай. Аждерха йылан тавлыкъ ичинде къала. Кечмекнинъ чаресини тапалмай, чокъ чекише. О кечильмез тавны чыкъкъангъа къадар, балалар эвлерине якъынлашалар.

Не де исе, аждерха йылан тавдан чыкъя ве аман къузмагъя башлай. Балаларнынъ артындан етейим, дегенде, бугъя:

— Къызым, кузгюни ташла, — дей.

Къызчыкъ кузгюни ташлай. Аждерха йылан денгиз ичинде къала. Чекише, чекише денгизден чыкълмай. Балалар эвлерине келелер. Къувангъанларындан бугъанынъ юзюнден-козюнден опелер. Бугъанынъ озю де оларны къртаргъанына къувана. Бугъя шай этип, оларны къртаргъан сонъ:

— Сиз мени союнъыз, — дей.

Балалар:

— Сиз не айтасынъыз, бизге о къадар ярдым эткен айванны соймакъ мумкюнми? — деп тааджипке къалалар.

Бугъя исе, кене де:

— Сиз мени союнъыз, манъя ондан ич де зарар кельмез. Эгер де мени соймасанъыз, меним сизге джаным агъыраджакъ, — деп ялвара.

Балалар агълашалар. Бугъя, кене де сёзюнден къайтмай:

— Эгер мени соймасанъыз, сиз аждерха йыландан къртылмазсынъыз, о сизни илле тапып ашар. Мени союнъыз да, диварнынъ дёрт кошесине дёрт аягъымны илинъыз, — дей. Балалар бугъанынъ айткъанына разыолалар. Соймаздан эвель онынънен сагълъкълашалар. Къызчыкъ козьлерини джума. Огълан да агълай-агълай бугъаны соя. Бугъанынъ айткъаны киби, дёрт аягъыны диварнынъ дёрт кошесине илелер.

Акшам ола. Балалар яталар. Саба туралар, бир даа бакъса, не корьсинлер, бугъанынъ дёрт аягъындан бири арслан, бириси къаплан, бириси тюфек, бириси де къылычкъа чевирилъген. Балалар башта къркъушалар, лякин сонъундан джесаретленелер. Насыл олса-олсун, бу силяларнен озьлерини кърчаламакъ мумкюн оладжагъыны анълайлар.

Бир кунъ къыз денгизге баргъанда, бириси:

— Акъыз, джибер сачларынынъ, сачларынъя сарылып чыкълайым, — деп ялвара. Къыз исе, оны эриштире, лякин сачларыны узатмай, эвлерине къайтып келе. О айны шу ялварувны чокъ керелер даа эштите, лякин онъя къулакъ асмай. Бир кунъ саба, кене де денгизге бара. Аждерха йылан бу сефер онъя бир дюльбер йигит олып корюне ве:

— Акъыз, узат сачларынынъ, мен де сенинънен бир олайым, мен севем сени, эгер мындан чыкълсам, сени озюме алырым, — деп оны алдатмагъя башлай. Къыз бунъя инана, узун сачларыны сувгъаджибере, аждерха йылан онъя сарылып ялыгъя чыкъя, къызны къучакълый, севе, опе. Къыз да аждерха йыланни зияде севип башлай.

Аждерха кыызгъа:

— Эгер менимнен яшамакъ истесенъ, агъанъны кыркъ къапылы дегирменден ун кетирмеге ёлла, — дей.

Кыыз эвге келип агъасына:

— Ах, меним бир дане агъам, мен пек хастам, сен мени сагъылтмакъ ичюн кыркъ къапылы дегирменден ун кетирсе эдигъ, — дей.

Агъасы онъа:

— Кетирейим, къардашым, тек арув ол, сен меним малдан, джандан да татлы бир къардашымсынгъ, — деп джевап бере. Аман шу ерде кийине, тюфегини, кылычыны, арсланнен къапланны да алып догъру кыркъ къапылы дегирменге кете, лякин: «озюм кельгендже, къардашым олер», деп къоркъа. Къардашы исе, о къапыдан чыкъарчыкъмаз, аякъ устуне туруп, пенджереден бакъа. Шу арада аждерха йылан келе де кызынен корюше.

Кыыз:

— Агъамны алдатып, кыркъ къапылы дегирменге ёлладым, — дей.

Аждерха йылан къувана да:

— Энди къайтып кельсе менден къуртылмаз, — дей де кыызгъа, — агъанъны ольдорген сонъ, мен сени алырым, экимиз берабер яшармыз, сенингъ ананъны, бабанъны да тапармыз, олар да бизнен берабер яшарлар. Бизден дюльбер-дюльбер балачыклар догъар-осер, буюрлер. Сонъ оларны эвлендириримиз. Чокъ бахытлы олурмыз, — дей.

Кыыз:

— Сен мени тойгъа кезмеге алып кетерсингъми? — деп сорай.

Аждерха кыызгъа:

— Мен бир фыйтон тутарым, истеген еринъе кетерсингъ, — деп джевап бере.

Кыыз бу сёзлернинъ эписине инана. Аждерха йылан ичюн кызыны гъайып этмек ич бир шей дегиль, лякин огъланни гъайып этмек кыйын. О, огъланни гъайып этмек ичюн чекише.

Чокъ кечмеден, кызынынъ агъасы дегирменге бара, андаки ундан ун ала. Бу дегирмен тылсымлы экен. О, дегирменнинъ къапыларындан бирер-бирер чыкъмагъа башлай, отуз докъузынджы къапыгъа къадар эписини кечип чыкъа. Кыркъындыжы къапыгъа кельгенде, огъланнинъ озю чыкъа, арсланнен къаплан къапыдан чыкъалмай, ичте бастырылып къалалар.

Огълан, къапыны ачмакъ ичюн о къадар тырышып бакъа, амма ачып аламай. Унны алып догъру эвлерине келе. Бир даа бакъса, не бакъсын: къардашынен аждерха йылан онынъ кельгенини беклеп

отургъанларыны коре. Огълан шаша, не япаджагъыны бильмей. Эгер, арсланнен къаплан олгъан олса эди, о кьоркъмаз эди, лякин ёкълар. Не де олса, кьардашынынъ янына барып:

— Мына, санъа кьыркъ къапылы дегирменден ун кетирдим, — дей, унны узата.

Аждерха йылан огълангъа:

— Сен азырлан, — дей.

Огълан:

— Неге азырланайым? — деп сорай. Къыз агъасына:

— Энди эджелинъ етти, агъам, азырлан! — дей. Огълан, Аждерха йыланни сувдан чыкъарылгъаныны анълай ве оларгъа чевирилип:

— Яхшы, мен сизнинъ истегинъизнен разым, лякин сиз манъа шу сельби терегининъ тёпесине чыкъмакъ ичюн, беш дакъкъа мулет беринъиз. Мен сонъгъулыкъкъа бу ерлерни сейир этип, дюньянен сагълыкълашайым, — дей.

Аждерха йылан:

— Айды яхшы, амма тез ол, — деп разылыкъ бере.

Огълан чабик-чабик терекке тырмаша. Сельбининъ чин тёпесине мине де, бутюн койни сейир эте ве яваш-яваш теректен тюше, эм тюшюне. Шу арада арслан ве къапландан алып къалгъан эки тель тюкчиги акъылына тюше. Оларны бири-бирине окъалай да, сельбиден ашагъы тюшмени девам эте. О да аягъыны ерге баса, арсланнен къаплан етишип келелер. Огълан юреклене. Къыз ве Аждерха йылан буз-бузлайлар. Огълан арсланнен къаплангъа:

— Буларнынъ ишлерини тез вакъытта битиринъиз, — дей. Арсланнен къаплан шу арада кьызнен аждерха йыланни парча-кесек этелер. Шай этип огълан, Аждерхадан ве агъасына хиянетлик япкъан кьыз кьардашындан кьуртула.



ДЖАНЛЫ ОЗЕН

Э-эй, коюмизнинъ башына нелер кельмеди?! Буларны тильнен айтып, къалемнен язып битиралмазсынъ...

Мында душманлар олгъан вакъытта, бизим топрагъымыз аяжкъа котерилгенде, биз къартлар ве къартанайлар, эвлятларымызгъа:

— Кетинъиз, айды кетинъиз, бизим еримизнинъ юзюни денъиштиреджек адамларгъа барынъыз, оларгъа къошулынъыз ве ярдым этинъиз. Биз сизлерге ярдым этермиз, — дедик.

Бизим огъланларымыз дагъларгъа, орманларгъа чыкъып кеттилер. Орманлар шувулдай, дерсинъ агълай эдилер. Коюмизде душман тура эди. Кунълер агъыр эди...

Ябанджыларнынъ сия ве ашайтлары бар эди. Дагъларда гизленген бизим огъланларымызнынъ исе, не сиясы, не де ашайтлары бар эди.

Биз къартлар, элимизден кельгени къадар огъулларымызгъа ярдым эте эдик. Олар орманларда бош отурмай чалыша, куреше эдилер. Ашайттан пек замет чеккенде озенчикке къарай да:

— Сен, озенчик, пек шенъсинъ, коюмизнинъ янындан кечип кетесинъ. Сен бизимкилерге айт, бизде отъмек битти, — дейлер.

Озенчик оларгъа:

— Яхшы, айтырым, — деп, ашыгъы догъру акъып кете эди. О кой ичинден яваш-яваш акъып кеткенде:

— Қъартлар, огъланларынынъ отъмеги биткен, замет чекелер, — дей эди.

— Я биз оларгъа отъмекни насыл алып кетермиз, ёлларны душман къапатты да? — деп сорай эдик.

Озенчик:

— Сиз къартлар, къапуста япракъларыны алынъыз, оларнынъ устуне отъмек салынъыз, о якъыны мен озюм беджеририм, — дей. Биз да шай япамыз. Озенчик, устылерине отъмек олгъан къапыста япракъларыны къыргъа къаршы алып кете. Мен буны озь козюмнен коръдим, сен кульме, озенчик бизим огъланларымызгъа ялынъыз отъмек дегиль, керек олгъан эр шейни ташыды. Кунълерден бир кунъ озенчик бизге:

— Сиз къартлар, не къарап турасынъыз, огъулларынынъгъа сия керек, — деди.

Бизлер мадамки бизим огъулларымызгъа сия керек, бу сияны тапайкъ да, огъулларымызгъа джиберейик, дедик. Дедик де, сияны озенчикке теслим эттик. Озенчик явагътан сияларны юкъары догъру

акъызып алып кетти. Анда ялыгъа ташлады. Огъуллаарымыз сияланып, еримизнигъ юзюни денгъиштиреджек адамларгъа къошулдылар. Къошулдылар да бирликте душманны айдап ендылер. Иште, бойле этип огуллаарымыз топрагъымызныгъ озюни бир тамам темизледилер ве койге къайтып кельдилер. Бутюн къартларныгъ огъуллаары къайтып кельди. Ялынъыз, меним огълум къайтып кельмеди. Мен озенчикке къарап:

— Я Асан, къайда? — дедим.

Озен индемей турды. Сонъ, яваштан манъа бир тери къалпакъ алып кельди. Къарасам, Асанчыгъымныгъ къалпагъы. Мен озенчикке:

— Озенчик, огълумны не кетирмейсинъ, оны кетирмек о къадар зормы? — дедим. Озенчик огълумны да кетирди... Акърын-акърын кетирди де тегиз бир ялыгъа къалдырды. Озю ёлунен акъып кетти.

Ялыгъа огълумныгъ аркъадашлары кельдилер. Асанны, огълучыгъымны, чалгъынен комдилер. Дженазеге бутюн джемаат топланды.

Мен чокъ яндым, чокъ агъладым. Лякин не чаре? Эй, огълум! Сени эм орман, эм де озен, эм де бутюн яхшы адамлар хатырлайлар. Сен огълум, ич бир вакъыт ольмезсинъ, биз эпимиз сени хатырда тутамыз.

ДЖИГЕРДЖИ КЪАРТ

Эски заманларныгъ биринде пек зенгин, пек саран бир адам яшагъан. Бу адам пара тогламакъ ве мал арттырмакъ эшкъына ашсувдан вазгечип, ялынъыз джигер ашамакънен кунъ кечире экен. Шуныгъ ичюн де онъа, Джигерджи къарт дегенлер.

Мына бу Джигерджи къарт бир кунъ тюшюнджеге далгъан:

— Джигер манъа пек паалыгъа, эр бир окъкъасына тамам учъ капик берем! Котериледжек масрафмы бу?! Къасапкъа барып бакъмакъ керек, бельки джигер бираз уджузгъа тюшер, деп ойлана.

Бойле бир къараргъа кельген сонъ, Джигерджи къарт учъ-дерт саат ёл юрип, къасапкъа бара ве къасапчыдан:

— Къардашым, джигер уджузмы, — деп сорай.

— Окъкъасы эки бучукъ капик, — деп, къасап джевап бере.

— Ой, анасыны, паалы экен де, — деп Джигерджи къарт теренден кокюс кечире. — Я буныгъ уджуз олгъан ери ёкъмы?

Джигерджи къартныгъ саранлыгъыны бильген къасап, оны къомшу койге йибере:



— Тез олунъыз, кечикменъиз, джигерсиз къалырсыз, — дей. Джигерджи къарт джан терине пишип, эки-учь саатлик ёлдан сонъ, къомшу кой къасабасына барып ете.

— Къардашым, джигер уджузмы? — деп сорай.

Къокъуп башлагъан джигерлерни тез-тез сатып йибермек къасеветинде олгъан къасап:

— Сизге окъкъасыны бир бучукъ капиктен саярым, — дей. Къач окъкъа чекейим? — деп сорай.

Джигерджи къарт джигернинъ уджузлыгына къызып:

— Еди окъкъа чек, къардашым, — дей, — ёл узакъ, бере бир афта ашамалыкъ олсун.

Джигерджи къарт сасып башлагъан джигерлерни торбасына толдуруп ёлгъа чыкъа. Азмы кете, чокъмы кете, бир даа бакъса, акъшам олгъан. «Я барып да огъоме хырсызлар чыкъса, торбамны алсалар, мен не япарым? Он бучукъ калигим авагъа савурылып кетсинми? Ёкъ, алла косътермесин, джигерсиз къалгъандже джанымны алсынлар», деп тюшюнип кете. О ёл кенарындаки къавеге барып кире.

— Алла мусафирини къабул этинъиз, — дей, — къавенъизде бир акъшам геджелемеге мусааде беринъиз!

Къаведжи:

— Буюрынъыз! — деп джеваплана ве къарткъа къапыны ача.

Джигерджи къарт гъарипликке урып:

— Къардашым, ятакъ парасы сорамаданъыз, мен тиленджи бир къартым, — дей.

Къаведжи бу къартнынъ ким олгъаныны бильсе де, индемей. «Мен сангъа ким олгъанынъны бильдиририм», деп тюшюне де къартнен савлукълашып озь одасына кире.

Къавеханенинъ ичи пек къыйметли килимлер, макъатлар, атлас миндерлер ве алтын, кумюш савутларнен донатылгъан экен. Джигерджи къарт бу зенгинликке ачкозъликнен бакъып тургъан арада, ичери баштан-аякъ йипек кийген, башы ве къоллары алтыннен ялтырагъан дюльбер бир къадын келип кире, пуф тешёк тешей, атлас ёргъан джая ве къарткъа:

— Гедженъиз хайырлы олсун! — деп, ялаша одагъа чыкъып кете. Ергъунлыкътан ве юкъусызлыкътан меджалсыз къалгъан Джигерджи къарт аман тешекке кире. Кире амма, джигер кене акъылына тюше: «Джигерни хырсызламазлармы? — деп тюшюне, — пуф тешек тешеп, мени юкълатмакъ истейлер, сонъ джигерлериме бир хиянетлик яладжакълар Екъ, джанымны беририм, джигерлеримни бермем. Шакъа дегиль, тамам он бучукъ капик теледим», деп тюшюне ве козюне юкъу

кирмей. Джигерджи къарт джигер торбасыны пуф ястыкъ астына сокып, башыны ястыкъкъа ясландыра. Лякин козюне юкю кене де кирмей. «Ач хырсызлар ана кельдилер, мына келеджеклер, мени ольдюреджеклер, джигер торбасыны аладжакълар», деп ятсы маалине къадар козь юммай. Ятсы маалинде исе, янаша одадан эки кольге чыкып арангъа кирелер.

Джигерджи къарт: «Бу да, насыл муджизе экен?» деп, яткъан еринден атылып тура, джигер торбасыны къолтугъы астына сыкъа ве кольгелернинъ пешинден кете. Бакъса, не корьсин: къаведжинен къадыны чокъмар таякъларнен ур-патласын аран ичиндеки топракъ обасыны котеклейлер. Таякъларыны котерип эндирген сайын:

— Мына сангъа, мына сангъа! Сагъ олгъанда аш ашамадынъ, джигер ашадынъ, ольген сонъ таякъ аша! — дейлер.

Джигерджи къарт: «Бу не алямет экен?» деп, сабагъадже тюшпонип-ташынып чыкъа. Эртеси кункю, къаведжи ичери киргиненен, джигерджи къарт ондан:

— Топракъ обасында ким бар, сиз оны не ичюн котекледингъыз? — деп сорай.

Джигерджи къарткъа джевабында къаведжи:

— О топракъ обасы дегиль де, къабирдир, бу къабирде котекке ляйыкъ бир адам ята. Биз оны эр гедже котеклеймиз, — дей.

Джигерджи къарт ольген сонъ котекленген мерумнынъ талийинен меракъланып:

— Я о не япкъан, не къабаат ишлеген? — деп сорай. Қъаведжи:

— Дингъленгъиз, къартым, айтып берейим, — деп икяесини башлай.

— Бу эв де, звнинъ ичиндеки бу зийнет де, озен боюндаки багъчалар да, сизге тешек тешеген къадын да, къабирде чюрюп ятмакъта олгъан джинасирнинъ эди. Бай бир киши олгъанына бакъмадан, ашамады-ичмеди, озюни де, къадыныны да ач тутты, бутюн омюр байлыкъ тоглады. Ач яшады, ачлыкътан еберип де кетти. Лякин оледжекте де ачкозлиги къалмады. Байлыгъыны бирдюньягъа алып кетмек мумкюн олмагъаныны анълагъан сонъ: «Мезарымны азбарымда къазынгъыз, къабиримни корип, мал-мулькиме токъунмагъа къоркъсынлар», деп васиет этти.

Байнынъ къадыны, эри ольген сонъ, чокъ агълап отурмады, мангъа эрге чыкъмагъа разылыкъ берди. Мен де оны севе эдим. Биз эвлендик. Раат-раат, муаббет яшап башладыкъ. Лякин бизим бахытлы омюримизни кедерлеткен бир ал бар эди: геджелери, бу джинасир къарт къабиринден чыкъа, азбарны долана, сонъ отура-отура, къанлы джигер ашай эди.

Биз бу джинасирнинъ гъайып олып кетмесини тилеп, геджелернен дуа этип чыкътыкъ, амма дуамыз къабул олмады. Бир кунъ къавеге бир дервиш келип къалды. Биз онынънен акъыл даныштыкъ. Бу дервиш бизге шойле деди: «Мерум бу фани дюньяда пек саран бир адам олгъаны ичюн, бакъий дюньягъа баргъан сонъ дженнетке де, джеэннемге де къабул этильмеди. Ана яшамагъа ер тапамагъаны ичюн серсерийлик этип юре, сизге хиянетлик япмакъ истей. Оны котекленъиз, аджымадан котекленъиз. Эр акъшам ятсы мааллеринде къызылчыкъ таякълары алып къабирини баса-баса таякълангъыз ве таякъларынъызны котерип эндирген сайын, оны энъ яман сёзлернен сёюнъиз».

Биз дервишнинъ айткъаны киби япа башладыкъ. Аллагъа шукур, мерум бай шу кунъден сонъ пейда олмады.

Джигерджи къарт, сес солукъ чыкъармадан, къаведжининъ икяесини динълей, сонъ аякъкъа туруп, къаведжининъ къолуна беш кумпош пара туттура:

— Ал, къардашым, бу — ятакъ парасыдыр, — дей ве ёлгъа чыкъа. Қъаведжи Джигерджи къартнынъ артындан кулюмсиреп:

— Эй къартым, джигер торбасыны унуттынъыз да, алынъыз, — деп къычыра. Джигерджи къарт артына биле айлананып бакъмадан: «Керекмей, копеклерге берирсингиз», деп ёлуны девам эте. Дос-догъру базаргъа келип кире. Эт токъянындан ярым къой ве бир къурсакъ май ала, бакъалдан бир къуту эльва, бир къопкъа бал ве бир метий де пенир ала, эвине джибере, сонъ араба тутуп, арабаны пирнич, ун, пекер чувалларыннен юклеп, эписини эвине джибере.

Джигерджининъ эвине бу малларнен хаммаллар кельгенде, онынъ къадыны неге огърагъаныны бильмей, шашып къала. Бир даа бакъса, чувалларнен юкю араба да келип токътай. Заваллы къадын текмиль шашмалагъанындан:

— Ёкъ-ёкъ, биз бойле шейлер ашамаймыз, биз ялынъыз джигер ашаймыз, — деп хаммалларны ве арабаны къайтармакъ истей. — Бу эв джигерджининъ эвидир, бу эвге джигерден башкъа шей кельмез, джигерни де Джигерджининъ озю алып келир, — дей.

Хаммаллар ве арабаджы:

— Бизни Джигерджининъ озю джиберди, — деп юклерини таппап кетелер.

Джигерджининъ къадыны бу маллар яньна бир озю къалгъан сонъ, корьгенлерим бельки тошюмдедир, деп шубеленмеге башлай. Қъана, пармагъымны тишлеп бакъайымчы дей де, тишлерини пармагъына батыра. Батыргъанынен вайылдап йибере. Бу арада Джигерджининъ

озю де келип къала. Келип къала амма, оны танымакънынъ чареси ёкъ; башында кирли явлукъ ерине каракуль кълпакъ, майлы джюббе ерине тери якъалы чекмен, аякъларында исе, хасыр чарыкъ дегиль де, йылым-йылым йылтырагъан потик!

Джигерджи азбар кълпудан киргени киби:

— Эй апакаъй, тез ол, чиберек пишир, кълйманлы аджыма, чёюнни майгъа толдура-толдура пишир, кълум-кълмшугъа етсин! — дей, багъыра. Кълджасынынъ худжур сёзлерине шашып кългъан кълдын:

— Акъай, санъа бир шей олмадымы, акълылынъны ойнатма-дынъмы? — деп сорай.

— Ёкъ, апайчыгъым, мен акълымны энди таптым, инсан малгъа дегиль де, мал инсангъа керек экен. Умют этем ки, бир кунь ола, олип кълсам сен севимлинънен келип, меним кълбиримни котеклемезсинъ.

— Акъай, бу насыл лакъырдыдыр? Сен, гъалиба, акълылынъны чылдыргъансынъ. Барып моллакъланы чагъырайыммы?

Джигерджи кълрт:

— Айды апакаъй, давран, чибереклерни пишир, о якъны сонъ лаф этермиз, — дей де пычакъларны алып, кълйма чекмеге башлай.

АХМАКЪ КЪАШКЪЫР

Бир заманда бар экен, бир заманда ёкъ экен, бир ахмакъ кълшкълыр бар экен. Бу ахмакъ кълшкълыр койден узакъ буюк дагъларда джуре экен, кийик тапса эписини тутып ашай ве шай да яшай экен.

Кунълерден бир кунь, о пек хасталана. Хасталыгъынынъ себеби, дигер айванларны ынджыткъаным ичюндир, деп тюшюне де, озъюне:

— Хасталыкътан турсам, ич бир айванны ынджытмам, — дей. Арасы чокъ кечмей, тюзеле. О хаста олгъанда берген сёзюни, бутюн айванларгъа бильдирмеге къларар бере. Кете-кете, дагъда бир алан ичинде отлап тургъан бузавгъа расткеле. Бузав ондан кълркълп, кълчамагъа ынтылгъанда, кълшкълыр онынъ огюне чыкълп:

— Кълркълма, достум, мен артыкъ сизни ынджытмамагъа сёз бердим, — дей.

Бузавнынъ бунъа чокъ инанаджакъл кельмей. Амма кълшкълыр, гузельдже савлыкълашып кеткен сонъ, инана.

Кълшкълыр бираз кеткен сонъ эки кълчкъларгъа, сонъ бир аткъа расткеле. Оларгъа да, артыкъ оларны ынджытмайджагълна сёз берип, кълйта.

Кълшкълыр кълбасына догълру келе. Баягъл ёл алгълан сонъ, о

озюнинъ зиядесинен такъаттан тюшкенини, чокъ ач олгъаныны, къурсагъынынъ гырылдагъаныны дуя.

Не япсын, тюшоне:

— Бабам-дедем ойле яшап ольгенлер, мен не ичюн бу къадар мераметли олам я, — деп, къайтып атны ашамагъа къарар бере.

Къашкъыр артыкъ бир шейге къулакъ асмай, дос-догъру аткъа кете. Ат кене эвельки еринде отлай экен. О къашкъырны корьгенинен меселени анълай ве бир айнеджилик тюшоне.

Къашкъыр онынъ янына келип:

— Мен сени ашамагъа къарар бердим, — дей.

Ат къашкъыргъа:

— Ашасанъ аша, лякин арт аягъыма бир мых кирди, о мени чокъ раатсыз эте, башта оны чыкъармангъны риджа этем, — дей.

Къашкъыр бунгъа разы ола. Атнынъ аягъындан мыхны чыкъармакъ ичюн онынъ арт аякъларына якълаша, шу арада ат къашгъыргъа яхшы бир тепме яндыра, ахмакъ къашкъыр юварланып кете. Ярым саат эсини топлап оламай ята. Бираз эси башына келе башлагъан сонъ, тентирментир еринден турыш кете. Къочкъарларны расткеле де оларны ашамагъа къарар бере. Къочкъарлар экиси бири-биринен тюртюшип отура экенлер. Бир даа бакъсалар, къашкъырнынъ кельгенини корип меселени анълайлар, амма тюртюшмекни вазгечмейлер.

Къашкъыр догъру оларнынъ янына келип:

— Сизни ашамагъа къарар бердим, — дей.

Къочкъарларнынъ бириси:

— Гузель амма, сен башта бизни анълашгыр да, сонъ ашасанъ, аша. Мына бу бизим бабамыздан асабалыкъ къалгъан топракъ. Биз оны боллошгирмек ичюн чекишемиз. Риджа этемиз болип берингиз, — дей.

Къашкъыр разы ола ве топракъны больмек ичюн къочкъарларнынъ арасына кире, бундан файдаланып къочкъарлар экиси эки тарафтан озьлерининъ сиври бойнузларынен къашкъырны тюртип эсини ала ве озьлери къачып кетелер.

Къашкъырнынъ алы чокъ феналаша, о зайыфлай, сонъ дередже такъаттан тюше. Сонъки ишанчы олгъан бузавгъа кете. Бузавгъа да барып оны ашайджагъыны айта.

Бузав:

— Бойнузымнынъ янында бир яра бар, башта оны къопар ташла да, сонъ ашасанъ аша, хасталанмазсынъ, — дей.

Къашкъыр разы олып, онынъ бойнузынынъ янындан къапайым дегенде, бузав артыкъ такъаты биткен къашкъырны тюртип йыкъа ве озю къачып кете.



БЕКИР МУСТАФА

Бир заманда султан Сулейман озь сарай адамларынен бир джума куню селямлыкъкъа¹ чыкъкъан. Сокъакъ бою толу сейирджи халкъ арасында устю-башы йыртыкъ бир саргъуш атылып чыкъып, султан минген атнынъ тизгининден тутып токътаткъан. Султаннынъ бекчилери аман башсыз эрифке уджюм этип, тутмакъ истейлер. Лякин султан бу адамнынъ джесаретли арекетине тааджип эте, элинен ишарет этип, оны сербест быракъмаларыны эмир эткен.

Султан Сулейман, аякъта зорнен тургъан саргъушкъа бакъып:

— Сёйле огълум, тилегинъ недир? — деп сорагъан. Саргъуш султангъа:

— Султаным, бу атны мангъа сатса? — деген.

Султан дикъкъатнен бакъкъан да, къаршысындаки адамнынъ бутюн куньдогъушкъа озь саргъушлыгынен, гъариплигинен мешур Бекир Мустафа олгъаныны корьген. Бекирнинъ бу чыкъышы султаннынъ о къадар хошына кеткен, атта шакъылдап кулип джиберген.

Сонъ Бекирге бакъып:

— Пек яхшы, Бекир, мен сангъа бу атны сатайым. Лякин бу атны мангъа минип кезмеге учъ кунъ даа мусааде эт, — деген.

Бекир де султангъа:

— Олур, олур, султаным. Менден сангъа изин. Истесенгъ, бар учъ кунъ даа минъ! Барсын алла сангъа сагълыкъ берсин! Сен, султан Сулейман, мангъа бир кереден айтса, бу маличикке не берейим? Лякин бакъ, султан достум, эгер менден зияде фиат истейджек олсангъ, сонъ ишинъ фена олур! — деп, пармакъ саллагъан.

Султан кулькюден озюни туталмай:

— Къоркъма Бекир, узлашпырыз. Бу атчыкъ мангъа беш юз лирагъа² мал олды. Сангъа да о къыйметке беририм, — деген.

Зор-беянен аякъ устюнде тургъан Бекир, джеблерини къарыштырып, тюбюнде унутылып къалгъан учъ гъурушына³ чыкъарып султангъа узаткъан да:

— Ал пейинъни, — деген.

Бекир атнынъ тизгинини ташлап, озюни сейир эткен халкънынъ кулюши алтында гъурурланып, ёлуны девам эткен.

¹ селямлыкъ — Стамбулда султанларнынъ джума куньлери джамите тантаналы кетмесине дегенлер

² лира — тюрк парасы

³ гъуруш — алтын паранен секиз капик

Беш адым кеткен сонъ, артына айланыш, султангъа пармагынен саллап:

— Бакъ, Сулейман, Бекир Мустафаны сакъын алдатайым деме, — деп кычыргъан.

Арадан учъ кунъ кечкен. Султан селямлыкъта Бекирнен олгъан вакъианы хатырлап озъ хызметчилерини ёллап, оны сарайгъа чагъырткъан. Бекир сарайгъа киргенде, султан онъа:

— Айды, Бекир, энди вакъыт кельди. Сай параларны! — деген.

Саргъушлыкънен не япкъаныны бильмеген Бекир, ич бир шейден хабери олмагъан адам киби, козылерини султангъа тикип, шашкъын, шашкъын бакъып къалгъан. Сонъ:

— Султаным, насыл алышвериш акъкъында айтасынъыз, я? — деп сорагъан.

Султан Бекирнинъ устуне багъырып:

— Меним киби буюк бир хакъаннен¹ эгленмеге санъа ким, акъ берди? — деген. — Сен дегильми эдинъ, кечкен селямлыкъта меним атымны беш юз алтынгъа базарлыкъ эткен? Эгер сен, шимди параларны саймасанъ, мен шу дакъкъа сени сюйрю къазыкъкъа отуртмаларыны эмир этерим, — деген.

Озюнинъ саргъушлыкънен япкъан арекети нетиджесинде къазыкъкъа отураджагыны акъылы кескен, эр шейде, эр ерде азыр джевап олгъан, ич бир вакъыт агъыр вазиет къаршысында шашып къалмагъан Бекир, вакъыт къачырмай бу зорлукънынъ астындан чыкъмакны да тюшонген. Бекир элини кокюсине къойып:

— Эй айныкъларнынъ ве саргъушларнынъ буюк падишасы! Озюнъиз айтынъыз, Бекирнинъ мында не къабааты бардыр? Сизнинъ атынъызны — алла онъа узун омюрлер берсин, селямлыкъта базарлыкъ эткен мен дегиль де, шериатнынъ «шарабен таура²» деген тесирли кефсер³ сувудыр, — деген.

Саргъуш Бекирнинъ бойледже шериаткъа, динге тиль узатувы султанны даа зияде ачувландыргъан. О къапы бекчилерине багъырып, бу динсиз эрифнинъ акъкъындан кельмелерини эмир эткен. Лякин Бекир, озюни ич де сыкъмагъан. Эль ишаретинен султанны токътатып:

— Сиз султаным, меним айткъанларымны ишнен косътермеге изин беринъиз. Сиз, мына бу чагъырткъан бекчилеринъизге эмир этинъиз де, ёлдан энъ хор, энъ тынч, энъ чыплакъ сизнинъ подданларынъыздан учъдане адамны узурынъызгъа кетирсинлер. Буларнынъ бири аякъсыз,

¹ хакъан — хан, монарх

² таура — темиз, пак

³ кефсер — диний китапларда дженнет чокърагынынъ суву

бири кёр, учюнджиси де чыр-чыплакъ бир тиленджи олсун. Оларгъа бир софра къурсынлар, устюни энъ яхшы шарап, ракъыларнен донатсынлар. Сонъра, султаным, бу къудретли ичкинигъ факъыр дервишлерни буюк падишагъа ве азаматлы падишаларны да ахмакъ эшекке чевиргенинигъ озюнгиз шааты олурсынгыз.

Султан Сулейман Бекирнигъ бу джесюрлигине тааджип эте. Онынъ сёзлеринингъ не дередже акъикъат олгъаныны денъемек ичюн Бекирнигъ айткъанларыны тезден ерине кетирмелерини бекчилерине эмир эткен.

Арадан бир саат кечер-кечмез, сарайгъа учъ дане факъыр тапып келелер. Биринингъ эки козю де кёр, экинджиси чыр-чыплакъ тиленджи, учюнджиси де эки аягъы олмагъан киши экен. Бекир оларны къаршылап алып, учюни де падиша софрасы киби къыйметли шараплар, ракъылар, къавалтыларнен донатылгъан софра башына отурткъан. Оларны бири-бири пешинден, тюшлеринде биле коръмеген татлы шарапларнен къаделерини толдуруп сыйлагъан. Султан исе, бу ишлерни перде артындан сейир эте экен.

Тезден, буларнынъ учюнингъ де тиллери чезиле, дамарлары ичинде уюшкъан къанлары къуветли акъмагъа башлагъан. Башта энъ джансыз олгъан аякъсыз джанлангъан. О огюндеки шарап шишесини къолуна алып, саллагъан ве юксек сеснен:

— Эй, мельун зеэр! Сен шише ичинде тургъанда не къадар да тынчсынъ. Амма адамнынъ ичине кирдинъми, атеш кесилесинъ. Сени тюшюнип чыкъаргъан адам элиме тюшсе, истесе султан Сулейманнынъ озю олсун, мына бу кевдемнен, валлаи, таптар гебертир эдим! — деген.

О бир тарафтан кёр адам аякъсызга:

— Олан, аякъсыз къафир, сен анда не зырылдап турасынъ? Мен сенинъ делиргенинигъни корем! Ич, серсем эриф, амма сесингъ чыкъмасын! Ёкъса, санъа ойле бир ерлештиририм, истесенгъ султан Сулейман ол, эки козюнгъ бирден ерге акъар тюшер! — деп багъыргъан.

Ракъыдан джошкъан чыплакъ тиленджи де султанны урмакъ лакъырдысыны эшиткени киби, элиндеки шишесини бар къуветинен саллап кёргъа:

— Ур, кёр огълан, сакъын козюне бакъма! Ур, къалын ченгели пезевенкни! Ур, балабан къурсагъынынъ ягълары акъсын! Геберсе етмиш эки алтынны джебтен чекерим!

Бу лафлардан сонъ, Бекир Мустафа перде артындан динълеген султангъа якъынлашып:



— Эй, ер юзнинъ халифеси! Шимди, султаным, селямлыккъа чыкъкъанда атны сатып алгъан мен дегиль де, фани дюньянынъ энъ акъыр, энъ хор, инсанларны, энъ джесюр, энъ азаматлы инсанлар алына чевирген шарап олгъанына инандынъызмы? — деген.

Султан Сулейман Бекирге бир тюрлю джевап тапалмагъан. О, яры тири, яры олю алда озъ подданларындан энъ хор, энъ акъыр адамларнынъ не къадар къоркъу ёллагъаныны гизленген перде артындан динълей экен. Озь мемлекетинде булар кибицернинъ бинълернен олгъаныны хатырлап, арслан киби джесюр, дюньяны титреткен падиша, сувукъ терлер ичинде къалып интикъам алмакъ истегенини де унутып, завалларны сагъ-селямет сарайындан джиберген. Инсанларнынъ бутюн исыяны, разылыкъсызлыгъы бу шарапны ичкенлеринден себеп, деген къараргъа кельген.

Султан козьлерини кокке тикип:

— Ляйляи илялла! Бу зезрни ичмекни инсанларгъа арам эткен пейгъамберге шукюрлер олсун! — деп алласына дуа эткен.





ЭФСАНЕЛЕР

АРЗЫ КЪЫЗ

Къырымнынъ ялы бою турк султаннынъ къолунда олгъанда, Мис-хор коюнде Абий агъа адында пек тынч бир къартчыкъ бар экен. Абий агъа койнинъ ашагъы мааллесинде, денъизге якъын бир ерде, эски бир дам эвчикте омюр эте, озъ багъчыгъында ишлеп кечине экен.

Абий агъа бай бир киши олмаса да, акъыллы, намустлы, чалышкъыр, догъру бир эmekчи оларакъ танылгъан. Буннынъ ичюн койдешлери арасында буюк сайгъы ве итибар къазангъан экен.

Абий агъа озъ бостаныны, багъыны, къапысы огюндеки кучюк багъчачыгъыны буюк бир севгинен бакъа, къыйметли мулъкюни эм эки аякълы, эм чокъ аякълы душманлардан къорчалагъан. О эр кестен эйи джыныс мейва етиштирмектен зевкъ ала экен. Эр шейден де зияде Абий агъа къара козлю къызы Арзысыны пек севе, оны мукъайтлыкънен осьтюре, козъ бебегинден зияде сакълай экен.

Абий агъа озюнинъ догърулыгъынен, ишкузарлыгъынен озъ койдешлери, атта къомшу койлер арасында шурут къазангъан. Къызы Арзынынъ дюльберлиги, чеберлиги Абий агъанынъ шуретини бир къат даа арттыра экен.

Гузель Арзынынъ бою узун, бели индже, къашлары къара, чатма экен. Онынъ комюр киби къара, ири козълери, вишне тюсю киби дудакълары, асылгъан нар киби къырмызы дюльбер янакълары чокъ къальблернинъ ягъыны ириткен.

Койдеки къомшу къартанайчыкълар Арзынынъ янакъларыны сыйпамай, къартбабайлар да Абий агъанынъ азбары янындан кеч-

кенде тютюн чубукъларыны даа дияде думанлатмай, Абий агъагъа озьлерининъ рагъбет ве сайгътыларыны косътермей кечмей экенлер.

Эр кестен зияде Арзынынъ артындан гизленип юрьген, онынъ эр адымыны сынагъан ве койге чокъ келип кеткен, айнеджи къарт турк Али баба олгъан. О гузель Арзыны биринджи кере ялыдаки чешмеден бакъыр гюгюмнен сув алгъан вакъытта корьген. Али баба, Анадолы ялыларындан Мисхоргъа алыш-вериш ичюн сыкъ-сыкъ келип кеткен, елькенли гемининъ саиби экен. Озюнинъ айнеджилигинен, яланджылыгъынен ве доландырыджылыгъынен мешур бир базиргян олгъан.

Къарт Али бабаны кимсе севмей, эр кес ондан сакъынып кезе экен. Онынъ акъкъында, ялы бою койлеринден дюльбер кызыларны хырсызлап, Тюркиеге паша сарайларына кетирип сата, деген лафлар да айтыла экен.

Али бабанынъ чокътан-чокъ кескин бакъышлары Арзыны титрете, къоркъуза экен. Гузель Арзы къарт айдутны, ялыдаки чешме башында сыкъ-сыкъ ресткетире башлай. Али бабанынъ тайфасы¹ да, Арзынынъ не ерге кеткенини, къайдан кельгенини бакъа, эр адым алышыны огренмекнен огъраша, анги саатлерде, кимлернен кезгенине баргъандже тешкере экенлер.


Кунылер кечкен сайын, Арзы дюльберлешкен. Баба юртунда, анасынынъ янында, о ойнап-кулип яшагъан. Онынъ шенъ кулюши — багъда, бостанда, чешме башында — эр ерде эшитилъген. Озюнинъ шенъ тюркюлерини йырлап, ялыдаки чешмесине келип, о чешит тюстеки ташчыкъларнынъ ойнакълыгъыны узун-узады сейир этмекни пек севе экен.

Арзыгъа Мисхорнынъ намлы йигитлеринден бир чокъ къудалар кельселерде, Абий агъа «кызымдаа яштыр» деп, оларны кулерюзьнен къайтара экен.

Ырызлы Арзы къудалардан сакъланып юре экен. Даа якъында, ялыдаки чешме янында ресткетирген кескин бакъышлы, арслан къияфетли Гъаспралы Эмир-Асан адлы йигитни, бир кере коръсе де, асла хатырындан чыкъармагъан. Асла, онынъ ялы кенарына чыккып, денъизнинъ далгъаларына бакъып, далгъын-далгъын сейир этмесининъ себеби де шу экен. Гузель Арзынынъ къальбинде яш йигитке ашкъ, муаббет гултери ачылгъан.

Кунылерден бир кунь, Эмир-Асан Абий агъанынъ кызына къуда донатып йиберген, Абий агъа бирден-бир эвлядыны узакъ койге берип, асретлик чекеджегини тюшюнип, теренден кокюс кечирген. Лякин

¹ тайфасы — денъизджилиери манасында



бири-бирине муаббет беслеген эки яш къальбини бир-биринден айырмакъ олурмы? Абий агъа, сакъалыны къашыта-къашыта, сеvimли бир данесининъ гонъюлини къырмамакъ ичюн, разылыкъ берген.

Гузель Арзыны нышанлагъанлар. Нышан дуасы ве дост кызылары джыйылышып, нышан джыйыныт япылгъан. Къыш кечкен. Шень баарь кельген. Абий агъанынъ багъчасындаки тереклер кызы киби, чешит тюсте чечеклернен доналгъан. Дюльбер Арзынынъ янакълары баарь гуллери киби аллангъанлар.

Къурбан байрамы якъынлаша. Тойлар-дюгюнлер сыкълашып башлайлар. Бутюн кой шеньликлер ичинде гъаркъ ола. Арзынынъ тоюны да, байрамнынъ дёртюнджи куню япмагъа къарар бергенлер. Той якъынлашкъан сайын, Арзы ялыдаки чешмесинден, тугъанларындан, багъчасындан, догъып-оськен коюнден айырыладжагъыны хатырлап, къасеветлене экен.

О йылы, кучюк Мисхор койчиги учъ байрамны бир кереден япкъан: къурбан байрамы, баарь байрамы, бир де гузель Арзынынъ дюгюни. Ярашыкълы койнинъ шень яшлары ве кызылары дам тёпелеринде къоран тепип, «Ай варирач, варирач» тюркюсини йырлай, дамдан-дама манелер айтышып, явлукъ алып берише экенлер. Энгъ шень, энъ къалабалыкъ маалле, Абий агъанынъ яшагъан мааллеси экен. Мисхор коюнинъ сеvimли чечеги олгъан Арзы кызынынъ дамлы эвинде, аман-аман бутюн кой халкъы топлангъан. Узакъ койлерден, та Дерекой, Айвасылдан биле, сайгъылы Абий агъанынъ япкъан дюгюнине, пек чокъ мусафирлер оны сеvim-сайып кельгенлер. Ёллар, сокъакълар халкънен толгъан.

Бугуныки шеньлик, шамата чокъ олса да, Арзынынъ даима шень гонъю, бир тюрю бу шеньликни дуймагъан. Онынъ къальби сыжынтылар ичинде эзилген. Не ичюн олгъаныны, неден кельгенини Арзынынъ озю де билмей экен.

Акшам олгъан, орталыккы къаранлыкъ баскъан. Азаматлы Ай-Петри къаясы юкьугъа далгъан, къара чаршафкъа бурюнген,

Къой ве туварларны айдап кельген чобан къавалынынъ азиз сеси, акшамнынъ тынчлыгъыны бозгъан. Денгъизнинъ куньдюзги мавы юзю къараргъан.

Ал шали антерини кийген Арзы, отургъан миндеринден туруп, келин одасындан чыкъкъан. Сонъ кере оларакъ, озюнинъ къыйметли чешмеси ве денгъизнинъ ялысынен савлукълашмакъ ичюн, элине бахшыш гогюмини алып, фырлантысыны башына орытип кеткен. Денгъизнинъ кенарына ерлешип, далгъларнынъ чарпынмасыны, чешме сувунунъ шарылтысыны динълеген. Бу ерлерде кечирген татлы

балалыкъ девирини хатырлап, хаялға далған. Бу ерлерден, кызылык аятындан, баба юртундан айырыладжагыны тюшпонгенде, заваллы Арзынынъ козылеринден сыджакъ яшлар тѣкюльген. Лякин бу вакъыт, озюнинъ пешинден, онынъ эр бир адымыны, эр бир арекетини излеп тургъанларындан ич де хабери олмагъан. Заваллы кызы, гедженинъ къаранлыгында хырсызланырым деп, ич де шубеленмеген. Амма чалылар тюбю, оны къаравуллагъан, бир чокъ душманларнен толукъ экен. Озюни душманлар сарып алгъаныны, денгиз хырсызларнынъ атаманы, оны чешме артында беклегенини дуймагъан.

Арзы чешмеге келип, гюгюмини чешме тюбюне ерлештирген. Чешменинъ суву шенъ тюркюлеринен гюгюмнинъ ичине акъа экен.

Бирден, онынъ башы устюнде бир шей кыбырдагъан. Бириси, мышыкъ киби онынъ огюне сычрап тюшкен. Эки кюветли къол, бахытсыз кызычыкнынъ, индже белине сарылгъан. Аджы бир сес чыкваргъан, лякин шу саат агъызыны эки къол къапаткъан, башына чувал саргъанлар. Заваллы кыгчырмакъ дегиль, нефесини биле зорнен алгъан.

Хаин хырсызлар кыйметли авларыны омузларына атып, догъру гемилерине ёллангъанлар. Оларнынъ ёлбашчысы Али баба экен. О энъ сонъу, султаннынъ сарайыны яраштыра биледжек, озюне де буюк байлыкъ ве нам къазандыраджакъ киби, бир авнынъ эльге тюшкенине, пек сеvingен.

Бойле дюльбер бир кызыны чалмакъ, онынъ тоймагъа бильмеген, нефисхор къальбининъ энъ буюк бир эмели, умютсиз келип тюшкен.

Кызынынъ бир кере чыккъан адджы сесини эшиткен Абий къарт, бутюн дюгюн халкъынен бирликте ялыгъа чапышып кельгенлер. Лякин кеч къалгъанлар.

Али бабанынъ елькенли гемиси, артыкъ денгиз далгъалары устюнде чалкъана ве Арзыны узакъ Стамбулға алып кете.

Бутюн кой шенъликлерден вазгечип, къаралар кийип, бульбуль киби сёйленген кызычыкнынъ къарасыны туткъанлар. Эвельден шенъ тюркюлер сёйлеп акъкъан бол сувлу чешмеси де, бойле бир къоркъунчлы джинаеттен сонъ, яваш-яваш сувуны эксильтмеге ве энъ сонъу, козыашлары киби тамчы-тамчы акъмагъа башлагъан.

Ялынъыз, ялыда бир кере дюльбер Арзынынъ чалынмасына тамам бир йыл толгъанда, кене шу баарь акъшамында, ялыдаки чешменинъ суву бол-бол акъмагъа башлай экен. Тамам шу саатте, Къара денгизнинъ далгъалары арасындан бир денгиз анасы кучагындаки баласынен ялыгъа чыккъан. Ялыдаки чешмеге якъынлашып, сувдан янган адам киби, чешменинъ сумегине дудакъларыны япышгырып

ичкен сонъ, эллерины, юзюни ювган. Беяз эллеринен чешменинъ тапшларыны муаббетнен сыйпап, ялы кенарына ерлешип отурган. Денъизнинъ коклернен бирлешкен кениш юзюне бакъып, терен тюшюнджеге далган. Койге догъру дюльбер юзюни чевирип, ичини чекип, терен бир «ах» чеккен сонъ, текрар денъизнинъ далгъалары арасында гъайып олып кеткен.

Арадан бир къач йыл кечкен, Абий агъа къааринден ольген. Эслилер къартланганлар, яшлар эслилер сырасына кечкенлер.

Мисхор койюлери эр йыл денъиз анасынынъ къучагында балачыгынен ялыгъа чыкъкъаныны, чешмеден къана-къана сув ичкенини корип, пек къоркъуша экенлер.

Амма, онынъ ким экенини, не ерден кельгенини бильмей экенлер.

Кунълерден бир кунъ, Стамбулдан кельген базирганлар, о денъиз анасынынъ ким олгъаныны бойле анылаткъанлар.

Мисхорда, денъиз ялысындаки чешме янындан хырсызланган бахытсыз Арзы къызны, денъиз хырсызы Али баба Стамбулгъа кетирген ве оны догъру эсирлер базарына алып кеткен. Бу базардан, Тюркиенинъ паша ве бейлери гаремлерини яраштырмакъ ичюн, дюньянынъ эр тарафындан хырсызланьп, зорнен кетирильген къызларны буюк паралар берип ала экенлер.

Бу базарны, ара-сыра султаннынъ, озъ гарем агъалары да ёкълай экенлер. Бахытсыз Арзыны базаргъа кетирген вакъытта, султаннынъ гарем агъасы къызны корип, бегенген. Оны падиша сарайыны яраштырмагъа, танърыннынъ эр халифеси¹, пейгъамбер векили, султаннынъ ятагыны зийнетлендирмеге лаякъ танып, агъырлыгъы къадар алтын берип, алганлар.

Къызны падиша узурьна кетиргенде, пек макъбул корьгенлер, онынъ ичюн, Али бабагъа хазинеден буюк бахышлар берильген. Арзынынъ озюне де, бакъувджы ханым тайин олунган.

Алтынлар, йипеклер, ниметлер² ичинде гъаркъ олган ве султаннынъ озъ муаббетине наиль олган дюльбер Арзыны ич бир шей къуавандырмаган. Бахытсыз Арзы ватаньна, ана ве бабасына, Эмир-Асанына, ялы чешмесине олган асретинден сарарып-солган. Оны ич бир шей севиндирмеген, бир шей онынъ гонълони алмаган. Гаремде эр шейден эрек, эр кестен чет отура экен. Бир йыл ичинде олган балачыгъы биле, онынъ къырыкъ гонълони шеньлендирмей экен.

Севимли Къырымнынъ ялысындан чалынган кунюне, тамам

¹ халифе — ярдымджы

² нимет — ашайт байлыгъы

бир йыл толгъанда, Арзы баласыннен султан сарайынынъ денгизге бакъкъан къуллеси устоне чыкъып, озюни денгизге аткъан. Стамбул богъазынынъ кумюш тюс далгъалары арасында гъайып олып кеткен. Иште, о акышам да, Арзы денгиз анасы олып, кучагъындаки балачыгъынен Мисхор ялысындаки чешмеге биринджи кере чыкъкъан экен.

АЮВ ДАГЪ

Пек эски вакъытларда Къырымнынъ ялы боюнда, дюньяда даа инсанлар яратылмагъан бир заманда джын тайфасы, деген бир тайфа яшай экен.

Кийик, дагълы мемлекетге оларнынъ яшайышы пек агъыр, емеклери заметли, котерильмейджек киби кучъ экен. Булар алланынъ эмирлерине пек садыкъ, итаалы къальблерини нурландырмакъ ичюн ёллангъан шериятны тутат экенлер. Алла — пейгъамберлеримиз бизим мушкюль яшайышымызны енгиллештирер, деген умютнен яшай экенлер.

Бирликте ёрулмай чалышувы саесинде, джын тайфасы кесильмез дагъларны къырып багъчагъа чевирген, топракъларны сувармакъ ичюн арыкълар къазгъан, берекетли багъ, бостанлар етиштиргенлер. Бойле чалышып, олар яшайышларыны тюзете ве йыл-йылдан байлыкларыны арттырат экенлер.

Олар не къадар чокъ чалышсалар, о къадар да ёкълукъ ве итияджны енъгенлер. Раат омюр кечирмек, анджакъ озь эмеклерине, чалышувларына багълы олгъаныны яхшы анылагъанлар. Эгер чалышып отъмек къазанмасанъ, алланынъ бир тюрлю ярдым этмейджегини акъыллары кесе башлагъан.

Бу джын тайфасы, риваетке коре, инсанлардан да акъыллы экен. Вакъыт кечкен сайын, оларнынъ юреклеринде алланынъ бирлигине, шериятнынъ догърулыгъына шубе уянгъан. Кеттикче, олар алланынъ бинасына аз къатнамагъа, эксик ибадет этмеге башлагъанлар. Йыл-йылдан алла ёлуна берген фитир ве къурбанларыны эксильткенлер.

Аллагъа исян эткени ичюн, дженнеттен къувулгъан иблис шайтан исе, буны беклеп, тапамай экен. Аллагъа, итааттан чыкъа башлагъан джын тайфасыны даа зияде ёлдан чыкъармакъ ичюн фурсат беклеп тура экен. Иблис энъ сонъунда озюни джын: тайфасына пейгъамбер

оларакъ таныттыргъан. Олар артыкъ алланы терк этип, онынъ энъ буюк душманы олгъан иблиске седжде эте, ондан ярдым къыдыра башлагъанлар.

Иблис озюни дженнеттен къувгъан алласына чокътан берли кин беспеп, онъа эр фурсаттан файдаланып, бир яманлыкъ ялмагъа тырыша ве онынъ къулларыны итааттан чыкъармакънынъ ёлунда кезе экен. Алланынъ энъ догъру къуллары олгъан ве онъа инанып кельген, джын тайфасыны ёлдан чыкъаргъанына лек къувана экен. Иблис янгъы халкъны джесюр олмагъа, шеньлик ве зевкъ ичинде яшамагъа чагъыргъан. Оларгъа юзюмлеринден шарап сыкъып ичмеге, къарыларына ачыкъ кезмеге изин берген.

Аллау таля, иблиске бакъып, догъру ёлдан чыкъкъан тайфасына, оларны итааткъа кетирмек ичюн бир пейгъамбер ёллагъан. Пейгъамбер оларны янгъыш ёлдан вазгечтирмек, алланынъ бирлигини танытмакъ ичюн чокъ вааз, насиат этсе де, бир шей файда бермеген. О итааттан чыкъкъанларны ахретте джезнем азабынен къоркъутса да, иблиснинъ шериатындан вазгечтирип оламагъан. Джынлар оны пейгъамбер деп танымай, онынъ насиатларыны мыскылгъа ала, оны гевезе къартчыкъ деп, эриштире экенлер. Иблиснинъ огреткен шень-зевкълы ёлундан кеткен джын тайфасы, пейгъамберни озъ мемлекетлеринден къува, ны аштан, сувдан мухрум этип, кезген ёлуна таш ата экенлер.

Алланынъ ёллагъан пейгъамбери душман иблис тайфасынынъ элинден гизленип, зорнен къуртулып, дагъларгъа къачкъан.

Къыйналмакътан джаны янгъан пейгъамбер, юксек бир дагънынъ телесине чыкъып, аллагъа шикъет этмеге башлагъан. Пейгъамбер къыркъ кунъ, къыркъ гедже намазлыгъындан тышмей, алладан озюни къувгъан, динден чыкъкъан джын тайфасына къатты джеза, узерине бинъ бир тюрлю беля ёллап, ер юзюнден оларнынъ тамырыны джоймасыны истеген:

— Я рабби, сен оларгъа ойле бир беля бер ки, динден чыкъкъан къулларынгъа бир ибрет олсун! — деп, дуа эткен.

Башкъа тарафтаки къулларынен огърашкъан алла, пейгъамбернинъ бу дуа ве ялварышларыны эшитмеген. Ниает, къыркъ биринджи куню пейгъамбернинъ гуръ давушыны эшитип, джын тайфасына не сой къуветли джезалар бермек керек олгъаныны тышюнмеге башлагъан.

Алланынъ, догъру ёлдан чыкъкъан къулларыны джезаламакъ, ичюн, эбедий бузларнен къаглы, зынджырларнен багълы бир Буюк Аювы бар экен. Алла буны къаглангъан бузларындан азат этип, зынджырларыны чезип, шериатны унуткъан джын тайфасынынъ, узерине юремекни эмир эткен.

Буздан, зынджырлардан азат олгъан, алланынъ интикъамджысы,

бу Буюк Аюв дерья-денъизлерни кечип, джын тайфасынынъ яшагъан Кырым ялы боюна кельген. Джын тайфасынынъ, куньбатыдан биринджи кою олгъан Форос янындаки Сарыч бурунъна кельгенде, Буюк Аюв денизден чыкъып, къарагъа аякъ баскъан. Онынъ дагъ киби балабан кевдеси пек къоркъунчлы ве агъыр экен. Устюндеки тюкю де сыкъ чамлыкъкъа бенъзей экен.

Буюк Аюв денъизден чыкъкъанда, ойле далгъалар, фуртуналар къопкъан, атта ялыдаки бир чокъ койлерни денъизге ювып алып кеткен. Алланынъ белясы-интикъамджысы Буюк Аюв къарагъа аякъ басып, ялынен юрге башлагъан. О, озъ агъырлыгъынен ялыда расткетиргенини ура, йыкъа, дагъларны дарма-дагъын эте, кескин, сюрю тырнакъларынен топрагъыны къопарып аткъан ерлерде, балабан дерелер мейдангъа кетире экен. Аювнынъ азаматлы кевдеси алтында ялы бою топракълары денъизге тайып кете, эти ашанып, тек къабургълары къалгъан огюз киби олып къала. Таш къаялар да, бу юкнинъ астында даяналмай парча-парча олып, гурылеп йыкъыла, заваллы джын тайфасынынъ койлерини озю тюбуне комип таплай экен.

Ялы бою бу азаматлы кевденинъ агъырлыгъы алтында инълей, къалтырай, койлер, шеэрлер йыкъыла, дагъыла. Дагълар ерлерини авуштыра, эр ер тюрлене. Тегиз ерлерде учурумлар, сарп къаялар пейда олалар. Топракълар аджайип къатлар алында бурюше, майыша экен. Бу къиямет ичинде, джын тайфасынынъ буюги-кичиги гъайып олгъан. Алланынъ шериатыны унутып, иблиске табынгъан тайфанынъ меркезлери олгъан ерлерни, алланынъ дешетли белясы Буюк Аюв тырнакъларынен парчалагъан.

Ернинъ теренликлериндеки къайыкъларны къазып чыкъарып, дарма-дагъын этип, балабан таш йыгъынлары мейдангъа кетирген. Бойлеликнен Ореандада, Алупкада, Симеизде, Кучюк койде Аювнынъ демир тырнакълары астында балабан къая йыгъынлары мейдангъа кельгенлер.

Не аналарнынъ, не балаларнынъ козь яшлары, не де бутюн джын тайфасынынъ баш эгип ялваргъанлары — ич бир шей, интикъамджы Буюк Аювны токътатып оламагъан. О не къадар йыкъса, даа зияде йыкъмакъ истей, интикъам дуйгъусы даа зияде алевлене экен. Шимди Ялта олгъан ерде, асый джын тайфасынынъ энъ буюк ибадет ханелери бар экен. Энъ буюк папазлар анда иблисининъ алтын суретине ибадет эте экенлер.

Бу ерге кельгенде Буюк Аювнынъ ачувы даа зияде атешленмеге башлагъан. Интикъам дуйгъусы артыкъча арткъан. Аллагъа инанмагъанларнынъ ятагъыны тюбю-темелинден йыкъмагъа къаст

эткен. Аюв, о ернинъ ташыны, топрагыны сипип-сипирип аткъан. Лякин, о ернинъ тосюни денъиштирейим деп, ортасына терен бир чукъур ачкъан.

Къудретли янбашларыны дагынынъ эки тарафына тиреп, ойле бир итеген ки, къоджа дагылар ялыдан беш вёрст узакъкъа чекильгенлер.

Бир вакъытта юксек дагылар олгъан ерлерде терен джарлар, учан сувлар мейдангъа кельгенлер. Бутюн дюньягъа нам берген иблиснинъ азаматлы ибадетханелеринден эсер биле къалмагъан.

Бойледже, эбедий бузлар арасында тонып тургъан, сувларгъа алышкъан Буюк Аювнынъ мазалы тени ер юзюнде буюк бир зорлукъларнен аякъларыны алып юре экен. Иблис халкъынынъ ибадетханелери йыкъылгъан, ернен эксан этильген сонъ, Буюк Аювнынъ ачувы бираз тынчлангъан. Ялыларны эшип, йыкъып кетмекни Аюв девам эттирген.

Кете, кете Буюк Аювнынъ къаршысына чечеклернен донатылгъан Партенит тюзлиги расткельген. Бу тюзлюктеки дюльбер тёпечиклер, зенгин, ярашыкълы орманлар, шеньликнен шувулдап акъкъан озенчиклер, кербар киби йылтырагъан юзюм багълары, зумрут киби ешилъ чайырлар, Аювнынъ биле къатты мермер юрегини йымшаткъан. Интикъамджы Аювнынъ кельгенини корип якъынлашкъан олюм къаршысында титреген Партенит тюзлюги халкълары, онынъ къаршысында эгиллип, агълап-сызлап къаршылагъанлар. Оны мерхаметке кетирмек ичюн, онынъ огюне аналар озь балаларыны узата, яшлар исе, къоркъудан титреген нишантыларыны гизлей, олюм джезаларыны беклей экенлер. Интикъамджынынъ къан ичиджи юреги бу корюнишнинъ къаршысында йымшагъан, джын тайфасыны гъайып этмек ичюн алла ёлунда баягъы огърашкъаныны хатырына кетирип токътагъан. Буюк Аюв озюнинъ ялы бою эппейи ёл юрип ёрулгъаныны ве ёргунлыкътан къуругъан богъазыны слатмакъ истеген. Буюк Аюв юзюни денъизге догъру чевирип, ог аякъларынен сувукъ денъиз сувуна кирген. Озь алласына эгиллип еди кере седжде эткен. Къоркъунчлы башыны денъизге батырып, чокъ вакъыт сув ичкен. Денъиз, онынъ агъызы тюбюнде шапыра, копюре, богъазындан селлер киби сувлар ичине акъа экен. Аюв о къадар сувсагъан экен, йылларнен ичсе де тоймагъа бильмеген. Асый джын тайфасына олгъан ачувы даа къанмагъан алла, Буюк Аювнынъ сувдан чыккып, ёлуны девам этмесини, Партенит тюзлюгиндеки койлерни йыккып, халкъны да гъайып этмесини эмир эткен. Буюк Аюв алланынъ бу эмирине къулакъ асмай, сув ичмекни девам эттирген. Мукъаддес эмирни ерине кетирмеге аджелелик этмеген Аювгъа алла лянет эткен:



— Сен меним буюк бир интикъамджым эдинъ. Шимди меним энъ буюк асыгъ къулум ол! Келеджеклерге бир ибрет олмакъ ичюн, тургъан ерингде къатып къал! — деген.

Алланынъ лянети Буюк Аювнынъ мазалы тенини таш кестирип, къуветли янбашларыны да учурымларгъа чевирген. Онынъ юксек аркъасы кениш бир тёпе алыны алгъан, денъиз ичиндеки балабан башы кескин учурумларгъа чевиритьген, сыкъ юнъу де кесильмез эмен агъач дальна кельген. Буюк Аюв, Аювдагъ олгъан ве эбедий къатып къалгъан. Аювнынъ кенъиш агъызы къаршысында анджакъ Къара Денъиз шувулдай. Шимди биле, ойле келе ки, санки о кене сув иче. Онынъ ичюн денъизджилер бунынъ агъызы якъынларындан аля бугунъ биле кечмеге къоркъалар, о ерден сакъына-сакъына айланып кечелер.

Арадан чокътан-чокъ юз йыллар кечкен сонъ, Буюк Аювнынъ, пек къоркъунчлы келишинден артыкъ ялы бою тынчлангъан, раатлангъан. Дагълар оськен, чешит айванлар догъгъан, инсанлар пейда олгъанлар. Аюв дагънынъ этрафларында: Гурзуф, Къызылташ, Куркъулет, Дерменкой, Партенит койлериде къурулгъан. Бир вакъытлар Аювдагъ устюнде яшамакъ истегенлер олгъан. Олар, онынъ устюнде буюк кильсе ве бир де къале къурып ер-лештиреджек олгъанлар. Лякин, англашъыла, ишлери фена олгъан. Аювдагънынъ устюнде кимсе яшап оламагъан. Чюнки онъа алла лянет эткен.

АЛТЫН БЕШИК

Пек эски заманларда ер юзюнде, дженнеттен къувулгъан Адем даа яратылмагъан бир вакъытта, Къырымда инсан десенъ, инсан дегиль, рух десенъ, рух дегиль, джын тайфасы адында нелердир яшай экен.

Джын тайфасы бир къач джыныс экен. Бир къысмы ерлернен коклерни яраткъан аллагъа ибадет эте, онынъ бирлигине инана. Бир къысмы да онынъ бирлигине иман этмеген джын тайфасы экен.

Къырым дагъларынынъ бир тарафында ялы бойларында аллагъа къуллыкъ эткен алла джынлары яшай экен. Олар алланынъ эмирлерини тутта, пейгъамберлернинъ суннетлерини иджра эте, беш вакъыт намаз къылып, рабби таянынъ бергенине шукюр эте экен.

Къырым дагъларынынъ о бир тарафында да джынлар яшай экен. Олар алланынъ бирлигине иман этмей, эмирлерини тутмай, алланынъ



душманы олгъан иблисиниъ ёлундан кете, онынъ эмирлерини тута экенлер. Иблис озюни оларгъа алла деп таныткъан, о тайфаны ах ёлундан саптыргъан.

Алла джынлары багълар, багъчалар етиштирип, тары сача, кетен токъуй экенлер. Иблиске инангъан джынлар кийик дагъларда яшай, къой асрай, къараджа авлап кечине экенлер. Бу эки джын тайфасынынъ эр экисининъ де ханлары бар экен. Булар озъ арасында ичте узлашмай, сыкъ-сыкъ дженк эте. Бири-бирлерининъ топракъларыны тутуй ала, туварларыны айдап кетелер. Чёлъ ишлерине кедер кетире экенлер. Бундан себеп, араларында пек къанлы дженклер ольш, бири-бирлерининъ койлерини, шеэрлерини якъа, багъ-багъчаларыны харап эте экенлер. Бир чокъларыны ольдюрип, бир къысмыны да эсир ала. Мемлекетлерине кетирип мерхаметсиздже ишлете экенлер. Алла джынлары иблисиниъ джынларына нефрет эте. Иблис джынлары да алла джынларыны бир къашыкъ сувгъа богъмагъа ашыкъа экенлер. Бу тайфаларнынъ ханлары да озъара душман экенлер. Бири-бирини къангъа богъмакъ, интикъам алмакъ ичюн фурсат беклей экенлер.

Арада олгъан дженклерде чокъусы иблис джынлары енъе экен. Чюнки, олар дагъларда яшагъанларындан даа джесюр, даа атик, чыдамлы айдамакъ экенлер. Олар авджылыкъта алланынъ джынларындан даа уста экенлер. Алла джынлары исе, топракъта чалышып кельген халкъ олгъанындан, силя къуллазмагъа алышмагъан, эвлеринден чыкъмагъа къоркъкъан, дженк айнеджиликлерини билъмеген яваш, тынч бир тайфа экенлер.

Иблис тайфасынынъ пек дюльбер, джесюр, кескин яш бир огълу бар экен. О, даа севги не олгъаныны билъмей экен. Чюнки онынъ мемлекетинде, онынъ яш къальбинде севги атешши якъа биледжек дюльбер, онъа ляйыкъ бир къыз даа етишмеген. О эджебий мемлекеттеки гузеллер акъкъында сёйленген масалларны севе ве джан къулакънен динълей экен.

Бу хан огълунынъ, алла джынларындан олгъан ханнынъ сарайында буюген бир эсири бар экен. Оны дагъда къызылчыкъ джыйгъанда хырсызлагъан экенлер. О пек акъыллы, намуслы, билиджи олгъанындан, къартайгъан сонъ, хан огълуны тербие этмекни эманет эткен. О ханнынъ огълуна чешит тюрлю усталыкълар, окъ атмакъны, юксек ерден атламакъны, аткъа минмекни, тез чапмакъны огреткен.

Бу къарт эсир, тербиелеген баласыны пек севе. Онъа башкъа джынларнынъ яшайышлары, дюльбер къызлар акъкъында эр акъшам масаллар айта экен. Къарт эксери вакъыг, эсирликте олгъан башкъа ватандашларынен гизлидже корюше, олардан озъ мемлекети

акъкъында тазе хаберлер ала экен. О, хан огълуна озь мемлекети ханынынъ дюльбер бир кызы олганыны айта. Мемлекетнинъ бульбуллери дал-далдан учып, онынъ дюньяда мисли олмагъан дюльберлигини мактап йырлай экенлер.

Хан огълу, душман эсирлеринден хан кызыны корьгенлерни звине тоглап, олардан онынъ гульге бенъзеген янакълары, къалем киби индже къара къашлары, йылдызлар киби парылдагъан сия козьлери, кираз киби кырмызы дудакълары, толкъун киби яйылгъан гурь сачлары акъкъында сорай экен.

Хан кызынынъ дюльберлиги акъкъында эшиткен сёзлери вастасынен, онынъ акърансыз гузеллигини козь огъуне кетире ве юреги севги атешинен алевлене экен. О, хан кызыны бир керечик корьмек, онынъ агъызындан бир лафчыкъ эшитмек ве онъа Кырымда сизинъ киби дюльбер ёкъ, деп айтмакъ авесинен яна эди. Онынъ бутюн акълыны, фикирини анджа о къомшу дюльбери сарып алгъан, анджа бир онынъ хаялынен эглене экен. Оны не къураджакъ авы, не де учып тургъан къушларгъа нишан алув ырышлары, не де кийик джойрюк атлар узеринде атешли-къошувлары, не де кылычнен дженк оюнлары, не де шенъли къонушмалар, чалгъы-чагъаналар, не де эски дженкчилернинъ айткъан масаллары, не де къарт анасынынъ хан огъуллары акъкъында масаллары — ич бири онынъ ашкъ толгъан къальбини къувандырмай экен.

Хан огълунынъ чырайыны сия булутлар къаглап алгъан, кимсенен лаф этмей, эр даим тошпонджели, аштан-сувдан вазгечкен, ялынъыз бир озю ашкъынынъ атешинде янып къавурыла экен. Озь бабасынынъ энъ нефретли душманынынъ кызыны севгенини, бир кимсеге айтмагъа джесарет этмеген. Хан огълуны, бу онъалмаз дерт сарарткъан-солдургъан. О аякъта бир кольге киби кезе экен. Гизли севда, оны иште, бу алгъа кетирген.

Къарт хан, огълунынъ бу алыны корип, абдырагъан. О огълундан бу денъишмелернинъ себеплерини сорап аныламагъа не къадар тырышса да, бундан бир шей чыкъмагъан. Огълан бу соравларны, мезар киби сессиз, джевапсыз къалдыргъан. Хан мемлекетнинъ энъ уста ырымджыларыны тоглап, йылщызнамеге бакътыргъан, чешит тюрлю ырымлар яптыргъан, козь назардан сакълап бир чокъ адамларнынъ тюслерини алып тютетселер де, ич бир тюрлю чаре огъланнынъ дердине буламагъанлар.

Хан озь мемлекетининъ энъ гузель оюнджы кызларынынъ къамиль оюнларынен, джуджелернинъ чакъаларынен давул-зурна, чешит тюрлю чалгъы-чагъананен эглендирмек истесе де булар огълангъа



ич бир тесир этмеген. О кене эскиджесине чырайы сытыкъ, гъамлы бир алда кезе экен. Хан баба, огълунынъ гизли сырыны, бир тюрлю анъламакънынъ ёлуны буламагъан. Энъ сонъ, озъ янына энъ буюк хызметчисини чагъырып, огълундаки гъам, кедернинъ себеплерини мутлакъа бильмек ишини авале эткен. О, хан огълунынъ эр бир адымыны, лафыны излеп кезсе де, онынъ дердинден бир шей анълап оламагъан. Энъ сонъу, бир акъшам юкъугъа далгъан огъланнынъ янына барып, къулагъыны онынъ агъызына якъын тутып динълеген вакъытта, бир чокъ тюрлю севги сёзлерини ве «ах, Зера, Зера!» деген адны эшиткен.

Буюк хызметчинен, хан чокъ вакъыт бу аднынъ кимге аит экенини тюшонселер де, бир тюрлю фаркъына бармагъанлар. Бутюн мемлекетни соратып чыкъкъанлар. Лякин, ич бир дане «Зера» адлы къыз тапылмагъан. Хан намлы фалджыларны тоглап, фал ачтыргъан.

Къарт фалджынынъ бириси, Зера адлы къызынынъ буюк денъизнинъ ялысында япагъаныны тапып айткъан. Алланынъ джынларындан, эсирлерден сорап, онынъ энъ осал душманы олгъан ханнынъ къызы олгъаныны анълагъанлар. Къарт ханнынъ къоркъусы, артыкъ ачувгъа ивирильген. Огълунынъ бу севгисинде озюнинъ таджына, тахтына, мемлекетине алласы иблиске къаршы бир хиянетлик корьген. Хан огълуна о къызынынъ адыны анъмакъ дегиль, затен онынъ акъкъында тюшонмекни биле ясакъ эткен. Эгер ондан вазгечмесе, лянет этеджегини, атта къаранлыкъ зиндангъа атаджагъыны сёйлеген.

Лякин огълунынъ юреги, ойле къоркъутувардан севгилисининъ ашкъындан вазгечеджек юреклерден дегиль экен. Бабасынынъ ачувы сакинлешмегенини корьген огълу, къатты суретте, гизлидже баба юртундан къачмакъны къарарлаштыргъан. О ашкъ олгъан хан къызыны дюнья козюнен бир корип, хаста юрегини сагъылтмакъ фикирине тюшкен. Лякин къаравул къоюлгъан бекчилерни насыл алдатаджагъыны чокъ тюшонген. Онынъ бу тюшонджелерини ерине кетиреджек садыкъ къарт даясындан башкъа кимсе ёкъ экен. Къарт дая оны озъ баласы киби севе, онынъ эр бир истегини япмагъа азыр тура экен. Къарт эсир, бир чобан урбасыны тапып кетире. Зифт къаранлыкъ, ягъмурлы бир геджеде хан огълунынъ ятагъына бир баш ясап къоя, къияфетлерини денъиштирип, бир усулнен къаравлагъан бекчилернинъ янындан кечип кетелер. Бир чокъ кёр сокъакълардан кечип, шеэрнинъ къале диварына келелер. Ялынъыз онъа белли олгъан ер асты, гизли ёлнен дагъ ичине чыкъа ве бир къобагъа келелер. Мында чыкъкъан сонъ, къачакълар бир дакъкъа токътап, бир нефес алалар. Сонъ кене де къоркъунчлы, сарп ёллардан алынъыз кийик

эчкилернинъ, къараджаларнынъ авджыдан къоркъмай сербест юре биледжек, ёлджу аягъы басмагъан сыкъ дагълардан кечип, ёлсыз-иссиз къаялардан атлап, тырмашып юрьгенлер.

Бойледже, олар бутюн гедже дагънынъ тёпесине тырмашып, саба ачылгъанда яйлянынъ устуне чыкъкъанлар. Эки ханлыкънынъ сынътыры олгъан ер бом-бош экен. Мында эр эки ханлыкътан да кимсе корюнмеге къоркъа экен. Бойле олсада, къачакълар кунъдюз юрьмектен къоркъып, акъшамгъа къадар къаранлыкъ бир къоба ичинде беклеп тургъанлар. Қъаранлыкъ баскъанынен олар, гизиликнен, яйладан тюшелер. Алла джыңларынынъ бекчи постларыны, авджы чалашлары, чобан хошлары арасындан гизленип кечерек, чобан копеклерининъ уджумындан сакъыныш, сабагъа якъын, ялы бою койлерине тюшкенлер.

Баба юртундан, озъ ватанындан къачмакъ къолай кельмеген. Дуюлмай, иссиз дагълардан кечип, душман мемлекетине кирмек де къолай бир иш дегиль экен. Лякин пек чокъ бекчилернен сарылгъан хан сарайына кирмек, онынъ дюльбер къызыны коръмек даа да зор экен. Хан огълу сарайгъа кирмек ичюн бинъ-бир тюрлю чарелер арасада, ич бири файда бермеген. Бекчилер оны къува, бекчи копеклер заваллынынъ устю-башпын йырта. Юксек диварлар, демир къапъылар онынъ ёлуна сед чеке экенлер.

Яш огълан къаарълене, севгилисининъ юзюни корип оламагъанына пек зияде окюне экен. Қъарт даясынен экиси, мыглакъа сарайгъа кирмек, эмелини ерине кетирмек ичюн бир айнеджилик тюшонелер. О вакъыткъа къадар эшитильмеген иляилер, къасиделер эзберлемеге башлагъанлар. Чокъ вакъыткъадже бу тюркюлерни эзберлеген сонъ, дервиш къияфетине кирип, эр кунъ саба хан сарайынынъ къапъысына бара, алланынъ буюклигини ве ер юзю къалифеси — ханнынъ девлетини макътап, гуръ сесинен иляилер йырлай экен. Яш дервишнинъ дюльбер, яныкълы сеси, тюркюсиндеки риджа ве эзгилери энъ сонъ хан къызынынъ къулагъына барып ете. О эр кунъ белли вакъытларда сарай къапъысына якъын келип, гизиликнен дервишлернинъ яныкълы, дюльбер иляилерини динълеп къайта экен.

Бир кунъ гузель Зера бабасы-хангъа ялвараракъ, дервишлерге сарай джамисине келип гузель иляилерини йырамалары ичюн изин истеген.

Дервишлернинъ иляилери ханнынъ да юрегине келишкенинден, къызынынъ хатирини къырмай, сарай джамисине кирмелерине изин берген.

Иште мында геджелернен юкъусыз къалып, хаяллангъан севгилисини дюнья козюнен биринджи кере коръген. Шашкъанындан



озюни джоя башлагъан. Къаршысында тургъан мелек, эр тюрлю тюшондженинъ тышында, гузелликте мисли олмагъан, хаял эткенинден къат-къат арткъач бир дюнья дюльбери экен.

Хан кызы, Зера да иляилерини динълеген яш дервишнинъ дюльбер, гуръ сесинден башкъа, ямавлы факъыр урбанен сарылгъан ярашыкълы, индже белини, ай киби юзюни, шаин бакъыпшыны, атик козылерини, джесюр турушыны эслеген.

Арадан бир къач вакъыт кечкен. Дервишлер эр кунъ сарай джамисинде иляи сёйлемек ичюн келе кете экенлер. Яш дервиш сарай азбарында ялынъыз бир иляи сёйлемекнен къалмай. О окъ атув, нишан алув, куреш, къошув ярышларына да къатыла, эр ерде, эр вакъыт биринджиликни ала экен.

О мемлектнинъ батырларындан, ич бири къуветлиликте, атикликте, нишанджылыкъда бу яш дервишке акъран кельмей экенлер.

Хан ве кызы Зера, бу дервиш къыяфетининъ астында озь мемлекетини ташлагъан бир асылзаде бардыр деп, шубеленмеге башлагъанлар.

Арадан бир къач айлар кечкен сонъ, бир кунъ экиси корюшип, бири-бирлерине юреклерини ачкъанлар. Къарт падиша буларнынъ риджаларыны ред этмеге ёл тапмай, эвленмелерине разылыкъ берген. Хан огълу, хан кызынынъ динини къабул этип, дервиш урбасыны алып, асылзаде къыяфетинде нишанлысынынъ узурьна кельсе де, асыл неслини, къайдан кельгенини гизлеген.

Бир йыл дегенде, ханнынъ кызы Зера алтын сачлы бир балачыкъ багъышлагъан. Буны корьген къарт хан, озюни пек бахытлы къуллардан эсап эткен. Къальби севинчен толгъан хан, торунына баба-эдждаттан асабалыкъ къалма алтын бешикни багъышлагъан. Онынъ союздан кельген бутюн ханлар балалыгъында бу бешик ичинде асралгъанындан, о мукъаддес таныла экен.

Бу бешик темиз алтындан ясалгъан, филь тишинен, къыгметли эльмаз, зуберджет, зумрут ташларнен пек усталыкънен сырмалангъан экен. Бешик саллангъанда, озьлюгинден шырыкълы бир сеснен «Айненни» торкисини йырлай экен. Дюльбер Зера озь баласыны бу бешик ичинде юкълатмагъа башлагъан.

Кель вакъыт, кеч вакъыт хан кызынынъ ислям динини къабул эткен бир хан огълуна никълангъан хабери, иблис джын тайфасы ханлыгъына да барып етишкен.

Хан чокътан берли гъайып олгъан огълуны къыдырса да, изини тапмай экен. Бекчилерни асып-кессе де, бир чокъ фалджыларгъа фал ачтырса да, огълунынъ къайда олгъаныны бир торлю огренип

оламагъан. Энъ сонъу хан, огълунынъ дагъларда олип къалгъанына къарар берген. Огълунынъ, душман олгъан ханнынъ къызына эвленмектен исе, бойле олюмнен ольмеси даа да хайырлыдыр деп, озъ гонгъюни ала экен.

Душман ханнынъ сарайында олгъан никяны, къызындан бала догъгъаныны эшиткенде, ханнынъ къарт юреги шубе атешлери ичинде ялмагъа баплагъан. О, душман мемлекетине гизли адамлар ёллап, ханнынъ къызына эвленген яшнынъ ким экенини огренип кельмелерини эмир эткен. Кеткенлер, керчектен де душман динини къабул этип, душман сырасына кирген ханнынъ гъайып сайылгъан огълу олгъаныны анълап кельгенлер.

Буны эшиткен ханнынъ, бабасына, ватанына, динине хиянет этип, къачып кеткен огълуна нисбетен ачувы буюген ве алевленген. Душман ханнынъ къызына эвленип, ондан сары йылан етиштирген, иблиснинъ дининден дёнген огълуна къаршы олгъан ачувы кеттикче атешленген. О, огълуны догъру ёлдан сарптыргъан бу алланынъ джын тайфасынынъ ювасыны, кокюнден, тамырындан сёкюп атмагъа, хаин огълуны да талгъа асып ольдюрмеге къатты къарар берген.

Хан бутюн улемасыны чагъырып диван къургъан. Оларнынъ югюне озъ макъсадыны къояракъ, душман мемлекетини къангъа богъмакъ, огълунынъ динге, ватангъа япкъан хиянетлигининъ интикъамыны алмакъ истегенини сёйлеген. Улемаларнынъ, бу иште онгъа ярдым этмелерини сорагъан. Олар бунынъ уджунда ягълы къуйрукъ олгъаныны дуйгъанларынен, ханнынъ ачувыны даа зияде арттырып, озъ аскерлерини бермеге ишандыргъанлар.

Иблиске тапынгъан ханнынъ ордусы дагълар ичинде топланып, чадырлар къургъанлар. Джын улемалары тарафындан къандырылгъан, къутуртылгъан ханнынъ атешли сёзлеринен алевлендирильген аскерлер, душман топрагъына апансыздан уджюм япкъанлар. Еди яз, еди къыш дженк эткенлер. Къан, озен киби акъкъан. Атларнынъ аякълары алтында ер инълей, дагъдан тюшкен душман, джанаварлар киби уджюм этип койлерни, шеэрлерни йыкъа экенлер.

Алланынъ джынлары исе, озъ ватанларыны, бала-чагъаларыны, къартларны къорчалавда, озьлерининъ бирер батыр олгъанларыны косьтере экенлер. Къарт душманнен куреште, хан озъ аскерлерининъ башында турып, чарпышкъан. Джесюр йигит киеви де, айры бир орду башына турып, озюнинъ янгы ватаны, озъ къадыны, баласы огърунда душман ордусынен къарамандже дженклеше, эр вакъыт аскерлерининъ огюнде, биринджи сырада, энъ къоркъулы ерлерде уруша экен. Дюнъки достлары олгъан, душман аскерлерининъ устуне арслан киби атыла экен.

Языкъ ки, олжумден къоркъмаз, атештен сакъынмаз адам, онынъ ордусында ялынъыз бир дане экен. О эр ерде булунамай, эр ерге имдаткъа етишип оламай экен. О бир ерде енъсе, башкъа бир ерде айдут дагълыларнынъ къутургъан копек киби уджумлерине даяналмай, сыра бозула, аскерлер кери чекиле экенлер.

О арслан киби, бир болжук аскернен душманнынъ чадырыны уджум этип, ичерсине далгъан бир вакъытта, янындаки аскер болжуклери даяналмай кери къачмагъа юзь туткъанлар. Бундан фейдалангъан душман, оны къолайсыз бир дере ичинде сыкъыштыргъан. Душманнынъ битмек-тюкенмек бильмеген аскери, турмай келе экен. Юксек къаялардан бинълернен окъ, таш парчалары, ягъмур киби ягъгъан. Бир даа, бу ташлардан бир данеси, о буюк къараманнынъ манълайына тийип, оны бир нефесте ерге серип къойгъан. Бу таш, хаин, залым бабасынынъ элинен атылгъан таш экен.

Севгили ёлбашчысыны гъайып эткен орду, душманнынъ уджумине даяналмай, бозулгъан ве бутюнлей ёкъ этильген. Ольдюрилъген хан огълу янына, онынъ садыкъ даясы, сырдашы, къарт да серильген. Бутюн джынлар арасына дешетли бир къоркъу тюшкен.

Артыкъ къаршы турмакънынъ дегиль, анджа къачып къуртулмакъны тюшюнгенлер. Кинлери къабаргъан джын аскерлери, ярдымсыз къалгъан мемлекетнинъ ичине сель киби акъып, койлерни, шеэрлерни йыкъкъан ташлагъанлар. Къаршыларына расткельгенлерни аскъан, кескен, догърагъанлар. Таш устюнде таш къалдырмагъанлар. Чечек киби донангъан ялы боюны къаранлыкъ, иссиз бир сахрагъа чевиргенлер. Эсирликке алынгъанлар озылерини бахтлы сая экенлер, чюнки оларнынъ ич олмаса, джанлары сагъ къалгъан. Къалгъанларыны, бала-чагъагъа баргъандже, къыргъанлар.

Бичаре джынлар къайда къачып къуртулсынлар? Башкъа мемлекетке къачып къуртулмакъ ичюн, денъизде гемилери де ёкъ экен. Дагълардаки къалелери душман элине кечкен. Бутюн ёллар, душман мемлекетлерине барып чыкъа экен. Кимсе ичюн къуртулмагъа ёл, имжян къалмагъан. Джынларнынъ ханы, къызы ве торуны къалып, бугунги Алупка олгъан ерде, сонъ къуветини сарф этип, арслан киби курешкен. Чокъ вакъытлар, душман аскерлери оны эльге кечирмекнинъ чаресини къыдыргъанлар. Энъ сонъ, оны темелинден йыкъмакъ ичюн, бир чаре тапкъанлар. Ай-Петри яйлясынынъ тёпесине чыкъып, ондан пек балабан къаяларны къопарып, ашагъа юварлатып, хан сарайыны дарма-дагъын эткенлер. Душман аскери сарайнынъ устюне о къадар чокъ таш юварлаткъан, атта ер юзюнде сарайдан эсер биле къалмагъан. Онынъ ерине, бугунъки «хаос» деп

адландырылгъан, балабан таш йыгъымлары мейдангъа кельген. Ай-Петриден биринджи къаялар тюшкенде, сарайнынъ артыкъ йыкъыладжагъыны корьген къарт хан къааринден яна-йыкъыла, гизли ер асты ёлунен исар къаясындаки къалеге авушкъан. Бичаре хан, озюнен берабер къанлы козьпшларыны теккен къызы Зеранен торуныны да алгъан. Битмез-тюкенмез байлыкъларындан, ялынъыз энъ къыйметли, баба туюсу олгъан, алтын бешикни алгъанлар. Заваллылар, пек буюк замет ве мешакъатнен, ер тюбю ёлунен къалеге догъру юрьгенлер. Бу ёл, тёпеден гизли бир къобагъа чыкъа экен. Ер тюбю ёлунен къапыгъа якъынлашкъанда, бир вакъытлар душмангъа къоркъу берген къалесини, Ай-Петриден юварлаткъан ташларнен ерексан этильгенини корьген хан, къааринден янгъан-якъылгъан.

Залым душманлар оларны бу гизли ерде корьмейджек, ольдюрмейджек, эсирликке алып оламайджакъ, лякин о бичарелер ичюн гизли къоба, къуртулыш оладжакъмы я?

Бутюн ерлерни харабе алына чевирген, эр ер олюлернен толгъан, кимсе къобанынъ агъызыны ачып, оларны къуртарып оламайджакъ. Ич бир ярдымсыз къалгъан бахытсызлар, бу къобанынъ ичинде ачлыкътан джан чекишип ольгенлер. Оледжекте, къарт хан алтын бешикнинъ узерине ойле бир ырым япкъан, бешик инсан козюне корюнемз бир алгъа кельген.

Риваетке коре, шу алтын бешик бу куньге къадар къобада сакълы тура экен. Анджа, базада бир къуветли фуртуна эскенде, ель къобанынъ ичине кире де, бешикни тепрете ве бешик яваштан агъыр эзгинен, агълатыджы бир сеснен айненни тюркюсини йырлай экен. Чокъ адам исар къобасына кирип, ичиндеки алтын бешикни эльге кечирмеге чалышкъан, лякин оны кимсе тапып оламагъан. Бу адамларнынъ базылары, исардан ашагъы йыкъылып, парча-парча олгъан. Базы бирлери, сагъ къайтсалар да оларны джын чарпкъан. Олар, я омюрлик къыйыш агъыз къалгъанлар, я эллери, аякълары топлангъан, я да делиргенлер.

Къарт хан бешикни пек къатты ырымлагъан. Бешикнинъ тылсымыны бильмеген, оны алып оламаз. Бу тылсым, озь бабасынынъ элинден ольген ханзаденинъ арслан къальбиндеки севги киби, сёнемек бильмеген, къоркъу бильмеген, сынъыры олмагъан муаббет атешинен янгъан, бир къальбке малик олгъан адамгъа ачыладжакътыр.

АЙДАМАКЪЛАР КЪОБАСЫ

(Къызыл-Таш эфсанеси)

Узун къыш акъшамлары баджадан ель сызгыргъанда, къутурган денгиз киби окюргенде, татарлар оджакъ башында отурып, Къырымнынъ сонъки йигити акъкъында, къартларнынъ икяесини динглемеге пек севелер. Ич бир вакъыт эзилгенлерининъ ве ёкъсулларнынъ джаныны агъыртмаган Алим ичюн, Къырымнынъ дагълары биле гъурурланганлар. Байлар Алимден, яшыннан къоркъан киби, къоркъкъанлар. Бутюн губернияда Алимнен корюшмек истеп, оны ялынъыз бир адам араштырган. О Къарасувбазарнынъ эски кясы экен. Айткъанларына коре, онынъ юмругъы теразе фунтлукъларындан да агъыр экен. Онынъ кескин бакъышындан ер тюбюне сакъланып биле, къуртулмакъ мумкюн дегиль экен.

Къырым токътамадан о акъта, ялынъыз Алим акъкъында еди йыл лаф эткен. Бу йыллар ичинде, Алим еди кере къаравуллар къолуна тюшкен ве еди кере бугъавларны къопараракъ, Таракъ-таш дагъларына, ногъай чёллерине къачкъан. Бутюн яшлыкъ Алимге дост экен. Халкъ гедже-кундюз алланынъ адыны ангып, Алимни белядан сакъламасыны истеп, намаз къылганлар. Лякин, Алимнинъ башы устюнде къара булутлар асылы тура экенлер. Акъ сакълалты къартлар тынып турсалар да, буны биле экенлер.

Шу йылы, Къырымда корюльмеген сувукъ олган. Факъырлар чекишкен, лякин зенгинлерге де арув олмаган, чюнки ёллар бою, Алимнинъ баскъыпларындан ич биреви аман корьмегенлер.

Алимни чешит ерлерде коре экенлер. О шеэрлерде пейда ола ве атта Къарасувбазар кясына барып, Алимни эльге бермек ичюн, озь ярдымыны биле теклиф эткен. Бу вакъыт кяя Алимге: «Алим меним элимде олса, санъа юз онълукъ», — деген. Алим оны кулрек: «Мына, Алим сенинъ къолунъа озю кельди, лякин сен оны тутып оламадынъ» — дей ве аман пенджеренден сычрайракъ, атына минип, шеэрден чыккып кеткен. Артындан атлылар къувган, еталмаганлар.

Алимнинъ безз атына учъ танав олып, о токътамадан учъ кунъ, учъ гедже чапа биле экен.

Алим Таракъташ дагъларында да яшаган. Бу вакъыт учъ тарафтан къаравуллар чыккып, бутюн Таракъташ дагъларыны сарып алганлар, лякин Алимни тапамаганлар. Отуз къаведжиси, вакъытында Алимге хабер этип етиштирген, Алим Къызыл-Ташкъа авушкъан. Анда, топракъ тюбюнден кирильген... айдамакълар сакъланган, дымлы

бир кьоба бар экен. Анда, Алимнинъ итияджы — шейлери топракъ тубюнде тура экен. Бу кьобанынъ ичинде, шифалы сувнен яраларны сагъылткъан ве инсанларнынъ кьуветлерини арттыргъан дигер бир кьоба даа бар экен.

Мында, Къызыл-Ташта, Алим баягъы бир вакъытлар сусып тургъан. Оны, ялынъыз Отуз къаведжиси ве Алимнинъ эльчиси Баттал биле экен. Батталгъа озь тилини ютмакъ, Алимни эльге бермектен кюлай экен. Алим, Батталнынъ оксюзчиги Шашнени севе ве бабасынен онгъа, кимерде пюрк феси, кимерде панты фес, кимерде де алтын купелер джибере экен. Шашне, озь достларына янгъы бахшышларны косътерип, кюпая тургъан экен. Балабан олса, Алим онгъа эвленеджегини, бутюн Къызыл-Таш хазинесини онгъа береджегини, айтып юре экен.

Доманака урумнынъ къызы буны эшитип, бабасына барып айта. Бабасы Алимден кюркъа ве оны севмей экен, чюнки кюркъсанъ, эр заман севмейсинъ. Ондан да гъайры, оларнынъ арасында къан душманлыгъы бар экен: баскъып вакъытнда, Алим Доманаканынъ тувгъаныны ольдюрген. О вакъыт Отузда кая пейда олгъан, джемаатны топлагъан. О татарларгъа кыргъый киби бакъып: «Алим меним элимде олмагъангъа къадар, койден кенаргъа тавукъ, къафестеки гогерджин биле чыккып къанат саламасын!» — деген. Шу геджеси, койде ич бир кимсе юкъланмагъан. Сокъакъта авазлы шейтан тогъ ойнап, багъчалардаки тереклерни сын-дыргъан, кюркъакъларнынъ къалпы тыкъ-тыкъ къакъан ве кечкенлернинъ устуне сазагъанлы ягъмур киби атылгъан. Тав кюркъунчы-кюркъунчы нефес алгъан, булутлы коктен гурюльдеп ягъмур, сель олып Къызыл-Таш дересине бинглердже сув ташкъынлары мейдангъа кетирген.

Бу гедже, айдамакълар ич кимсени беклемегенлер, айдамакълар кюбасы ичинде янып битетаткъан кюрлу атешнинъ башында, чекменлерине сарылып юкълангъанлар.

Алим пек сакът юкълан экен. Санки, эр кунъ япкъаны киби, бу гедже де, шифалы сувны ичеджеги кельген, лякин кюба ичиндеки чокъракълардан сув ерине, къан фышкъыра экен. Джагларнынъ юкъарсындан къара йыланлар къалачланып, саркъып тура экенлер. Мына олардан бириси, тайгъалакъ ве сувукъ сою, Алимнинъ богъазына сарылып тююмленген.

Бу агъырлыкъкъа даяналмагъан Алим, пек яман багъыргъан, козьлерини ачып бакъкъанда, янында озюнинъ кокюсинден басып, богъазыны сыкъып тургъан, буюктен-буюк бир адамны корьген. Алим багъыргъан, лякин юрегининъ астындан кюпкъан аджджы агъры, онынъ эсини алгъан. Алим бир даа козьлерини ачкъанда, энди

озюнинъ ве достларынынъ багълы олгъанларыны корьген. «Селям алейкум, Алим, сен мангъа мусафирликке кельген эдинъ, амма шимди, коресинъми, мен сангъа мусафирликке кельдим», — деп, кимдир онынъ энгъеси устюнден сёйленген.

Алимнинъ козьлери огюне бир даа къаранлыкъ чёккен, эси кеткен. Экинджи сефер эси башына кельгенде, энди саба ачылгъан ве оны самара устюне кой сокъагъы бою алып кете экенлер. Санки бутюн кой олю, койде ич бир джан корюнмей экен. Эр кес, кяянынъ бакъышындан сакълана экенлер. Кяя, Алимнинъ юзюне бакъып, индемеген, санки бир шей сорагъандай олгъан, Алим де бакъышнен джевап берген: «Билем, артыкъ Къырымда йигитлер олмаз!»

Энди уйле вакътында, кой правлениесининъ янында, арабалар устюнде багълангъан айдамакълар ята экен. Алим де, демир зынджырларнен кишенленген. Онынъ янында къаведжи Баттал ята экен. Ёлны девам этмек ичюн эр шей азыр олгъанда, Батталнынъ къызы Шашне чапып келе ве козьашлар тёкип, ынджынып агълай. Кяя къызчыкъкъа: «Агълама, тезден бабанъ къайтар», — дей. Сонъ, Алимге бакъаракъ: «Аз къалды унута яздым, мен сангъа борджлум. Хатырлайсынъмы, Алим меним элимде олгъан вакъытта, сангъа юз энлукъ бермеге ишандыргъан эдим? Шимди Алим меним элимде, пара сениндир», — дей Алим.: «Оларны шунгъа бер», — деп къызчыккы косътере.

Арабалар яваштан еринден коче ве бойледже Алимни дагълардан омюрлик алып кетелер.

(Н. Маркснынъ «Крымские мотивы»
адлы китабындан къырымтатарджагъа
чевирген Амет Усеин)





ЛЯТИФЕЛЕР

НАСРЕДДИН ОДЖА АКЪКЪЫНДА

МЕН ДЕ ОНЫ ТЮШЮНЕМ

Насреддин оджа бир кунъ, бостан хырсызлыгына барып чувалыны къавун-къарпызгъа толдургъан арада, бостаннынъ саиби оны якъалай: — Меним бостанымда не ишинъ бар? — дей о.

— Бугунъ бир кучълю боран къопты ве мени мында котерип атты, — дей оджа.

— Я къавун-къарпызларны ким джыйды?

— Ана шу боранда, къолума не расткельсе, оны къопарып алдым.

— Я о, къавун-къарпызларны чувалгъа ким толдурды?

— Мен де, оны тюшюнем даа, — дей Насреддин оджа.

МЕН БАЗАРДА ОЛМАЙ ДЕДИМ

Насреддин оджа бир кунъ ёлда кеткенде, къаршысындан бир адам йипнен багълы копегини алып кельгенини коре.

— Копекни къайда алып кетесинъ? — деп сорай Насреддин оджа.

— Базаргъа, сатмагъа алып кетем, — дей адам.

— Мусульмангъа базарда колек сатмагъа олмай да. Бу динге келишкен шей дегильдир.



— Шай олса, копекни сиз ал да кетингиз, мен оны бир даа эвге алып къайтмам, — деп, адам копегини Насреддин оджагъа туттура.

Оджа копекни алып кете. Къаршысына расткельген бир адам:

— Оджам, копегингизни сатмайсынгызмы? — дей.

— Ал, сатам, — дей де, Насреддин оджа бедава алгъан копегини сата. Шу арада къайдандыр, копегини берген адам чыкъып къала да:

— Я сиз мусульмангъа копек сатмагъа олмай дедингиз де, озюнгиз исе, бедава алгъан копегингизни парагъа сатасынгыз.

— Мен базарда олмай дедим, — деп джеваплана Насреддин оджа.

АЛЛА КЪЫСМЕТ ЭТСЕ

Насреддин оджа къомшусындан борджгъа 100 рубле пара сорай ве беш куньден къайтарып беририм, дей. Къомшусы 100 рубле бермеге разы ола ве дей:

— Алла къысмет этсе, иншалла беш куньден къайтарып берирсиз.

— Эльбетте, алла къысмет этсе, беш куньден къайтарып кетиририм, — дей оджа ве параны алып кете.

Беш кунь кече, алты кунь кече, он кече, оджа параны алып кельмей. Ниает къомшусы оджанынъ эвине келип:

— Косътерген муддетингиз чокътан кечти, алгъан парангызны къайтармайсыз, — дей.

Оджа:

— Алла къысмет эткен олса, кетиреджек эдим, амма къысмет этмеди, — деген.

НАСРЕДДИН ОДЖА ВЕ ПАДИША

Яш падишанынъ бири илян бере: « Ким де мени, ялан айтып алдатып олса, онъа 40 къопкъа алтын беририм», — дей.

Бу илянны эшиткен яланджынынъ бири падишагъа келип шойле дей:

— Бу йыл бостанымда бир къарпыз осьти, кескенде пычагъым онынъ ичине тышип кетти. Мен аткъа минип, бир кунь къарпызнынъ ичинде доландым, амма пычагъымны тапалмадым.



Падиша буньнъ ялан олгъаныны бильсе де:

— Э-э... олуджыдыр, — деп джеваплана. Яланджылардан бири даа бостанында 40 аршын боюнда, 40 аршын энинде бир хияр осьтюрип, ондан копюр япкъаныны айта. Падиша бунъа да:

— Олуджы шейдир, — деп джеваплана.

Бу илянны Насреддин оджанынъ апайы эшиткен.

— Эр кес сени азырджевап, акъыллы сая. Къана бакъайым, бар падишаны алдат да, 40 къопкъа алтын къазанып кель, — дей акъайына.

— Эй апай, ойле яланларгъа инанмагъан ахмакъкъа, даа насыл ялан айтмакъ мумкюн?

Лякин апайы, онынъ якъасыны боппамай. Насреддин оджа бираз тюшпонген сонъ:

— Яхшы, 40 къопкъа олмаса да, эки къопкъа алтын алып келирим, — дей де эки дане бош къопкъаны алып, падишанынъ сарайына бара.

— Не кельдинъ, ялан айтмагъамы? — деп сорай падиша ондан.

— Ёкъ, падишам, — дей оджа, — раметли бабанъыз былтыр менден борджгъа, мына бу къопкъаларнен эки къопкъа алтын алгъан эди. Эгер мумкюн олса, бабанъызнынъ борджуны бермез экенсингизми?

Яш падиша эгер оджанынъ айткъанына ялан десе, 40 къопкъа алтын бермек керек оладжакъыны тюшюнип «олуджыдыр» дей де; эки къопкъа алтын берип, Насреддин оджаны сарайдан озгъара.

БОСТАН ХЫРСЫЗЫ

Насреддин оджа бир кунъ бостан хырсызлыгъына кетеджек олып, эшегини кетирип къодалагъына еке. Айдап кетеджекте оны къомшусы корип:

— Къаякъкъа огъурлар? — деп сорай.

— Дженнетке кетемен, — деп джевап къайтара.

Бостангъа барып, къодалагъына къавун-къарпыз юклеп чыкъкъанда, оны къаравул коре. Къодалагъынны бошаттыра да, кочерини чыкъарып, Насреддинни котеклей.

Эшеги де, къодалагъы да къала, озю зорнен къачып къуртула.

Саба тургъанда, оны къомшусы корип шойле дей:

— Дженнетте сени пек сыкъкъанлар, гъалиба. Баш-козюнь яралангъан.

— Дженнеттен къайткъанда, джеэннемге де кирдим. Башым анда яраланды, — дей Насреддин оджа.



— Насыл этип, бир кереден эм дженнетке, эм джеэннемге бардын?

— Дженнет дегени, къавун-къарпыз ашы экен, джеэннем дегени, джарты кочер башы экен.

КЪАВГЪА ЁРГЪАН УСТЮНДЕ

Насреддин оджа бир кунъ зияде ёрулгъанындан, акъшам ашпъндан сонъ тёшегинде ятып раатлана.

Шу арада бир шамата эшите. Аман башына ёргъаныны япа да, къавгъанынъ себебини анъламакъ ичюн, къаранлыкъта адамлар арасында къарыша.

Не ола-не олмай, Насреддин оджанынъ башындан ёргъаныны чекип алалар. Оджа не ятмагъа бильмей, ымпыс-тымпыс эвге къайтмагъа меджбур ола. Онынъ яваштан эвге киргенини корьген апайы:

— Не олгъан шунда? Насыл къавгъа экен? — деп сорай.

— Къавгъа бизим ёргъан устюнде экен, — дей оджа. — Ергъан кетти, къавгъа да битти.

ПАПУЧЛАР

Насреддин оджа бир кунъ талебелеринен кете эди. Талебелери онынъ папучларыны алып сакъламакъ ичюн, бир айнеджилтик тюшюнип тапалар. Талебелерден бири, Насреддин оджаны кызыштыра:

— Бу терекке ич кимсе чыкъып оламаз!

Насреддин оджа аман папучларыны чыкъарып къойнуна къоя да, терекке тырмашмагъа башлай. Бу алны корьген талебелер:

— Эфендим, папучларынгъызны не ичюн къойнунгъызгъа къоясыз? — деп сорайлар.

Насреддин оджа оларгъа джевап бере:

— Терек тёпесине чыкъкъан сонъ, бельки башкъа ёл тапытыр.



СААТ САТА

Насреддин оджа бир кунь эвине косьтекли саат такъып келе. Къадынына косьтере.

— Вай!.. Оны къайдан алдынъ? — деп сорай къадыны.

— Хырсызладым, — дей оджа. Ваай!.. Айыплар олсун.

— Айып менде дегиль, о кишиде. Керек олса, ачыкъагъыз олмасын.

— Хырсызлыкъ шейни эвде тутма. Ярын базаргъа алып кетип сат.

Оджа форсаланып базарда юре. Адамлар корьсинлер деп, саат косьтергенини джеп тышына саркъыткъан. Абур-чубурнынъ фиятыны сорай. «Саатны сатсам къадынгъа шал, озюме штан алырым», тасавурынен саатчилер сырасына кире. Энди мушгериге теклиф этмек макъсадынен саатыны къолуна алмакъ истей. Истей амма, джегте саат ёкъ. Хырсызлагъанлар. Ана ачыкъагъызлыкъ къайда.

Оджа эвге тавсыз къайтып келе. Къадыны ондан:

— Саатны къачкъа бердинъ, — деп сорай.

— Алгъан фиятыма бердим, — дей оджа.

БАЛТА

Насреддин оджа бир кунь чокътан-чокъ одун парлай. Акъшам ёрулып киргенде, одун парлагъан ерде балтасыны унутып къалдыра.

— Орталыкъ аманлыкъ. Бир шей олмаз, — деп юкъламагъа ята.

Оджа саба тургъанынен кене одун парламакъ истей. Амма балтасыны тапып оламай. Къыдырмагъан тешиги къалмай. Дерсинъ, къанатланып учкъан, ёкъ! Оджа озюни сыкъмай. Эки къолуны джебине сокъып, кой ичине чыкъа. Кой джемаатынынъ чокъусу тюкян къарчыгъасына тоглашкъанлар. Оджа оларнынъ янына келе. Селям-келямдан сонъ, озь дердини айта башлай:

— Мал дегенде, бабамдан къалма бир балтам бар эди. Бу гедже оны да хырсызлагъанлар.

— Яландыр.

Яланып-маланып анъламам, ким алгъан олса да, балтаны ерине кетирип къойсын. Мен къоркъузмакъ истемейим. Лякин талап этем. Балта еринде олсун. Балта тапылмагъаны такъдирде фикиримде бир къурназлыкъ бар, оны япарым, эпинъизге къыйын олур. Сонъ, манъа джанынъыз агъырмасын, — дей. Шай дей де, адамларнынъ юрегине мых сокъып, эвине къайта.

Адамлар абдырашалар. Не япаджакъларыны бильмейлер. Оджанынъ фикириндеки хурназлыкътан къоркъалар. Койге — «Оджанынъ балтасыны ким де хырсызлагъан олса, къайтарсын! Сонъу ярамайдакъ», деген деллял къакътыла. Шу геджеси джегат раатсыз юкълай.

Экинджи куню адамлар сабадан, кене тюкян къарчыгъасына топлангъанлар. Не олды экен? Балта тапылдымы экен? — давасы чезильген арада, куле-куле Насреддин оджа келип къала.

Эр кес бирден:

— Балтанъ тапылдымы, оджа? — деп сорайлар.

— Тапылды, — дей оджа.

— Шукюр, белядан къуртулдыкъ.

— О даа насыл беля?

— Балта тапылмагъаны такъдирде, акълынъда олгъан къурназлыкънен къоркъузгъан эдинъ де?! Догърусыны айт, оджа, акълынъда не ярамазлыкъ бар эди?

— Балтам тапылмагъан олса... янгъысыны яптыраджакъ эдим. Ярамазлыкъ шундан ибарет эди.

АХМЕТ АХАЙ АКЪКЪЫНДА

ТЮПСИЗ ЧАПЧАКЪ


Яз ягъмурсыз, къургъакъ кече. Озенбашта берекет олмай. Ахмет ахай тюшюне: багъ-багъчаларны сувармакъ керек, лякин адамлар сувны юксекликке ташымагъа къыйналар. Не ялмакъ керек?

О чокъ тюшюне ве онынъ чаресини тапа. Ахмет ахайнынъ бир бекмез чапчагъы бар эди. О чапчакънынъ тюбюни тешип, озюнинъ багъчасына къоя. Онынъ багъчасы исе, Озенбашта эр кеснинъкинден юксекте экен. Ахмет ахай минаренинъ тёпесине чыкъып, койнинъ бутюн халкъына мураджаат эте:

— Джемаат, мени дингъленгъиз! Мен багъчамда юкълай эдим. Ойле бир сес эшиттим ки, онъа итаат этмемеге чарем ёкъ.

О сес мангъа шойле деди:

— Огълум, бекмез чапчагъынъны багъчанынъ ортасына къой, Озенбаш адамларына айт кельсинлер, оны сувнен толдурсынлар.



Оларнынъ эмеклерини такъдирлемек ичюн исе, огълум, санъа айтам, чапчакъкъа сонъки бир къопкъа сувны ким тексе, багъчанынъ ярасыны онъа бер!

Ахмет ахайнынъ багъчасы кучюк олса да, бир къопкъа бедава сув ичюн багъчанынъ ярысыны алмагъа истемеген адам тапылмай. Эр кес къолуна къопкъа алып, сувгъа чапа, Ахмет ахайнынъ багъчасындаки чапчакъкъа сув ташымагъа башлай. Эр бир адам чапчакъны биринджи оларакъ толдурмакъ истей. Олар ашагъыдан юкъарыгъа, юкъарыдан ашагъы чапалар.

Баягъы вакъыт кечкен сонъ, базы биревлери:

— Бу насыл шей я, Ахмет ахай, арыкътаки сув энди битип отура, сенинъ чапчагъынъ исе, аля даа толмай, — деп къыгчыршалар.

— Сабурнынъ тюрю сары алтындыр, учер кере даа барып кельсенъиз, сонъ толар, — дей Ахмет ахай.

Олар учер кере дегиль, алтышар кере даа къатнайлар, арыкътаки сувны ташып битирелер, лякин Ахмет ахайнынъ чапчагъы толмай. Ахыр-сонъу, олар чапчакънынъ тюрсиз олгъаныны анълайлар ве Ахмет ахайгъа дарылып башлайлар.

Ахмет ахай оларгъа бакъып куломсирей де:

— Нафиле ерде ачувланманъыз, джемаат, башларынгъызны котер де бир бакъынъыз, ташыгъан сувынъыз къайда акъа, — дей.

Чапчакънынъ тюрюнден токътамадан, озьлерининъ багъчаларынъ догъру акъкъан сувны корьген джемаат пек хошнут ола, Ахмет ахайнъ алгъышлайлар.

КЪАРГЪА ВЕ АХМЕТ АХАЙ

Бир кунъ, Ахмет ахай Озенбаш озенине барып урбасыны юва. Шу арада бир къаргъа учып келип, онынъ бир топач сабуныны алып кете.

Ахмет ахай еринден атылып тура, амма... Къаргъаны тапсанъ ал. О къаргъанынъ сим-сия къанатларына бакъып:

— Онынъ къанатлары меним урбаларымдан да кирли, къара экен. Ювунсын, арынсын, — дей.



ОШАТАМ, АММА АЙТМАМ

Къурбан байрамы арфесинде, Ахмет ахай бир къой сатын ала ве арангъа къапай. Чайырда ойнакълап юрмеге алышкъан бу къой, башкъаларындан айырылып мында кельген сонъ, бутюн гедже къычырып, шорбаджысына юкъу бермей экен. Ахмет ахай ахыр-сонъу даянып оламай. Ачувланып арангъа кире де:

— Не ичюн багъырып, орталыхны йыхайсынъ, домуз! — дей. Ахмет ахайнынъ бойле дегенини эшиткен къадыны:

— Эв, мусульман, сен дегенинъден хаберинъ бармы? Хойгъа домуз дединъ, энди о хурбанлыхха кечмез. Буны Мухаммед азретлери ясах эткен.

Ахмет ахай эртеси куню къойны аджеле сата ве онынъ ерине башкъасыны кетирип арангъа къапай. Озю исе, юкъламагъа ята. Лякин, бу къой да озюнинъ къурбан чалынаджагъыны дуйгъаны киби къычырмагъа башлай. Ахмет ахайгъа раатлыкъ бермей.

Ахмет ахай ачувлангъанындан ашыкъып тюб урбасынен чапыш чыкъа да, араннынъ къапусындан бакъып, яваштан:

— Ах, сени де анавыгъа ошатам, амма адыны айтмам, — дей.

ТИЛЬКИНИНЪ КЪУЙРУГЪЫ

Рахмет челеби яланджылар ярышпндан умюдини узъмей ве бир икяе даа башлай.

— Бугунъ орманда бир тильки корьдим. Онынъ къуйругъы энъ аздан алты аршын эди. Эгер ялан олса, къуран опеим!

Ахмет ахай онынъ яланыны тюзете:

— Тилькининъ алты аршын къуйругъы оламы? Энди сен аллахтан эр бир аршин ичюн бирер таях ашайджанъ.

— Яхшы, — дей Рахмет челеби, — мен керчектен де бираз къабартып айттым, алты дегиль, дёрт аршын эди, къуран опеим!

— Адамлар сенинъ айтханынъ киби, узун хуйрухлы тилькини бир заман корьмегенлер. Мыгна сангъа, эки аршын ичюн эки таях даа, — деп Ахмет ахай Рахмет челебининъ аякъларына ура.

— Догъру айтасынъ, дёрт дегиль, эки аршын эди. Инанмасанъ, къуран опеим!

— Бу да ялан, мына сангъа эки таях даа!

— Эки аршын эльбетте, чокъча, лякин эки суюм бар эди. Инанмасанъ, къуран опеим!



- Энди мытлах шашырдынъ! — деп, Ахмет ахай бир даа ура.
- Ой сени, шейтан, не ичюн мени урасыпъ? Не, тилькининъ къуйругъы олмаймы ёкса?
- Тилькининъ эки суюмлик хуйругъы олмай. Мен сени онынъ хуйругъыны бираз узат, деп урам.
- Къайсы тарафкъа узатайым да, сенинъ истегенинъ киби олсун?
- Керчек олгъан тарафкъа узат, — дей Ахмет ахай.

УЧЪ НАСИАТ

Бир кунъ Ахмет ахай, молла бостанынынъ янындан кече. Молла исе, шу вакъыт кимден бедава файдаланмасыны, къабакъларны койге ёлламакъны тюшонип тура экен. Шу ерден кечип кететкъан Ахмет ахайны чагъырып, шойле дей:

— Эй, азамат огълум, эгер сен бу хабах толугъу чувалны койге алып барсанъ, мен санъа учъ насиат айтарым, олар санъа парадан да зияде керек олур.

Молланынъ ачкъозлюгини пек яхшы билъген Ахмет ахай, ондан пара чыкъмайджагъыны биле, лякин онынъ насиатынен меракълана. Хабах толугъу чувалны котерип, койге ёл ала. Онынъгле ян-янаша молла да адымлай.

— Динъгле биринджи насиатымны, — дей молла. — Эгер санъ бириси джаяв юрмек ат минмектен яхшы десе, инанма.

Буны эшиткен Ахмет ахай:

— Недай манасыз шей айтасынъ, бу да не маразнынъ насиаты, буны эр бир ахмак биле, — дей.

— Ашыхма, ашыхма, — дей молла. — Эгер сен экинджи огютимни ишитсенъ, бедава алып бармагъанынъны анъларсынъ.

— Айды шуны динълейим, — деп тюшуне Ахмет ахай, — бельки экинджи насиаты керек олур. — Хана, айт экинджисини.

Молла экинджисини айта:

— Эгер санъа, бекарлыкъ эвли олудан эйидир, деселер, сен онъа да инанма.

— Тъфу! — деп согуне Ахмет ахай. — Сен молла мени алдатасынъ. Яхшысы параны бер. О, эльбетте, сенинъ ахмак насиатындан файдалыдыр.

— Ашыхма, ашыхма. Сен учюнджи насиатны динълемединъ, — дей къоркъкъанындан молла. — Эгер, эвельки эки насиат ойле пек хыйметли олмаса да, учюнджисини сен бир оба алтынгъа да денъишмезсинъ.



Ахмет ахай бираз юрген сонъ:

— Сени динълейим, молла, — дей. Молла учюнджи насиатыны да айта:

— Огълум, эгер санъа, фухарелик байлыктан яхшы деселер, бунъа ич де инанма.

Шу вакъыт олар учурым янына келип къалалар.

— Ойле олса, менден де бир насият динъле, — дей Ахмет ахай ве омузындаки къабакъ толугу чувалны учурымдан ашагъы ата да, — эгер санъа, хабахлар парламалар деселер, сен, молла ахай, ич де инанма! — дей.

СОНЪУНЫ СОРАМА

Ахмет ахай ич бир тюрлю ичкиге алышып оламагъан. Ичкен сонъ, эр вакъыт башы агъыра экен. Шу койде эр даим саргъуш юрген бир тиленджинен акъыл танъша:

— Ичкен сонъ башым агъыра, не япмалы?

— Даа ичмелисинъ, — дей тиленджи.

— Ичем, лякин кене агъыра.

— Бир даа ичмелисинъ.

— Ойле амма, сонъу не оладжакъ, — деп сорай Ахмет ахай.

— Сонъуны сорама, манъа бакъ, манъа! — дей тиленджи.

АХМЕТ АХАЙ ОРАЗАНЫ ЧАНАЛАТА

Озенбашлынынъ бири, маджарыны екип чёльге кетеджек ола. Апайы онъа дей:

— Эй, адам, сен кетесинъ амма, оразанынъ не вакъыт, хайсы куню башлайджагъыны чёльде хайдан биледжексинъ?

— Догъру айтасынъ, апай, мен барып оразанынъ не вакъыт келеджегини, Ахмет ахайдан сорап билейим, — дей.

Ахмет ахай шу куню Бойкада, чалашта озюне маджар ясай экен. Адам онъынъ янына барып, ораза не вакъыт башлайджагъыны сорай.

Ахмет ахай джиддий бир меселе чезеджек адам киби, бираз тюшонген сонъ, къыскадан шойле анълата:

— Ярын — бизим «бутунимиз» сайылсын, лякин бутунъ даа «ярын» дегиль, анълайсынъмы? Ёх, бир шей анъламайсынъ? Мен санъа

арабча бир кягъыт язып берейим. Не де язсам, бугунь охума, ярын оху. Чѣльде олгъан вахтында бугуньки кунюньни кечир де, ярынки кунни хыдыр. Тюневинки кунь кечкен сонъ, йылдызларгъа бахып, меним берген кягъытымны оху. Мына бундан сонъ, оразанынъ не вахыт башлайджагъыны билирсинъ.

Адам шу куню кягъыткъа бакъмай. Экинджи куню кене «бугунь» ола ве о кягъытны окъумакъны ярынгъа къалдыра. Бойлеликнен, гъарип озенбашлы бутюн ай девамында озъ маджарынен кенъ-къулан чѣллерде юрип, оразанынъ невакыт башлайджагъыны, бугунь дегиль, ярын къыдыра. Къыдыра, амма аслы тапып оламай. О Озенбашкъа кельгенде, ораза энди биткен экен.

— Бугунь арефе куню, — дей онъа апайы, ярын оразы бите. Энди хурбан байрамына бир хой хурбан чалмагъа азырланмакъ керек.

Бир ай оразаны чѣльде къыдырып юрьген адам, арадан бираз вакыт кечкен сонъ, Ахмет ахайны коре:

— Валлаи, сангъа джаным агъырды, Ахмет ахай, бу хадаргъадже алдатмакъ олурмы адамны, — деп элем эте.

Ахмет ахай кулип, джевап бере:

— Не ичюн джанынъ-агъырды, ёкъса бир ай ач юрдинъми?

КЪАЧАКЪ

Ахмет ахай Озенбаштаки ун сатыджыгъа борджлы экен. Ун сатыджи парасыны алмакъ ичюн, Ахмет ахайнынъ пешинден юрип башлай. Ахмет ахай исе, ондан гизленип юре. Куньлернинъ биринде, о Ахмет ахайны коре ве онынъ артындан чапа. Ахмет ахай къача, келип эвине кире ве къапуны ичертин мандаллай. Шу дакъкъада онынъ апайы чыкъып, ун сатыджыгъа дей:

— Ахмет ахай эвде ёх, о дагъгъа кетти.

— Кечкен сефер де, дагъгъа кеткен эди. Бу сефер де, кене дагъгъа кетtimi? Бутюн вакыт дагъда юре, анда не бар экен онъа?

— Хора ятмакъ ичюн агъач кесе. Азбарны хоралайджакъ. Борджгъа пара бергенлер эвимизнинъ янына топланып, омузларынен хорагъа хашынсалар, оларнынъ юньлерининъ баягъысы хорагъа илинип халыр. О юньлерден мен чорап орерим. Ахмет ахай исе, оларны сатып борджларыны одер.

Ун сатыджи онъа бир шей айтмай, къайтып кете. Лякин куньлернинъ биринде, ун сатыджи Ахмет ахайны ёлда расткетире:

- Утанмайсынъмы, борджынъны бермейсинъ, озюнъ де хачып юресинъ?
- Санъа не къадар борджым бар?
- Юз алтын.
- Эгер мен эки кунъден сонъ, санъа дохсан дохуз бучугъыны берсем, санъа не хадар даа борджым халаджакъ?
- Ярым капик.
- Алла, алла! Ярым капикке, о хадар шамата хопармакъ керекми шу, — дей Ахмет ахай, — утанмайсынъмы?

ОДЖАКЪ ШАКЪАСЫ

Бир кунъ Багъчасарай ханы, къурназлыкъта Ахмет ахайны енъеджек ола ве онъа мураджаат этип шойле дей:

— Мен санъа бир вазифе беририм, эда этсенъ мукъфат алырсынъ, беджерип оламасанъ, башынъны кестиририм, анълаштыкъмы?

— Айтмасы сизден, ятмасы менден, анълаштых. Шундан сонъ хан айта:

— Меним сарайымдан чыкъ ве къайтып меним яныма кель, лякин ёл бою кимсеге токъунма, ич бир шейге элинъни тийдирме. Эгер биревге токъунсанъ, ненен тийген олсанъ, сени о шейден марум этерим.

Ахмет ахай сарайдан чыкъкъанынен, хан ёлгъа юз къаравул къоя. Бутюн ёлларны кеселер, адам дегиль, атта пире биле кечип оламайджакъ.

Я шакъаджы насыл этип ханнынъ янына, сарайгъа кирген? Мына насыл! Яваштан мердивенни таяндырып, дамгъа чыкъа, баджадан эвге тюше ве ханнынъ огюнде пейда ола:

— Корьдинъизми, хан, хартлыкъ сизнинъ сачларынъызны чаларткъан, ахылынъызны тохаллаштыргъан. Манъа, Озенбашлы Ахылданеге, бойле вазифени чезмек хыйындыр, беллейсинъизми ёхса? — дей.

ЭКИ ЯВЛУКЪ ТОПРАКЪ

Хан Ахмет ахайгъа пек ачувлана ве:

— Бугунъден сонъ меним топрагъыма аякъ басма! — деп, оны айдап йибере. Я Ахмет ахай не япкъан?

Акъяргъа барып, эки явлукъ без киречли топракъ къазып ала. Топракъ толугу бу явлукъларны чарыкъларынынъ астындан кечирип, сарып, багълай ве сарай огюнде, ханнынъ сельбилери арасында юре.



Хан, сарайнынъ софасындан Ахмет ахайны коре ве онъа багыра:

— Эй, пезевенк, мен санъа бу ерде юрме деген эдим де! Къайда джеллят? Бу итаатсызнынъ, огъурсыз башыны кесип атсын!

Ахмет ахай хангъа шойле джевап бере:

— Хан азретлери, меним аяхларым сизинъ топрагынъызгъа басып юрмекни, ахылына биле кетирмейлер. Оларгъа бунунъ кереги де ёх.

— О не дегенинъ? — деп багырыкылай океленген хан. — Сен утанмайып, меним озь козюмнен корип тургъан шейни, ред этеджек оласынъмы? Я да мени сокъурлангъан, беллейсинъми?

— Сокъурланмагъан олсанъыз, яхшы бакъынъыз меним чарыхларымнынъ тюбюндеки, Акъярдан алынган топракътыр.

Хан, Ахмет ахайнынъ чарыкълары, без киречли топракъ толукълукъларнен багълангъаныны корьген сонъ, ойле ошланып кулген ки, аз къалган сыкълумагъа.

МУДЖИЗЕ

Бир кунъ Ахмет ахай хангъа къавурылган къаз сатын ала, лякин ёлда кельгенде онъа сукъланып, бир аягъыны къопарып ашай. Кене яхшы, ханнынъ частына, базар сарайдан чокъ узакъ дегиль экен, къазнынъ тек бир аягъы кеткен.

Ахмет ахай оны кетирип шорбаджысына бергенде, хан къазнынъ бир аягъы олмагъаныны корип:

— Къазгъа не олды я? Экинджи аягъы къайда? — деп сорай.

— Хан эфеңди, — дей Ахмет ахай, озюни ич бир къабаатсыз сайып, — бутунъден башлап, Багъчасарайнынъ бутюн хазлары бир аякълы олган. Инанмасанъыз, озюнгизнинъ козьяш чешменъиз янына барып бакъынъыз.

Къыя олгъанындан, ханнынъ ушюген къазлары бирер аякъларыны къарынларына басып, бирер аякъ устюне тура экенлер.

— Давул кетирип, оны чокъмарлап башланъыз, — дей хан. Давул сесинден къоркъкан къазлар, о бир аякъларыны да тюшпорип, табана къувет къачалар.

— Сонъ насыл, — дей хан, — тутулдынъмы? Догърусыны айт, къазнынъ экинджи аягъы къайда?

— Падиша азретлери, — дей Ахмет ахай, — хорху муджизе догъура.

Сиз оларны хорхутып, оларда экинджи аях пейда эттинъиз. Эгер бу чохмарнен сизнинъ башынъызгъа урсалар, хорхханынъыздан, бу ерден эки аяхлап дегиль де, дёрт аяхлап хачар эдинъиз.

Хан Ахмет ахайнынъ азырджеваплыгъына шашып, куле ве онъа бу шакъасы ичюн бир кисе тютюн бере.

Яш эдебиат авескъары, Ахмет ахайдан сорай:

— Айтынъыз я, иджадымны прозагъамы багъышлайым, ёкъса поэзиягъамы?

— Прозагъа.

— Ойлеми, демек, икяелеримни окъудынъыз ве бегендинъиз?

— Екъ, амма шиирлеринъизни окъудым, — деп джеваплана Ахмет акъай.

Къадынымнынъ догъгъан кунюне не багъышлайджагъымны тюшонем, бир акъыл берсе, — деди Ахмет ахай бир аркъадашына.

— Озюнден сорамайсынъмы? — деди аркъадашы.

— Сорасам, парам етмез деп къоркъам, — деди Ахмет ахай.





АТАЛАР СЁЗЛЕРИ ВЕ АЙТЫМЛАР

Хызмет тюби — хазине.

Хайырлы ишнинъ кечи ёкъ.

Бутунъки ишни ярынгъа къалдырма.

Ерни кунеш яраштырыр, инсанны — иш.

Чалышкъан адам ач къалмаз.

Арекетте — берекет.

Сабан туткъан ач къалмаз.

Ишлемеген тишлемез.

Бир ишни башлама,
Башлагъан сонъ ташлама.

Иш устасындан къоркъар.

Къачып кетсенъ, сачып кет.

Язда бош джургеннинъ къолуны кес,
Къышга джургеннинъ аягъпы.

Къалгъан ишке къар ягъар.



Багъны бакъсанъ багъ олур,
Бакъмасанъ дагъ олур.

Тырышкъан киши джол тапар,
Таш-темирге мых къакъар.

Эрте сюрген, эрте топлар.

Адамнынъ сёзюне дегиль, ишине бакъ.

Джемаат аткъан таш узакъ тюшер.

Джемаат кескен пармакътан къан чыкъмаз.

Халкъкъа къошулгъаннынъ гонгълю токъ,
Халкътан айырылгъаннынъ юзю ёкъ.

Халкъ юрген ёлдан юр.

Халкънен яша, халкънен оль.

Бирлик олгъан ерде тирилик олур.

Кокке дегиль, копке бакъ.

Бирлешкен бинъни йыкъар.

Халкъ илине ярашыр, балыкъ — голжоне.

Топлу къойдан, борю де къоркъар.

Халкъ уфюрсе — боран къопар.

Асыл киши алтын деп ольмез, халкъым деп олер.

Озюм ичюн тувгъанман, халкъым ичюн олермен.

Терек айры оссе де, тамыры бир.

Халкъ кечкен копюрден сен де кеч.

Халкъкъа хиянет — Ватангъа хиянет.

Халкъкъа хызмет — девлетке хызмет.

Джемаат сёзю — бирлик сёз.



Халкъны яманлагъан козьсиз къалыр.

Халкъкъа бирлик — къушкъа къанат.

Торгъай учса — топынен.

Халкънынъ тынчлыгъыны бозгъан аман къалмаз.

Досттан айырылгъан бир йыл агълар,
Ватандан омюр бою.

Ватансыз инсан — тюркюсиз бульбуль.

Ватан ичюн откъа тюшсенъ, янмазсынъ.

Эр шейден Ватан татлы.

Байнынъ кейфи кельгендже, фукъаренинъ джаны
чыкъар

Ачкозь молла джавдан бетер.

Агъызы къыйыш олса да, бай сёйлесин.

Байнынъ иши ферманнен, ёкънынъ иши дерманнен.

Байнынъ къулы — молла.

Фукъаренинъ аты олса — пичени ёкъ,
Пичени олса — аты ёкъ.

Молланынъ айткъаныны яп — япкъаныны ятма.

Имамгъа пара кельсин де, ким ольсе ольсин.

Олю козюнден яш — молла эвинден аш.

Байнынъ кучю джебинде.

Этме молланен базар, сонъуны дувагъа базар.

Байда олса: — Хайырлы олсун!
Фукъареде олса: — Къайдан алдынъ?

Молланынъ сарыгъына къор тюшсе,
Имамнынъ этеги туташыр.

Къызы барнынъ назы бар.

Къыз бешикте, джиези сандыкъта.



Къыз баланынъ къысмети кыркъ ерде.

Ашыкъкъан къыз эрге бармаз,
Барса да кунъ корьмез.

Къызынъ олса эль эвинде ятмасын,
Огълунъ олса базар ашына татмасын.

Огълан къанатлы ат олса,
Къыз къанатлы къуштыр.

Къыз тапкъангъа ай тувар,
Ул тапкъангъа кунъ тувар.

Келинни кельгенде корелер.

Киев къайнана топрагъындандыр.

Чокъ сѣзнинъ азы яхшы,
Къыз баланынъ назы яхшы.

Аналы къыз — къыналы къыз.

Киеви яхшы олса, къайнана огъуллы ола,
Киеви яман олса, къайнана къызсыз къала.

Киевинъ яман олса, къызынъдан корь,
Келининъ яман олса, огълунъдан корь.

Севги бир олса, эки юректе яшай.

Севги асретликнен сыналыр.

Ай ёлджынынъ ёлдашы,
Ашыкъларнынъ сырдашы.

Зорнен гузеллик олмаз.

Эр кимнинъ озъ Зореси бардыр.

Ашыкънынъ козю сокъур, къулагъы сагъыр.

Джан тартмаса, гонъюль севмез.

Богъдайнынъ яхшысы ерден,
Апайнынъ яхшысы эрден.

Яхшы къадын ишли олур,
Яман къадын тишли олур.



Яхшы къадын эв сабысы,
Яман къадын эль сабысы.

Эрсиз къадын, югенсиз ат.

Къызгъа келир юз киши,
Алып кетер бир киши.

Апрель кельсе буз турмаз,
Къуда кельсе къыз турмаз.

Корьмейиндже юзюни,
Айтмам генди сёзюмни.

Янгъгъыз софрасыны озю джыяр.

Янгъгъызлыкъкъа яр яхшы.

Бодененинъ эви ёкъ,
Къайда барса, сыйы ёкъ.

Достсыз баптым — тузсыз ашым.

Дост башкъа бакъар, душман аякъкъа.

Эски дост душман олмаз.

Дост къара куньде белли олур.

Агъзынъ толу къан олса да,
Душманнынъ янынъда тюкюрме.

Эмектен дост артар,
Ошектен — душман.

Яхшы деп юерсинъ,
Кунюнъ тюшсе, билерсинъ.


Эйилик яп да, дерьягъа быракъ,
Балыкъ бильмесе, халкъ билир.

Бир яманнынъ еди мааллеге зарары бар.

Къазма чукъур, озюнъ тюшерсинъ.

Яхшы ат торбасыны арттырыр,
Яман ат — къамчысыны.

Яхшыдан унер ал,
Ямандан ибрет ал.



Яхшыдан нам кѣлтыр,
Ямандан кѣан кѣалыр.

Яхшы ниет — яры девлет.

Яхшынынъ ичинде яманлыкъ турмаз.

Яланджынынъ шаады янынъда олур.

Йымырта косьтерип, бор туттурыр.

Яшлыкъ башкѣа бир келир.

Иш яшта дегиль, баштадыр.

Кѣарт кѣойнынъда кѣалач,
Кѣармаласанъ — комеч.

Акѣыл яшта дегиль, башта.

Бир яшлыкѣта, бир кѣартлыкѣта.

Кѣарт атнынъ тепмеси кѣатгы олур.

Чыкѣмагѣан джанда умют бар.

Олюмнен базарлыкъ олмаз.

Ольген кѣой борюден кѣоркѣмаз.

Ольгеннинъ артындан олюнмез.

Башкѣа тюшкенни козь корер.

Кѣуш ювада корѣгенини кутер.

Ана сютюнен кирмеген,

Тана сыртынен кирмез.

Кѣапы ачыкъ олса да, сорап кир.

Эманетке хиянет япма.

Акѣыллыгѣа айттым — анѣлады, бильди,
Акѣылсызгѣа айттым — шакѣылдады кульди.

Делиден догъру джевап.
Акъыл акъылдан устюн.
Къалпакъ ал десенъ, баш алыр.
Эв ясагъан балта тышга къалыр.
Кимсенинъ акъкъы кимседе къалмаз.
Бегенмеген къонушмасын.
Дагъ дагъгъа булунмаз,
Инсан инсангъа булуныр.
Инсан къадрини инсан билир.
Арслан изинден, йигит сѣзюнден къайтмаз.
Йигит адынен ангылыр.
Йигитнинъ башына нелер кельмез.
Ташны тутса сувыны чыкъарыр.
Батыр бир олер, къоркъакъ — юз.
Башынгъа тюшсе башмакъчы олурсынъ.
Алмакънынъ бермеси де бар.
Ит де олса — ырызы бар.
Ёлдан тапсанъ, сайып ал.
Адынъ чыкъкъандже, джанынъ чыкъсын.
Дагъ устюне къар олур,
Намуслыда ар олур.
Мусафирине коре сыйы.
Сорап бергенже, сокъып бер.
Ашынъ олгъандже, къашынъ олсун.



Чагъырылгъан ернинъ узагъы ёкъ.

Сыйлагъан сыйланыр.

Къапымыз ачыкъ төрюмиз бош.

Кельгенге къапы, кеткенге ёл ачыкътыр.

Ракъы кирер, акъыл чыкъар.

Саргъушлангъан дост душман олур.

Саргъуштан дели къачкъан.

Ичсень, акъылынынъны ичме.

Къаденинъ бири ярар,

Экиси къарар,

Учюнджиси зарар.

Сабырнынъ тюбю сары алтын.

Сув корьмезден папуч чыкъарма.

Хыяргъа коре, турупкъа шукюр.

Сыр сырны ачар, сыр да дертни.

От тюшкен ерни якъар.

Мераметтен дерт асыл олур.

Кеч олсун, хайырлы олсун.

Озю тояр, козю тоймаз.

Бир къолтукъкъа эки къаргъыз сыгъмаз.

Эчки — джан дердинде, къасап — мал дердинде.

Коктен не ягъгъан да, ер къабул этмеген.

Чокъкъа чапкъан, аздан къуру къалыр.

Аз берген джандан,

Чокъ берген малдан.

Эр ким илине, папий голюне.

Пахыл тоймаз, хырсыз онъмаз.



Сувгъа барып, сувсыз къайтыр.
Эльге къюу къызгъан, озю тюшер.
Усттен ялтрай, ичтен кълтырай.
Ернинъ де кюлагъы бар.
Копекке талангъандже чалыны долан.
Бою кесат, ичи фесат.
Бу ягъда бир къыл бар.
Атына кучю етмеген, арышыны тепелер.
Къазангъаны безенгенине етмей.
Шашкъан папий кюйрукътан далар.
Балыкъ баштан сасыр.
Къатыгъым къара деген олмаз.
Юз берсенъ, элли даа истер.
Къаведен кългъаныма янмайым,
Сырадан кългъаныма янам.
Ашлы эльден, суву гольден.
Къыш кышлыгъыны этмесе,
Яз язлыгъыны этмез.
Хораз чагъырмай, танъ атмаз.
Март къапыдан бакътырыр,
Къазма-курек якътырыр.
Апрельнинъ онуна,
Тувар минер ёлуна.
Тавукъ тюшюне тары корер.
Баш чалышкъанда, тиль раатланыр.
Бала сенинъ, амма баш сенинъ дегиль.
Бир тери ичинде кюй эм азар, эм семирир.
Бир башсызнынъ он мааллеге зарары бар.



Ине юткъан итдай.
Йип богъазына.
Къарда джорген джавкъындай.
Азыргъа дуваджы.
Эки якъасы бир кельмей.
Атешнен шакъа олмаз.
Арпа къылчыкъсыз олмаз.
Ёкъ — шейтандыр.
Я сырагъа, я невбетке.
Бильгенингъни сёйле, бильмегенингъни дингъле.
Зенаатнынъ яманы олмаз.
Илим саиби ач къалмаз.
Илимсиз адам — мейвасыз теректир.
Окъув ичюн ёкъ бир къарар,
Зиядеси бермез зарар.
Дюньягъа тоюлмаз.
Оджагъа, ана-бабагъа эткенингъ киби урьмет эт.





БАЛАЛАР ФОЛЬКЛОРЫНДАН НУМЮНЕАЕР

САЙЫЛАР

Эвелеме, девелеме,
Деве къушны къувалама.
Аппул, утпул,
Чыкъ да къртул.

(Топлагъан И. Майджы)

Ине, ине, изет ине,
Бекир ине,
Шама-шара, кумюштген пара,
Стамбулдан къыз кельген,
Бурумчыкънен туз кельген,
Орул-ёрул,
Уч да къртул.
Элеме-белеме,
Хатьме-хутьме,
Даре-дукку,
Араба къапу,
Зембелеге мин де, пыс!

Эльден, бельден
Бельбаш ичюн,
Сюйрю сенек,



Ёлдаш ичюн,
Тавукъ тепти,
Хораз опти,
Хан кызы селям этти, чыкъмая.

(Топмагъан Э. Османов)

ИНЕ

Ине-ине,
Изет ине,
Бекбав ине,
Бекир ине,
Шашкъайым,
Шатыргъайым,
Чыкъсын тилим.

ТЫРЫМТАЙ

Эбабилим,
Эбелем-тебелем,
Тельден эки,
Фырылдавукъ,
Бурма таякъ.
Таякъ деген,
Талгъы огюз.
Огюз деген —
Орьме къайыш.
Къара джоргъа.
Къайыш деген —
Джоргъа деген —
Джорум тай,
Джувурып чыкты
Тырымтай.

МАМАЙ БЕРСЕ

Элиф, бе, те, се,
Джум, Дал, Косе,
Анам мамайчыкъ
Берсе...



Къарнынъ ачса,
Къыргъа къач,
Къырдан санъа
Къыркъ къалач.
Отуз докъузын аша,
Бирин манъа ал къач!

ОН АЛТЫДЫР

Эки секиз
бир докъуз.
Эм йигирми,
Эм отуз.
Бешке болит,
Бир къошсанъ..
Он алтыдыр —
Инансанъ.
Инанмасанъ —
Сай да бакъ,
Он алтыдыр,
О мытлакъ.

(Топлагъан Ф.З. Джемпарова)



Элемеки, белемеки
Темир теки
Сексен эки бызылдавукъ,
Бозма таякъ
Акъ къуш, кок къуш,
Бош ауз тилинъни къыс.

(Топлагъан Ф. Мустафаева)



Давул такътым бойнума,
Чыкътым деве ёлуна.
Деве ёлу бит базар,
Бит базарда аю бар.



Аю мени кьоркьызды
Кьулагьымны чынълатты.

(Топлагъан А. Эмиралиев)



Эннан-меннан
Таштан джонгъан,
Обачыкъ тепечик
Къара юз копечик.

ЭРИШТИРЮВЛЕР

Оймакъ агъыз, фындыкъ бурун,
Юзюм козь, кьалем къаш,
Тахта манълай,
Къабакъ баш.
Чарыкъ агъыз, чокъмар бурун.
Патлакъ козь, чатма къаш,
Араба къапу,
Сенек сапу
Къолда ташы,
Эльде ашы,
Битли башы.
Тишсиз палу,
Араба къапу,
Гъыч-гъыч-гъыч.

ТЕЗАЙТУВЛАР



Эски ананънынъ токъмагъыны
топ-топ-топ,
Янғы ананънынъ токъмагъыны
топ-топ-топ,



Бир далда эки къартал,
Бири къарт къартал,
Бири яш къартал.
Яш къартал
Дал къакъар,
Къарт къартал
Дал тартар.



Эр кес мархамаланды,
Мен мархамаланамадым.



Оджакъ башында къартанай
Чорап, шалгъа джун тарай.
Къара сыгъыр баласыны ялай,
Анам бабама чорап ямай.



Ашамалы, ичмели
Шашмаламамалты.

(Зилан койлю, Анифе Умеровадан язып алынды)



Сарымсакъламалымы
Сарымсакъламамалтымы?

Къарт бабам къаргъаны
Къорадан къувды,
Къоркъудан къарт къаргъа
Къанатын къырды.



Къарчыгъа къаршында
Корюнген кузь куню
Къарылгъач къанаты,
Кемал Керимни кичкене коюнден
Кетирип къарчыгъа къаршында
Къалдырып кеткен.

(Байдарлы, Фатма Абитовадан язып алынды)



Шу къаршыдаки дагъда эки тильки,
Бири эркек, бири диши.
Эркек кюркю йыртыкъ тилькининъ кюркюню,
Диши кюркю йыртыкъ тилькининъ кюркюнюми
ямамалы, (ёкъса)
Диши кюркю йыртыкъ тилькининъ кюркюню,
Эркек кюркю йыртыкъ тилькининъ кюркюнюми
ямамалы?

(Байбуртлы)



Бизим азбарда бир чокъ алабота осе,
Бу алаботаларны алаботалатаджакъсынъмы,
Екъса алаботаламайджакъсынъмы?
Алаботалатаджакъ олсанъ, алаботалат,
Алаботалатмайджакъ олсанъ, алаботалатма

(Меинов)



Къайдан (юкъарыдан) эки тамна тамнай,
Бири меним манълайыма тамнай,
Бири анамнынъ манълайына тамнай.

(Байбуртлы)



Ашамалы (емели), ичмели, амма
Сачмаламамалы (шашмаламамалы).

(Байбуртлы, Меинов)



◆
Учъ тас къайсы хошафы.

(Байбуртлы)

◆
Арпачыкъ ашлагъан
Алиме апте
Агъзына аджыткъы,
Акъ арпа алгъан.

(Бекир Мемет огълундан язып алынды)

◆
Ашадан гелир топал чобан,
Ямап сатар чатал сабан.
Ничюн ясап сатар топал чобан
Чатал сабан?

◆
Къыркъ къулуплы къуп
Къулупы къыркъ къуп.



ТАПМАДЖАЛАР

I

Бир кыюм бар:
Эки тюрлю суву бар.
Бири сары, бири беяз,
Салласанъ да кыарышмаз.
(Иымырта)

Сув ичинде кыаясы,
Озюндедир маясы.
Онсыз емек ашалмаз,
Ашанъ, фена дейильмез.
(Туз)

Белин бувгъан,
Сувгъа далгъан.
(Макъарне)

Узун аралыкъ,
Ичи кыаранлыкъ.
(Труба)

Алчачыкъ терек
Анама керек.
(Ине)

Бир эвде бир занбакъ,
Сен де бакъ, мен де бакъ.
(Кузьгю)

Эки сохта куреше,
Аякълары тиреше.
(Макъас)

Тегерек аран,
Ичи боран.
(Элек)

II

Одаман орда,
Эки козю ёлда.
(Копек)

Устю пулчыкъ,
Ичи къылчыкъ.

(Балыкъ)

Аламан аякъ, алтын таякъ,
Джувурсанъ, етмезсинъ яланаякъ.

(Къоян)

Багъдан келир «оп-оп»,
Аякълары топ-топ.

(Балкъурт)

Пинди, пинди, пинди кетти,
Орталыкъкъа синъди кетти.
Шимди чыкъар корерсинъ,
Куле-куле олерсинъ.

(Кирпи)

Дагъда яшар дагъ киби,
Бойнузы пытакъ киби.
Эгилир сув ичмеге,
Багъырыр улакъ киби.

(Къараджа)

Зувул, зувул, зувул къушлар,
Койден узакъ тавда къышлар.
Озю ичюн азырлар,
Инсанларгъа багъышлар.

(Балкъурт)

III

Тишлери чокъ — тишлемей.

(Тырнавуч)

Аттан юксек,
Копектен алчакъ.

(Эгер)

Чапа, чапа, талмай,
Атнынъ пешинден къалмай.

(Араба)

Дагъгъа барса къутура,
Эвге кельсе отура.

(Балта)

Кетяйткѡан филь,
Аркъасында тасма тиль,
Акъылыпъ олса, ойлян да биль.
(Сабан)

IV

Алчакътыр даллары,
Инджечиктир беллери,
Ал риван къан идер
Алам десенъ эллери.
(Къызылчыкъ)

Чегирдеги татлыджа,
Озю олур сарыджа,
Багъчасына баргъандже,
Козюнь тоя егендже.
(Зердали)

Ешилъдир пальтосы
Сарыдыр костюмы.
Къыркъ тешиги бар,
Ичинде бешиги бар.
(Бадем)

Бир кичкене филь таш,
Ерге тюшсе сынмаз,
Япыджылар япалмаз,
Анахтарнен ачылмаз.
(Фындыкъ)

Асты джары, устю джары,
Ортасында бинъ бир тары.
(Инджир)

Яваш-яваш дал олур,
Ешилъ экеч ал олур,
Тутаджакъ олсанъ, сакът тут,
Эки элинъ къан олур.
(Къырмызы дут)

V

Башы ер астында,
Сачлары ер устюнде.
(Себзе)

Алчачыкъ бою бар,
Къадифеден тону бар.
(Мор патильджан)

Узунджа бою, ешилъдир сою,
Акътыр къаны, сувдыр джаны.
(Хыяр)

Ер астында джирен ат,
Атнынъ териси еди къат,
Соярсынъ да ашарсынъ,
Ашагъанда агъларсынъ.
(Согъан)

Къат, къат къатламчыкъ,
Къатламадан ап-ачыкъ,
Терек десенъ — япракъ,
Яткъан ери топракъ.
(Къапыста)

Башы ешилъ — емиш дегиль,
Устю къара — комюр дегиль,
Ичи безъ — пенир дегиль,
Къуйругъы бар — сычан дегиль.
(Къара туруп)

VI

Акъшам олса корюнир,
Саба олса джоюлыр.
(Ай)

Бир толым бар,
Эльге сыгъмаз,
Бир ягъы къара,
Бир ягъы безъ.
(Дюнья)

Эв тепесинде бир элек фындыкъ.
(Йылдызлар)

Биз, биз, биз эдик,
Отуз эки къыз эдик.
Тахтачыкъкъа тизильдик,
Танъ аткъанда джоюлдықъ.
(Йылдызлар)



Бир явурым бар:
Бутюн дюньяны кѡаглар,
Денъизни кѡагламаз.

(Кѡар)

Учь огюзим бар:
Бири ашар, тоймаз,
Бири кетер, кельмез,
Бири ятар, кѡакъмаз.

(Атеш, тютюн, куль)

Дагъдан келир,
Таштан келир,
Эгерленген Арслан келир.

(Сель)

VII

Анавы кѡырнынъ устюнде
Ильмек-чильпек отура,
Ильмек-чильпек астында
Кѡалем сызар отура.
Кѡалем сызар астында,
Джарыкъ йылдыз отура.
Джарыкъ йылдыз астында,
Булашыкъ токъул отура,
Булашыкъ токъул астында,
Джалмап-джутар отура.
Джалмап-джутар астында,
Сыйпап сары отура.
Сыйпап сары астында,
Тюпсиз кѡую отура.

*(Сач, кѡаш, козь, бурун, агъыз,
сакъал, кѡурсакъ)*

Еди тешикли токъмакъ,
Оны бильмеген ахмакъ.

(Баш)

Эки улукътан сув акъар,
Беш атлы кѡаршына чапар.

(Бурун ве пармакълар)

Сапсыз кѡашыкъ
Диваргѡа ятышыкъ.

(Кѡулакъ)



Бир келиним бар,
Кель, кель, десенъ, кельмей,
Кельме, кельме, десенъ, келе.
(Дудакъ)

VIII

Къаядан аттым парланмады,
Сувгъа тошти парланды.
(Кягъыт)

Агъач ичини ойгъанлар,
Ичине шейтан къойгъанлар.
Ялан айтса азгъана,
Къулачыгъыны бургъанлар.
(Кемане)

Эки тюрлю бир метий,
Увулдай да дувулдай,
Дувулдайгъа къарай да,
Зувулдай да зувулдай.
Зувулдайгъа къарай да,
Ырбанлай да тырбанлай.
(Давул ве ойнагъанлар)

Къат-къат къапыста,
Ичи толу кырмагъыста.
(Китан)

IX

Бир кичкене алаша,
Токътамайып чалыша.
(Саат)

Козълери яман ятгырай,
Кендиси дыр-дыр къалтгырай.
(Автомобиль)

Мында окюре, авлакъта тюкюре.
(Тюфек)

Узакътан келир выз-вызнен;
Еди бинъ йылдызнен.
(Сачма)





ЧЫНЪ ВЕ МАНЕЛЕР

ЧЫНЪ АКЪКЪЫНДА ЧЫНЪЛАР

Чынъ дегени недир о келиштирсенъ,
Чынъдан чекмен джабарман эриштирсенъ.

✓ Къарткъа яшкъа чынълашмакъ дегилъ айып,
Бир къач бейит айтайым хатринъ сайып.

Аджджы берсенъ де ич мугъаймам,
Чюнки чынъман яшагъан чин ногъайман.

Чынъ яхшы шей, чынълавны бильмек керек,
Чынълашкъанда джыламамакъ, кульмек керек.

Чынъ бильмеген джыйындан эрте къачкъан,
Шайтип байгъуш озъ сырын ачкъан.

Эвель яшлар чынъ айтып танъ аттыргъан,
Озьлерине эп-достны шай айттыргъан.

Чынъджы болсанъ, чынъны сувдай ичмек керек,
Тек, къардашым, башга ойлап-бичмек керек.



Чынъджыларнынъ токъалы, данеси бар,
Эр чынъджынынъ озъ тизген манеси бар.

Чынълагъанда акълынъны джыйып чынъла,
Чевредеки достларынъны суюп чынъла.

Чынъ айткъанда агъызынъ бир данедир,
Эшиткенде къулакълар бинъ данедир.

(Топлагъан Ш. Селимов)

ДЖЫЙЫНЛАРДА, ТОЙЛАРДА ЧЫНЪЛАНЫП КЕЛИНГЕН УМУМИЙ ЧЫНЪЛАР

Айдынъыз, къызлар, чынълайыкъ, гурделенсин,
Душман козю кёр олсун, перделенсин.

Аякъ тарта, джан сюе кельмеймен десем,
Котериле гонълюм сени коръсем.

Ах, дегенде джурегим тек джарылмай,
Джан севгенден файда ёкъ, тен сарылмай.

Авдарылсам ах, диймен онъымдан солгъа,
Дунья меним дер эдим, сен тюшсен къолгъа.

Ай мубарек авада, шавлеси джерде,
Теним джуре тентиреп, джаным сенде.

Айдай манълай, джайдай къаш, чолпандай козь,
Оймачыкъдай авуздан шекердай сёз.

Айтчы, дюльбер, айтчы сен бир къонайым,
Огърынъ неге джонемей, бозторгъайым?

Айвалыкътан сув акъар мейвалыкъкъа,
Къатип тозып турайым севдалыкъкъа?



Авзынъ ачсанъ корюне пирнич тишинъ,
Къолай, къолай битирсе, туткъан ишинъ.

Айланаман къаралтынъ, саяман ташынъ,
Къысмет этсе, ашарман пиширген ашынъ.

Акъ десем къальп къарара, козь торлана,
Сен шай десенъ, гурь юрек орталана.

Ай мубарек авада, шавлеси джерде,
Къавушсайдыкъ биз сенмен тез куньерде.

Айткъан сёзден ич дёнмем, къарардан къайтмам,
Ич адетим тувулдыр дост мугъайтмам.

Айткъан сёзюм элял эт эндиден сонъ,
Дердим кимге айтарман сен кеткен сонъ?

Акъ къафтанынъ этеги беден-беден,
Элмаз бетинъ саргъайгъан элеминъ неден?

Айва терек яз къокъур, къыш бурленир,
Джигитке инам ич олмаз, къыркъ турленир.

Алем кечкен копюрден, халкъ джурген джолдан,
Насибинъе табылгъан, къачмасын къолдан.

Байлайыммы башынъны, бош турсынмы?
Екъсам сенинъ яш башынъ зевкъ сюрсинми?

Бойдан-бойгъа эв салгъан, тахтадан сачакъ,
Сизлермен сурген коп девран унутылмайджакъ.

Ботен айткъан онъмасын, бойны урулсын,
Онъ къурулгъан пердеси, сол бурулсын.

Тёбен къарап, къол сильтеп, джурюшинъ суйдим.
Бир корьгенде мен сени джандым, куйдим.



ЯШНЕН КЪЫЗНЫНЪ КЪАРШЫ-КЪАРШЫГЪА КЕЛИП АЙТКЪАН ЧЫНЪЛАРЫ

Яш:

Мына селям, мен де кельдим,
Атымнынъ башын аджымай, джиберебердим.

Къыз:

Алейкум селям, хош кельдинъ, ах бир данем,
Атымны къайда байляйым, къыдырлез лялем.

Яш:

Мына селям алейкум, къара козь дюльбер,
Эгер башынъ бош болса, джавлыгъынъ бер.

Къыз:

Хош кельдинъ, козюм джарыгъы, саргъайып солдым,
Адымны язып, джавлыгъым бергендай болдым.

Яш:

Акълъ пасма къафтанынъ, сельби боюнъ,
Пешмансырап джуресинъ, недир оюнъ?

Къыз:

Пешмансырап, монъ тартып, джуремен далып,
Корьмегейдим джаныгъынъ, сонъгъа къалып.

Яш:

Къара кер атым эгерлеп, коюнъден кечтим,
Тюшомде сенинъ элинъден бир къаде ичтим.

Къыз:

Къара кер атынъ устюнде коюмден кечтинъ,
Къаде ичмей къолумдан, ашыкълыкъ ичтигъ.

Яш:

Бир корьгенде мен сени джандан суйдим,
Дюльберим, сенинъ дердинъден джандым да куйдим.



Къыз:

Ятсам ястыкъ сувлайман, турсам джавлукъ,
Мурадынъа ирерсинъ, тиле савлыкъ.

Яш:

Кечемен къапынъ огюнден, аралыкътан,
Сен сарардынъ, мен солдым севдалыкътан.

Къыз:

Ашагъан ашым аш дегиль, яшагъан яшым,
Эр кунъ къайгъы ичинде айлана башым.

Яш:

Ах, десем къатейим, дердим кучлю,
Кетеджекмен дюньядан окюнчлю.

Къыз:

Ольсем, озюм олейим, ольмесин сёзюм,
Сенинъ къайдынъ чекемен, сейдане козюм.

Яш:

Отлар джана ичимде, орман-перман,
Тапылмай экен бу дертке ич бир дерман.

Къыз:

Ах, деймен де, джылайман кяде-кяде,
Мурадыма ирмедим бу дюньяде.

Яш:

Ай авелеп, къуш къонар, когем сайлап,
Бир къоначыкъ корьгейдим, башынъны байлап.

Къыз:

Байлы олса баш байлы, аякъ, къол бош,
Меним санъа хатирим бинъден бир хош.

Яш:

Къаралдыкъ къафес, къафес, къапынъ терс, уюнъ чёльде,
Халкълар корер къоначыкъ, джанынъыз менде.



Къыз:

Къаралдынъ къафес, къапынъ терс, тобаны талда,
Шимди итибар арувда, экинджи малда.

Яш:

Ай авелеп учайым, беджерген тутсын,
Шекер, шербет олайым, истеген джутсун.

Яш:

Бабанъ санъа фес алъан борджъа батып,
Чынъламасанъ не кельдинъ ер къапатып?

Къыз:

Базаргъа хабер джибердим ат патлатып,
Бир араба чынъларым келеятыр.

Яш:

Садефли курсю устюнде келямым бар,
Он эки алтын, бир пошу селямым бар.

Къыз:

Къаш къарагъа авесмен, козь элягъа,
Севмезим селям джиберген, бакъ белягъа!

Яш:

Айттырайым бабанъа, берсе алайым,
Джанынъ истеген ерлерге эв салайым.

Къыз:

Айттырсанъ бабам ич бермез, анам севмез,
Сендай эткен сойына киевим демез.

Яш:

Бабанъа барып ялвармам, ананъдан сормам,
Бунъа дерлер йигитлик, алырман зорман.

Къыз:

Денъиз четтен буланыр, ортадан тынар,
Пек юксектен учасынъ, къанатынъ сынар.



Яш:

Бай баласы дегилтим, айлыгъым — элли,
Дегенин эткен йигитим, эр кеске белли.

Къыз:

Меним бабам бай киши, йигит сайлай,
Юз кумюшлик алашаны сачакъкъа байлай.

Яш:

Ай къатында бир йылдыз, айгъа тартыкъ,
Бай баласы болгъанчюн кимден артыкъ.

Къыз:

Ай тюбюнде бир йылдыз, ай баласы,
Алтын тастан сув ичкен бай баласы.

Яш:

Сенинъ эвинъ теренде, коралмайман,
Не къальбте джургенинъ билялмайман.

Къыз:

Акъшам ах, деп ятаман ай баткъандже,
Адынъны айтып джылайман танъ аткъандже.

Яш:

Сенинъ фесинъ сары алтын, сачынъ къундуз,
Агъызынъдан чыкъкъан джевабынъ къуйрыкълы йылдыз.

Къыз:

Оте-кете джуресинъ, къарамайсынъ,
Уйпалашкъан перчеминъ тарамайсынъ.

Яш:

Къарчыгъагъа чыкъарсынъ, минерсинъ ташкъа,
Кой ичинде джурюшинъ алемден башкъа.

Къыз:

Явлыкъ ал да, явлыкъ бер, пей больш къалсын,
Эшиткенлер ах десин, корьгенлер шашсын.



Яш:

Багъчаларда кестане дане-дане,
Аладжагъым дюньяда тек бир дане.

Къыз:

Еккен атынъ ал тору, тельбеви тельден,
Козюнъни ач, йигитим, кетерим эльден.

Яш:

Бир алманы болейик, эки этейик,
Эки гонюль бир олса, джур кетейик.

* * *

Ал къадифе джибердим, киермисинъ?
Агъамдан къуда джибердим келирмисинъ?

Ал къадифе олмаса, мору олыр,
Сенинъ агъанъ олмаса, башкъасы олыр.

Биз бир четте багъча эдик, маальсиз пиштик,
Айырылмаз къозу эдик, айры тюштик.

Базарларда сатылгъан топ-топ явлыкъ,
Мен эвими ясатгым, сангъа савлыкъ.

Ягъмур ягъар, къар ягъар, буберликке,
Сизинъ киби бармы экен дюльберликте?

Кокте йылдыз пек сийрек, ай тегерек,
Тийменъ меним яреме, озюме керек.

Мезарлыкъта къой бакътым, ызым къалды,
Шу маледе бир къызгъа козюм къалды.

Айланайым дер эдим, алдымда къыр бар,
Мен айланып кельгендже сени алырлар.

Аттым, урдум айваным, къозгъадым талман,
Сейлечи, ярем, сейлечи, сёюнъе зарман.



Алейкум селям, ах, лялем, хош кельдинъ гулим,
Санъа яман айтмагъа бармай тилим.

Фесильген эктим къорагъа, къокъламагъа,
Ал торы атым, сав болсын ёкъламагъа.

Бир оркенде беш къавун багъар битин,
Ичимде меним от джана, чыкъмай тютюн.

Кой алдында чагъала сувгъа дала,
Шу бир койде бир къыз бар, акъылым ала.

Мавы шали антерим, ал явлыгъым,
Ятып, турып истерим джан савлыгъым.

Мына селям алейкум, гедженъиз хайыр,
Ишге дёрт козь барабар суйгенинъ айыр.

Он эки тюрлю орнек бар ал явлукъта,
Ойнайыкъ да, кулейик джан савлукъта.

ЭСКИ ДЕВИР ЧЫНЪЛАРЫНДАН

Чалышмакъ бизге бедава, акъ демек айып,
Фукъареге яшайып дюнъяда гъайып.

Эвим бар деп кирмеге аякъ тартмай,
Тиленип байгъа бармагъа юзюм батмай.

Ичкен сувым быланыкъ, савутым бакъыр,
Отурмагъа ерим ёкъ, эвим такъыр.

Афталардан оджакъта от якъмайман,
Пиширмеге балларгъа аш тапмайман.

Чобан, ыргъат джуремиз мырзада, байда,
Не ярыкъ бар, не шавле кунеште, айда.

Ыргъатнынъ ашы шорба, я да умач,
Эки кунъ бираз токъ болса, беш кунъ о ач.

Абдырай меним аягъым, къалтырай теним,
Ашамагъа аш тапмай, ах дегеним!

Бай сарайда отурыр, фукъаре уйде,
Недайын зевкъ оладжакъ бундай койде.

Анам, олпом айдалды къуру суюкмен,
Келеджекте мен байгъа джурмейджекмен.

Чарыкъ бавым коселе, чарыгъым къайыш,
Бай дегенде ич олмаз хатыр сайыш.

Яткъан ерим къазарма, ичкеним борч,
Онъ къолымда тюфегим, солымда къылыч.

Падиша дейлер, бай дейлер, алдайлар бизни,
Бездик дженктен, анайлар, сагъындыкъ сизни.

ТАПМАДЖАЛЫ ЧЫНЪЛАР

Маналы чынъ айтайым, манасын тап,
Къарчыгъасын чыкъармай, тёпесин джап.
Ойланаман къалиптен, шайдыр деймен.
Къарчыгъасы чыкъмагъан къабирдир деймен.

Эки эгиз къочанай, эмди анасын,
Джайрап джаткъан чечекнинъ бер манасын?
Эки эгиз къочанай — геджемен кунъдюз,
Джайрап джаткъан чечекнинъ манасы — йылдыз.

Алтмыш тору, юз сексен чал ат,
Мыхыман, налы къач этер, эсабын айт?
Учъ юз бингъмен, бингъ бир юз мыхман налын,
Акъылынънынъ дерени, тилигънинъ балы.



Япракъсыз ешерир, джавунсыз осер,
Недир онынъ манасы кунъдюз пишер?
Ченггель фесинъ чекенъде, алтыннынъ чюйде,
Джавунсыз, кунъсюз кыыз осер салкын уйде.

Секиз джанлы, дёрт джансыз, эки айланма,
Шу бир чынънынъ манасын коп ойланма,
Секиз джанлы огюздир, дёрт моюнса,
Эки айланма тегеречик, таптын айса.

Бу кунъ тувган бир бала, кырккына джетмей
Ольген десенъ джаны бар, дюньядан кетмей?
Айдыр онынъ манасы бильгенлер айтар,
Кырккына джетмей отузда даима кыйтар.

НОГЪАЙ БЕЙИТЛЕРИ



А-а-ай!
Джылкы ичинде сюер атым, ав,
Темир де коктир,
Джувурьшын бильмеймен, ав,
Джорюши коптир.
Озюмни озюм макътайман, ав,
Кой ичинде,
Мени ал деп, джурген кызлар, ай йигитлер,
Яман да коптир, эй-эй!...



А-а-ай!
Джылкы ичинде сюер атым, ав,
Джирен байтал,
Эй, эгечи, жылкымны, ав,
Бу якъкъа кыйтар.



Джаш келинмен дост болсанъ, ав,
Байына айтар,
Арув кызман дост болманъ, ай йигитлер,
Къарувынъ къайтар, эй-эй!...



А-а-ай!
Чыбыртма, джылкыым, чыбыртма!
Чыбыргъандан сонъ,
Шыбырткыымны ерге урып,
Шыпыргъандан сонъ.
Арувман деп макътанма сен,
Байнынъ кызы,
Къабыргъанъда эт къалдырмам
Сыдыргъандан сонъ,
Сенден арувын табарман, а-ай,
Къыдыргъандан сонъ, эй-эй!...



А-а-ай!
Бир айдай, эки айдай, ав,
Учъ айдай,
Ногъайнынъ бир кызы бар
Тувгъан айдай!
Къашлары бар къайтандай, ав,
Къолу джайдай,
Сачлары орюльген, къылгъанлай,
Созып салгъан джыландай, ай-ай,
Кокреги къалкыкъ, томалакъ,
Тостакъандай, эй-эй!...



МАНЕЛЕР

Кок гогерджин олайым,
Азбарыпга кьонайым.
Айлыкъ дегиль, йыллыкъ дегиль,
Омюрлик ярень олайым.

Къая тлюбюнде чокъракъ,
Сен гуль олсанъ, мен япракъ.
Кель экимиз сарылайыкъъ,
Душман козюне топракъ.
Ай догъар — ай ашыгъы,
Кунъ догъар — кунъ ашыгъы.
Къаерлерде юресинъ,
Гонълюмнинъ ярашыгъы?

Ялыгъа бакъар къырлар,
Сувда ойнар балыкълар.
Эр кеске байрам, той,
Бизге мушкюль яныкълар.

Къаршыдан коръдим сени,
Ал гулюм сандым сени.
Къокъламагъа къыймадым,
Эллерге бердим сени.

Багъча боюн доландым,
Мен достумны ойландым.
Достумдан мектюп алгъан сонъ,
Пек зияде къувандым.

Десте-десте къамышлар,
Къызлар нагъыш нагъышлар.
Нагъышласа нагъышлар,
Севдигине багъышлар.

Мавыдыр юзюгим ташы,
Янды юрегим башы.
Якъты да мени яндырды,



Къарасувнынъ бир яшы.
Акъ антерим дѣгмели,
Козъчиклери сюрмели.
Сенинъ чюрюк къальбинъни,
Кимден сорап бильмели.

Ал кягъыгъ, сары кягъыгъ,
Агъларым саат-саат.
Меним достум узакъ ерде,
Нидже олсун джаным раат.

Дерелер акъмакъ иле,
Джанынъны якъмакъ иле.
Чиркинлер гузель олмаз,
Чокъ алтын такъмакъ иле.

Мердивеним къыркъ аякъ,
Къыркъына урдум бир таякъ.
Ярем келе деселер,
Не эль тутар, не аякъ.

Сырма сачлар къарышыкъ,
Мен санъа олдым ашыкъ.
Сен хатриме тюшкенде,
Элимден тюшер къашыкъ.

Къаранфиль оюлырмы?
Атешке къоюлырмы?
Сенинъ киби гузельге,
Дюньяда тоюлырмы?

Къаштарынъ къарасына,
Гуль къойдым арасына.
Кель бир мане сѣйлейим,
Юрегинъ ярасына.
Чалдыгъым бир кемане,
Яздыгъым чокъусы мане.



Юз яшасанъ тоюлмайджакъ,
Зевкътыдыр бу земане.

Къая къаягъа бакъар,
Къаядан селлер акъар.
Окъумышлар тургъанда,
Джаиллерге ким бакъар.

Мане, мане, манелер,
Не бахытлы анелер.
Къызы эким, огълу оджа,
Малледе бир данелер.





АЛИМ АКЪКЪЫНДА РИВАЕТАЕР

КЪАРАВУЛЛАР МЕЙДАНЫНДА

Къарасувбазарнынъ Къарагъачкъа таба тарафында «Къаравуллар мейданы» деген бир мейданлыкъ бар. Бу мейданлыкъкъа Алим эр заман келип-кете тургъан, лякин онынъ мында келип кеткенини ич кимсе бильмей экен. О Къарасувбазарда олгъан бутюн тойларгъа келе, яшларнен берабер отура, олардан тырнакъ къадар чекинмей экен.

Куньлернинъ биринде Алим Къарасувбазаргъа суннет тоюна тюшкен. О той саибининъ эвинде ятып къалгъан. Тойнынъ сабасына Бобович озюнинъ каясы ве судьясы Аджы Селяметнен берабер Къарасувбазарда яшагъан зенгинлерни ве эсир койлюлерни тоглап, Алимни тез куньлер ичинде тутмакъ акъкъында падишанынъ эмири чыкъкъаныны ве бу эмир боюнджа шимди эр кесни силяланып, Алимни къыдырмагъа чыкъмаларыны меджбур эткенлер. Бу хабарни шу саат Алимге етиштиргенлер.

Алим яткъан еринден турып:

— Айды, ойле олса, мен оларгъа озюм барайым! — деген.

Арасы чокъ кечмеден, Къарасувбазарда олгъан байлар, мырзалар тюфек, къылыч, къама, пыштав такъынып чыкъкъанлар. Эсир койлюлернинъ эллерине исе, не расткельсе, оны туттуруп чыкъаргъанлар. «Къаравул мейданында» топлангъанларнынъ ич бирисининъ эли бош дегиль экен. Кимиси, демир сенек, кимиси балта ве пычакъ алгъанлар. Булар Алимни къыдырмагъа кетеджек



олып турган арада, Янъы Джами мааллесинден бир тоз-думан ве ат аякъларынынъ патырдысы къопа, тап ерниинъ биле, титрегени дуюла экен. Мейданлыкънынъ башында бир атлы пейда ола. Бу атлы халкъ уюрими олгъан ерге бир келиш келе амма, корьмелисинъ! Бу атлыннынъ кельгенини корьген, Бобовичнинъ къясы абдырап башлагъан. Халкъ экиге болонген. Атлы догъру Аджы Селяметнинъ къаршысына келип:

— Огъурлар ола, Селямет агъам, меним эшиткениме коре, бугунъ сиз Алимни якъаламагъа чыкъкъансыз! — дегенде, Аджы Селяметнинъ чырайы тюрленип башлагъан.

— Абдырама, Селямет агъам, абдырама! Мен сизни чокъ заметке къоймаджакъ олыш, озюм кельдим. Къана, козь батыргъан союнъыз, тутунъ мени! Мен Алиммен! Бакъ, силя котерген союнъыз башсыз къалмасын! — деп Тозлу-Торугъа эки къамчы ургъан ве бир даа Алимни булсанъ ал!

Алимнинъ бу сёзлерини эшиткен зенгинлер, дерсинъ таш, демир кесильгенлер. Лякин Алим кеткен сонъ, «Къана, не атмадынъ? Сен не атмадынъ?» деп, бири-бирини сёге экенлер. Алим шу ерден, догъру Алмагъа баргъан. Анда къавеге кирип ашагъан, къара къаве ичкен ве кене атына минген де, Алманы кечкени киби, келеяткъан 40 керванны токътатып шейлерини тутып алгъан ве фукъарелер арасында даркъатып берген.

Кунылерден бир кунъ, кене Алим Кефеге кеткен ёлда почтаны беклеген. Почта бираз кечикип кельген олса да, Алим почтанынъ келеджегини билтип, анъдырып тургъан. Почта келеяткъанда, Алим бирден онынъ огюне чыкъкъан, амма помещик оны апансыздан аткъан ве бу ерде Алимнинъ аты ольген, озю исе, аякътан яралангъан. Алим кене къачып къуртулгъан. О дагълар ичинден, гизлене-гизлене догъру меним къартбаамнынъ чалашпына кельген де:

— Умер агъа, мени бир помещик атты, лякин о да сагъ къалмаз, сиз Умер агъа, Аджы Мамуткъа барынъыз да айтынъыз онъа, келип меним аягъымдаки сачмаларны чыкъарсын, — деген.

Аджы Мамут, о вакъыт пек метинли экимлерден экен. Ана бу эким Алимге бир саанъ сыйлы аш да ясатып, догъру къартбаамнынъ чалашпына кельген, Алимнинъ аягъындаки сачмаларны чыкъаргъан сонъ, къайткъан. Меним къартбаам Алимге чокъ ярдымлар эте экен. Бунынъ ичюн, оны суд этип, тюрьмеге биле къапагъанлар. Сонъундан къуртулгъан.

Бир кере даа шай олгъан. Багъча-элининъ помещиги эр кунъ Алимни кыдырмагъа адам джибере ве бутюн ёлларнынъ башына къаравулар салдыыр экен. Бир кунъ, Алимни кыдыргъанлардан бир къачы, къартбабам къаравуллыкъ эткен ерге келип:

— Алимни корьмедингъизми, къартым? — деп сорагъанлар.

— Ёкъ, корьмедим! Я оны менден не сорайсынгъыз, мен Алимни излеп джурмейим де гъалиба? — деген. Лякин шу вакъыт, Алим онынъ чалашы ичинде ята экен. Къартбабам эшиткенини Алимге келип айткъан. О:

— Къана не тарафкъа кеттилер, — деп еринден тургъан. Къартбабам Биели тарафыны косьтерген. Алим бир къач керелер сызгыргъан сонъ къартбабама:

— Языкъ, къартым, шуларны нафиле къачыргъансынгъ. Кетиргейдинъ чалашкъа, отурышпыр, лаф этер эдик. Бельки къайтарлар, не дейсингъиз?

— Ёкъ энди кельмезлер.

— Ойле олса, кетмек керек.

Къартбабам бир даа бакъса, чалашкъа догъру джелювнен кельген бир атны корьген. Бу ат Алимнинъ огъуне келип токътагъаны киби, Алим онынъ аркъасына сычрап минген де:

— Айды, сагълыкънен къалынгъыз, Умер агъа! Мен даа келирим! — деген.

Арасы чокъ кечмеден о оны араштырып джурген адамларнынъ пешинден еткен де:

— Огъурлар ола, ёлдашлар! Ёлунгъыз къаякъкъа?

— Къайдадыр дейсингъ, къардашым, бизим помещигимиз чибинге девни юттуртаджакъ ола, бизге Алимни кыдырта. О Алим, биз киммиз, биз онынъ янында чибиндирмиз, бу ич оладжакъ шейми?

— Я сизлер ким оласынгъыз?

— Эсир койлюлер.

— Ойле олса, мен сизни азат этем, сиз шимди догъру Смаил мырзанынъ сарайына етишингъиз де, айтынгъыз, Алим онгъа мусафирликке бараджакъ ола, бундан да гъайры, бугуньден сонъ «Чешмели терек» янына келип токътап, раатлангъан койлюлернинъ озьлерине ве айванларына къылынмасын. Эгер бугуньден сонъ да токъунса, мына бу тобулгъы къамчымнен аркъасыны сындырырым, ангъладынгъизмы? Мына, мен Алимим! Айды, тез кетингъиз ве меним



айткъанларымны онъа илле айтынъыз! — деген. Эсир койлюлер Алимнинъ айткъанларыны, Смаил мырзагъа бильдиргенлер. Лякин Смаил мырзанынъ огълу Мемиш, «Чешмели терек»ке келип токътагъан койлюлерге кылынмакъны эп девам эткен. Алим буны эшиткен. Бир кунъ гедже, Алим Мемишнинъ эвине барып, онынъ аркъасыны къамчынен тилим-тилим тилип алгъан ве эгер кене кылынмакъны девам эттирсе, бир даа кельгенде ольдюреджегини айткъан.

Шу ерден Алим Къарасувбазаргъа кельген, бираз отурып эгленген сонъ, экинджи куню бир даа келеджегини айтып, кеткен.

Бу хаберни, Бабаджангъа ве полициягъа кимдир бильдирген. Полиция каясы бутюн зенгинлерни силяландырып, Алимнинъ келеджек ётуны зынджырлап алдыргъан.

Алим Къарасувбазаргъа догъру кельгенде, бу алны сезген. Бираз вакъыт оларгъа индемеген, якъынлагъан вакъытта къолуна балкъ-балкъ этип, кумюш парылдагъан кылыгыны ала ве:

— Достум олгъанлар бу тарафкъа, душман исе, къаршыма чыкъсынлар! — деп кылыгыны онълу-соллу сильтеп башлагъан да, душман алкъасы ичинден къачкъан. Алим кеткен сонъ, бираз вакъыт къоркъуларындан эслерини тоглап оламагъан байлар, мырзалар бири-бирине:

— Сенинъ тюфегинъ аттымы? Я сенинъ тюфегинъ, пек къоркътынъмы, — деп сораща экенлер. Бу ерде зияде къоркъкъан бир зенгин янындаки дигер зенгинге:

— Озюм къоркъмадым, амма юрегим тырым-тырым ойнады, — деген.

*(Къарасувбазарлы, 82 яшындаки
Эмир-Асан Сеиптя къарттан 1939 сенеси
язылып алынды)*



АЛИМНИНЪ КЪАПАТЫЛМАСЫ

Алим Копюрлю койде догъган. О сабийлигинде, бабасындан оксюз къалган. Оны, Карасувлы Къурт Сеит деген киши, эвлятлыкъа ала. Алим бу адамнынъ элинде осе ве буюй.

Бу вакъытта, Къарасувда Абрам деген, зенгин бир караим да яшай экен. Бу караимнинъ буюк тюкяны бар экен. Бир кунъ, о япкъан алыш-веришининъ келирини явлыкъа сарып, секиз-он яшында олгъан къызынен эвине ёллагъан, ёлда бу къызнынъ огъоне хырсызлар чыкып, элиндеки парасыны тутып алгъанлар ве озюни де къувлап джибергенлер. Абрамнынъ къызы агълай-агълай, эвлерине кельген ве ёлда огъоне хырсызлар чыкып, параларыны тонагъанларын айткъан. Шу куню, саба Алим ишке кетейткъанда ёлдан бир явлыкъ тапкъан.

Абрам параларыны тапмакъ ичюн чокъ чапкъалагъан, лякин бу ишни ким япкъаныны тапып оламагъан сонъ, полициягъа бильдирген. Лякин полиция да хырсызларны тапалмагъан.

Арасы бир къач вакъытлар кечкен. Кунълерден бир кунъ саба, Алим Абрамнынъ тюкянына шей алмакъ ичюн кельген. Алим бу вакъыт, Къарасувда энъ зенгин караимлерден сайылгъан, Бабовичнинъ хызметкары экен. О тюкяндан, Бабовичнинъ сымарлагъан бутюн шейлерини алгъан сонъ, ана шу ёлдан тапкъан явлыкъыны чыкъарып алгъан шейлерини саргъан вакъытта, тюкянджы Абрам бу явлыкъны коръенинен Алимден:

Сен бу явлыкъны къайдан алдынъ? — деп сорагъан. Алим:

— Бир къач кунъ эвельси ёлдан тапкъан эдим, — деп джевап берген.

Абрам бу ерде Алимнинъ якъасына ялышып:

— Бакъ-бакъ, хынзырнынъ баласына, ёлдан тапкъан экен! Шимди мен санъа явлыкъны къайдан тапкъанынъны айтарман! — деп, шу ерде Алимни полициягъа туттургъан. Алимни ботен ерде, полиция алып кетип тюрьмеге къапагъан.

Алим бу вакъыт 17—18 яшларында бир йигит экен. Алимни къапагъан ве сонъундан макеме этип Къырымдан тышкъа, арестантлар ротасына ёллагъанлар. О бираз вакъыт анда булунгъан сонъ, къачмакъ чарелерини коръген ве къачкъан. Кене Къырымгъа къайтып кельген. Дагъгъа кетмекни къарар эткен ве савлукълашып анасына:

— Мени ботен ерде хырсыз деп, джезаладылар. Мен озь къолларымнен оларнынъ акъларындан келеджекмен. Мында къалсам,



эп бир мени тутарлар, мен дагыгъа кетемен. Иште, бугуньден сонъ меним эвим-баркъым шу къаршыдан корюнген юксек дагылар оладжакътыр. Мени, сиз эр кунъ шу дагыларнынъ ичинден була билирсинъиз. Мен сизни ич унутмам: келир-кетерим, — деп чыкыш кеткен. Анасы озъ эвлядыны козьаш тѣкип озгъаргъан.

Алим, кимерде, геджелейин шеэрге тюше, анасынен корюше ве кенедагыларгъа чыкып кете экен. Бираз вакъытлар шай яшагъан сонъ, Алим озюне бир ат пейдаламакъны тюшюнген. Бу вакъыт, Къарасув орталарында яшагъан зенгинлерден бирисининъ джуйрюгини тутып алгъан ве озюни къорчалмакъ ичюн пыштав, къылыч, къама такъыштыргъан.

Алим озюне ат ве сила такъыштыргъан куньонден башлап, озюнинъ душманлары олгъан помещик, базиргянларнынъ ътуны кестирип башлагъан. Олардан алгъан параларны фукъарелерге дагыткъан.

О Къарасувгъа тюшкен сайын, онъа хыянетлик эткен базиргян Абрамнынъ къалысыны пыштавнен атып, дельме-тешик эте экен.

Алим озъ атыны джапларгъа тырмашмагъа, къоркъунчлы сырымлардан кечмеге, джаптан ашагъы догъру атламагъа огрете, алыштыра экен. Алимнинъ аты озю киби пек атик, къоркъу билъмез олгъан.

Кунылернинъ биринде о, Мавлюш коюне якъын олгъан «Чегерлик Алан» деген ерде, юкълэгъан ве атыны исе, кушенлеп отламагъа джиберген. Бу вакъыт зенгинлерден бириси, Алимнинъ юкълэгъаныны корип, аман полициягъа хабер эте. Полиция бу хаберни алгъаны киби, Алимни тутмакъ ичюн, атлы аскерлер джиберген. Атлы аскерлер бу аланнынъ этрафыны сарып алгъанлар. Алим, атынынъ зияде кишнегенинден абдырап уянгъан ве бакъса, не коръсин, озюнинъ этрафыны аскернен сарып алгъанларыны корьген. Лякин о, ич абдырамагъан. Яваш-яваш еринден тургъан, атынынъ кушенлерини чезген ве чар-чабик эгерлеп, аркъасына минген. Энди аланнынъ тѣгерегини сарып алгъан аскерлер исе, алкъалап, Алимге таба эп якъынлаша экенлер. Озюне къаршы кельген аскерлерни корьген Алим, аман къылычыны чыкъарып:

— Чекилинъиз! Ёл беринъиз! — деп, къылычыны онълу-солту саллап, тоз-думан къопарып, аскерлернинъ янынъдан кечип кеткен. Аскерлер оны тутаджакъ олып, чокъ къувалагъанлар. Амма Алимни булсанъ ал!

Биркъач вакъытлар кечкен сонъ, Алимни сытма хасталыгъы туткъан. Онынъ джурмеге биле, меджалы къалмагъанындан, кунылернинъ биринде, Джелятмырзанынъ къошуна барып, ятып къалгъан. Чобанлар

оны баягы вакыт бакъжанлар. Бир кунъ акъшам, чобанларга аш ташыган бала, къопта, бельгисиз бир адамнынъ хаста яткъаныны корип, Джелал мырзага келип айткъан. Джелал мырза бу бельгисиз адамны Алимдир деп, къарарлаштырган ве озюнен берабер полиция адамларыны алып, къошуна кеткен. Полиция адамлары къошны сарып алганлар. Олар къошкъа кельгенде, Алим пек хаста олгъанына бакъмадан, оларнен чатышкъан ве озюни туттурмамакъ ичюн чокъ тырышкъан. Лякин, оны бирден басып туткъан ве къолларыны, аякларыны багълагъанлар. Джелал мырза онга эки шамар урган. Бу вакыт, Алим Джелал мырзага:

— Сен йигит дегиль экенсиң! Эгер сен йигит олган олсанъ, мени эллеримни багъламаздан эвель урар эдинъ. Шимди мени, эллерим багълы олганда, уфачыкъ бир бала да ура биле, — деген. Бу ерден Алимни полицияга алып кетелер ве сонъундан тюрьмеге къапайлар.

*(Судакъ районы, Отуз коюнде яшагъан
К.Н. Добченкодан 1937 сенеси язылып алынды)*

КЪУЛАКЪСЫЗ АЛИМ

Къарасув орталарында, Мамбетлан коюнде факъыр бир койлю бар экен. О бутюн омрю бою, помещиктен борджга ер, ашлыкъ алып, къапысында олган эки огюзчигинен сабанджылыкъ этип кечингенинден, эр сене помещикке борджлу къала экен. Йыл-йылдан, койлюнинъ помещикке олган ашлыкъ ве онлама борджлары арткъан. Койлю бу бордж одевни, помещикке чалышмакънен битиралмагъан. О помещикке чалышкъан сайын, борджлары да эп чокълаша экен.

Помещикке олган борджуны одемек ве факъырлыкъ себебинден къач сенеден берли эвлендирип оламагъан, нишанлы огулунынъ тоюны япмакъ ичюн, къапысында олган эки огюзчигини базарга кетирип, сатмагъа къарар берген. Шай да япкъан. Лякин бу факъыр, огюзлерини сатып, базардан коюне къайтаткъанда, ёлда алансыздан, онынъ алдына бир атлы чыкъкъан да:



— Чыкъяр параларыңны, мен Алиммен! — деп къяртның параларыны тутып алған. Нишлейджегини бильмеген къярт, агълай-агълай коюне догъру кеткен. Ёлда онъа бир атлы даа расткельген. Къяртның козьаш тёкип агълагъаныны корьген бу атлы, Алим экен. О:

— Не агълайсынъ я, къяртым? — деп сорагъан.

— Насыл агъламайым, меним къяпымда, малда-джанда эки огюзчигим бар эди. Мен, помещикке олгъан борджумны одемек, эм де нишанлы огълумның тоюны этмек ичюн, огюзлеримни базардан сатып къяйтаята эдим. Бу ерге кельгенде, ана шу Алим деген, динсиз ёлумыны басып, параларымны тонап кетти, — деген Алим:

— Насыл Алим, сен шашгынъмы шу? Аты не дайын эди, къяртым? Не тарафкъа кетти? — деген.

— Джирен къашкъа эди, алла бойнуны урсун! Шеэр бетке кетти, балам, — деп айткъан.

— Ойле олса, къяртым, сен бу ерде мен кельгенджек отурып тур» — дей де, шу айдутның пешинден къувып кете. Арасы чокъ кечмеден, Алим бу эрифни тутып кетирген ве къярткъа:

— Сенинъ параларыңны алгъан Алим бумы, къяртым? — деп сорагъан.

Къярт айтмагъа къоркъа, къялтырай экен. Лякин Алим:

— Къоркъма сен, къяртым, айт! — дегенде, къярт:

— Эбет, бу эди, балам, — деген.

Алим, къяртның параларыны алгъан айдутның устуне, къяузгун киби атылып:

— Чыкъяр, къяртның параларыны, хыңзыр эриф! — дегенинден, къяртның ёлуны баскъан хырсызның козьлери, къоркъусындан патлап чыкъаязгъан.

Озюни Алим деп, адландыргъан бу хырсыз, аман джебинден къяртның параларыны чыкъяргъан. Алим оның къяолундан параларыны алып, ёлджу къярткъа берген де:

— Сай да бакъ, къяртым, параларың текмильми? — деген. Къярт параларны сайгъан сонъ:

— Текмиль, балам, текмиль, сагъ ол, сексен кумшош эди, — деген.

Алим бу вакъыт къярткъа:

— Алим керчектен де Алимдир, о бу дагъларның огълу ве дагъ къярталларының агъасыдыр. Алим хырсыз дегильдир. О ич бир

вакыт, фуқараларның джанып ағыртмай. Оларға эйиликген башқа ич бир шей япмай. Иште, бунның ичюн, олар Алимни севе ве оның адыны намландыралар! Амма бу — копек. Оны атмак керек, кьартым, чюнки о кьутурган!..

Сонъ, кене айдуткьа чевириле де, шойле дей:

— Эй, достум, биз Къырымда эки Алим олдыкъ, шимди бизни халкъ яхшы танып оламаз. Шай олган ерде, бир де биримизде бир нишан олмак керек, — деп, аман къамасыны чыкъарып, кьартның козю огюнде, оның ётуны баскъан хырсызның кьулагъыны кесип алган.

— Сен кьулакъсыз Алим ол, мен де кьулакълы Алим олайым! Бу вакыт, халкъ да бизлерни, башкъа-башкъа Алимлер олгъанымызны анълар, — деген. Бу ерде, Алим бир даа кьарткьа:

— Кьартым, Алим мына менмен! О, хырсыз эрифнигъ бирисидир, — деп шу ерде кьойнундан юз кумюш даа чыкъарып кьарткьа берген. Кьарт бу параларны да алып, кьувана-кьувана коюне кьайткъан экен.

*(Къарасувбазар районы, Копюрли койде яшагъан
Джамай кьарптан 1939 сенеси язылып алынган)*

АЛИМНИНЪ ЭЗИЕТЛЕНМЕСИ

Алим, Джелал мырза Кипчакскийнингъ япкъан хиянетлигинен тутулган. О, озюнингъ Тёбен кой якъындарындаки кьошунда Алимнингъ хаста яткъаныны эртеден анълап, полицияга билдирген. Полиция кяясы, бу хаберни алгъаны киби, озюнен берабер элли-алтмыш аскер алып, кьошуны чевре-четтен сардырган. Алим бу вакыт юкълай экен. Оны юкъу арасында апансыздан туткъан, эллерини, аякъларыны багълагъан ве арабага кьойып Къарасувга кетиргенлер.

— Алим тутулды! — деген хабер, йылдырым чабиклигинен орталыкъкьа джайрагъан. Бу хаберни, Акъмесджит полициясы — Таврида губернаторына, Таврида губернаторы да, аман падишага етиштирген.



Падиша хабарни алгъаны киби, Алимни беш юз солдат арасындан кечирип, аркъасына учъ бигъ чубукъ урулмасыны, эмир эткен.

Падишанынъ эмири, тез бир вакъыт ичинде, Къырымгъа еткен. Бу эмирни ерине кетирмек ичюн приказлар асылгъан. Алимни урмакъ ичюн, сагълам фышкъын чубукълары кетирилип азырлангъан.

Алимнинъ бойле бир агъыр вазиятке къалгъаныны анылагъан шу этрафнынъ койлери, онъа уруладжакъ бигъ чубукъны сатып алгъан ве башындаки къалпагъыны учъ кере толдуруп, селяметлик ёл парасы бергенлер.

Алимни чубукънен ураджакъта, устюндеки урбаларыны чыкъартып, бир талекенинъ устуне юзюкююн яткъызгъанлар. Онынъ эллерины ве аякъларыны яхшы этип бугъавлагъан сонъ, беш юз аскерни эки якълап тизген ве оларнынъ эллерине бирер чубукъ, туттургъанлар, Талекени, бу аскерлернинъ арасындан кечиргенде, аскер башлары оларнынъ артларында турыш, аскерлерге:

— Къуветли урунъыз! — деп, эмир эте экенлер.

Алимни урмакъ истемеген аскерлернинъ озюни, аскер башлары тобулгъы къамчыларнен ура экенлер.

Джеза пек агъыр экен. Алим, башта урулгъан чубукъларнынъ аджысына даянамагъанындан, аркъасына чубукъ урулгъан сайыш, чапалана, ынгърана экен. Лякин, онынъ душмангъа нисбетен, кескин ачув бийлеген козьлеринде, бир тамчы яш биле корюнмеген.

Алимнинъ аркъасына урулгъан эр бир чубукънынъ астындан фышкъырып чыкъгъан къара къан, талекеден ерге чыбыргъан. Ахыр сонъу, Алимнинъ башындан эси кетип, байылып къалгъан. Бунгъа бакъмадан, оны эп ургъанлар. Уруладжакъ чубукъларнынъ эписи урулып биткен сонъ, оны хастаханеге алып, аркъасынынъ къаныны джувгъанлар.

Алим хастаханеде учъ ай яткъан. Хасталыкътан тургъаны киби оны махсус яптырылгъан, демир къафеске къапап, янына дёрт аскер къойгъанлар да, оны сюрдюктен эткенлер.

Алимни алып кеткенлернинъ огъуне, ёлда ногъайлар чыкъалар. Аскерлерни ольдюргенлер, къафесни парлап, Алимни къуртаргъанлар. Арабагъа екильген огюзлерни исе, сойып ашагъанлар.

Бундан сонъ, Алим ногъайлыкъта къачакълыкъ этип, яшамагъа башлагъан. Мында, Алим айван яткъан магъазларда, тобан тюбюнде



гизленип джурьген. Алим бир даа, Къырымгъа къайтып кельген, амма артыкъ Къырымда яшамакъ мумкюн олмайджагъыны анълагъанындан, аркъадашларынынъ ярдымынен Тюркиеге къачкъан.

*(Акъмесджит районы, Битакъ коюнде яшагъан
Фатиме къартийден 1938 сенеси язылып алынды)*

КЪАРАКЪУЛАКЪ

Къаракъулакъ деген адам, Къарасувбазарда тайфалар мааллесинде яшай экен. Бу адам, Алимнен пек дост олгъан. Алим Къарасувбазар орталарында булунгъан вакъытларда, шеэрге де сыкъ-сыкъ тюше ве Къаракъулакънынъ эвинде геджелей экен. Бу адам, озю тайфалардан олып, пек яман мазаллы, сагълам, мераметли бир адам экен. Къаракъулакъ Алимге эльчилик эте, онгъа чешит тюрлю янгы хаберлер бийдире экен.

Алим Къарасувбазаргъа тюшкен сайын, бир къач фукъареге ярдым эте ве Мемипш агъанынъ къапысыны пыштавнен атып, дельме-тешик этип къайта тургъан экен.

— Эй... эй...й... къардашым, биз не билемиз? Биз даа, Алимнинъ помещиклерге къылынувынынъ, фукъарелерге япкъан ярарлыкъларынынъ бинъде бирини бильмеймиз. Алим, къыркъ керван сакъчысыны тиз чекъторген Алимдир, о! О, Алим демектен Алим олгъан. Эгер, о вакъыт Алимде 40—50 адам олгъайды, олар чокътан, помещиклерни денъызге богъар эдилер. О бир озю де, зенгинлернинъ, помещиклернинъ акъларындан кельген. Эгер, Кефеден чыкъкъан бизиргянлар, Алимнинъ Къарасувбазар, Эски Къырым дагълары бойлары джургенини эшитселер, артларына айланып къайта экенлер. Алимнинъ адыны эшиткенде, агъаларнынъ этлери-тенгълери титрей экен.

Алим фукъарелерни пек аджый экен. Бир кере, гедженинъ бир маалинде, о, Борулча беттен келип, Къарасувбазарда тайфалар яшагъан маалленинъ янындан кечип кете яткъанда, шеэрнинъ энъ кенарында олгъан яш бала сеслерини эшиткен. Гедженинъ бир вакъытында олгъан бу зий-чувнынъ себебини анъламакъ макъсадынен, Алим шу эвнинъ пенджереси туюбуне барып, бираз вакъыт дингъленип тургъан. Эвдеки балаларнынъ аш истеп, агълагъанларыны агълагъан.



Бу гедже, тышга, къаранлыкъ, ай ёкъ, кок юзюнде къара булутлар долана экенлер. Эгер, бойле бир геджеде, пенджеренъни келип къакъсалар, инсангъа не къадар титис келе тургъан! Алим бунынъ фаркъына баргъандыр. Лякин, ичериде ачлыкътан инъылеген балалар, Алимге пенджерени къакъмагъа меджбур эткенлер. О пенджерени тысырдатып, явашган:

— Эмдже, ач къапынъны, мен алла мусафиримен, сангъа айтаджакъ сёзюм бар, — дегенде, ичириден:

— Ким о, сангъа не керек? — деген, абдыравукъ сес эшитилген. Эвнинъ ичини сюкюнет къаплагъан. Атга, отъмек истеп, агълашкъан балачыкълар биле агълавларыны токътаткъанлар. Арасы бир къач дакъкъалар кечкен сонъ, тайфа яваштан пысырдап:

— Ачайыкъмы? — деген.

Алим къапынынъ ачылмасыны баягъы беклеген сонъ бир даа:

— Эмдже ач, ач! Менден чекинме, мен Алиммен, сангъа айтаджакъ шейим бар, — деген. Алимнинъ адыны эшиткен тайфа, аман къапыны ачкъан да:

— Хош кельдинъ, Алим агъа, буюр, буюр! — деген.

— Сав олунгъыз, ичериге кирип отурмайджакъман, сиз чыкъынгъыз азбаргъа, — деген. Бу тайфа азбаргъа чыкъкъаны киби Алим онъа:

— Мына эмдже, ал мынавы параларны да шимди догъру фурунджыгъа барып, ондан отъмек алып кель ве шу сабийлеринъни тойдур! Айды тез ол! Мен сен кельгендже бу ерде беклермен, — деген.

— Алла разы олсун, Алим агъа, лякин шимди фурунгъа бармам. Эписи бир, о фурунджы яткъан еринден турып, мангъа отъмек бермез, мени къувып къайтарыр. О хиянетке акъшам чокъ ялвардым, борджгъа бир фунтчыкъ отъмек бермеди. Шимди барсам, сопалап къувалар.

— Айды-айды, бар кет, тез ол! О сени къуваламаз!

Тайфа шу ерден, догъру фурунджынынъ эвине догъру джурюш эткен. Арасы чокъ кечмеден, къаранлыкъ ичинде бир къаралты пейда олгъан. Алим къаршына кельген бу къаралтыннынъ, ким олгъаныны бирден танып оламагъанындан, эвнинъ талдасына чекилген, лякин отъмек алмагъа кеткен тайфанынъ бош къайткъаныны коръгени киби, талдадан чыкъып:

— Къана, не ичюн бош къайтасынъ? — деп сорагъан.

— Алим агъа, фурунджы къувды, кет пезевенк, шимди геджелейин

отъмек олмаз! Инсангъа аман-аралыкъ бермейсингъиз! Дюньядан джюльп битмедингъиз, хынзырлар! — деп сөгди, — дегенде, Алим:

— Айды ойле олса, тюш пешиме, берабер барайыкъ, — деген.

Алим тайфанынъ огюнде дев киби адымлай, тайфа исе, онынъ артындан джотакълай экен. Фурунджынынъ эви янына баргъанлар, амма бу ерде бир городской пейда олгъаныны корьгенлер. Алим ондан асла да чекинмей. Оля, о арслан!... Арслан кьоркьармы? Онгъа сенинъ городскойнынъ не оладжакъ?! Белинде къамасы, къытычы, элинде экишер-экишер пыштавы ве аркъасында буркъасыны япынгъан, козюнъ эйилик корьсин!

О апансыздан городскойнынъ устуне атылгъан:

— Сесинъ чыкъмасын, атарман! Эгер джапынгъдан безген олсанъ, къытыр! Алиммен! Къана, смирна! Мукъайт ол, къыбырдама, къыбырдадынъ — ерге серермен! Меним мында бир дакъкъалыкъ ишим бар, шимди къайтаджакъман! — деген.

Городской буз-бузлагъан. О, ерге мыхлангъан къазыкъ киби къатып, чырайы ап-акъ кесилген. Алим шу ерден догъру фурунджынынъ къапысына барып, къапыны къакъмагъа башлагъан. Ичерицен фурунджы ачувлы-ачувлы:

— Ким о? — деп багъыргъан.

— Меним, мен!

— Сангъа бу вакъытта не керек?

— Сесимден танымайсынгъмы ёкъса, мен Алиммен! Тез ач къапынъны, ёкъса парлап кирермен, ишинъ яман олур, бейим! — деген.

Фурунджы не япсын, ачкъан. Алимге хош кельди айткъан ве төрге кечмесини риджа эткенде, Алим:

— Ёкъ, бейим, төрге башкъа сефер кельгенде кечермен! Сен шимди джевап бер! Сен бу факъырнынъ балаларынынъ ач экенлерини биле турып, не ичюн онгъа къылынасынъ? Не ичюн сен онгъа отъмек бермединъ? Арам! Неге хынзырланасынъ? Бар бир чувал ал да кель, тез ол! Ичине отъмек толдур. Шимди оны сөгип къайтаргъанынъ ичюн, меним козюм огюнде онгъа 100 кумюш береджексингъ! Къана чыкъар!

Алимнинъ эмирлерини алгъан фурунджы, маймун киби чевириле ве эр эмирини шу дакъкъасы ерине кетире. Фурунджы параларны сайып берген сонъ, Алим:

— Шимдилик савлыкънен къалып тур! Мен сангъа мусафирликке



даа да келе билирмен, мукъайт ол! Эгер бу къарткъа яман сѣз айтсанъ, башсыз къаладжагъыңны билъ! — деп, къапыдан чыкъкъан. Алим сокъакъта, онынъ чыкъмасыны, беклеп тургъан городскойнынъ янына баргъан да:

— Сен меним дегенимни туткъанынъ ичюн, мен сени азат этемен. Бу гедже корьген шейингъни кимсеге айтма! Айды, тез ол джоюл, къоркъакъ тавшан! — деген.

Алим шу ерден тайфанынъ эви алдына келип, атына минген де, догъру Къаракъулакънынъ эвине баргъан. Бу сефер Алимге Къаракъулакъ, о вакъытлары Къарасувбазарда яшагъан Зумбиловнынъ «Мен Алимни корьсем, бакъып турмам, атарман!» дегенини айткъан. Алим бираз куломсиреп:

— Зарар ёкъ, невбет онъа да келир. Энди саба якъын олса керек, мен бир чырым алайым. Танъда мени уянтырсынъ, — деп эр заман озюнинъ ята тургъан одасына кирген. Къаракъулакъ да яткъан.

Танъда Къаракъулакъ оны уянткъаны киби, Алим пенджереге бакъаракъ:

— Бираз чокъча юкълагъаным амма, зарары ёкъ. Мен кене ишиме вакътында башлар ве етиштире билирим, — деген.

Алим еринден турып кийингенге къадар, Къаракъулакънынъ къадыны энди онъа къара къаве пиширип азырлагъан. О къавесини ичип тышкъа чыкъкъанда, Къаракъулакъ Алимнинъ Тозла-Тору атыны эгерлей экен.

Даа саба ачылмай, лякин кунъдогъушны эр заман Тозла-Торунынъ сыртындан сейир эте экен. Асыл, узакътан къызарып аткъан танъ, онынъ гонгълоне буюк бир тесир эте экен. Алим бу ерден Тозла-Торунынъ сыртына минип, Къаракъулакъкъа:

— Айды сагълыкънен къал, къардаш, корь, танъ къызарып башлады! Манъа иш башында булунмакъ керек. Мен Зумбиловгъа кетемен. Бакъайым, мени насыл атар экен. Саба эшитирсинъ! — деп бир даа куломсиреген.

Арасы чокъ кечмеден, Алим Зумбиловнынъ Бульбуль багъчасынынъ ичине кирген. Андан эки къалын чатал алып, янгы къурумагъа башлагъан пиченлерни бурып-бурып, чаталгъа къаршы багълагъан да озюне мердивен тарзында бир шей ясагъан. Алим энди Зумбиловнынъ яшагъан сарайына барып, озю ясагъан мердивенни диваргъа къаршы таягъан ве яваш-яваш мердивенден юкъары тырмашып пенджереге

чыккыан. О пенджерен, Зумбиловнын сабалык къара къаве ичип турганыны корьген ве аман пенджеренин джамларына бир тепме ургъан. Ургъан амма, Зумбилов элиндеки къаве фильджанын тюшип кеткенини дуймай кългъан. О артына айланып, не олгъаныны къарайджакъ вакъытта, тепесинде тургъан дагъ къарталы — Алимни корьген.

Алим:

— Селям, Зумбилов бейим, сабалар хайыр! Меним сенинънен корюшмеге пек авеслигим къозып, кельдим. Къана, сен мени атаджакъ экенсинъ, айды ат! Мына, мен Алиммен!..

— Ёкъ, ёкъ, хайыр, мен шай демедим, Алим агъа!..

— Ойле олса, чыкъар мени атаджакъ пыштавынны!

— Мына ал... ал!

— Демек, толдурып азырладынъ, яхшы!.. Айды тез ол, алланъа дуа эт, санъа джезннемден бир ер азырласын! — деп, пыштавыннъ тапанджасыны ачкъан. Зумбилов ялварып, Алимнинъ аягына йыккылыпган.

— Тез тур, арам оледжек! Чыкъар зенгинликлеринъни! Магъа мында кельгеним ичюн, шимди юз алтын сай, чокъ беклемеге вакътым ёкъ! Айды, тез ол! — деген.

Алим Зумбиловдан истеген шейлерини алгъан сонъ, бир даа Къаракъулакънынъ эвине кълтып кельген. Оларны Къаракъулакъкъа берип, Къарасувда яшагъан тайфаларнынъ энъ фукъарелерине дагъытылмасыны эмир эткен.

*(Къарасувбазарлы, Шаматов Меджит
аркъадаштан 1939 сенеси язылып алынды)*

МУНДЕРИДЖЕ

Тертип этиджиден.....	3
-----------------------	---

ДЕСТАНЛАР

Эдиге.....	4
Эдиге бий (вариант).....	27
Чорабатыр.....	70
Къопланды батыр.....	87
Кёр огълу.....	89
Къозукюрпеч.....	101
Таирнен Зоре.....	108
Нар къамыш.....	118
Ашыкъ Гъарип.....	125

ХАЛКЪ ЙЫРЛАРЫ

Агълама, келин.....	132
Гульсюм къыз.....	133
Дегирменджи.....	134
Баарь.....	136
Гидинь, булутлар.....	136
Яр-яр.....	137
Къаршылав йыры.....	138
Наврез.....	138
Ешиль япракъ арасында.....	139
Атадан оксюз къалдым.....	140
Бегим къарт (йыр-оюн).....	140
«Диредиль-диредиль къавалым...».....	141
Чобан ве къыз.....	141
Меним улум батыр.....	142
«Айя» десем ярашыр.....	143
Чубукъчы.....	143
Сыра, сыра къазанлар.....	143
Шу къаршыда акъ байырда.....	144
Порт-Артур.....	145
Шомпол.....	146
Таракъташлы Сейдаметнинь йыры.....	147
Йыр I.....	147
Йыр II.....	148
Зампара мазин.....	148
Умер оджа.....	149
Саба олса.....	150

ХАЛКЪ МАСАЛЛАРЫ

Зампара къады.....	151
Аждерха йылан.....	155
Джанлы озен.....	163
Джигерджи къарт.....	164
Ахмакъ къашкъыр.....	168
Бекир Мустафа.....	170



ЭФСАНЕЛЕР

Арзы кыыз.....	174
Аюв дагы.....	179
Алтын бешик.....	183
Айдамаклар кыбасы (<i>Кызыл-Таш эфсанеси</i>).....	192

ЛЯТИФЕЛЕР

<i>Насреддин оджа акъкында</i>	
Мен де оны тюшюнем.....	195
Мен базарда олмай дедим.....	195
Алла кыismet этсе.....	196
Насреддин оджа ве падиша.....	196
Бостан хырсызы.....	197
Къавгъа ёргъан устюнде.....	198
Папучлар.....	198
Саат сата.....	199
Балта.....	199

<i>Ахмет ахай акъкында</i>	
Тюписиз чапчакъ.....	200
Къаргъа ве Ахмет ахай.....	201
Ошатам, амма айтмам.....	202
Тилькининъ кыуругъы.....	202
Уч насиат.....	203
Сонъуны сорама.....	204
Ахмет ахай оразаны чаналата.....	204
Къачакъ.....	205
Оджакъ шакъасы.....	206
Эки явлукъ топракъ.....	206
Муджизе.....	207

АТАЛАР СЁЗЛЕРИ ВЕ АЙТЫМЛАР.....209

БАЛАЛАР ФОЛЬКЛОРЫНДАН НУМЮНЕЛЕР

Сайылар.....	219
Эриштирювлер.....	222
Тезайтувлар.....	223
Тапмаджалар.....	226

ЧЫНЪ ВЕ МАНЕЛЕР

Чынъ акъкында чынълар.....	232
Джыйынларда, тойларда чынъланып келинген умумий чынълар.....	233
Яшкен кызынынъ къашы-къаршыгъа келип айткъан чынълары.....	235
«Ал къадифе джибердим, хиермисинъ?..».....	139
Эски девир чынъларындан.....	240
Тапмаджалы чынълар.....	241
Ногъай бейитлери.....	242
<i>Манелер</i>	244

АЛИМ АКЪКЪЫНДА РИВАЕТЛЕР

Каравуллар мейданында.....	247
Алимнинъ къапатылмасы.....	251
Къулакъсыз Алим.....	253
Алимнинъ эзиеденмеси.....	255
Къаракъулакъ.....	257



Літературно-художнє видання
Кримськотатарська усна народна творчість
Хрестоматія

2-е видання, виправлене

Укладач Бекіров Джафер

Директор І.Б. Чегертма
Редактор Г.М. Дудакова
Тех. редактор М.Дж. Курбідінова
Худ. редактор З.Ш. Акімова
Коректор Е.А. Ібрагімова
Оператор Ф.Р. Майлісєва

Підписано до друку 09.06.2008 р. Формат 60х84¹/₁₆. Папір офсетний.
Гарнітура "SchoolBook". Умовн. друк. арк. 15,34. Обл.-вид. арк. 8,5.
Об'єм 16,5 друк. арк. Тираж 600 прим. Зам. № 230.



КРП «Видавництво «Кримнавчпеддержвидав»
95000, м. Сімферополь, вул. Горького, 5.
*Свідоцтво про внесення до Державного реєстру суб'єкта видавничої
справи ДК №508 від 26.06.2001 р.*

Діапозитивна плівка виведена з оригінал-макета,
представленого ТОВ «Нікатайм».
Надруковано у ТОВ «Видавництво «Вперед».
95006, м. Сімферополь, вул. К. Маркса, 80.

КЫРЫМТАТАР
ХАЛКЪ АЗЪЫЗ
ЯРАТЪДЖЫЛЫГЪЫ

ХРЕСТОМАТИЯ